

EL. ZEJLERJA
ZHROMADŽENE SPISY.

A. 887. 3.

22 XI F. Z-1-11

BUCHBINDEREI
HÜBELDENCK
LEIPZIG

HANDRIJA ZEJLERJA
ZHROMADŽENE SPISY.

ŠTWÓRTY ZWJAZK.



HANDLUNG

CHRISTIAN

VERLAG



M. S. 1. 8^o
21-4



HANDRIJA ZEJLERJA
//
ZHROMADŽENE SPISY.

ZRJADOWAŁ A WUDAŁ


DR. ERNST MUKA.

Z NAKŁADOM

SERBSKEJE STUDOWACEJE MŁODOSĆE.

ŠTWÓRTY ZWJAZK.

BAJKI, SPĚWY. PŘEŁOŽKI.



BUDYŠIN.

Ćišć Smolerjec knihićišćeŕnje.

1891.



1/8^o 21/4



HANDRIJA ZELJERJA

ZHROMADNEZE SPISY.

BRUNNEN & WIDMANN

DR. ERNST MURHARDT

2. THEIL

ZERBISCHER STUDENGENGENOSSENSCHAFT

STADT BRESLAU

BAUKI SPISY. TROJICKI



BRESLAU

Das Smolezer Kinderspital

1891

Wobsah.

	Strona
I. Bajki we wjazanej rěči	1—152
II. Nabožne spěwy	153—261
III. Składnostne spěwy	262—312
IV. Přeložki we wjazanej rěči	313—385
V. Hróńčka (Kruški a tružki)	387—399
VI. Bajki w njewjazanej rěči	401—428
VII. Žiwjenje a skutki H Zejlerja	431—459
VIII. Rozprawa wo wudaću	460—468
IX. Pokazowař jednotliwych basnjow	469—479

Předslowo.

Zo je tutón štwórty zwjazk zhromadženych spisow Handrija Zejlerja wo nimale počejcu sylniši hač kóždy přních třoch zwjazkow, leži we tym, zo serbska studowaca młodosc jako nakładnica dla njedostatka srědkow wobzamkny, zo ma so cyły wudawk z tutym zwjazkom skónčić. Zložuju so po jeje wobzamknjenju dyrbyeše redaktor hladać, zo by wšo někak wažne a zdžerženja hódne hišće do štwórteho zwjazka zwjedł, a to je so jemu tež na to wašnje radžilo, zo so wot str. 264 wšo z mjeńšimi pismikami staješe a zo bu wot wjacorych recensijow jenož najlěpša wočišćana. Hewak su so wot Zejlerjowych wudžělkow we wjazanej řeči jenož někotre zlamki a njedodžělane spěwy w stronu wostajile, štož budžeše so snadź bjez škody a po mysli basnika tež w přních třoch zwjazkach stać móhlo. Ale wot wudžělkow w njewjazanej řeči smy tu jenož bajki sobu podali, wšo druhe, jako jeho listy, wótčinske rozpominanja w Tydź. Nowinach, čišćane přédowanja a druhe pěše nastawki jako do krasneho pismowstwa njeslušace z cyła njeprjajwši. Štožkuli pak mějachmy ze wšeho tu wuwostajeneho a druhdze hišće njewozjewjeneho za zdžerženja hódne, kaž wosebje basnikowe listy, smy w Łužicy, lětn. 1889—91 zwočišćeli.

Z teje samsneje přičiny njemóžachmy, kaž bě z wopředka wotmyslene, wobšěrnny žiwjenjopis basnika a nadrobnu rozprawu wo tymle wudawku tu přidać, ale dyrbjachmy woboje po móžnosći krótke spisać, tola pak smy so prócowali, wšě wažne momenty zebrać a podać. Wuwostajili smy skónčnje tež dwaj přnjotnej hłosaj basnika: 1) k rańšemu kěrlušej str. 169, kiž steji w zběrey „Krótke kěrlušy za šule“ 1842, str. 21 a 2) k wječornemu spěwej (zwj. III str. 125), kotryž dotal wot nikoho dostać njemóžachmy.

Ze zřadowanjom a woznamjenkami njejsmy wot puća w přních třoch zwjazkach wobkedžbowaneho wotstupili. Hrončka w V. wotdžěle su alfabetiscy zřadowane; alfabetiski pokazowař bajkow w njewjazanej řeči pak mějachmy za njetřebny.

Redaktor.

Bajki

we wjazanej řeči.

Motto:

Do basnje (bajki) wěrnosć zadržasćich,
Kiž ze žiwjenja nazhonich.
Tež k česći luda serbskeho
Wzach druhdy jeho přisłowo —
Chce sej štó z teho wučbu wzać,
Tón njebudže so nihdy kać!

(Ze zběrki „Serbske basnje“ 1855.)

Předspomnjenje.

H. Zejlerjowe bajki tu zhromadnje (120 čislow) wudate su z wjetša přenjatne wutwory basnikoweje myslnosće, jenož w někotrych je maćizna wot druhich pak staroklassiskich pak nowišich bajkarjow přijata, ale wot našeho basnika tak swobodnje na serbske wobstejnosće přenjesena a samownje zložena, zo móža so tež tute derje sobu do přenjatnych ličić.

Wjetši džěl tutych bajkow bu w „Časopisu Maćicy Serbskeje“ (lětn. 1848—62) wozjewjeny, něšto tež w „Tydžeńskich Nowinach“ (lětn. 1842—49). Z Časopisa M. S. přija Hórnik sydomnaće najrjeńšich do swojeje „Čitanki“ (Budyšin 1863) str. 56 sll. a Kućank woćišća hromadku w „Jutrničcy“ (lětn. 1848—50) za swojich čitarjow w katolskim prawopisu. Za serbski lud powšitkownje wubra H. Zejler sam zběrku z Časopisa M. S. a wuda ju w ewangeliskim prawopisu jako Maćičnych spisow č. 26 pod napisom: Serbske basnje, swojemu wulcy lubemu ludej podate k wužitkej a k zabawjenju wot H. Z. W Budyšinje 1855. Tuta zběrka, w „Serbskich Nowinach“ 1855, str. 268 sll. wobšěrnje připowjedžena, wobsahuje 60 bajkow z metriskim předśłowom (hl. motto). W našim wudawku smy je my na to wašnje woznamjenili, zo zady napisma do spinkow ličbnik tejele zběrki stajichmy. Wšě bajki, kiž nimaju ani zady ani spody napisma přispomnjenja, su tu přeni króć z basnikowych zawostatych rukopisow wozjewjene. Jich je radna ličba.

Nimo „Počasow“ su tute bajki najlěpše, najdokonjanije a serbskemu ludu najspodobniše wupłody Zejlerjoweho basnistwa.

Redaktor.



Zawod.

Wěrnosć něhdy khodžo po swěće
Nanajkrasnišo so blyšćeše;
Jejny napohlad bě krasniši,
Hač wšech hwězdow blyšč tam na njebju;
Štóž ju zetka, woči zandželi:
Tak jej' pruhi mócnje kaľachu.

Wěrnosć nad tym jara zrudži so,
Při tym zetka muža stareho;
Temu zrudźbu swoju skoržeše,
Šědziwc pak k nej takle rěčeše:

„O ty jasna njebja kralowa,
Tebje wšak swět wěsće lubo ma;
Twoju jasnosć pak wón njeznjese,
Duž so wobleč drasty — hinaše!“

„„Wotkal wozmu?““ wěrnosć praša so
Po wšej stwórbje wóčko wobročo.

„Njeh my služimy!“ ju prošachu
Štomy, trawy, kwětki lubje wšě,
A tež zwěrjata k nej přiňnachu,
Kóžde něšto rad ji dawać wě.

(1845.)





1. Škleńcow prawowanje.

e škleńčeŕni so něhdy dachu
Do řeče škleńcy wšelake
A službu swoju mjenowachu,
Na kotruž žana počehnje.
A klinčo ščerčo kóždzička
Swój wužitk a česć powjeda.

Najbóle pak so wupjeraše
Tam swójba škleńcow winowych;
Wo hosćinach řeč znošowaše
A lutyh knježich wosebnych.
Wšě poskoča a zaklinča,
Swój rjany přichod wopomnja.

„My mamy nadźiju 'šće rjeńšu!“
Rój paleńcaŕkow zawoła.
„Ha, mamy zaslužbu snadź mjeńšu
Wo wokřewjenje čłowjestwa?!
Haj, nas w wšěch khěžach lubuja!“
Tak wone sylnje zaščerča.

Duž wrěšćeć poča něšto z kuta:
 „Hdže chceće bjez nas towarški?
 O, waša krasnosć njej' tak kruta,
 Zo njebyšće nas trjebali*.
 Naš puć so k wašom' přizamknje:
 My smy te škleńcy lékařske.“

(Wokoło 1842.)

* Po holanskej narěči za: trjebałe.



2. Mucha a wólša.

Na rěcy muška zejhravje
 A žiwjenja so zraduje;
 To šelma wětřik wuhlada
 A syći: Čakaj prózdnica!
 Wón z poľnej hubu zaduny
 A muška padže do žołmy.

Duž wboha tyšnje zynčeše:
 „Ach ruče, ruče pomhajće!“
 A muški, bručki, mjetele
 Tam pře nju žaloscěchu wšě
 A džachu w swojej mudrosći:
 Štó čołmik nětko natwari?

„O blazni!“ wólša susodna
 Na brjozy stejo zawoła:
 „Štóž pomhać njewě na měsći,
 Tón pomocy čas skomudži!“

A lisčićko na kiješku
Tej mušcy pušći na wodu.

* * *

Kaž w rěcy kiješk, lisčićko
Je mušku smjerći wutorhło,
Tak małko husto trjeba je,
Zo hubjeny so wumóže;
We prawym času pokrutka
Je cyłe pječwo winojta.

(Wokoło 1842.)



3. Nahladna mucha.

(Tydź. Now. 1844, 199.)

Mam wulki dźiw chcu powjedać,
Zo budžeće so spodziwać;
To bě čas wulki, běše zlé
Tehd', jako mucha wjelka zjě.

Haj, mucha něhdy wjelka zjě,
A dokelž jara poľna bě,
Duž kožu zaso wupluny.
Njej' tole podawk puzorny?

Ta mucha zleći na ha'zu,
Nic toľšu, jako kłonicu;
Wětr poča ha'zu kolebać
A mucha so tak zradować:

„Tu widziš swěće zacpjaty,
Kak ćežka sym na hałozy!
Tu wo to njeje, što ja sym —
Ně, ale wo to, što ja jěm.“

Swět blazny tu wěc wobmysli
A wot tehdy so nałožī,
Zo hlada, što što ma a jě,
Nic na to, što wón je a wě. (1844.)



4. Mucha a placawa.

(Tydź. Now. 1845, 121.)

Na placawu so sydže mucha wobžerna
A po njej běhajo ju hroznje hanješe:
Phi, phi, ty stara koža, naša mordařka!
A wobnjerjedži ju a so ji směješe.

„Što złoby pěniš, njedušna sam'pašnica?“
Duž rjekny placawa so ćežcy hněwajo —
„Njewěš, kak wot was tysacy sym zabiła?
A ty mi runje tež sy zrała, złodźijo!“

„Kak směsne je, haj blazne twoje hroženje“,
Ta mucha křidła trějo zacpnje wotmołwi —
„Ty sama nječiniš próšk hrozy, bojosće,
Hdyž kedźbliwa će čłowśka ruka njedžerži!“

* * *

*

Tak puta, jastwa, šibjeńcy,
 Wšě wustawki a zakonje
 Su směch a pohóršk we kraju,
 Hdyž wyšnosć wusnje na mječu. (1845.)



5. Škowrončk, wróna a sroka. [1.]

Njehań to, štož njemóžeš;
 Přez to k česći njepřindžeš!

Spěwał w módrej wysokosći
 Škowrončk fifolo,
 Spěwał w nowej wjeselosći
 Sej na nalěčo.

Mjerzajo duž džeše wróna
 K srocy na polu:
 „Dušu! tón slěpc chce być króna.
 W cyłym stworjenju.“

„Daj sej pokoj“, sroka praji,
 „Što je na hercu?
 Njeh so z didlowanjom daji,
 Z tajkej robotu.

Njeh so jeno z namaj měri
 Kipra šipleńka,
 Móc! haj móc wšo wjerći, ćeri,
 Nic kusk spěwańčka.“

* * *

*

Hruba zawisć pyta swary,*
 Hanić lěpšeho,
 Plujo jěd na wyšše dary,
 Pjasće khwali so. (1845.)

* Časopis M. S. 1848, 27: Zawistny wě nam'kać swary.



6. Spokojna myš.

Myš pólna zmjerzła zmoknjena
 Puć do wsy něhdy namaka
 A wubra, kaž so samo wě,
 Sej přenje lěpše twarjenje.

Tón hród, kiž myška nastupi
 A wuzwoli sej k hospodźi,
 To prózdna ćicha cyrkej bě,
 A we njej hišće myši dvě.

Tej wobydleńcy cyrkwinej
 Hač najrjeńšo ju witaštej,
 A džěše jimaj k wutrobje,
 Zo njej' hač rjemješk we domje.

Tón přewlečeštej na měsće
 A nuzowaštej naležnje:
 „Jěz, luba, a wzmi za lubo,
 To je naj' cyłe bohatstwo.“

„„O““, džeše cuza, „„, mějtej džak;
 Ja spokojom běch hižo tak,
 Zo sedžu w suchim kućiku
 A nam'kam třechu hospodnu.

Ach, kajka je to dobrota,
 Ta kólnja, waju hospoda,
 Tu chcu so w měrje zwohrěwać
 A ničo lěpše nježadać.““

* * *

Tu, njespokojny bohačko,
 Na khudych ludži dopomń so;
 Khlěb, sól a třecha hospodna:
 To hižo su jim njebjesa.

(wokoło 1845.)

— * —

7. Wulka hara a mały kwas.

„Hohej! bratřa hólcy, juskajće!“
 Sanc wrobel něhdy wołaše,
 „Hlaj, slónco wyše zaswěći
 Na křidleško a pazorki;
 A njejeba mje protyka,
 Je jutře Pětra Pawoła.

Hohej! to je naš krasny dzeń,
 Hdžež kóždy sanc je nawožen
 A kóžda sančka njewjesta,
 Je holca abo wudowa,
 Tež wudowc kóždy ženi so
 A slub a kwas je na dobo.

Štóz pak ma hišće wutrobu
 Pod křidłom strowu, čućiwu,
 Štóz njecha wostać nježenjenc:
 Tón sukničku rjedź sebi džens,
 Tón překusaj sej kedźbliwje,
 Kak by što řečał přistojnje.

A štóz so jutře jednoći,
 Džens hišće přelič sadžaki,
 Zo wě, hač móže dosahać,
 A njetrjebał so hańbować;
 Štóz kuchinsku česć lubo ma,
 So džens tež pońje wobstara.“

A jako ranje zaswita
 Na swjatoh' Pětra Pawoła,
 O, to bě hara, lětanje
 A kusanje a wusmjecé,
 Zo nihdže wiki konjace
 Nic njejsu takle njeměrne.

(Wokoło 1845.)

— * —

8. Liška a myše. [2.]

Brón njepřecěla nej' tak zła,
 Kaž husto jeho dobrota.

Myšy, tapy liška běžeše,
 Lónčko pšenčnych kłosow njeseše,
 A štož prjedy bě sej žadała:
 Myšku w polu je tež zetkała.

Myška w połnym straše mjenješe,
Zo z jej' žiwjeńčkom so stało je.

„Što so bojiš, hlupy njerjedže“,
Liška přečelnje k njej' rěčeše,
„Hladaj, pohlej, što ja nětko jěm;
A duž powěz twojim sotram wšěm,
Zo nětk pšeńca moje jědło je
A mój njeměr z wami přestanje.

K wopokazmu měra, lubosće
Položu te kłosy tudy wšě.
Troštna budź a syta najěz so,
Přiwjedź sem tež twoje přečelstwo:
Za was, cyłu čestnu myšinu,
Tutón wulki wopor přinjesu.“

Myški, požadliwe za pšeńcu,
Połne wěry lušćić hanjachu;
Kóždu pak, kiž sama přiceže,
Liška hnydom lapnyła tam je,
Tak zo žana smjerće towařski
Hač do poslednjeje njezhoni.

* * *

Lóžka wěra, dary, womlódnosć —
Slepja čłowjekow tež husto dosć,
A kaž mudry přeco kóždy je,
Něchtó jeho někak popadnje.
Duž měj kedźbu stare přisłowo:
Kóždy ma tu swoje kosydło.

(28. 12. 1846.)

— * —

9. Sroka a sołobik. [3.]

Štož njedočink za nuzne ma,
To dobremu je haniba!

X sołobikej sroka pisana
Takle rěčo něhdy přiskaka:
„Bratře, mjez wšitkimi ptačkami
Je twój spěw a hlós najrjeniši;
Ale kóždy pak tež póznaje,
Zo sy ptačatko najhlupiše.

Takle dowěrnny a wćipny sy,
Nimaš kedźbu falšne poklěty,
Skočiš takle z lohka do smjerće,
Njeje žel cí twoje žiwjenje?
Nawukń mudrje hladać so, kaž ja —
Khrobło přinjese do njezboža.“

„Ja so smjerće bojeć, strachować?“
Džeše sołojk, „teho chcu so wzdać!
Tajka bojosć by česć raniła,
Bych so tebi runał, škódnica;
Přetož wo žiwjenje njewušne
Šelma přec' najbóle třepoce!“

(4. | 9. 1847.)



10. Mucha a bruk. [4.]

Wěčnje čwileŕski pŕah éaha,
Kohož njepopŕeće žaha!

Stwina mucha naleći
Něhdy bruka w zahrodži,
Poča wołać: „Hańbuj so,
Njenasytny zežranco!

Lisće štomam wurubiš,
Khošćišćam je spodobniš,
Chceš-li tak wšo spóžerać,
Praj, štó móhl ée lubować?“

Trašnje rohi nastaji
Bruk a křídla šepjeri,
Hněwny muchi praša so:
„A što ty maš za jědło?“

Aj, ty bita honjena
Z khěžow, ze šklě, z hornyka,
Praj, štó tebje lubuje
A na kermuš prosy ée?“

* * *

Paduši a njewušni
Leža radži we zwadži,
Jedyn pŕec' na druhoho
Z njepopŕećom hórši so.

(8. | 9. 1847.)



II. Čmjela mjez pčočkami. [5.]

Čmjela hlód bě žiwila,
 Duž ji přińdže myslička,
 K bohatšim so pčočkam dać,
 Po nich tež so zwašnjować;
 Přetož pola zwěriny tež nuza
 Wšelke spyta a so wšelko huza.

Čmjela džělać počina
 Přemo pčočkow horliwa.
 Pčočki nowu towaršku
 Spodźiwajo khwalachu;
 Cuze bě jim z němskeho najskerje:
 Nowe khošćišća te mjetu derje.

Měsac lědma woteńdže,
 Čmjela z kolča wuceže,
 Slódke pčočkow kubleško
 Droha kup ji zezda so.
 „Z tajkej drějeńcu mi dźiće“ — trubi,
 „Radšo khuda — mi so lěpje lubi.“

* * *

Wjele ludži w znamjenju
 Lěnej' čmjely wopišu,
 Kotrychž nuza, khudoba
 Jenož honi do džěla,
 Ale sprócný khlěb a wudźerženje
 Njej' jich wěc a wěrne wotmyslenje.

(18. | 9. 1847.)

— * —

12. Wjewjerca, sknadź a mały kralik. [6.]

Sknadźej z hnězda něhdy džěcata
Mordańska we haju wjewjerca
Rubješe a kóncowaše.

„Ach, te wbohe džěci naše!“
Sknadź a jeho žona plakaštaj —
„Što smój, wjewjerca, či činilaj?”

Khójna, dub a šmrěk a worješ'na,
Buk a jědla či dosć nadawa
Swojich plodow, sy-li hlódna,
A hlaj, twoja khlama škódna
Zadaja naj' džěci bjez winy.
Pře čo tajki njeskutk žadlawy?“

„„Na te blady!““ džeše wjewjerca,
„„Kajke prašenje wo »čehodla?“
Tamle mały kralik lěta,
Njeh tón praji prawo swěta!““
Mały kralik z keččka swarješe,
Zo wšak wšudže móc přez prawo dže!

(7. | 11. 1847.)



13. Młoda a stara kóčka. [7.]

Njebudź wobužny na swar,
Často je wón Boži dar!

Praj wšak, luba, złota maćeřka,
Što sy husto takle wobužna?

Druhdy dobra basničku mi baješ,
 Ze mnu skačeš, rada ze mnu hraješ,
 Druhdy zaso na mnje swariš, syčiš,
 Placnješ mje a wótre słowo rěčiš!?"
 Takle micka młoduška
 Swoju staru prašala.

Stara mica, myši šolćina,
 Džeše k młodej: „„Njebudź blaznica,
 Džesać lět žno khodžu w tutym dwori,
 Widžu, zo so česć a kubło spori,
 A do kotrehož tež kuta kuknu,
 Wšudžom za mnje tež tu wěrnosć wuknu:
 Hdžež so nihdy njeswari,
 Tam so k zbožu njehnoji.““

(10. | 11. 1847.)



14. Kokoš a psyk. [8.]

Po zdaću a po wěrnosći
 Maš swět tu jara wšelaki!

Kokoš khodžeše po hasy
 Horje, dele tam a zasy,
 Wjele pychi wuhlada.
 Dokelž běše njedžela,
 Słyši słowow tysacy
 Powjedanych mudrowscy.

„Kajka mudrosć!“ kokoš praji
 K psyčkej, kiž so při njej staji,

„Kajka rjanosć bohata
Debi tola čłowjeka!“
Pos pak lěpje zhonjeny
Jejnu rěč tak porazy:

„„Moja luba ćeta putka —
Wjele rěči, mało skutka,
Kornař zloty, slěborny,
Zaki prózdne — »winojty«,
To so rade na swěći —
Móžeš wěrić, — towařši.““

(10. | 11. 1847.)



15. Rozkorjene hołbje.

(Časopis M. S. 1848, 33.)

„**K**nježe kralo, što ty prajiš?“
Rjekny škraholc k worjolej,
„Kajku wukaznju ty stajiš
Abo koho k sudnikej?
Domske hołbje z lěsnymi
Su so tolsće zwadžili*.

Domjace te hołbje chcedža
Z mocu lěsne přestworić;
Dokelž lěsne mjenje wjedža,
Dyrbi jich wěc za psy hić,
Mjeno, rěč a pismowstwo,
Wšitko ze wšěm na dobo.

* Po holanskej narěči za: zwadžile.

»Štož my njejsmy«, lěsne praja,
 »To pak hišće budžemy«;
 Swoju hłowu na to staja,
 Zlětuja so do črjódy,
 Žadyn njecha nochować,
 Mi je strach, što ma so stać.

Bjezkholowcy, kholowače
 Wótřa brónje w kukawach.
 Kajke škody, kajke plače
 Budžeja* to po pukach!
 Lěsarjo lud khrobly su,
 Podarmo tež njerubnu.

Knježe kralo, to ja praju,
 Lěsne njech so poddadža,
 Lud budź jedyn! ja džě znaju,
 Domske nuzy nječěrpa;
 Čiń tak z mocu jednotu,
 Wšak lud jenoh' pjerja su.“

„„Makhjawello! to je k škodži““,
 Na to worjoł wotmołwi,
 „„Jena pica drje so hodži,
 Nic tak z wašnjom, z rěčemi;
 Kóždy swoje wobkhowaj,
 Druhemu pak pokoj daj!

* Po holanskej narěči za: budu.

Jene w drjewinje na štomach
 Njeh, kaž móža, zakurča,
 Druhe njeh po třěchach, domach
 Stonaju a bubnuja,
 Brón a hněw njeh wotloža:
 To je moja přikaznja!““

(11. | 11. 1847.)



16. Lišcyna pomoc. [9.]

Wjelk w lěsu w jamje sedžeše
 A na njezbože plaka;
 Duž liška hnydom přiběhnje
 A po kromje tam skaka.

„O wjelko, kajke protyki
 Tu delkach zrudnje džělaš?
 Hlaj, éichi lěs wšón zabrinči,
 Tak z cyłym hłosom spěwaš!

Skoč, wujo, skakaj móčnišo!
 Ja chcu éi ha'zu podać, —
 Čiń, — prjedy hač ée wošćěrjo
 Tu zatřěli tón brodač!

„„Proš““, džěše wjelk, „„proš hajnika,
 Praj dobre słowo za mnje, —
 Ach luba, złota, bože dla!
 Ty njejsy tola na mnje?““

„Ně, wjelko“, liška wurazy,
 „Će byla wěčna škoda;
 Tak młody, rjany, nadobny
 Hajńk, dušu! tež ěi woda.

Ja prošu, modlu, klaknu so,
 Kaž bratra hajńka znaju, —
 Haj, swoju kožu zawěrnno
 Za twoju kožu staju!“

Duž tyšny wjelk so spokoji
 A lišcy žeńtwu lubi;
 A mjez tym hola zaklinči,
 Hajńk dže a na rózku trubi.

So liška ruče wohladnje,
 Wjelk so k njej troštny směje,
 „O lubši wjelko! što to je?
 Mi wutroba so škrěje!

Tón hajńk, ach to tón prawy njej',
 Ja njeznaju próšk jeho —
 O to je jěra solotej!
 Ja njestupju před njeho.

Swój testament piš, hlupjenče!
 Piš, wjelko!“ liška rjekny,
 A smějo mydło wjezeše,
 A z ěilej kožu ěekny.

* * *

Z tym šelma wbohich troštuje,
 Zo wěstu pomoc lubi;
 Ze směchom pak, hdyž nuza dže,
 Kaž slaby płať so zhubi. (13. 11. 1847.)

— * —

17. Pčolkow skóržba a khostanje. [10.]

Popřeńka ta z danju bjerje,
 Zawisć pak so sama žerje!

Bóh, jako zemju stworił bě
 A wšitke jeje rjanosće
 A stworjenja a stworjeńčka, —
 Duž z njebja dele pohlada,
 Kak běhajo a lětajo
 So z wjeselošću žiwi wšo.

A we tym, zo tak hladaše
 Na stworjeńčka te dželařske,
 Duž pčolkow žalosć wuslyši:
 Zo čaka je kij prošeřski,
 Hdyž čmjelam džećel čerwjeny
 Je sobu k pastwje podaty.

Bóh hnydom k pčolkam pohlada,
 Kak so z tej skóržbnej wěcu ma,
 A hramowanje lichownske
 A njepopřeće widžeše;
 Duž hněwny hłojčki džećela
 Za pokutu jim zezamka.

* * *

Dosć zamóžitych na swěće
 Tak skiwli njenasytniwje;
 Ći mēnja, zo b'dža prošerjo,
 Hdyž sami zhrabać njem'ža wšo,
 Hač zhubja abo njekrydnu,
 Štož njepopřeja bližšemu. (1. | 2. 1848.)



18. Zapowědženy pohrjeb.

(Tydž. Now. 1849, 261.)

Psy něhdy z wulkej zrudobu
 Na koči keřchow jědžechu;
 Tam khować cheychu pudlika,
 Najdušnišeho kumpana.
 Duž nasta zběžk mjez kóčkami*
 A jena mjawčo postupi:

„Tón njebohi drje hódny je,
 Zo jeho k nam tu hrjebjeće:
 Wón woči poľnej zawisce
 Njej' měl, kaž kóžda wot nas wě.
 Tež rozdžělenja žiwjeńske
 Mać zemja a row njeznaje.

Wón bě pak pos a připódla
 Bjez wěry kočoh' wuznaća,
 Duž přeč z nim, što wón tudy chce,
 Nam kóčkam zda so njezdobne,

* 1. recens.: Duž koči lud so roznjemdri.

Zo psyča pjeršč jow po smjerći
So k našej kočej towařši. —“

* * *

Skót ludžom njechce přirunać
Ta baseń, ale pokazać,
Kak do skotu tež zajědze,
Štož činja džěći čłowjeske,
Kiž druhdy z dźiwnej namyslu
Tež morwych hišće risaju.

(5. | 2. 1848.)

— * —

19. Dub a kopřiwa. [11.]

Čim njelubše, čim radniše,
Čim krasniše, čim žadniše
Tu w swěće něštožkuli je!

„**P**hi dubje, wulki stary bėsmanje,
Dži do so! njeje tolsta hańba će!
So do poł swěta hordy přesćěraš,
A kajku horstku drobnych žoldži maš?
Što móhl ty wjacy plodzić porno mi,
Swět dyrbjał stejeć w samej dubini!“

Z tej rěču symjenjata kopřiwa
So da do duba, swojoh' susoda.
Dub z hordom žanu hańzu njezhibny,
Ji wotmolwi pak zacpjo smějicy:
„„To stare zhonjenje je na swěći,
Zo njerjad so najbóle symjeni.““

(25. | 2. 1848.)

— * —

20. Tři žaby a bačon. [12.]

Kaž wuhór smykły so
Ći bórzy z ruki sunje,
Tak rjeńša nadzija,
Hdyž njemysliš, će truhnje!

Tři žaby wocučichu k žiwjenju
Na rjanym slónčnym nalěcu,
A z roztateho přerowa
Kwor kwor! ta přenja zarjehta:
„Budź swjaty Jurjo khwaleny,
Zo naše jastwo roztał sy!“

Nós druha tykny z přerowa
A pacy w slónčku přesčera:
„Kwor kwor! najlubše sotřički,
Kak je to krasnje na swěci,
Kwor kwor! na lěto zbožowne,
Nam kćēja časy mjedowe!“

Kwor kwor! so třecej přitorhny,
Ju lapny bačon pyskaty,
A nowe lěto mjedowe
Žno přeni dzeń bu skepsane:
O jerom, kak to wujeba
Najrjeńša husto protyka!

(2. | 3. 1848.)



21. Stara a mloda wjewjerca.

(Tydź. Now. 1848, 47.)

„~~XX~~ ukń, džowčička, mój hnězduško,
 Před womłódnosću hladać so,
 A wobhladniwa, zdžeržliwa
 Pój nětko ze mnu do swěta“ —
 Tak wjewjerca mać wučese
 A džowku z hole wjedžeše.

Lěs lědma za khribjetom je,
 Duž mloda wołać započnje:
 „Ach maći, luba maćerka,
 Kak rjane tamle jabłuka
 Mi kiwaju, su lubozne,
 A mi so tež jich jara chce.“

Mać praji: „Luba džowčička,
 Njeh kiwaju tam jabłuka,
 Dónž njeb'dža wołać na tebje:
 Pój jow! pój jow! wšak wostaj je“;
 A z tym je nimo plonycha
 Puć dalši z mlodej ćahnyła.

Nic hodžinka so njeminje,
 Duž włóski worjeh kiwaše;
 A prjed' hać hnězdušk džowčička
 Štom a plód prawje wobhlada,
 Bě hnydom mać tam horje fuk
 A z ha'zy woła: cuk, cuk, cuk.

Duž mloda škrěči wjewjerca:
 „Aj, aj, ty mama zwažliwa,
 Što hrymzaš ty jow jabluko,
 Kiž hišće njej' će kiwało?“ —
 A prjed' hač mać so wohladny,
 Bě hnězdušk za njej na hał'zy.

A praji z rěču šibalskej:
 „Aha, to wšak nic trjeba njej',
 Zo jabluka hdže přepušću,
 Njeh mjelča abo wołaju;
 Wšě zjěsć — to njej' mi na mysli,
 Je woptać — wěsće nješkodži!“

* * *

Wěr, wučba leći do wětra,
 Kiž poručnik sam přestupa
 A džesać druhich přikazow
 So přimnje jeje křidleškow.
 To chcyli starši wopomnić
 A moju baseń njezacpić.

(8. | 3. 1848.)

— * —

22. Wróna dróhowańka.

Wróna něhdy wćipna do swěta
 Puće daloce bě činiła,
 A jej' nan a mać so zwjeseli,
 Jako zaso domoj přileći;
 Cyle přecelstwo a susodstwo
 Přińdže słyšeć něšto noweho.

Wróna dróhowařka skašlowa;
 Trěje pysk, so wažnje wupjera:
 „Što je nowe? Čezke časy du,
 Powěsć wozjewju wam hiobsku:
 Čłowstwo hlódne wobzamknyło je,
 Z nami dželić jědło njobjeske.“

„Z nami dželić? — što ty njeprajiš?
 Ty nic konje tola njeměniš
 Za nas rězane na pastwišću?
 To by było!“ — z hněwom wołaju.
 Tajki njeskutk džě historiske
 Naše dobre prawo potorhnje.

(W měrcu 1848.)

— * —

23. Hórka a dólčk. [13.]

So hórka dólčkej wusměwa,
 Zo steji póčrjeny,
 A džeše: „Pój sem kadlička,
 Maš mokre kholowy,
 Ja chcu ći trochu wužimać,
 To móhło so ći dobro zdać.“

Dólčk horce slónčko wočakny
 A w lécu wołaše:
 „Pój hórka sem, pój, wutla sy,
 A huba tak ći skhnje,
 Ja chcu ći něšto włohi dać,
 To móhło so ći dobro zdać.“

Te wćipne rěče slyšeše
 Tam pódla runina
 A dzeše: „O kak lěpša je
 Ta prawa srjedźina;
 Nic přemałko, nic přewjele,
 To tyje přeco najlěpje!“

(5. | 4. 1848.)

— * —

24. Kačka a kačor. [14.]

Kačka bachta kačorej:
 „Posl'chaj, mužo, rozsudźej,
 Njej' to hordosć njeznjesna,
 Njepřistojna, khwaleńska:
 Kajku kokoš haru džěla,
 Hdyž je jónu jejo měla.

Wohidne jej' khwaleństwo
 By pak hišće znjesło so,
 Ale tu maš honaka,
 Tón hakle ći dykota:
 Moja žona, nejko, nejko!
 Je mi znjesla běle jejko!“

Kačor praji: „Spokoj so,
 Njewěš swěta wašničko?
 Česće dosć, zo njedače,
 Prjed' hač jejo znjesla je;
 Z cyla pak to wěc je stara:
 Mały kwas a wulka hara!“

(6. | 4. 1848.)

— * —

25. Kokula a sknadź.

(Tydź. Now. 1848, 163.)

Bě něhdy dolho mokrota,
 Duž kokula so rozhněwa;
 Sam wrobel khětro swarješe,
 Zo sukničku sej womaže,
 Tež lastojčka bě huslički
 Na hrjadu pojsła we hródzi.

Mać kokula bě mjerzaca,
 Zo kóždy ptačk so překhowa,
 A džeše k mužej: „To mi praj,
 Hač je to žadyn wótcny kraj,
 Hdžež poddan žadyn widžeć njej’
 A ničo do šklě kuchinskej’?

To džě respekt wšón přestanje
 A naj’ kommando kamsy dže,
 Tež naš diplom a prawizny
 Nam rozmokaju na kusy;
 Preč, preč! tu hišće přikhadža
 Tež wrótna konstitucija!“

„„Maš prawje, luba mandźelska!““
 Muž kokuliny zawoła,
 „„Haj, budź tu božmje, krajo zły,
 Hač dotal wótcny rěkany,
 Prjed’ hač jow něšto přisadžu,
 Jón dušu radšo wopušću!

[Ja předam swoju nuknicu
A z prochom, mochom wučahnu.
A potom, potom plakajće!
Tu mokru brodu žimajće;
Wy mróčele a njejesa,
Was budže kusać žaroba!““]

„Haj, ćehńtaj, ćehńtaj božemje!“
Sknadž pod halozu spěwaše,
„Zwjež, patriarcho škraholco,
Tež ty sej swoje břemješko;
Hlaj, knježich wašoh' runjeća
Rad wšudže z kraja žohnuja.“

(W haprylu 1848.)



26. Róžowy pupk a łopjenko.

(Tydź. Now. 1848, 235.)

„**H**đže slónčko jasne, ach, hdže sy?!“
Tak wołaše pupk róžowy
A k njejbu mróčnom' hlada;*
Wón chce so rozwić, wotewrić,
Přez wón a pychu zwjeselić,
Duž pruhow złotych žada.*

„O!“ rjekny k njemu łopjenko,
„Budź dočakny a spokoj so,

* W rukopisu: A tři dny hižo čaka;
Duž na mróčele plaka.

Ze zhonjenja cí praju:
Po mróčenjach a njewjedri
Wšě zela, kćenja, róžički
Ćim rjeńšo zakćewaju.

[Duž njeskorž, k njebju wobroć so!
Wěr, hdy by slónčko swěćilo
Na přenje pozdychnjenje,
Poł bjezdžak by te pruhi pił
A slónca móc by nazhonił
A sylne wuhorjenje.“]

* * *

Što, čłowječe, sy w tyšnosći,
Hdyž hnydom zbože njeswěći
Přez horja pomróčenje?
Swój čas, kaž pupik różowy,
Tež ty ćim rjeńše witaš dny
A slódše wokřewjenje!

[Přec' poľna škla a wjesele
A nihdy nuza, tradanje:
To čłowjek rady zywa;
Po tyšnosći a po sylzach,
Po starosći a po prócach
To zbože hakle bywa!]

(30. [6. 1848.)



6

27. Sowa a zyba. [15.]

So sowa zahe wusunje
Ze skhowa ćmoweho,
Dzeń slepi ju, duž hněwaše
Na překhwatanku so.

A z wołanjom a złobotu
Rój ptačkow přičeže,
A sylnje do njej' praskachu,
Zo so ji styskaše.

To zyba želnje widžeše
A k sowje přileći:
„Pój, pój! wěm wuček za tebje,
Džak budžeš wědžeć mi!“


A jako ju do khowanki
Bě pod keřk dowjedła,
To sowa zły pysk rozdaji
A zybu spóžera.

A smějkotajo měnješe:
„Ty hlupe stworjenje,
Mój džak ći dlěje njetraje,
Hač pali njezbože.“

* * *

*

Ta baseń wšitkim přiwoła:
 O njezabudźće wšak
 To hrónčko: Kajkaž wutroba,
 Haj, tajki je tež dźak! (5. | 7. 1848.)



28. Wjelk a psyk. [16.]

Brjuch hlódny wjelka ćěrješe
 Na popad k wowčeřni,
 A we tym, zo so měrješe,
 Tam skoči do pasli.
 Wón zaswari: „Psej skorženo
 Na zlóstne, falšne čłowjestwo!“

Što činić? nohu wotkusać,
 Kiž tčeše w železu?
 To njechce so jom' pěkne zdać
 A boli přez měru. —
 Wón zawinča: „Psej skorženo
 Na zlóstne, falšne železo!“

„„Što wina je?““ psyk zašćowka
 A přiħna hněwniwy,
 „„Ty šelma, poħny rubjenstwa,
 Sam na tym wina sy;
 Tej zlej a falšnej wutrobi
 Dže khostanje za pjatami.““

* * *

*

Kaž wjelk, tak swarja škódnicy
 Wot wjele tysac lět,
 Hdyž hdže so jedyn popadny
 Na pasle a zły swět,
 Hač runje su swój prut a kij
 Ze swojich kerkow rězali. (8. | 7. 1848.)



29. Džiwny sejm.

(Tydź. Now. 1848, 187.)

Na dworje něhdy dzeržachu
 Sejm kury, husy, kački:
 Jim přišlo bě do myslički,
 Hač spěwne njejsu ptački.

A mjez wšitkimi husyčka
 Najbóle šcebotaše,
 Hač runje kačka, pancawa,
 Tež dycha njelut'waše.

Kaž woda rěč jim z pyska dže,
 Pak steja, pak íi sedža.
 A jako džeń so khileše,
 Wšě jenak wjele wědža.

[Duž wotpóslancow póslachu
 Na knjeza hrabju pawa.
 „Tón“, džachu wšitke po rjadu,
 „Njeh wusudženje dawa.“

Knjez paw tu wěc sej rozpomni
 A wažnje kašlowaše
 A zjawnje, wótře po khwili
 So takle słyšeć daše:

„„Wy wot nohow hač do nopa
 So wulcy blazni zdaće;
 Bóh daj wam telko rozyma,
 Kaž wjele pjerja maće!““]

* * *

Do sejma nihdy njedyrbi
 So hubak, blazn sadzić;
 Čim jasniše su myslički,
 Čim lěpje budža radzić.

(14. 7. 1848.)

— * —

30. Worjoł a mały kralik. [20.]

(Po basni z luda.)

MMały kralik něhdy swarješe:

„Zo pak w swěće wšitko wopak dže,
 Slaby je kaž pluwy wěty,
 Njeje nihdy kedźbu měty. —
 Je to prawda? móže zbože kćěć,
 Hdyž najsylniši chce knjejstwo měć?

Worjoł, najhrozniši pazorak,
 Kóždeho džě z lóžka ćisnje znak,
 Běda, štóž so jemu staji,
 Teho njesmilnje wón daji;

78

Wobeńdže-li žane njeprawdy —
Hdže je sud? štó přińdže k pomocy?“

Kaž by čmjełam złuskał do hnězda,
Na to znjeměrnj so ptačina.

„Wón je blazn“, jene rěča,
„Wón ma prawje“, druhe škrěča;
Na posledku při tej měšeńcy
Wjetša džělba radu wobzamkny:

„Kotryž slóncej přińdže najbliže
Z mócnym křidłom, tón njech z kralom je!“
Wone leća — wyše — niže —
Worjoł slóncu pak najbliže,
Hižo widži swoje dobyće
A so prosći polny wěstosće.

Hlaj, duž mały kralik z ćikotom
Wusuny so jemu pod křidłom:
„Ja sym kral, haj ja sym dobył“,
Wola wón, „sym wyše pobyl“,
Wyše worjoła wón zejhrawa —
Přińdže dele a trón požada.

„Ty sy dobył, dobył zawěrnó“,
Małe ptački džachu wokoło;
„Njejsy tež nam nihdy škodzil,
Za krala by nam so hodzil!“
A na měsće klinčo spěwachu:
„Slawa, slawa kralej nowemu!“

Jako worjoł wotpad widžeše,
 Z nóżnow wótry mječ swój wućeže,
 Kaže wšudže k wójnje trubić,
 Dokelž njecha knjejstwo zhubić.
 Mały kralik ćeka — što sej chce?
 Do myšacej' džěrki zalěze.

„Aj ty šelma!“ worjoł zahrima,
 „Wumóc njedyrbi će khowanka,
 Prjedy šćuwać, k zběžkej wabić,
 Moju česć a knjejstwo slabić,
 Potom čeknyć lestnje před bitwu —
 To su kusy! ja će roztołku!“

Ale kaž so samo rozymi:
 Howrja zběžki a při njeměri
 Ma kral džělać połnej rucy —
 A tak worjoł tež kaž ducy
 Kaže sowje, swojom' hejtmanej,
 Stražować před džěrku myšacej.

Mjez tym, zo kral druhdže jednaše,
 Sowa pola džěry kedźbuje;
 Cyłu nóc tam sedžo kuka —
 Ale jejna mištyrštuka
 Na ranje so zjawnje pokaza:
 Z drěmkom kralika je přepasła.

Worjoł kral so slynje rozhněwa,
 Sowje wodnjo lětać zakaza;

Sowa prosy ze sylzami —
 Worjoł njeda a ji grami;
 A duž ptačata wot teho dnja
 Wona žerje a je zahubja.

Cyła ptačina pak wodnjowska
 Džerži swěrnje kaznje worjoła,
 Jědojta na sowu helsecy
 Pjerje do njej' njepřečelscy,
 Hdyž so wodnjo něhdže pokaže.
 Mały kralik mjeno skhował je.

(14. 7. 1848.)



31. Lišcyna rada.

Čim mjenje ma što rozyma,
 Čim bóle so čí khlemi.

Moł něhdy lišku nadeńdže
 A poča: „Moja luba,
 Ja chcył rad wuknyć wot tebjje,
 Hejz' njeje dolha truba
 Tych wučbow abo papjerow,
 Kiž dyrbyja nutř mi do mozhow.

Mam do wole dosć mozhow drje,
 Bych mudrosće pak nabył;
 Tež prošu, wuč tak wšitko mje,
 Zo njebych ničó zabył. —
 A měł tež hłowu dubowu,
 Njej' wěrnó, za džen dowuknu!“

„„O wole, liška wobkrući,
 Na ničim njejsy wbohi,
 Dosć mudrosće maš we hłowi,
 To zjewja twoje rohi,
 To wurostki su mudrosće,
 Kaž kóždy nazhonjeny wě.

[Duž tebi ze wšěm wuradźu,
 Za twoje khwalbne mjeno:
 Štož njej' po twojim wuzdaću,
 Tam rohi zastaj jeno;
 Tež njemjelč w ćichej mudrosći:
 To twoju khwalbu powjetši!]

A hdyž tak połnosć wědžeństwa
 Je z domom w twojim nopi,
 Što je ći trjeba přibytka?
 Štó njetřebnje šac kopi?
 Bodź, mudruj, prawuj, njecofaj,
 Wšěch zarěč! to će khwali kraj.““

„To sym ći derje zrozumił,
 To njem'že ćežko panyć,
 Bych wěrnje tež był tintu pił,
 Chcył jenož kwaku ćahnyć!
 Tak džeše woł a požada
 Sej hišće dlějše rohizna.

Što bu? Wšě woły na lnišću
 Nětk radu posłuchaju

A so, chceš wěc čim dušnišu,
 Čim bóle zapjeraju,
 Tež blabaju so do wšeho
 A njesprócniwje bodu so.

* * *

Zo so tu wučba přistaji,*
 To po prawym njej' trjeba,
 Ju mudry widzi na měsći,
 Wołk njech sej ju won hrjeba:
 Štož pak je tajki prawy woł,
 Tom' dorěčeć njej' nchtó móhl.

(17. 7. 1848.)

— * —

32. Paw a husyca. [18.]

Knjez paw so w dworje hordžeše
 A praji k husyčcy:
 „O, mje so nchtó njedótknje,
 Zo woskobał mje by;
 Haj, wšitke woči wobroća
 So za mnu połne džiwanja.
 To čini, zo tak pyšny sym
 A tak so zybolu;
 Ty z twojim pjerjom wohidnym
 Sy skerje k mjerzanju,

* W rukopisu: Bosé, prawować, so zaleži,
 Nic cofać — w swěće plaći.
 Što mjelčiš w éichej mudrosći?
 To twoju khwalbu haći.
 Tak sylnoh' k hlupym přiliča,
 Hdyž do wšeho so njeměša.

Hač sprócnj bur, haj mazany,
 We swojim kabaći?
 Ně, pychařstwu dže do přědka
 Ta wšědna, nuzna potrjeba.

(20. 7. 1848.)



33. Wjetši sy a wjetše maš prawo. [21.]

*W*lynčo, hrajo zlětowaše
 Něhdy mloda kuntwora,
 Swět so paradiz ji zdaše,
 Dónž jón lěpje njepózna;
 Přetož srjedz najrjeńšich wjeselow
 Zašmjata so pawkej do syćow.

„Pušć mje, pawko“, wona džeše,
 „Pře čo žiwjenje mam dać?“
 „„Hlajće, hlajće““, pawk so smješe,
 „„Slabušk zechce prawować.
 Słyš džě, hlupa, štož ty njezhudaš:
 Wjetši sy a wjetše prawo maš.““

Mjez tym, zo pawk mordowaše,
 Přileća tam sykorka;
 Pawk so hóršo wobaraše,
 Sykorka pak zawoła:
 „Přěhrać dyrbiš, što so wobaraš?
 Wjetši sy a wjetše prawo maš.“

Na tej žratwje zwjeselenu
 Kraholc hrabny sykorku;
 Wona škrěči: „Našu jenu
 Morić je hrěch z hanibu.“
 Kraholc wrjesny: „„Aj, što wudawaš?
 Wjetši sy a wjetše prawo maš.““

Hajnik třěli, zemja ržeše,
 Kraholc padže trjecheny.
 „To by bylo“, hajnik džeše,
 „Zo ty jowle z knjezom sy;
 Rozym, třělba to je swědčer naš:
 „Wjetši sy a wjetše prawo maš.““

* * *

Podćišćenje, lube džěci,
 Wopiše to přisłowo,
 Wono knježi mójnje w swěći
 A je hrózba slabšeho:
 Hdžež pak pola ludži z knjezom je,
 Tam tež njeprawdow kónc njebudže.

(28. | 7. 1848.)

— * —

34. Borkawa a třěčk. [22.]

„**Q**, naju w swěće runja njej’,
 Ja du na mjaso, ty na krej.“
 Tak poča bórčo borkawa
 Na třěčka a jom’ ruku da
 A chcyše z nim so stowařšić
 A jako ćeta spřěćelić.

„„Hatsi, hatsi!““ třečk zaporska,
 „„To byla krasna nadoba,
 Ja nazelen knjez wóckaty
 A w rjanej nowej sukničcy,
 Ja měł so z tobu wujować!?
 To, wohidna, so njem'že stać.““

To borkawu tak rozhori,
 Zo třečkej plistu wotłóži
 A wolaše: „Duž měniš ty,
 Zo suknje dla wjerch hižo sy?!
 Měj woči tež wot smaragda,
 Ty třečk sy, kaž ja borkawa.“

* * *

Tež wěsći ludžo hordža so
 A zacpja runja swojeho
 Dla wobliča a drasćički,
 A wšak, hdyž hladaš při swětli:
 To rjany abo njerjany
 Njej' ani kroška winojty.

(15. | 8. 1848.)

— * —

23

35. Pjeńk a šmutajca. [19.]

Suchi pjeńk a šmutajca
 Steještaj we haju.

„Džědo“, wona zawoła,

„Ty sy zbytk we kraju,

Ja pak rostu zelena,

Přichodnosće zepjera.“

Rjekny pjeńk: „Haj, wjele dnjow
Mojich tudy běše,
Wjele mi tež njewjedrow
Wyše hlowy džěše;
Njezacp mje pak młoduška,
K wobćežnosćam njezrała.“

Šmutajca so hóršeše,
Horde dawa słowa,
Praji: „Z tobu kónc wšak je,
Ja sym kruta, strowa!
Njeje slóncu skhadźace
Lubše tež, hač wječorne?“

Mjez tym bur tam přijědže
Z ćežkim wozom slanja,
Šmutajcu wóz rozlamje —
Kónc bu jeje žwanja,
Do pjeńka wóz załóži,
A hlaj! pjeńk — jón powróci.

* * *

Starych njezacp, młoduško,
Wěš ty, što će čaka?
Hordosci pad bliži so
A na khroblych laka;
Čežke pruhi, nadběhi
Zjewja, što je sylniši! —

(17. | 8. 1848.)



36. Baseń wo wjedrje. [23.]

Wě
 Wě lěce něhdže połdra sta
 (Po lijeńcy to běše)
 Wěc dźiwna je so podała,
 Zo Bóh po swěće dźěše
 A cylej stwórbje polubi:
 Zo lětsa wjedro dowoli,
 Kaž kóždy sam je zechce.

Duž hory dešćik prošachu,
 Wo slónčko mjez tym doły;
 Štom sadowy chce ćišinu,
 Lěs měni: wětr je strowy!
 A ludžo hakle — to bě zlě —
 Kaž wjele hłowow — próstwow bě
 Wo wjedra wobroćenje.

Bóh wšěm, kaž móžno, činješe,
 A tu hakle bu hara!
 Směšk, zběžk, haj wójna howrješe,
 Štóž njećepje, tón škara;
 A z knjezom bě najsylniši,
 Dónž druhi jeho njepobi —
 Wšo překi, po dlu dźěše.

Duž Bóh sam zaso wobzamkny,
 Po swojej woli wodzić
 Wětr, mróče a slónčne dny,
 Zo móhla zemja plodzić;

A ludžom pisać dowoli,
Kaž chcedža, jenož protyki
A dale ničo wjacy.

To pomhaše a jednota
Zas' knježeše na zemi,
Za dobre kóždy dopózna,
Zo Bóh wšěch wolu zlemi;
A tak je to tež wostało,
Zo Bóh so stara za wjedro
A hospodařstwo wjedže.

* * *

[Njej' tak tež druhdže na swěci,
Hdyž kóždy swój rózka trubi,
Hdyž pjasć a brón wšo wobknježi*
A rozym knjejstwo zhubi?
To žalostna je měšeńca,
Hdžež sylny słabšich spóžera,**
A šelma w mutnym łoji.]

(19. | 8. 1848.)

— * —

37. Topoľ a dub. [24.]

Wróć čłowjestwo so k krutosći
A k jadru staremu.

[~~N~~ Na haćenjach we susodstwi
So dub a topoľ šeri,

* 1. recens.: Hdyž lakomstwo wšo wobknježi
A přemóc prawo rubi.

** 2. recens.: Hdžež přińdže słabši pod koła.

A dótkaj so z hałzami;
 Tón topoł wjacy měri
 A šwižniši so pozběha
 A na dub z hordom pohlada.]

„Kaž pyramida nahladny
 Ja k mróčelam so měrju,
 A z kajkim spěchom hladajcy
 Ja wyše tebjě ćěrju!“
 Tak topoł k dubej rěčał je
 A zacpnje dale mjenješe:

„Ty šešeračo njeruny,
 Štó tebjě k pyše sadža
 Kaž nas, te włošske topoly?
 Nam čestne město dadža
 We cyłych rjadach při puću:
 Praj, štó je lépsi wot naju?“

„„Twój napohlad a wysokosć““,
 Dub wotmołwi, „„drje nimam,
 Tež njemóžu tak spěšnje rosć,
 Kažkuli tež so přimam:
 Za to pak mjehki sy ty hłub,
 A ja sym kruty, twjerdy dub.““

* * *

Chce něhdy tebi hordo rosć
 Na róst a ličko rjane,

Ty spomń, što waži nahladnosć,
 Hdžež jadro njeje žane. —
 Štóz bratři počink z rjanosću,
 Tón bjerje khwalbu najwyššu. (1. 9. 1848.)



38. Wobzamknjenje štyrinohateje zwěrinjy.

(Časopis M. S. 1848, 200.)

Ʒako law kral nastupi
 Něhdy knjejstwo swoje,
 Rěčeše wón k dźiwini:
 „Słyšće słowo moje;
 Wobćežnosć ma kóždy njesć,
 Dyrbju-li ja knjejstwo wjesć.

Dajće, dawki skladujće,
 Kaž so kóždom' słuša;
 Što kral hewak zamóže?
 Naposledku čuša
 Kóždy lumpak na njeho,
 Rozpadnje tež kralestwo.“

A hač runje z bojosću
 Wšitcy třepotachu,
 To pak swoju njewolu
 Tola spóznać dachu;
 Dawać a so woprować
 Žanemu so njechce zdać.

Wulka prjódcy zwěrina
 Šćuwaše tu mjeńšu,
 Dostać mjenja bjez dawka
 Swobodu ćim rjeńšu.
 „Ně, my ničo njedamy!“
 Zhromadźizna wobzamkny.

„„Dobre, dobre!““ wotmołwi
 Law kral hriwy třaso,
 „Prut a kij sće rězali
 Kóždy nětko na so,
 Ja sym kral a wobswědču,
 Zo za ničo njesteju.“

Zwěrina bě wotešla,
 „Ničo njedać“ slodži,
 Ale što so wukopa
 K jeje wulkej škodzi?
 Město zo law škituje,
 Žerje wón, štož nadpadnje.

A kaž kral, tak poddanjo,
 Štož so lubi, bjeru,
 A kaž móža, mordujo
 Jedyn druhoh' žeru;
 Kóždy w kraju swój knjez je,
 Dónž joh' druhi njepóžrje.

* * *

Mudračcy! tu přikład je
 Swobody bjez dawka.

Komuž chcyće na nju dže,
Njeh džě za njej blawka;
A daj poč a tuk sej rosć —
Rěznikow žno budže dosć.

(2. 9. 1848.)



39. Hołb a ročka.

(Tydź. Now. 1849, 253.)

Hołb leći ročku troštować
Pod lipu zelenu,
A ročka njecha posłuchać
Ze samej zrudobu.

Zo najlubši je njeswěrnny,
Bě ročka słyšała,
Duž ji dla jeho njeswěry
So lamje wutroba.

„Mjelč hołbiko, leć wote mnje!“
Da ročka słyšeć so,
„Ja wumru, prjed' hač wožoltnje
Na lipje lisćičko“.

„„Wěr lubša““, hołbik zakurča,
„„Swět překoru je sył,
Kaž hałza dźerži lisćička,
Je twój ći swěrnny był.““

„Ach, mužskich słowo falšne je!“
Jom' ročka wotmołwi,
„Jich swěra so tak pominje,
Kaž lisće na lipi“.

Duž hołbik zaso zakurča :

„„So, rjeńša, njezrudzej,
Što hněwaš so dla šćuwanja?
Swět teho hódny njej’.

Štóž wěri kleskam přislodnym,
Swój pokoj předawa,

Štóž wěri hubam jědojnym,

Měr nihdy njenam’ka!““ (10. [9. 1848.]



40. Zbože a nuza. [25.]

Na drózy něhdy zetkało
So zbože z nuzu je,
„Hej, stej! ty złote džěcatko“,
Duž nuza wolaše,
„Kak dźiwne sy mi po drózy,
Praj, što će pušći njemudry?“

„„Ja pytam““, zbože wotmolwi,
„„Sej muža druheho,
Kiž by měł khribjet sylniši
Za moje brěmješko.
Tón, kiž je dotal nosył je,
Je mało lětow ćěrpješe.““

„To sym ja hinak swěrnisha“,
Duž nuza wurazy,
„Haj, tajkich blaznow pytam ja
A tajke khribjety!

Štóz tebje zacpi, dosta mje,
Mój spěw pak z druhoh' hłosa dže.“

* * *

Džens nuza rubjenc wobleka
Tych wčera židžanych
A z hórkej sylzu napowa
Tych łoni wjesolych;
To z wjetša na tych widžimy,
Kiž njespóznachu dobre dny!

(21. 9. 1848.)

— * —

41. Swjatojanowy konik a žaba. [26.]

Na lisčićku w lohkim čolmje
Z wodu dele po rěcy
Jědzeše po módrej žolmje
Konik swjatojanowy;
Wětřik jeho wuhladajo
Čakaj, čakaj! pomysli,
Z poľnej hubu zaduwajo
Jeho čolmik powróci.

„Po pomocy!“ konik woła,
„Njej' tu nchtó připódla?
Po pomocy z mokroh' rowa!
Moje křidła zapraja!“
Z brjoha wólša hižo khila
Dele haľzu pomocnu,
Jeho smjerće hórka čwila
Džěše ji přez wutrobu.

Duž tam rjehtać poča žaba:
 „„Wostaj, wostaj! wólšička,
 Njeh wón sam so z wody škraba,
 Štó wě, što Bóh w myslach ma!
 Njej'-li kónc jom' wotsudženy,
 To smjerc jeho njepóžrje.
 Božej woli poručeny
 Jeho dónt njeh wostanje!““

* * *

Runje žabje ludži wjele
 Z wotsudžeńskej přiwěru
 Smjertne ložo khorym sće,le,
 Hdyž so komdža z pomocu;
 Nic Bóh, ale člowska hluposć
 Tehdy k smjerci wotsudža,
 Skomdu tež rad hruba skuposć
 Z wotsudženjom zamołwja. (12. 10. 1848.)

— * —

42. Wroble a krahole. [27.]

Na třěše wroble zhromadžene
 Sej něhdy radu radžachu
 A škrjebotachu rozčerćene
 Na kraholcowu njeprawdu,
 A ničo mjeńše wuwjesć njechadža,
 Hač hasnyć jemu swěčku žiwjenja.

Kak najstrašnišo skóncowany
 By był — to hišće praša so;

A poča: „Što so nječini,
Zo hlowa tebi šedziwi?
Praj, gospodarjo rozhladny,
Kak dže so ći na stare dny?“

„„Ja stary? hižo šedziwy?““
Psyk mórći z hněwom napjaty;
A dokelž lětow dwanaće
Kósc někotru žno hrymzał je,
Duž tupe zuby wošćerja,
A kaž so wě, zle pohórša.

Micmica trochu zhorbi so
A rjekny: „Žane mlodženstwo
Tež na zubach ći widžeć njej’;
To pytnu pak, zo hordžerjej,
A bylo tež na stare dny,
Je wěrnosć plonuch kisały!“

(30. 12. 1848.)

— * —
44. Připóznaće.

„**S**y, slónčko kralo, slyšało,
Što piše swět a hwězdarjo,
Zo wyše starych dwanaćich
Planetow hišće wjacy jich
Pod njebjom bludzi ćelesow
Na šěsć a sydom džesatkow?“

Tak zawołachu wóndano
Ći stari znaći dwanaćo.

„Zo su tu, njechamy drje přec,
 Jich pak za swojoh' runja mječ,
 Jim poľne prawo z nami dać,
 To njemóže so nihdy stać!

Štož nej' nam starym porune,
 Štož hakle z jeja wulězc chce
 A k knjejistwu přińc so hotuje,
 To připóznać so njemóže.
 Tych mamy z časom přirězać,
 Jim horde mysle wuklepać.

Štož slabe je, my řezamy,
 Štož mjena nima, teptamy;
 My stari wulcy Hansojo
 Sej njedajmy brać kralestwo.
 Po našej slawnej přemocy
 Je prawda wšo, štož činimy.

Te mjeńše swěty, džěcatka,
 Te tykajmy přec' do měcha;
 Wšak deleka tam na zemi
 Tak džěla so tež z ludami.
 Hans připóznaje Hansa tam
 A Hanska wjedu k řeznikam.“

(1848.)



45. Bože slónčko a pikikowař.

(Časopis M. S. 1848, 195.)

„**N**a kajkich džeržiš prawiznach
 Při lětušich tych měšěncach?

Na kotrej stronje sedzał by,
Na prawej abo lěwicy?“
Tak bože slónčko wopraš
Na štomje pikikowarja.

„„Konservativ a kralowski““,
Knjez pikikowar wotmołwi,
„„To zda so mi najprawiše,
A hinak być tež njemóže;
Nam hewak revolucija
Wšě stare prawa spowróća““.

„Duž leć mi jow z tej zahrody!“
Tak bože slónčko wurazy,
„Ta słuša jenož mi za dom
Kaž wě to kóždy lisć a štom.
Što wujěš, ćišćiš, rubiš mje,
Hdžež prawo mam historiske?!“

„„Aj““, pikikowar wotmołwi:
„„To njeńdže jow a njeplaći,
Tu mjelčec ma historija
A rěčec revolucija,
Kiž swobodu chce najšěršu —
A teje so ja njepušću!““

* * *
Kaž hraje khorhoj na třěši,
Tak barbu dzerža lakomni;
Štož tyje jim, sej dowola
A druhim puta kowaja;

Bóh do rukow jim njedaj sud
A nihdže žadyn kraj a lud! (23. | 2. 1849.)

— * —

46. Lišcyne nakazanje. [28.]

Liška něhdy khora wali
Stonajo so do lěhwa,
Prjódcy pak ju žerje, pali
Jeje skutkow njeprawda,
Džeše: „Jeli wotkhorju,
Zawěsće so polěpšu“.

Liška začu polóženje
Z tutej želnej spowjedžu,
Požadane wotkhorjenje
Dóndže tež po tydženju.
Džak budź Bohu! mysleše,
Zo mi zaso lěpje je.

Liška nětk ma strowej nozy,
Kur a hus drje njekradnje,
Ale dđerži so po Bozy,
Kiž ji z horja pomhaše? —
Ně, ach ně, ju zamjerza,
Zo je wjele skomdžila.

Tyšny són so lišcy zdaše
Slub a khorosć přeetrata,
A duž z nowa wotwjeraše
Kurjenc pola burika;

Jón' pak zle so poradzi —
Psyk ju skoro dočini.

Wona lubi na smjerc k hora
Z pokutnymi sylzami,
Jeli hdy wjac' rubi z dwora,
Zo chce wumrjec na měsći;
K nakazanju wot Boha
Čas a skladnosć požada.

Liška zhoni nowu hnadu,
Smjerc ju tón króc njezmota;
Wěriš, zo njej' přišla k padu
A zo slub je dzeržala?
Ně, ju jenož mjerzaše,
Zo so mało pasla je.

„Wjetši šelma, wjetše zbože“,
To trošt běše lišcyny —
A duž z nowa wótri nože
Na kury a na hušy,
Rjeknje: „Pah, to wšitko dže,
Štóž so hlada, mudry je!“

* W rukopisu: Wjetša lesć a kedźbowanje,
Mysli wona, přepomha,
A duž stare čuchotanje
Po dworach njej' spušćila,
Lohcy njej' wšak wuhnate
Stare wašnje zwučene.

Prjedy hač zła smjerec ju mori,
 (Z krótkim njech wěc dopojdam)
 Liška hišće dwójcy skhori,
 A štož kóždy zhóda sam,
 Z kóždym razom pokuta
 Nowy wudawk dočaka.

Naposledku, ach, ow jena!
 Kak so zbože njewjerći —
 Liška w paslach popadnjena
 Za hunami žalosci,
 Při wšěch swjatyh pokutu
 Lubješe tam zawěstu.

Kak su wěrne, kak su sprawne
 Jejne sluby poslednje,
 Hajńkej tam drje njebě zjawne,
 Wědзец tež je njechaše,
 Ale pris! ju zarazy
 Srjedz najlěpšej' pokuty.

* * *

Sluby łamac — dolho wuńdze,
 Často prut je lahodny,
 Ale swój čas karan dóńdze,
 Zo so wuško wotrazy,
 Mudri z časom wopomnja:
 Kajawka so njewróća!

(7. | 4. 1849.)



47. Law a šwinc. [29.]

XXX
 e Africy, hdžež lawy su,
 Law zetka šwinca před džěru;
 Hač k zemi so šwinc pokhili
 A lawej pacu wokoši
 A zwaži so z nim porěčeć
 A prašeńčko so woprašeć.

„O knježe kralo khwalobny,
 Štó je cí runy na mocy?
 Štó khrobło twoje wupojda
 Kaž čłowjek, tak tež zwěrina!
 Duž praj, što honak stróži će,
 Hdyž »kikerahi« zaspěwje?“

„„Što staraju će slabosće
 Tak majestosće našeje?““
 Law zmórča a so rozhněwa
 A zběže pacu na šwinca;
 Šwap! jeho klesny mjez woči,
 Hač woheń z wočow wuleći.

Duž praji nan tam šwincowy:
 „Mój synko hišće njemudry,
 Chceš wulkich a swět k přećelej,
 Tu hladkować so přiwučej:
 Štóž rěči wěrnosć, hórki je,
 Plic, plac! na hubu dostanje.

(30. [4. 1849.]

— * —

48. Naložk swěta.

Xam čas a skutk chcu wopisać,
 Zo budžeće so spodziwać;
 To bě hlód wulki, běše zle
 Tehd', jako mucha wjelka zjě.

Haj, mucha něhdy wjelka zjě,
 A dokelž to kusk wjele bě,
 Duž kožu zaso wupluny —
 Njej' tole podawk wulkotny?!

Nětk mucha zleći na ha'zu,
 Nic tolstšu, jako klonicu;
 Wětr poča ha'zu kolebać,
 A mucha so tak zradować:

„Tu widziš, swěće zacpjaty,
 Kak ćežka sym na hałozy;
 Sam slepy tudy wuhlada,
 Štó něšto jě a wahu ma.“

* * *

Swět puzorny wěc wobmysli
 A wot tehdy so nałoži,
 Zo wěri tež najwjetše lžě,
 Štóž jeno prawje barbić wě.

(Hapryl 1849.)

— * —

49. Pjenježne tyranstwo. [30.]

Knjez toleř džeše k šesnakej:
 „Ja sym twój knjez, to hinak njej’,
 So naduwaj po móžnosći,
 Na mój bok waha přewaži,
 Jón’ wjacy plaću, dyžli ty;
 Duž widžiš, zo mój wotročk sy.“

„„Tyranje!““ šesnak zaklinkny,
 A mjerzaše so dundyrscy
 A mysleše: kak započnu,
 Zo wotbudu tu khudobu? *
 A we tym, zo tak hódaše,
 Tu wosmak pódla wuhladnje.

„„Ty kadla!““ šesnak zawoła,
 „„Wěš hižo moje prawizna?
 Jón’ wjacy plaću, dyžli ty,
 Duž sy mój wotročk rodženy;
 Sčehń sebi kłobuk přede mnu
 A wučesaj mi sukničku.““

„Hm!“ wosmak ćežcy zdychuje:
 „To tola helscy hrjeba mje,
 Bych jeno móhl — za tajku česć
 Chcył tebje hroznje domoj wjesć:
 Što činju? koho porazyć?
 Na někim tola knjez chcu być!“

* W rukopisu: Zo zahladžu tu hanibu?

Duž wuhlada kroš slěborny
 A k wutrobje jom' lóže bě,
 Wón wrěska: „Wbohi prošerjo,
 Kryj přede mnu sej wobličo!
 To miłosć je, zo, slěpco ty,
 Kroš płaćiš a mój wotročk sy.“

Kroš slěborny, kaž woblaty,
 Nic słowčko na to njepikny,
 Tu worćiznu — wón pomysli,
 Wy kroški a wy pjenježki
 Mi z danju płaćić budžeće —
 Wy čerwjjenaki, čakajće!

* * *

Tak džěla horde, wostudle
 Tyranstwo w swěće pjenježne,
 To něchtóžkuli pomysli,
 Hdyž polak ma na hospodži,
 Zo knjez je wšěch dwajnowarjow
 A požada jich česćenjow!

(Meja 1849.)

— * —
 50. Zajac a mrowja. [31.]

We sonach slódkich na poli
 Knjez zajac něhdy spaše,
 Duž jeho mrowja wubudži,
 Kiž po nim zběhowaše;
 Wón na nju njemdry swarješe
 A za to smjerc ji sudžeše.

„Ach, njebudź takle surowy“,
 Joh' mrowja poča prosyć,
 Budź wulcymyslne zmysleny,
 Ja džak chcu wěčny nosyć
 We wutrobje a pomjatkju
 Za twoju sćěrpnju dobrotu.“

„„Běž““, rjekny wuchač, „„puzorna,
 Mi hódno njej' će skazyć,
 Hejz' budžeš pak mi do lěhwa
 Hdy wjacj na mnje łazyć,
 Dha pak so z tobu stało je —
 Tón džak njech jeno wostanje!““

We sonach slódkich po lěci
 Tam zajac zaso spaše,
 Duž mrowja jeho wubudži
 A jachlo powjedaše:
 „Ček, ček! ja widžach ze štoma
 Po polu khodžo hajnika!“

Knjez Měšawkec so džakuje
 A nóżkuje, štož móže,
 A ducy sej tak mysleše:
 Što podawa so lóže,
 Hač zo tón mały zacpity
 Je wulkemu tež wužitny. (20. 6. 1849.)



51. Mjetel a hnójski bruk. [32.]

„Pój, žiw so wšak wot kwětkow tuka,
 Pój!“ wabi mjetel hnójskoh' bruka,
 „Njej' lěpje čiste wuzwolic
 A k lěpšemu so přiłožić?“
 A zo by bruk lóšt, lubosć dostał
 A při tej lěpšej pastwje wostał:
 Tam mjetel z nim je lětała
 A swój kumšt jemu pokaza.

Ta nowa wěc so bruka jima,
 Směch towařšow wón kedźbu nima;
 Wón rady khwalbu srěbaše,
 Duž z njerjada so pozběže.
 Wón jědzeše proch kwětkow rjanych
 A pilny njepřepušći žanych,
 A mjetele žno wyskachu:
 „„Tu měchmy dušu dobytu!““

Přez pola, luki, přez poł swěta
 Naš bruk, kaž praju, dołho lěta,
 A we tym zo tak čahaše,
 Wón kruwjacy planc wuhladnje.
 Tón běše jeho pastwa stara
 A wonja jemu jara jara,
 Tež stari bratřa kiwaja —
 Wón mysli a so rozmysla.

„Wzmi pos te kwětki wšě!“ wón trubi,
 „Tón planc mi zawěrnje so lubi

Kaž rózowa tam zahrodka,
 Adej ty čistosć wobužna!“
 We njerodži wón zaso toči
 A staja wopokaz před woči:
 „Štóž mazuch je wot naroda,
 Lóšt do njerjada wobkhowa!“

(1. 9. 1849.)

— * —

52. Wjelk a wowca. [33.]

Wjelk wowcu něhdy z wowčerńje
 Je wabił z khlamu lestnej:
 „Pój z jastwa won, tu maš so zlě,
 Pój k swobodnosći čestnej!
 Chceš dlěje dać so honić psam
 A třihać skupym čłowjekam?“

„„Rad lubje““, wowca wotmołwi,
 „„Do twojej' rady zwolu,
 To jeno čiin mi k lubosći
 A dopjelní moju wolu:
 Njeh zuby cí a pazory
 Preč wozmje łazeńk wustojny.““

Wjelk na to něšto do brody
 Sej mjelčo bórbotاشة
 A potom, kaž był wjesoly,
 Sej pacy wotrěwaše:
 „Haj, haj! ja leću k łazeńkej!“
 Hač do džens' pak so wrócił njej'.

* * *

Wjelk w tutej basni pokaže,
 Štóz póznać ludźi žada,
 Štó rubježnik a falšnik je,
 Hejz' hłupak njej' a blada;
 Duž hladaj, komu wěrił by,
 Hač tež je wěry dostojny.

(September 1849.)

— * —
53. Woł a žaby. [34.]

Woł přińdže k piću do hatka,
 Hdžež wójsko žabow bě.
 „Ach Božo!“ rjehta žabina,
 „To za nas budže zlě,
 Hdyž baćon telko zmorduje,
 Što tajki njeplech zežerje?“

Woł zaru, žaby zaržachu
 A z ćicha zakorča:
 „Ach, tón ma trašnu zlobotu
 A smjercé nam připojda.“
 Ze strachom kóžda třepota,
 Na čekanje je hotowa.

Woł třase hłowu rohatu
 A kroči do wody.
 So žaby ruče khowachu
 Pod křěk a do trawy,
 A z cyłym khwatkom někotra
 Je přez hłowu so přecísła.

Woł poča srěbać wodźičku
 Do kutła lačneho —
 „Ach běda!“ žaby měnjachu,
 „Nětk, nětk je stało so,
 Tón najprjedy chce wodu wzać,
 Zo móhl nas lěpje spopadać“.

Štož wědzachu, štož mózachu,
 Duž kóžda skakaše
 Won, z hatka won, tam přez kromu,
 Přez brjohi wysoke,
 A k dopomnjenju wěčnemu
 Swój strach do knihow pisachu.

* * *

Što tón a tamny wuhlada
 Přez brylu bojosće —
 Kak hlupych šerja bjez kónca
 Jich prózdne namysle,
 To zhoniš z tutym pojdańčkom,
 Duž njeběž z kóždym zajacom!

(September 1849.)

— * — 36

54. Bitwa žiwjow. [58.]

Moheń z wodu wojowaše,
 Žadyn dobyć njemóže,
 Hač so runje zapjeraše,
 Rycěrscy so bėdžeše,
 Po pomocy tehodla
 Kóždy woła towarša.

Wětr a zemja pak to běštaj
 (Jeli powěsć bajka njej’);
 Kotrajž na pomoc tu džěštaj
 Kóždy swojom’ přecelej.
 Kajke wěncy dobyštaj,
 Při posledku wohladaj.
 Kaž so wě, tam bitwa prawa
 Nětk so hakle spočina,
 Wětrik wohnjej mocy dawa,
 Zemja wodu podpjera;
 Ruće, wuće, howrjenje
 Ze wšěch kóncow słyšeć bě.
 Wójna přesta. Woheń pobyl
 Bě we bitwje najhóršej,
 Zo pak njeje ničo dobył,
 Dawa winu wětrikej;
 Woda njebě mudriša,
 Zemi winu přisudža.
 Kajki kónc to bě z tej wěcu?
 Wodžany a wobužny. —
 Tež nic hałožku na měcu
 Wětr a zemja njedoby,
 Ale džěštaj zrudnaj dom
 Z nječescú a porokom.

* * *
 Wěstym ludžom při jich zwadzi
 Khroble njebudž pomocny;
 Přetož hdyž jim zlě so radzi
 Abo nic po mysličcy:

Za džak winu přehraća
Pomocnikej přicipija.

(16. | 10. 1849.)

— * — 7
55. Jěž a kohlica. [38.]

Za myšinu jěž nuchota
A zetka kohlicu.

„Hdžež honiš ty“, jěž zawoła,
„Tam ja so pominu;
Móhl w džerach jězdzić ja, kaž ty,
Bych chcył so kormić knjezowscy.“

„„Što baješ““, — rjekny kohlica,
„„Što tebi nuza je?

Mje sowa, kraholec wotłaka,
Tež kóčka hrabnje mje,
Daj mi twój kabat jehlaty,
A dosć mam swoje žiwe dny.““

* *
Bóh stwori wšelke stworjenja,*

Da dary wšelake,
Zo wšitcy wšitko nimaja,
To jeho wola je;

Duž njemorkotaj njesćerpnje —
Wšo dobre nej' wšak hromadže!

(17. | 10. 1849.)

* 1. recens.: Dar, lóšt a brěmjo žiwjenja
Su wulcy wšelake,
Zo wšitcy wšitko nimaja
Pak Boža wola je;
Duž najbóle je zbožowny
Tu spokojny a sćerpliwy.

— * —

56. Pólny a wjesny šwjerč.

Šwjerč pólny něhdy wza sej khwile,
 Hdyž běše rjana njedžela,
 A pućowaše na poľ mile
 A k wujej do wsy doběža,
 Wuj wobćahnył tam korčmu bě
 A domował so pod kachle.

Po witanju a wokošenju,
 Kiž njebě tajke někajke,
 Po hosćinje a wotpočnjenju
 Wuj polowski so prašeše:
 „Nó, bratře, hdyž tu hercy su,
 Je słyšeć twoju pišćačku?“

„„O““, džeše wjesnik, „„ničo lóže,
 Tych stykam wšitkich do měcha;
 Naš jedyn něšto wjacy móže,
 A to so z teho wuhlada,
 Zo woni džeja wostajši,
 A ja pak piskam posledni.

* * *

Tak něchtóžkuli słaby, srěni
 Na wulkich hižo blawkaše
 A dobyća wěnc nosyc měni,
 Hdyž skhowa słowo poslednje,
 A so čím bóle khroboli,
 Hdyž nchtó z nim so njeměri!

(19. | 10. 1849.)



57. Wóslow prawowanje. [35.]

So črjódki wóstow na brjóžku
So wósly něhdy džělachu.
Duž nasta wulka měšeńca
A kopanje a překora,
Kaž něhdžežkuli přecelstwo
Při branju přińdže pod koło.

Mul, dobra wowca změrnawa,
Na jednanje sej prócu wza;
Kaž jandžel wón k nim řečeše
A měri, hlada, rjaduje,
Zo wulki, srěni, malički
Swój džěl by dostał po prawdži.

„Ty blada!“ jeni zaswarja,
„Ty šelma!“ druzy pluwaja,
„Ně! kón, to muž je hinaši,
Tón našu wěc njech wučini.“
Kón wołany tež přiběhnje
A měri, piše, woptuje.


Wón wšě te wósty zwoptawa
A wóslam wusudženje da:
„Ta wěc, kiž maće we skóržbi,
Mi lědma prócu zaplaći
A tehodla, kaž widziće,
Tu žadyn ničo njekrydnje.“

Hač to te wósly mjerzaše,
Zo jich proces tak wupadže?

Ně! małe wulkim popřachu
A wulcy džachu mjez sobu:
„Njech je! my wutrać budžemy
Tym małym ničo nanihdy!“

* *
Mjez khěžkarjom a mjez burom
Je zawisć jědowaty štom,
A tola lóže namaka
So w psowej khěžcy pomazka,
Hač jednota a popřečo,
Hdžež burjo su a khěžkarjo.

(Oktober 1849.)



58. Wysoke zemjanstwo


abo:

Topoł a slowčinka.

(Tydź. Now. 1849, 37.)

Na rjanu mlódnju slowčinku,
Kiž wurostła bě pod třechu,
So hordy topoł hóršeše:
„Što so tak šeriš, njerjedže,
Dla twojich módrych drjebuškow!“
„„Ach ja sym poľna wjeselow““,
Mu slowčinka duž wotmoľwi,
„„Zo njejsym prózdna na swěći.
Bych była tajka hoľa žerdź,
Kaž ty, bych hněwała so w smjerc!““
„Što?“ topoł hordže zawoľa,
„Ja žerdź — a prózdna! ha, ha, ha!
Haj žerdź! a hlaj, kak wysoka!“

(1849.)



59. Póselstwo wowcow. [39.]

Wot wowcow něhdy zebra so
Na krala lawa póselstwo.

„Knjez kralo“, jena rěčeše,
„Krwělačny wjelk nas zežerje;
To tyranstwo ty rozlamaj
A druheho nam knjeza staj!“

„„A koho?““ law so woprašaja,
„„Snadž pardela, snadž mjedwjedža?““
„Ach, miłosćiwy kralo, ně!
Daj zwěrjo nam, kiž trawu jě,
Njech elefant, kón, woł to je,
Zo jeno nam so lěpje dže.“

„„Dži z wočow mi““, law herjeka,
„„Ty swójba hłupje bječata!
Kaž bylo je, tak wostanje,
To prawo je wšak zastarske.““
Z tym sudom wołmonošerki
Su tyšne, zrudne domoj šli.

Duž podachu so nazajtra
Z tym póselstwom na čłowjeka.
Tón lubi škit a dobrotu,
To rěka pak — nic darmotnu:
„Štož zechcu hdy wam wzac a dać,
To za lubo pak maće brać.“

A jako lěto miny so,
Što praja wowcy dobreho?

„Přez cyly swět ta wěrnosć dže,
 Zo slaby přeco bity je
 A pyta-li hdže polěpška,
 Wón přińdže z luže do blóta.“

(18. | 1. 1850.)

60. Jednańska mzda. [36.]

Sultan, Neta, Filaks běchu
 Njeporadne psowiska.
 Z domom su pod jenej třěchu,
 Khuda je jich kuchina,
 Ale wójnu stajnu maju,
 Njepokoj a škerjedu,
 Džensa drje so wujednaju,
 Jutře zaso započnu.

Tute njedočinki zwadne
 Bella něhdy prošachu:
 „Bratře, ty maš dary skladne,
 Čiń mjez nami jednotu;
 My wšak chcemy twoju radu
 We wšem zwólnje poslušac
 A tež khostanje za hnadu
 Chcemy z twojej' rukow brać.“

Bello jedna, khutnje swari,
 Nowy porjad wustaji;
 Ale žel, wón khěžu twari,
 Kiž so na njoh' powali. —

„„Jedyn dostatk mamoj““, rjekny
Lapka k njej ta rubjana,
„„Kajkiž pak mi přichod čekny,
Znjesu jara spokojna,
Žanu krasnosć na swěci
Papjernik mi njerubi.

* * *

Z plačom husto knježa w swěci
Smjertnu dróhu nastupja,
Bjerje smjereć pak w khudej hěci
Wbohoh' rubjenc-nošerja:
Tón so lohcy spokoji,
Dokelž mało přisadzi.

(21. | 2. 1850.)

* ————— *

62. Kapon a wroble.

(Časopis M. S. 1860, 4.)

Řřed bróznju něhdy wo klósku
So wroble sylnje wadžachu,
A jedyn přemo druheho
Sej skoba drastne pjeričko,
A z njepopřećom hawtuje:
„Ty złodžijo! Ty paduše!“

Duž husy, kački nazdala
Tam wćipne hlówy zběhaja:
„„Njej' to naš dwór a hajnišćo,
Što chcedža tući prošerjo?““
A kapon, hejtman kurjacy,
Tam ćeri hladać horliwy.

Wón pasmo zwadne rozehna
 A swoje stadło zawola,
 Wón dikoce a wupraji:
 „Tu je kaž druhdže na swěći,
 Zo khlemi so přec' najbóle,
 Kiž prawo ma to najmjeńše!“

(Měrc 1850.)

✱

63. Krystal a dejmant. [40.]

Krystal a dejmant točenaj
 We woknje zlótnika
 So porno sebi blyšćeštaj,
 Kaž hwězda jutrnica;
 Štóž nimo džěše, wołaše:
 „Najswětliši pak dejmant je!“

Krystal bu poľny zawisće
 A muchi narěča,
 Zo dejmant wopancaja zlě
 A hroznje zabrudža.
 Štóž nimo dže, nětk mjenješe,
 Zo wón — krystal — tón rjeńši je.

Duž přińdže bur a praša so:
 „Što za tón bľuki dam,
 Mój luby, sprawny zlótniko?
 Ja móšeń slabu mam;
 Duž hakle na tón jasniši
 So khudy burik njezwaži.“

„„Tón bluki? aj, to dejmant je,
 Tón kupi jeno kral.
 Tón jasny, wujo, blazni će —
 To tuni je krystal!““
 Z tym zlótnik dejmant wurjedži
 A burej woči wotewri.

* * *

Kaž tu krystal so pozběha
 Přez muchi nješwarne,
 Tak šelma husto do přédka
 Přez přisłodnikow chce;
 Ta česć pak dołho njetraje,
 Łža nihdy wobstać njemóže. (August 1850.)

—*—

64. Kanarik a zyba. [41.]

*K*že křidleškomaj machotajo
 Kanarik w klětcy před woknom
 Najrjeńše hrónčka zaspěwajo
 So dawa slyšeć před swětom;
 Duž zyba k njemu přileći
 A z hlódnym hordłom fifoli:

„Kak dobry dzeń maš, bratře, tudy,
 Maš dosć a blido njedzelske,
 Naš jedyn sprócnny, hlódnny, khudy
 So přeplesć lědma zamóže;
 Duž wotčiń twoju khěžu mi,
 Njech wobjeduju při tebi.“

Kanarik hwizda: „„Aj to njeńdže,
Mje ryhle, zamki dźerža tu;
Štóž prohi mojej' khěže přeńdže,
Je zhubił wolu swobodnu;
Chceš ze mnu jěsć a kublač so,
Tak njesměš lětać wokoło.““

„Ně! žołtuško, mój bratře jaty“,
Duž zyba pódla fifoli,
„To pokazam rad lubje pjaty
Wšej twojej jasnej kermuši;
Kał bosy, suche skórčički
Chcu radšo jěsć při swobodzi!“

(August 1850)



65. Šwjerče a mrowje. [60.]

W róz přeni zemju přikrył je
A zymu připojdzí,

* 1. recens.: „Kak, žołtuško, mój bratře jaty,
Će tudy spěwać wjeseli?
Ně! přeni lěpši dzeń ja pjaty
Bych pokazala twojej jstwi —
A z cyła, hdy by njespěwał,
Će njeby nchtó zawjerał.“

Kanarik praji: „„Mi njej' znate,
Što jastwo je, što swoboda;
Duž zaspěwam, kaž mi je date,
Mje hlód a zyma njejima;
A njeměł tež so wubjernje,
Wšo dobre njej' wšak hromadže!““

Na šwjerče přińdže stróženje
 Wo přichod wozymski;
 Duž k mrowjam ćahnu do dwora
 A jedyn piskać počina:

„O naše sotry najlubše,
 Wam powěsć nowu dam,
 Zo w swěće zhromadnje wšo je*
 Nětk knjez a zakon sam;
 Duž wurunajmy so tež my
 A džělmy kubła bratrowscy.“

Pysk čorny mrowje zběhachu
 A džachu: „„To by šło.
 Praj, w kotrym kraju, kućiku
 Je waše kubleško?
 A nimaće-li nuknicow,
 Kak wjele maće tysacow?““

„Tak rozymić so njesmě to“,
 Šwjerč barbi škrěčicy,
 „W tym času wjele swojeho
 My hišće nimamy,
 We hłowje pak a w rukomaj
 Naš kapital a kubło staj.“

„„O bjezkholowcy!““ wołachu
 Wšě mrowje smějicy,

* 1. recens.: Zo kommunismus w swěće je.

„„Wam ani jehlu hejkojtu
Do džělby njedamy;
Što budže, hdyž smy dojedli?““
„Pon džělimy so z druhimi!“

(November 1850.)

— * —

66. Rubježne pčoly.

Pčolam něhdy wušla běše
W léce pastwa bohata,
Hdyž přez dny so deščik džěše,
Wětřik zymny zaduwa;
Duž lud jedyn zradzi so
Wučahać na rubjeństwo.

Banda padušna a lěnja
Swlěkaše nětk susodow,
Někotre haj hišće měnja:
„Wojebać so do kwětkow,
Tych so wjacy njedótk'my —
Tak smy žiwe kralowscy.“

Haj, haj, takle žiwe běchu
W krasności a wjeselu,
Štož sej nakradžechu, zjěchu,
Zbytk njej' dobyć za zymu;
Z wukanjom po rubjeństwi
Dobry čas tež zaleći.

Hubjeńše su najposledy
Po wšej swojej krasności,

Jako hdy su byle prjedy;
 Wěš-li dónt jich wjećeŕski:
 Nalěto je nam'kaju
 Z hlodom morwe we kołču.

* * *

Njehaj z paduštwom sej žadać
 Dobry dzeń a poľnu šku;
 Lěpje je po česći tradać,
 Hač so kormić. z njeprawdu,
 Wužitka ći njenjese
 Ženje kubło njeprawe! (10. | 12. 1850.)

— * —

67. Łhaŕ.

(Časopis M. S. 1849—50, 55.)

„Ma dorych wulke pjenjezy,
 O ludžo, pójće k pomocy!“
 Tak něhdy lóze hólčisko
 Je wonkach w polu wołało;
 A jako ludžo přiběhnu,
 Ma z kamjenjom jich k lěpšemu.

„Mi kruwa w bahnje zapadny,
 O ludžo, pójće k pomocy!“
 Tak z keŕkow won je wołało
 To samo lóze hólčisko;
 A jako ludžo přińdžeja,
 Wšak widža, zo tež to je lža.

„Ach, ja so nurjam do wody,
 O ludžo, pójće k pomocy,
 Džens dušu njeľžu, poběhńće!“
 Tón samy pachoľ křikaše.
 „„Tón lhař so kupa““, prajachu.
 Wón tepi so — to mě za mzdu.

* * *

Lhař přinjese so wo wěru,
 Zo jemu na wšěm posledku
 Tež wěrnosc wjacy njewěrja,
 Kaž jara so tež zaroća,
 A štož je pódla najhórše:
 Wón swojej škodže njewuńdže.

(1850.)

— * —

68. Šeršeń a pčoľki.

Wot srokopjela šeršeń honjeny
 Do koľča najbližšeho zlecił bě;
 Tam pak ma stare zwady.
 Što pomha, smjertne strachi přemóža,
 Wón zwažny fukny ruče do koľča,
 Hdyž njewě druhej' rady.

„Mje, lube pčoľki, prošu, khowajće,
 Hlaj za pjatu mój mordař tudy je
 A trašnu smjerc' mi hrozy;
 Ja nohcu nihdy wjac' was wobškodzić,
 Chcu wěčne přecelstwo wam polubić,
 Hdyž sym na wěstěj nozy.“

Duž džachu pčolki poľne želnoće:
 „„Haj, wostań tu, a wěčne zabyće
 Njeh stare křiwdy tupi!““
 A jako zalećil bě srokopjel,
 Što činješe naš pčolkow njepřećel? —
 Wón panku mjeda wupi!

(1850.)



69. Huso a liška. [42.]

Sněhběla liba šćebotajo
 Je něhdy w haće pluwala,
 Duž wot boka so přisnowajo
 K njej liška praji ludařska:
 „O lubša, njeh će wokošu,
 Ja přemóžnje će lubuju.“

„„So boju maćeřneho swara““,
 Duž wotmołwi ji husyčka,
 „„Tež je mje ze wšěm hańba jara,
 Ja hišće njejsym košila,
 Sym njezhonjene džěćatko
 A pódla — tebje boju so.““

„Ty njechaš? nochceš wo mnje rodzić,
 O to ja dlěje njeznjesu,
 Z tym budžeš mi a sebi škodzić,
 Ja wozmu štryk a šibjeńcu,
 Na wjerbje, wólši najbližšej
 Smjereć pytam, jeli žel ći njej.“

A dokelž hišće njehotuje
 So z wody běla husyčka,
 Duž liška štomy wobhladuje,
 Na kotry by so powsnyła;
 A jako poł dnja nimo je,
 Na prečku puć so dawaše.

„„Aha! nětk widžu njepotajnje
 Tu lubosć““, — woła libuška.
 „Ach!“ plače liška, — „njewuprajnje
 Sym zrudžena a mjerzaca,
 Zo žadyn štom we blizkosći
 Njej' sylny dosć, mje njedžerži!“

* * *

Kak lesć a hněw a hańbu tajić
 Wě jebak a so wusprawnić,
 To chce ći tuta baseń prajić
 A pódla na to dopomnić:
 Na jazyku so nosy měd,*
 A we wutrobje samy jěd.

(Februar 1851.)

To lež!

70. Knjez Hawł. [43.]

Kaž Salomo bě bohaty
 Knjez Hawł a čłowjek ponižny,
 Poł kraja jeho znaje;

* Čas. M. S. 1849, 53. Kak dobra duša dowěrna
 So z wjetša přeco zjebać da.

Wón stajnje blido kryte ma
 A syłu hosći powita,
 Tež khudym swój khlěb kraje.

Tón bohaty a darny knjez
 Bū pozběhany do njebjes,
 Kaž kóždy wěrić budže;
 Wón jeno zyknyc trjebaše,
 A k jeho službje spěchuje
 So kóždy rad a wšudze.

Wšo zbože pak je njeswěrne,
 Kaž knježe služby kulojte —
 To so tež tudy zhoni.
 Knjez Hawł, tón prjedy bohaty,
 Kaž cyrkwinska myš wokhudny
 A hórke sylzy roni.

Wón prosyc dze a plakaše,
 Što joh' najbóle boleše?
 Štó mi tón podawk zhóda?
 Ty myslíš, zo je spuščila
 Nětk jeho syła njedzakna
 Toh' kormjeneho knjeza.

Ně! hórje jeho boleše.
 Zo dał bě mužej najmjenje,
 Kiž najprjódcy bě hódny,
 A to bě šedziwc khablawy
 We nizkej khěžcy domjacy
 A husto khory, hlódnny.

Tón Hawła prosy ze sylzu:
 „Pój nětko ke mni pod třěchu,
 Syń so za blido moje,
 Štož moja ruka zamóža
 Hač do mojeho skónčjenja,
 To budže sobu twoje.

A jeli woči zandželu
 Ja prjedy tebje ze smjercu
 A skónču sprócne lěta:
 Ty wobsedzeř sy wšitkeho,
 Štož je tu moje rěkało,
 Tež twoja je ta hěta!“

* * *

Hdyž nuza z durjemi nutř dže,
 Rój přecelow so pominje,
 Won z woknom zeskakaju —
 So druhdy pak tež nam'kaju,
 Hdžež ze swěčku a z latarnju
 So žani njepytaju.

(6. | 3. 1851.)

— * —
71. Nabob. [44.]

Knjez Nabob z měšćanskeje hary
 So sćeže do wsy ćichownej',
 „Tu njejsu zawidžeřske swary,
 Tu pokoj mam“, wón mysli sej,
 „Jow bohatstwo a žiwjenje
 Mi słodzić budže najskerje.“

Knjez Nabob nětko wužiwaše
 Swój pjenjez w połnym wjeselu,
 A jako něhdy posłuchaše,
 Što praja burja na kraju,
 Wón słyšeše: zo zmija ma,
 Je kormjeńk, hordačk, lidora.

Knjez Nabob ruče rozmysleny
 Wšěch služobnikow rozpušći
 A somot, židu wuslečeny
 Po bursku wšitko přestwori,
 Wón z nizka žiwy ponižnje
 Hroch, kulki, kał a boby jě.

Knjez Nabob wćipny posl'cha z nowa,
 Što burja nětko pojda ja.
 Ach, nětko hakle twjerde słowa
 A zły sud na so wusłyša:
 Tón skupy slěpc, čert lichowny,
 Tón zdernje hišće z gramoty.

Knjez Nabob rjekny rozmjerzany:
 „To so mi nihdy njelubi“,
 A hnydom leći rozdawany
 Šac jeho — buram do ruki;
 Haj, haj! wón rozda bohatstwo,
 Do khudej' budy sydže so.

Česć Nabobowa přez wjes klinči
 Wot ranja hač do wječora,

To jemu rjenje w wuše zynči
A jeho hordosć loskota.
„Aha!“ wón praji z dowěru,
„To wědzach ja, zo přewinu“.

Hač Nabob nětk je wumóženy
Wot hubow zlych a wopluska?
Nětk tola wěsće spokojeny
Swój drohi pokoj wužiwa?
Ach, lědma lěto nimo dže,
Wón swoju khwalbu słyšeše:

Hi hi toh' něhdy bohateho!
Raws wbohi, kak so tamle drje!
Wón nima pokhilenja zleho,
Škórc puzorny pak wostanje,
Wón, jako pokład rozdari,
Bě tola blazyn dundyrski!

* * *

„Wšěm prawy być“ — štóž za tym wudži
A njewě sam, što prawe je,
Z tym je so stało, tón so prudži
A wětřik haćić spytuje;

Kiž móhl wšěm prawje wutrjechić,
Ma wšak so hišće narodzić!

(11. | 3. 1851.)

72. Khudy muž. [45.]

Muž khudy khodži po lěsu
A sylzy rozliwa,

Zo běše zhubił móšničku,
Hdžež tčeše jeho mzda.

Duž k njemu w holi přiwda so
Knjez jara wosebny,
Tón praji: „Wbohi mužiko,
Što plakaš pytajcy?“

„„Wo moju móšeń žaruju,
Kiž zhubich we holi,
W tej mějach wšo, štož zamóžu
We mojej khudobi.““

„Nó, nó! snadź rada budže cí“,
Knjez cuzy měnješe,
„Ja nam'kach tři te móšnički,
Snadź jena twoja je.“

Wón přenju móšeń wučahny
Bě poľna toleri —
„Je tale, kotruž zhubił sy,
To jowle ju sej wzmi.“

„„Ně!““ khudy mužik wurazy,
„„Ta knjez mi njerěka.““
Duž wjetšu móžeń wučahny
Tón knjez a pokaza.

Ta poľna jasnych zlotych bě;
„Je ta?“ so prašeše,
Muž khudy džeše zrudny: „„Ně!
Ta wulkich knježich je.““

Knjez wosebny zak přemasa
 A třeću wuceže —
 „„Haj, to je moja móšnička““,
 Muž khudy swědčeše.

Knjez wusmjja so a wotmołwi:
 „Ty sprawna wutroba!
 Wzmi, luby, wzmi sej wšitke tři,
 To sprawnosće je mzda.“

Štó bohatši a wjeselši
 Hač tutón khudy bě,
 Wón plaka, spěwa, poskoči,
 Kaž zamóže a wě.

Tón podawk bórzy pojda
 Po cylej krajini,
 Jón šelma skupy zasłyša
 A sebi nałoží.

Wón saha hnydom do lěsa,
 Preč ćisnje móšničku
 A wujo wjaza kózlika
 Wo móšeń pod khójcu.

Tež k njemu w lěsu nam'ka so
 Tón znaty kubolćik —
 „Što plakaš, wbohi mužiko,
 Kaž tyšny sołobik?“

„„Ach, ach, ja móšeń žaruju,
Kiž zhubich we holi,
W tej mějach wšo, štož zamóžu
We mojej khudobi.““

„Nó, nó, snadź budže rada cí!“
Duch lěsny měnješe.
„Ja nam'kach tři te móšnički,
Snadź jena twoja je.“

Wón přěnju móšeń wučahny,
Kiž bě ta šelmowa —
„Je tale, kotruž zhubił sy?
To wzmi ju, jowle! — na!“

„„Ně!““ šelma šibak wurazy,
„„Ta knjez mi njerěka““ —
Duž druhu, wjetšu wučahny
Duch z kapsy z njemała.

„„Tež ta njej' moja!““ měnješe
Tón šibak lakomny.
Duch třěcu móšeń pokaže:
Te złote pjenjezy!

„„Haj, to je moja, zawěрно!““
So šelma słyšeć da.
„Ně, to je moja! jebako!“
Duch lěsny zawrjeska.

* * *

Štóž trada radšo po česći,
 Hač lže a wujeba,
 Tom' rosće khlěb we khamori
 A toleř nawdawa! (15. 3. 1851.)



73. Škrěkawa a džećelc.

(Časopis M. S. 1862, 95.)

W duba žoldže wotnošować
 Džećelc widži škrěkawu,
 W lěsu hrjebać a je khować
 Widžeše ju njesprócnu;
 Duž so na nju roznjemdri
 A ju takle naswari:

„Skupa towařska na dubje,
 Nimaš dosć jow na štomje?
 Praj, kak so ći nosyć lubi
 Hišće tež do khowanki?
 Jěmy kóždy, štož tu je,
 Zbytk njech druhim wotpadnje!

A hdyž zemju swój čas budže
 Prikryć sněh a zasypać,
 Móžeš žoldže tu a druhdže
 Skhowane zas namakać?
 Wopomń, hač njej' podarmo,
 Zo tu wšědnje drěješ so!“

„„Žoldže měc a wotnošować““,
 Škrěkawa so zamołwi,
 „„Do khowankow zhromadźować,
 Ach, to złoty lóšt je mi;
 Było jich, kaž deščika,
 Wěr, ja bych wšě hrjebała!““

* * *

Stejće, skupi, kopić w swěci
 Mamon, kiž was čwiluje,
 Kiž nic wy nic waše džěci
 Wužiwać drje njeb'džeće,
 Ale herbjo smějkaći
 Póńdu wam za marami.

Kaž hdyž sroki zhromadźene
 Z koša sydrjec pokradnu,
 A jón drjebja rozčerćene
 Z kusanjom po trawniku:
 Tak, kaž z tutym sydrjecom,
 Budže z wašim namrěwkom!

(20. 2. 1852.)

— * —

74. Paw a slónčko.

(Lužičan 1860, 33.)

Ne złotych wrotow stupaše
 Won slónco majestetiske,
 Paw sedzi na třěši;
 „O slónčko, wulki blyšćerjo“,
 Wón škrěka, „twoje wobličo
 So mócnje zyboli.

Wěš pak, hdyž ja so wupinam
 A swoje koło pokazam,
 Zo swědči cyła wjes:
 Kak moje pjerjo kóždzičke
 Třibarbne slónčko krasne je
 A ja sym rjeńši knjez.“

So slónčko pawej směješe
 A džeše: „„Kak dha tehdy je,
 Hdyž nóc će wobkhadža?
 Zo ty był rjeńši, sławniši,*
 To jenož w twojej hłowje tči
 A džěci wołaja!““

* * *

Hdyž hordosć koho wobeńdže,
 Tón sam so wjacny njeznaje;
 Zle hórše pak so zda,
 Hdyž wupjera so małuški,
 A starši a čím hlupiši
 Tu khudu hordosć ma. (10. | 3. 1852.)

* — *

75. Bože žohnowanje.

Po swěće džěše Bože žohnowanje,
 Bě runje z něšto domow wuhnate,

* 1. recens.: Štož na tebi so miškori,
 To wote mnje su požčenki,
 A nihdže njewěrja!

A pytaše přez ćiche zakłapanje
 Sej nowy dom a sydło witane.
 O božedla! z kak požadliwym duchom
 Na hospodu je kóždy požada.
 Najwyšši, kaž najnižši z kedźbnym wuchom
 Při durjach posł'cha, hač so njekłapa.

Što zechce być? wšo tyšnje wočakuje
 A pilne džěło z rukow položi,
 So złotych horow kóždy zwjeseluje
 A dobrych dnjow we wěstej nadźiji.
 A dokelž dróhownik — to žohnowanje
 So někotrym přez měru komudži:
 Duž njesćěrpnj na dołhe počakanje
 Su mórčo zas' na swoje džěło šli.

Tak džělaše tež khudy muž na roli,
 Swój kěrluš spěwajo a pomysli:
 „Ja jenož přeco chcu po Božej woli
 Kaž prjedy swoje džěło činići.
 Hdžež hołbje su, tam zaso hołbje leća,
 Štóž pjenjez ma, tón pjenjez přikrydnje. —
 Tak było je čas čłowškoh' dopomnjeća!
 K nam khudym žohnowanje njepřińdže.“ —

„„O kajki bład a zmylka““ džeše k njemu
 To žohnowanje stejo nazdala.
 „„Ja k wšitkim přikhadžam, tež k najnižšemu,
 Štóž jeno prawje durje wotewrja.

Ja runje nastajich so k twojej khěžcy,
 Hdžež Bóh je prjedy, tam ja za nim du; —
 Duž spěwaj, džělaj, dži po Božej šćežcy:
 A hdyž je čas, ći mój dar přinjesu.““

(11. 10. 1852.)



76. Jeleń a jeho syn. [46.]

„**X**aj, wopomń“, rjekny hojo k nanej,
 „Kak hordej nosyš rohiznje,
 Tej njejstej k pyše jenož khmanej,
 Ně! nałož jej tež k nadobje;
 Hlaj, tamle slónčko dele dže,
 O přikol, nanko, popadń je.“

Hlaj, z kachlowymi widlicami
 Je kóžda žónka dosahnje;
 A měli potom kulu sami,
 Dha džeń a nóc tež naša je;
 Za bližšej hórku dyrbi być,
 Ju hrajo móžeš dosćěhnyć.“

Nan jeleń džiwaše so jara,
 Kak jeho synk žno mudry je;
 Tak wažna wěc tež jeho stara,
 Duž slónčko łojić sahaše;
 Wón sto drje hórkow přeleći —
 Za žanej slónčko njesedzi!

* * *

Kaž tuta próca jelenjowska
 Plód dobyć nihdy njezamó:

Tak podarmo je naša čloŕska,
 To wuslédzic, štož přikry Bóh;
 Naš přemudry duch zawutli —
 Štóž wěri, džěl ma najlěpsi! (28. 10. 1852.)



77. Pólna myš we wsy. [47.]

Myš pólna, Hapla Hrymzakowa,
 Swój wonkowski dom wopušci,
 A do wsy puć so k céce snowa,
 Kiž w bróžni bě na hospodži;
 Tam runje přińdže khwatniwa,
 Zo swjećeše so kermuša.

Na přetře wulke reje běchu
 Po němsku, serbsku, po pólsku,
 A sedžo na hrjadach pod třěchu
 Jim hercy dele piskachu;
 Sam džěd dze z wowku do reje,
 A jěsć a pić bě do wole.

„Ach, kajke bohatstwo a radosć“,
 Myš pólna praji, „tudy je;
 Bych měla wulcy wulku žadosć
 Tu wostać, jeli přidaće!“

„„Haj, wostań, ćeta najlubša““ —
 Wšě z jenym dohom wołaja.

Nazajtra, jako hišće spaše,
 Połpjana mučna myšina,

Juž „klip, klap, klip“ so slyšeć daše,
 A snopy leća ze přatra,
 Tež Hapla padže na huno —
 „Mordjo, što nječini so to?!“

„Štož móže, čekń, njech lećo ćeka!“
 Bě hesło a křik myšacy.
 „Do woršty dele!“ — nětko rěka,
 Štož blědej smjerći wuběhny.
 Tu měchu nowu khowanku
 A strach a hrozu zabychu.

A šěrych hosći hospodować
 Tež woršta dolho njemóže;
 „My dyrbimy zas přećahować!“
 Duž bórzy zaso rěkaše;
 Khlěb žadny bě, smjerc wěsćiša,
 Čim wjacy wšědnje womlóća.

Duž, kaž to wšitke spóznawaju,
 Bě skónčeny čas kermušny,
 A nahlu smjerc za pjatu maju,
 Wša krasnosć z razom wobłědny;
 A khromy posoł wjesela
 Jow svojich ludźi doklaca.

Štož wuńdže zabiću, to kóčka
 Tam z lóžkej prócu spopada;
 Přez nohu spěšnu, swětle wóčka
 Pak Hapla smjerći wuběža

A ćeri wróco do pola
A wuzna wěrne wuznaća:

* * *

Bjez bojosće pod swojej wěchu
Kusk suchi lěpje zesłodzi,
Hač kermuša pod cuzej třěchu
We njeměri a starosći;
Za tajki blyšć a kermušu
Ja spušču tež Australiju.

(11. | 4. 1853.)

— * —

78. Invalida a psyk. [48.]

Zle, falšne psysko njezwjazane
Bur něhdy w dworje žiwješe,
Na nadpady bě překlepane;
Kaž bórzy něchtó nimo dže,
Pod wrotami so wuwali
A skót a ludži wobškodži.

Mjez ludom, kiž tam wusta hary
A dyrbješe so wobarać,
Tež běše invalida stary,
Tež teho nadpadže tón drač
A zhraba jeho do nohow
Po wašnju svojich počinkow.

Duž wojak so nic njewohladny
A z hordom smějo dale dže.
„Mje kusaj, jědo njeporadny“,
Wón praji, „kaž će lóštuje!

Ja nošu nozy drjewjanej,
Kiž krej a mjaso nimatej.“

A dokelž psa wón kedžbu nima,
Tam husto nimo khodžicy,
Kažkuli zakhadža a přima:
To zlehny so hněw psykowy,
Hač naposledku njeblawknje,
Hdyž invalida nimo dže.

* * *

Chceš wotbyć blawkarjow, zlych ludži,
Zacp jědojte jich nadpady;
To džě jich zlósc najlěpje skludži,
Hdyž směješ so a změrom sy.
Štóž pak so z nimi škerjedži,
Zle hórše sebi načini.

(14. 4. 1858.)

— * —

79. Jehnjatko.

(Zahrodka kwětkojta II, 41.)

Sněhběle mlode jehnjatko
Na pastwu něhdy džěše,
A po džećelku skakajo
Tak zlóštne, wólne běše.

Hop, hop! přez pjenki, kamjenje,
Tam khroble sahi džěla;
„Stej, džěćo, stej! to budže zlé!“
Mać woła a so hněwa.

To mižatko pak z wólnosću
 Přez hory, doły skače,
 Hač na posledku pod hórku
 Dla lóžkej' mysle plače.

Tam kamjeń leži — „hopsa hej,
 Tón přelec!“ — wono praji;
 A hlaj, duž nohu zlemi sej —
 Tu lóšt a směch so staji.

O lóštne džěci zapišće
 To sebi do wutroby:
 Ta radosć, kiž přez měru dže,
 Ta wjedže do zrudoby!

(1853.)



80. Hola-wučerka. [49.]

Po holi něhdy dróhař dže
 Wot nocy překhwatany;
 Nóc čorna křidła šěrješe
 A pućej swětlo krany;
 Duž džeše, puća njeznaty,
 Tón dróhař: „Tu sym zhubjeny!“

Wón spyta pytać koliju,
 Wón masa a so khila;
 Čma rosće z kóždej kročelu,
 A ze ćmu jeho čwila,
 Hač plačo stejo wostanje,
 A khójny džachu pódlanske:

„„Štóz sćežku nam'kać přez hole
Po ćmě a w nocy žada,
Tón k njebjesam, nic do zemje,
Ze swěrnym wóčkom hlada;
Wot zemje radu nječakaj,
Do našich wjerškow pohladaj.

Kaž wurubanu sćežčičku
Tam swětlu widžiš smuhu —
Tu čaru dži, měj před sobu,
To nam'kaš — a maš pruhu:
Kak po ćmje a kak wbozy su,
Kiž zacpja swěcu njebjesku!““
(4. | 2. 1854.)



Sl. Tkhór a kóčka.* [50.]

Něhdy nócnik jeja-pijeński
Tkhór so zetka z kóčku we bróžni,

* 1. recens.: Tkhór a kóčka podeńdžeštej
Při nocy we bróžni so,
Přećelnje so rozmołwještej
Wot teho a tamneho,
Kaž hdyž wuj a ćeta hdy
Zetkatej so njejabcy.

„Ach, štó by so takle w swěći,
Luba ćeta, měł, kaž ty,
Mje a moje drobne džěći
Njeby hlód žrał zatrašny“;
Takle tkhór so słyšeć da,
Kóčka želnje posłucha.

A ji skorži, kak je hlódnny.
Mica hnydom poľna želnosće
Jeho přeprosny na snědanje,
Potom tež na wobjed slódnny.

„Ale, lubša, hdže maš městačko,
Hdžež cí twoje jědło staja so?“
Tkhór so ćety kóčki praša.
„„Nó, na ławje nutřkach zhotuje
Mi najbóle blido hosćinske
Hospoza, pak džowka naša.““

„Nutřkach we jstwje? ćeta, khort, naj, naj!
To su wuzke mjezy, ćesny kraj“,

Chce so rada nad nim smělic,
Jutře rano w kuchinje
Snědanje a wobjed džělic
Z nim we wěrnym přecelstwje,
Rjeknje: „„Wostań pola mje,
Dosć tu budže za tebe.““

Tkhór so boji a so spěra,
Z kóčku njecha do khěže,
Słaba běše jeho wěra
Do čłówskeje lubosće,
Ćekny hižo do ranja,
Prjed' hač ludžo stawaja.

* * *

Wšudže ma so hladać škódnny,
Dokelž ze swědomja wě,
Kajkeho je myta hódny,
Duž je poľny bojosće.

Džeše tkhór, „to njeje za mnje;
W pincy mać mi ludžo zabichu,
Loni jachu nana w kurjencu,
Zlósć a hněw tež maju na mnje!“

* * *

Bojosć njeprawdosće čwila je,
Hrozu před prawdosću začuje
Kóždy pakosćak a škódny,
Dokelž hižo ze swědomja wě,
Štož njej' prajiło jom' zhonjenje:
Kajkeho je myta hódny! (30. 5. 1854.)

—*—

82. Pliška a kokula. [51.]

So pliška šeri na hnězdzi
A jejka wohrjewaje;
Duž kokula k njej přileći
A skóržbu slyšeć daše:
„Mi muž je wušoł do swěta,
Što započnu ja samotna?“

Njeh jeničke ja jejko ći
Mjez twoje sobu kladu,
To wulke njej', o njezacpi
Mi wopokazać hnadu,
Kiž moje džěcatka a ja
Ći nihdy zabyć njesmědža.“

„„Ptak wulki““, pliška mysleše,
 „„Kiž će tak lubje prosy,
 Tón smilenja drje hódny je,
 Hdyž tajku starosc nosy;
 Duž wopor jemu přinjesu,
 Wšak plaćić chce mi z dobrotu.““

Pječ džěci na tři njedzele
 We hnězdze pliška widzi,
 Je skubła poľna lubosće
 Při swojim snadnym blidzi;
 Najbóle rosće kokula
 A pysk najšěrši rozdaja.

Tak přemóznje so rozšěri,
 Zo z hnězda wupadachu
 Či druzy bratřa, sotřički,
 So zbichu a kónc wzachu —
 A přeměnk, wulka kokula,
 Bu z cuzym kubłom skubłana.

* * *
 Přez dobroćiwosć wěrkojtu
 Tak něchtóžkuli kupi
 Sej njepřecela do domu!
 Duž njebudźće tak hlupi
 A wopomńće, što scěhuje,
 Prjed' hač sej rucy zwježeće!

(13. | 6. 1854.)



83. Liška a wjelk. [52.]

Wjelk z lišku čehnje po lěsu,
 A wuhladataj wjewjerću
 Cuk cuk! na spěšnej nozy.
 „Ach“, woła liška, „brunačko,
 Ja njesu dobre póselstwo,
 Što čekaš w tajkej hrozy?“

Duž wjewjerca so zastaji
 A džeše: „Što maš prajić mi,
 A hdže sy, četa, byla?“
 „Pój sobu“, liška zablawka,
 „Law kral će nuznje potrjeba
 A je ći dobry z cyła.“

Wón nowy porjad požada —
 Ty budžeš wyšša kuchařka,
 Ja naliwać jom' budu,
 Wjelk budže drjewo přinošeć
 A wowca jědže wudželeć
 A sorna sydać k sudu.

Tam zajac budže huslować
 A šwinc na mjehkim stole spać,
 A nic we wložnej džěrje;
 A pječene a warjene,
 Haj, kajkež jědło žadyn chce,
 Tam budže w poľnej měrje.“

Duž přińdže z khójcy wjewjerca
 Na krasny přichod wjesela —
 A što je so nětk stało?
 Ju liška hnydom popadnje
 A k wobjedu sej zarěže —
 Wjelk wot njej' dosta mało.

„Aj“, rjekny wjelk, „kak wěš ty lhać
 A z wulkim nožom přikrawać
 A slódku činić hubu!“

„„O wjelko, wulki blazniko““,
 So liška směje, „„što je to,
 Ty drje mi rěčiš k lubu?“

Nětk w swěće druhi trjebaš dych,
 Nětk wěrnosćiwych, zelhańnych
 Rad z jenym lohćom měrja;
 Duž rěka: lži po djabołsku —
 Na dobre zbože položcu
 Tak abo tak ći wěrja!““

(16. | 6. 1854.)

— * —

84. Baćon a wrobl. [53.]

Bur koło stare donjesł je
 Na lipu přidomsku,
 Do teho baćon twarješe
 Sej dom, kaž twjerdźiznu,
 A klepoce a přinoša,
 Hač mučny dzeń so dokonja.

To wjesny wrobl widžeše
 A khwata k pomocy,
 A přimołwjaty, kajkiž je,
 A česće lakomny
 Swój ćeńki prućik, słomičku,
 Tam přikladuje na kromu.

A jako twař bě hotowa,
 Kaž wulke hrodžišćo,
 Tu wrobl po wsy šćerkota:
 „O hlajće, susodžo,
 Što ja a baćon móžemoj,
 A kajkaj mištraj mój wam smój!“

„„O wroblo, słabe pacholo,
 To sy sej wjele zdał,
 Mój dom njej' twoje hnězdaško,
 Tón bjez tebje by stał!““ —
 Tak baćon z hnězda klepota,
 Směch za česć wrobl dostawa.

* * *

To wšak je směch a njeprawda,
 Chce karnikař česć mištera! (20. | 6. 1854.)

* — *

85. Konopačk a sykorki.

(Časopis M. S. 1860, 5.)

Štóz wusměša wšo hinaše,
 Hač móže sam a ma,

Je zdaty blazn najskerje,
Pak wulka zympula!

* * *

„Ně, ale praj nam konopačko“,
So slyšeć dachu sykorki,
„Praj puzorny a směšny ptačko,
Štó spěw a wašnje dał je ći?
Zlož po nami so božedla,
Će kóždy hewak wučuša.

So cyle lěto njesmějemy
A k žortej khwile nimamy;
Hdyž na tebe pak pohladamy,
Hdyž přičehnješ sem spěwajcy:
To woła kóžda heč, heč, heč!
A dyrbimy so khore smjeć.“

Ptačk konopačk so njemjerzaše,
Na wusměšenu njerunosć,
„„Wy blaznicy!““ wón zaspěwaše,
„„Njej' Bóh sam chcył tu wšelakosć?
To česć je jeho mišterstwa,
Zo kóždy ptačk njej' sykorka!““

(5. | 8. 1854.)

— * —

86. Mjedwjedźaj. [54.]

Dwaj w lěsu něhdy mjedwjedźaj*

Na hornyk rybow storčištaj,

Kiž při wohnju so warješe.

Duž mórčo kóždy póznawa:

„Aj, to je žadna hosćina

A jědło za naj' kralowske.“

Huj! po rjadu do hornyka

Duž kóždy ruče pomasa,

Zo častku wučahnył sej by.

Tu kóždy pak so zakhrěni,

Hdyž pacu sebi wopari,

Kaž do hornyka pomasny.

Duž radžitaj sej, nazdala

Tón hornyk sěahnyć wot wohnja

A potom ryby wukidnyć.

To dže. Što zas' pak dujetaj

A skakataj kaž kołwrótnaj?

Je móhło něšto wopak być?

O jerum, nětko k přidawkej

Tež khlamu sebi sparištej

Na časćach hišće warjacych.

* W Časopisu M. S. 1853—1854, II., p. 75 je basń po słowach z džěla trochu hinaša, dokelž ma tam kóždy rjadk na započatku zlóžku mjenje, n. př.: Mjedwjedźaj we lěsu dwaj

Hornyk rybow nam'kaštaj,

Při wohnju so warješe atd.

Te ryby studnu na zemi —
 Khelp dźetaj wonaj wostajši
 Zas' přeč do holow zelenych.

A jedyn přemo druhého
 Tam žaruje a hněwa so,
 Zo jeju jědło kralowske
 Je woheń takle skóncował
 A jemu tajku horcosć dał,
 Zo wužiwać so njemóže!

* * *

»Ničo-njewěm« škodu ma,
 »Něšto wědžeć« njepomha.

(1854.)

— * —

87. Mjetelina próstwa. [57.]

Na štalt a wodźew njepyšny
 Bě mjetel kałowa
 We wšědnej bělej sukničcy,
 Huj, jara mjerzaca;
 „Ach, luby Božo na njebjū“,
 Duž wona prošeše,
 „Ach stwoř mje tola rjenišu,
 Kaž tysac druhich je.“

Bóh jejnu próstwu dopjelni,
 Kak njelepa tež bě;
 Ju přestwori a přebarbi. —
 O to bě wjesele!

Duž lěta lóštnje wokoło,
 Jězć lědma khwile ma,
 A horda pokazuje so,
 Hač zrudnje so z njej sta.

Dla jeje rjeńšej' suknički
 Ju hólčec popadže,
 A z wjes'lom jejnej krasnosći
 Kónc zažny činješe;
 Wón překló jejnu wutrobu
 A mjetel zastona:
 „Ach, měla přědnju sukničku,
 Bych žiwa wostała!“

* * *

»Wy njewěsće, što prosyće«
 To wěrnosc je a wostanje. (1854.)

— * —

**88. Rano woł, připołdnju élo, popołdnju
 myš, wječor ničo. [59.]**

Wjelk, hišće syty wot wčera,
 So lehnyć běži do lěsa
 Na hórku, jako slónco skhadža;
 Duž tučny woł tam nimo dže.
 Wjelk sparny hłowu pozběhnje,
 A štoha jemu mysle radža?

Daj kadli běžeć! najebać!
 Chceš so tak zahe dračować?!

Tych wěsće so tu wjacy honi. —
 Wón přeběra so z lěnjosću,
 Hač steji slónco na połdnju
 A k wobjedu žołdk prózdny zwoni.

Nětk celo nimo khelpaše. —
 Wjelk, dokelž bjez snědanja je,
 So hotowaše na nje stanyć,
 Wón stawajo pak pomysli:
 „Ně, ale njeje hańba ěi
 Po wolisku na celo panyć?

Njech, nej' tu wołow retomas,
 Tón jedyn tola přińdže zas'
 A je mi skerje prócy hódne.“
 Nic wopuš pak so njewróci,
 Hač popołdnje so přibliži
 A wjelkej korča črjewa hlóдне.

Wón z hórki dele zhladuje. —
 Duž myš tam nimo přiběhnje,
 Za wjelka hewak špatne žratwo;
 Wón z mjerzanjom tež zawoła:
 „To zatrašnje jow woběra,
 Tu narosć njebudže mi sadlo.

Nó, myš pak nihdy nježeru,
 Štó znjese tajku hanibu?
 Chcu próznu słomu radšo mlóćić —
 Hdyž hinak nej', to na celo
 Ja radšo lakam čakajo,
 To z najmjeńša so dyrbi wróćić.“

To ćelatko so njewróća
 A wječor hižom přikhadža —
 Wjelk praji: „To mje tola hrjeba!
 Što činić? hlódnny lehnyć hić
 A myšku myšku wostajić,
 To při nuzy mi njeje trjeba“.

Wón ćeri k džěrcy myšacej,
 Chce lakać tam, o jerom jej —
 A što so bjez tym zrudne poda?
 Před nosom wjelkej hlódnemu
 Myš hrabny kraholc před džěru;
 Wjelk džeše struchły: „Škoda, škoda!“

* * *

Štóž składnosć pušća, přepase,
 Tom' ćeknje tež to zacpíte!
 A štóž so z časom njestara,
 Tón zhoni, što je tradanka. (1854.)

* —

89. Liška a synk.

Mać liška synka wjedžeše
 Raz přeni do swěta,
 Synk wulkoh' psyka wuhladnje
 A poča: „Maćerka!
 Njej' njepřećel to najhórši
 Na zajacy a na liški?“

Mać džeše: „„Někotry wot nich
 Je strašny wšelako,

Najwjětšich pak a najmjeńšich
 Najmjenje strachuj so!
 Tych srěnich pak, to radžu ći,
 So boj a zdal po móžnosći.““

* * *

„Tu měru maš tež na swěći“,
 Jan praji Wučbašic,
 „Najmudriši, tón nješkodži,
 Tež wěrný blazyn nic.
 Połblazyn a połwučeny —
 Tej skazytaj pak najwjacy.“

(26. | 9. 1855.)

— * —

90. Šěračk a kokula.*

Co hnězda skradžu šěračkej
 Bě kokla podnjesła;
 Tón wbohi runje domach njej',
 Duž njewě, što so sta.

„Kak zlétuje tu kokula!“
 Sknadž praji k šěračkej.
 „Ći přimołwja so za kmótra
 A to nic derje njej'.“

A jako šěračk wulahny
 Te drobne džěcata,
 Bě wulcy jara wjesoły,
 Zo pječ jich w hnězdze ma.

* Přirunaj podobnu baseń č. 82.

Wón sprócniwje so postara
Za wšitkich potrjebu,
A jeho luba mandželska
Z nim nosy wo wjetu.

Najbóle pak so kormješe
Tón přeměnk kokula,
Najprěńša přeco popadnje,
Štož starši nanoša.

A jónu z hnězda wumjeta
Wšěch swojich towařow!
Tu krwawi želna wutroba
Dla tajkich nječućow.

Sknadź plačo pódla zawoła:
„O njezabudźće wšak
To słowo: kajkaž wutroba,
Haj tajki je tež džak!“

(Wokoło 1855.)

— * —

91. Džiwna konferenca.

So něhdy wokna w šulskej jstwi
Do rěćow dachu z ławkami
Wo šulsku wěc a zaslužbu;
A džiwna konferenca bu.
Te wokna, durje wrěskaja,
Zo česće dosć jim njedadža.

Ow, to bě wrěskot, wołańca
A khwaleństwo a měšeńca,

Wša mudrosć tudy ze swěta
 Bu wučerpana do čista.
 Jed'n přemo druhoh' wjetšeje
 Přec' zaslužby so mocuje.

Duž jene wokno mudriše
 Swój wučerški hlós pozběhnje:
 „Ja widžu přec', što nutrkach je,
 Tež do wsy moje woko dže
 A wobkedźbuje mlody swět
 Přez dwaceći 'žno sprócnych lět.

Štož do pječ lět njej' lizane
 A do džesaćich třesane,
 A do pjatnaćich zhib'wane
 A do dwacećich runane,
 To kerk a wozdónk wostanje,
 Dónž rostu włosy na hłowje.“

(Wokoło 1855.)

— * —
92. Torničački.

(Časopis M. S. 1860, 4.)

Torničačka barbješe
 Módre swoje slowki,
 Woła ludži: „Hladajće,
 Nimam krasne džowki?

Tajke popki kulojte
 Sama zawisć khwali;
 Haj, ma štó zańc nahladne,
 Tón so hori, pali.

Z kłochowcom duž wobaram
 Znušlic wabne plody,
 Hódnemu pak rad je dam,
 Wón so njeboj škody.“

A štó nětk so spěchuje
 A je šćipać wuńdže?
 Nichtó do nich njechaše;
 Hłupy, štóž tam pónǵže!

* * *

Njepyš, njekhwal džowčičku,
 Maći, torničalku,
 Skhowaš ju wšak za pjecu,
 Twoju pyšnu kawku.

Lapka, ličko nječehnje,
 To su khude šacy,
 Štóž pod čapku strowy je,
 Žada něšto wjacy!

(7. | 12. 1859.)

✻

93. Liška a slon.

(Časopis M. S. 1860, 3.)

Liška knjeza slona wuhlada
 A ze spodźiwanjom před nim pozasta —
 „Kajke zbože“, džeše, „džensa pyta mje;
 Zo će zetkam, zwěrjo majestetiske;
 Dawno žadach tebje wohladać
 A česć twoju swětej předować.“

„„Nó tak hladaj““, rjekny slon, a pokaza
Knjeni lišcy swoju móc a wědomstwa —
„„Što ty měniš, drobny, slaby njerjedže?““
„Wěčna škoda“, liška blawka, „wo tebje,
Měl ty hišće moju mudrosć, lesć —
Cyły swět ći dyrbjal króny plesć.“

„„Móhł-li cyły swět tež na khribjeće njesć““,
Pózna slon, „„ja tajki dar a twoju česć
Nihdy njerodžu a zdobnje zacpiwam,
To bych jeno pokleće był čłowjekam;
Přetož to je złodźij najhórši,
Kotryž z mocu šelmstwo jednoći!““

* * *

Ze sprawnosću móc jednoćena
Je čestniša a sławniša,
Hač do złotoho zasadžena
Najrjeńša parla indiska,
A tyje stajnje k wužitku
Po cyłym kraju kóždemu.

(1860.)

— * —

94. Přiběracy hlód.

(Časopis M. S. 1860, 6.)

Ówě jehnjeći wjelk zežra něhdy,
Haj z prochom z mochom na holi,
A wot njej' spokojeny lědy
Za wowcu saha slědniši;
O jědowaty zežranco,
Maš ty hdže runja swojeho?

Ow haj, ow haj! tak pjenjez hlódný
 Rój čłowjekow tež hramuje.
 Njej' »tysacow dvě sći« dórtk hódny?
 A ma jej štó — o hladajće,
 Kak slipoce wón za třecím
 Haj bóle, dyžli za přenim!

(1860.)



95. Pos na dworje a liška.

(Časopis M. S. 1860, 57.)

K kokošu we khlamje runje
 Liška z dwora čehnješe,
 Jako filaks wo połnocy
 Pytny ju a dosaže;
 „Stej, stej, paduše! hdže sahaš,
 Prečku z twojim rubjeństwom?“
 Liška blawka: „„Kajka hrubosć,
 Što mje přimaš ze zubom?!

Sym džě policajska wyšnosć,
 Njewěš moju přislušnosć?
 Krwawnych sylzow na te kury
 Zahrodnik je plakał dosć;
 Jako služownicy prawdy
 Pomhaj skerje božedla,
 Hdyž tu do arresta wjedu
 Njepolěpšnoh' škódnika!““

„Sy ty policajska wyšnosć,
 To sym zakoń twój knjez ja,

Kiž móc twoju w wuzdže dđerži,
 Wobmjezy hdyž překročā.“
 Dalšich słowow nječinjaše
 Filaks, ale kusaše,
 Z tym bu liška wotprawjena,
 Kaž ji kóždy popřeje.

* * *

Kaž hdžež chce lawka blido być,
 Njej' prawy porjad w domi:
 Tak hdžež chce liška prawu tyć,
 Tam prawda wěsće khromi;
 Duž, zakon filaks, njedrěmaj,
 Na falšnych bohow kedźbu daj!

(1860.)

— * —

96. Law kral a jelen.

(Časopis M. S. 1860, 59.)

Wě purpurje, na złotym trónje
 Law něhdy sedži z kralowku
 Před zhromadźiznu w swojej krónje
 A dđerži krutu prašeńcu:
 „Kak steji z mojim kralestwom,
 Ze zakonjom a porjadom?”

Njej' horjo w kraju, kotrež tyši,
 A nihdže žana njeprawda?“
 Duž rozprawu najrjeńšu słyši
 A najslawniše powjestwa;
 Wón njejabcy pak wuhladnje,
 Zo jelen mjelčo sylzuje.

Law poča: „Što je so ći stało
A přez koho sy křiwdženy?“
„„Ach, kralo, wěrnosće je malo,
Kiž““ — rjekny jeleń — „„słyšał sy;
Wjelk je mi džěco roztorhał,
Kaž šwinc je sam to wuhladał.““

Law wrěskaše: „Smjerc bjez wšej' hnady
Wón dostań, přeměńk žadlawy —
Stup sem tón swědk, ja pomham rady,
Twój zloty synk budź wjećeny!“
Duž džewjeć swědkow postanje,
A kóždy wěrnje swědčeše:

„„Knjez kralo, wědź, nic wjelk to běše,
Twój syn to hojo roztorha!““

„Hum!“ zaru law a jemu džěše
Na směchi khlama zubata:

„Tu pešku, hojo, zabudźmy —
Mój syn je činił ryćeřscy!“

* * *

Što prajiš, hdyž tu kasta ludźi*
Přez lawa njeje mudriša,
Z tej samej wahu waži, sudźi,
Štož niže jeje runjeća?

* 1. recens.: Zo dźiwje zwěrjo takle sudźi,
To je wšak skoro bjez dźiwa;
Što prajiš pak, hdyž kasta ludźi
Je lawej cyle podobna?
To rěka, hdže sy rozym dał,
Zo lěpši njejsy, dyžli law?

K tych wysokosci njechał leżc,
A žanych wiśni z nimi jěsć. (1860.)



97. Rubježnik a dróhař.

(Časopis M. S. 1860, 60.)

Na puću něhdy z hole ćmowej
So wuwali na dróharja
Mječ w rucy zlóstny rubježnik.
„Daj pjenjezy mi wokomik,
A mjelč — će hewak zakolu!“
„„Haj!““ džeše dróhař z bojosću.

„„Ach ale““, džeše wurubjeny,
Hdyž tamnom' nětk wšo zdawał bě;
„„Mi jeno žel je wo tebjě,
Ty wbohi, wbohi čłowječe;
Hdyž pohladamy do pisma,
Njej' sud a hela twoja mzda?““

„O blaznje z pismom zatrašeny,“
Duž směješe so rubježnik;
„Ty měniš, zo bych stejał tu,
Bych wěrił sud a bibliju?
Ně, z tym mi njejij do kerka,
To žadyn zajac njestawa!“

* * *

Wot spočatka hač do kónca
Čert najhórši je njewěra!

(1860.)



98. Psyk a kóčka.

(Časopis M. S. 1860, 61.)

Psyk a kóčka něhdy džěštaj
 Wobronjenaj na hońtwu;
 A hdyž přeslědžiloj běštaj
 Mjasaprózdnju krajinu,
 Hlaj, tam za plotom 'šće radži
 Jimaj tola popad so;
 Běše snadny, što to wadži,
 Běše mlode wroblatko.

Zběže pak so dołha zwada,
 Kak chcetaj je hotować;
 Wšitkich psow a kóčkow rada
 Njemóže jej' rozjednać;
 Hač nětk skobać, kutlic, parić,
 Njeběchu te starosće,
 Ale hač pjec abo warić,
 Bě to žahle prašenje.

Njepodwólno, rozčerćeny
 Kóždy druhi přihot chce,
 Psyk na pječeń zasynjeny,
 Kóčka pak na warjene;
 Jeju zwada njewuhasny,
 Hač so wrobl zasmjerdža:
 Duž mjez psy a kóčki prasny
 Hidžeństwo wot teho dnja.

* * *

*

Zahłupjenaj — słyšu prajić,
 Kajke wiwy, malinki!
 Na te byču hłowu stajić,
 To waj' jeno wohidzi;
 Tola cíše, jenož cíše,
 Tajkich hłowow wuhladach,
 Kaž historija tež piše,
 Dosć na čłowskich ramjenjach! (1860.)



99. Wosoł a law.

(Časopis M. S. 1862, 97.)

K lawej něhdy zwjeseleny
 Wosoł jachlo přileća:
 „Majesteta! dowučeny
 Nichtó bóle njej' hač ja;
 Njejsym nětko wjac tak hlupy,
 Jeli rady potrjebaš,
 Wěř, mój ‚rozymiš‘ njej' tupy,
 K stajnej pomocy mje maš!

„„Čekń, čekń, blaznje zablaznjeny““,
 Law kral z hordom wotmołwi,
 „„K radže sy mój wuzwoleny
 Z wěstosću ty posledni;
 Přetož kohož mudrych rada
 Njewučehnje ze škody,
 Teho zdata, kaž ty, blada,
 Hlubje šwiknje do nuzy!““

* * *

Njewěš sam sej rady žanej,
 Wulcy zle to hižo je;
 Hórje, hdyž cí z radu khmanej
 Mudry služic njepřindže;
 Najhórje, hdyž podtykuja
 Blazni so cí k pomocy;
 Přez tych, kaž tež mudrosć duja,
 Dospolnje sy zhubjeny! (1862.)



100. Mjedwjedź, wjelk a liška.

(Časopis M. S. 1862, 97.)

Knjez mjedwjedź něhdy wobzamkny,
 Kaž wićežny bur bohaty
 So widžeć dać. Wón swinisko
 Kaž tučnoh' woła pólskeho
 Da šerom' wjelkej zarězać
 A lišcy kucheń wobstarać,
 Sam pak na wulku kołbasu
 Dže prosyc lěsnu zwěrinu.

Mjez tym wjelk rěznik wustojny
 Bě tykał, warił kołbasy,
 A liška mudra kuchařka
 Bě z niću wšitke měřila,
 Zo čestnym hosćam k pohórškej
 Nic žana krótša, dlěša njej',
 A hanještaj a džělaštaj
 Tak nuznje, kaž za wótcny kraj.

Za to pak mjedwjedź wiwlaty
 Na myto njebě wogramny:
 „Wój kóždu šestu kołbasu
 Sej kładźtaj hnydom na stronu,
 Poł swinjeća po hosćini
 Njech waju prócu zaplaći,
 A chcu waj' wšudže wukhwalić
 A do kuchinow poručić.“

Ach, ale što nětk scěhuje,
 Hdyž hosćow rój so přimjele?
 Hlaj, dokelž liška přejara
 Bě z krótkej niću měriła:
 To kołbasy kaž bibaski
 So hordžachu w połprózdnej škli
 A falnychu, zo položca
 Wot hosći ničo njedosta.

Duž rěkaše: „„Wój jebakaj,
 Nam swoje dórtki pokažtaj!““
 Jej' wotkladk přińdže na blido,
 Wšo wołaše: „Bowsmorano!
 Jej' kołbas kóžda tolstša je,
 Poł lohća dlěša najmjenje“ —
 Duž z hubu suchej, z hanibu
 A z pukami jej' wuhnachu.

* * *
 Njeprawe kubło njetyje
 A prawe sobu zežerje.

(1862.)



101. Law a kóčka.

(Časopis M. S. 1862, 99.)

Na lawa něhdy na štomje
 So kóčka dele khlemi:
 „Bóh postrow, luby wujo će,
 Ty sławny po wšej zemi,
 Kak česćow swójba Kóčkec ma
 A ja tež hišće sobu,
 Zo jena krej nas přeliwa,
 Smy z jenoh' rodu z tobu.“

„„Ja Kóčkec?““ zaru hněwnje law,
 „„Tak pój so ze mnu witać;
 Maš pismo, kotry sym ja staw?
 Duž chcemoj sej je čitać;
 By njebyła ty na štomje,
 Či za wuši chcył sunyć,
 Što Kóčkec abo Lawec je,
 A na wopuš čí plunyć.““

* * *

Tu baseń céhń na čłowjeka
 A čłowski rozdžěl w swěci;
 Smy wšitcy tež wot Hadama
 A z jenej' hruzly džěci:
 Kak mały džěl by plaćić dał,
 Zo jena krej smy wšitcy,
 By runje řečał jako law
 Tam k swojej ćeće micy!

(1862.)

— * —

102. Knjez Wjesela a jeho hajnik.

(Z luda.)

(Časopis M. S. 1862, 99.)

Knjez Wjesela ma hajnika,
Kaž kóždy knjez joh' nima,
„Stup sem, ty wačka služowna“,
Tak Wjes'la jeho přima,
„Praj, z čim sy so tak wudrasčil
A swoje čělo wukormil?
Ty sy mje jebał trašnje“.

„„Po česći, prawdže wšitko je““,
Jom' hajnik wobkručuje;
Knjez Wjesela pak ličeše,
Što hajństwo wunošuje,
Jom' do wočow a pokaza,
Kak dwójcy wjac' hajńk přetrjeba
A swojoh' knjeza kluka.

„Dži z wočow mi, ty šibale,
Mój njem'žeš dlěje wostać,
Ja prjedy pak po zaslužbje
Chcu, liška, tebje khostać.
Džeń a nóc dyrbiš w lěsu stać,
Dam će tam k štomej přiwjazać
Hač do plěch hłowy bosy.“

A jako nětk po přikazni
Hajńk w lěsu wuwjazany

Bě wutrał skoro cylički
 Džen horco čwilowany,
 To na wječor knjez Wjesela
 „Dži“, služownikej přikaza,
 „Dži, hladaj, što hajńk čini“.

Duž Anton ćeri do lěsa,
 Hač proch so kuri za nim;
 Wón hajńka čornoh' wuhlada,
 Tak muchow sedži na nim,
 Krwělačne jeho cychu —
 Duž Anton łama hałozu,
 Zo želny by je wuhnał.

„„Ach““, džeše hajńk, „„ach wostaj to,
 Ty wučeriš te syte,
 A druhim slěpcam z noweho
 Ja bywam blido kryte!““
 Z tej powěsću dom Anton dže.
 „Hm, hm!“ knjez Wjes'la mjenješe:
 „Dži, přiwjedź kadlu zaso!

Što pomha, zo joh' wučerju,*
 Kaž ty tam syte muchi?

* 1. recens.: Sym tutón měch džě nasypał,
 Što cheu za prózdnym hladać?
 Je wón so při mni natykał,
 Što hlódníšich cheu žadać?
 Tom' nowa pica atd.

Slěpc druhi móhl mi wo službu
 So kłapać hlódny, suchi;
 Tom' nowa pica trjeba je,
 Štó rukuje mi za lépše?
 Dži, přiwjedź kadlu zaso!“

(1862.)



103. Hordačk w njezbožu.

Pujwuj, tón lěsař wulkotny,
 Wza wulku škodu njejabcy
 Přez hajński wołoj mordařski,
 Kiž jemu nozy předyri.
 Tom', kiž bě přenje husle hrał,
 A z hordom w lěsu knjezował,
 Tom' bimbatej so nozy;
 Nětk invalidstwo hrozy.

Wón z mócnym hłosom zawoła
 Wo pomoc nětko do lěsa,
 Wón z hordej wěru wěrješe,
 Zo z črjódami wšo počehnje
 Joh' žiwic z jeho mlodymi
 A žarować ze sylzami;
 Wón pak ze zrudźbu zhoni,
 Kak wšo so nimo honi.

Duž mały kralik na štomje
 Da słyšeć jemu k powučbje:
 „Kaž prjedy běše widženy,
 Sy nětko wot wšěch hidženy,

Najnižši prošeŕ lapaty
 Je njepřećel twój sapaty,
 Ći směje so a popřeje
 Dla twojej' přenjej' hordosće."

(26. 7. 1863.)



104. Paw jako nawoženja.

Paw bě so rjany wupyšaŕ,
 Kaž mlody nawoženja,
 Bě skoro sam so nastróžaŕ
 Wot luboh' zybolenja.
 Duž wobzamkny wón pućować
 A po swěće so widžeć dać,
 Po krajach a po ludach,
 Kaž w hrodach, tak tež w budach.

Wón lědma pak bě pokaz'waŕ
 Džěl rjanosće poŕ lěta,
 Juž bě so kóždy nahladaŕ;
 A njebu w kedźbu měta
 Ta rjanosć, kaž so nadžeše.
 Duž hněwny zuŕ so škórni je
 A ćisny přeč dar spěwa,
 Dokelž so hišće hněwa.

* * *

Česć wudzić dawa ćwilu
 A wćipnosć traje khwilu.

(1863.)



105. Sorna a liška.

W lěsu zeleneho dorna
 Zetka lišku něhdy sorna
 A ju poča fukować,
 Kak to móže znjesć a trać:
 Z tajkej wopušu so nosyć,
 Zo móhl kórc do njeje wosyć.

Liška džeše: „„Błazna ćeta,
 Podlěšk, kiž so za mnu mjeta,
 Je po módže najnowšej,
 A tež w Serbach hinak njej',
 Wjacy kwasa, bóle kisa:
 Dlěše mam a dlěše wisa.““

* * *

Poľne prawo lišcy dawam,
 Hdyž do swěta hladać stawam:
 Wšelake te klundery,
 Za tym hač je zamóžny
 Něchtóžkuli rady třase
 A tu klunder-módu pase!

(1. | 2. 1864.)

— * —

106. Wosoł a ptački w haju.

So něhdy wosoł wuchaty
 Bě pušćil přez haj zeleny,
 Hdžež z hrónčkom tysacorakim
 We času rjanym, nalětnim

Chor ptačkow meju khwali;
 A khodžili a stali
 Su ludžo tam a pos'chali
 Na pišćele a huslički.

To měchinošeř pytnywši
 So hněwaše a pomysli:
 O didlowarjo, huslerjo,
 Wam zda so wěsće Bóh wě što;
 Ja lěpje začahuju,
 Hdyž zapiskam a duju —
 A hnydom wón tam započa
 So mócnje drěc a ruć I A.

Hłós jeho ruba po lěsu,
 Hač zarža w kóždym kućiku.
 Wón měni, zo Apollo je,
 Hdyž před nim wšitko wotmjelknje —
 „Tu slyšiče“, wón džeše,
 Što lěpše we mni třeše“;
 Kak so koncert pak spodobal —
 To njej' chronista wopisał.

* * *

Nam na torhošću žiwjenja
 Tež mnohe hłosy zaklinča
 A jedyn přemo drugeho
 Tu k wažnosći chce přinjesć so;
 Praj, kotry přewažuje
 A wšitke přewyšuje? —

To wěrne rjane přemóže
A dobyća so zmocuje! (15. 7. 1865.)



107. Wóslica a jeje synk.

Wóslica mać před poľ lětom
Wuměła bě wóslatko.
Horda džeše před wšěm swětom:
„Štó ma synka tajkeho?
Něšto wulke přichodnje
Budže wón, to wěste je.“

Lědma je poľ lěta stary,
Hižo słomu wot syna
Rozdželić wě! kajke dary!
Jeho česć b'dže wulkotna. —
Rěče dar wón najskerje
Hišće něhdy dostanje.

Kóžde džěčo poskakuje,
Kaž hdže jeho wohlada,
Hižo nětk joh' poplacuje,
Chce joh' měc a zawoła:
„Nanko, maći, kupće dha
Mi toh' lesnoh' wóslika.“

Njezměje-li tež dar, spěwać
Kěrluš knjeza swojeho,
Budže ruć a haru džělać —
Njezhonjenym trašidlo,

Wyššim podnožk sčerpliwy,
Nižšim pak law rujaty.

Kralam, wjercham, kaž je znate,
Wjele wósłow słužeše,
Druhdy zbože njepopřate
Jim najskerje připadnje.
Druhdy hłowa mudriša
Posl'chać dyrbi wosoła.

Z črjódami wšak trjeba budže,
Dónž swět steji, kajkiž je,
Wósłow stajnje tu a druhdze. —
Zhonjenje to wuči mje,
Wěm tež: kóždy na swěći
Po swojim so přečini.

* * *

Njesměš wósła! — kak chceš prajić,
Što pod slóncom špatne je?
Wšo so da na wužitk stajić,
Dar a mocy wšelake,
Sčěń a swětlo potrjeba
So do kóždoh' wobraza.

(21. | 7. 1865.)



108. Wjelk a wosoł.

Wjelk něhdy winčał w lěsu je,
Do jamy přepadnjeny,
Wšěm swjatym wopor lubješe
Hejz' budže wumóženy;

So nikoho pak njejima
Ta próstwa, khiba wosoła,
Kiž ducy nimo słyši,
Što Isegryma tyši.

Wjelk žebri, myto mjenuje
Ze přisahu najrjeńše, —
Duž wosoł hałzy zběraše
Pjasć tołste a tež ćeńše,
Hač jamu z nimi napjelni,
Zo wjelk tam z njeje wuskoči —
A wosoł mzdy nětk hlada,
Ju pomina a žada.

„O šerako njehańbity“,
Wjelk džeše, „njej' to hnada,
Hdyž hidne zwěrjo, kaž ty sy,
Knjez Wjelk sej k službje žada?
Njej' myta dosć, zo wostaju
Će, špatna krej, při žiwjenju?
Tón raz běž w swoju stronu
A postrow twoju žonu!“

* * *

Štó rozpomnity njebudže,
Hdyž tole čita, prajić:
„Tak jeno wosoł zamóže
Sam do stracha so stajić,
A wěrić tajkim lubjenjam
A pomhać tajkim zlodžijam,

Kiž hordži z tym so žiwja,
Zo kóžde prawo křiwwja.“ (23. | 8. 1865.)



109. Wosoł a liška

abo:

Radšo njeprawdu dyžli hluposć.

„Što dželaš a kak so ći dže?“

So wosoł lišku praša. —

„„Ach, khuduški mój popad je,

Hdyž wječor slónčko haša,

A hišće, štóž mje wuhlada,

Tón woła: »Čakaj zlóstnica!«

A tola ludžom hoju,

Hdyž myše škóдне loju.““

„Ach, moja ćeta wutrobna“,

Duž wosoł želnje praji,

„Swět slepy je a njeprawda

So jeno z tobu daji,

Ći stokróc lěpje šlo so by,

Hdy byla jeno wosoł ty —

Hlaj, ja sym wšudže znaty

A nihdže přepóznaty“.

„„Maš prawje!““ liška zablawka,

„„To běch sej dawno přala,

Ja wosoł — kajka dobrota —

Česć wulkotnu bych žnjala —

Kaž ty, tak mudra, widžana —
 Mi praji hlós pak wot nutřka:
 To njeńdže, lubša duša,
 K tom' wóslacy šik słuša!““

* * *

Čim hlupiši štó blazyn je,
 Čim kołwrotnišo baje
 A swoju kukel dowěrnje
 Za radnu pšeńcu saje
 A přiweze ju na wiki
 A wbohi slepy njewidži,
 Kak jeho předawaju
 A jeno za směch maju!*

(28. 8. 1865.)

—*—

110. Tresaty wosoł a jeho mukojći bratřa.

We gala-drasće tresatej
 A somoćanej, židžanej,
 Po měsće wosoł džěše —
 Wón pola majestetosće,
 Kaž kóždy zjawnje widžeše,
 Za zwěrjo wulke běše.

* 1. recens.: So k wopismu a naslědej
 Tu wosoł poručuje —
 Tón wbohi! z myslu želniwej,
 Wón njepytņje, što žuje.

Duž črjódka wósłow mukoŕtych,
 We próšnym młynje služownych,
 Puć jemu zaběžachu.
 „Stej bratře, džěco wósliče,
 A praj, što tebje pozběže?
 Zo tak će spozłóčachu.“

„„Što chceće““, wosoł wotmołwja,
 „„Waš bratr je djaboł a nic ja,
 Wam bělan woči khmuri;
 Ja jedyn waš? — to było mi!““
 A zadk wón do nich wobroći,
 Hač koža so jim kuri.

* * *

Wot wósła hač do čłowjeka
 Wšěm službička je hotowa,
 Njej' huba jeno slaba;
 Najskerje tón pak njewjestu
 Sej wjedže wěstu do domu,
 Kiž najbóle so blaba!

(6. 9. 1865.)

* — *

III. Wjelk.

Wjelk stary krótko před smjerću
 So přińdže psykej spowjedać:
 „Ach, wjele mam na swědomju,
 To, bratře mój, sam budžeš znać,
 Duž přińdu k tebi po radu,
 Kak zbóžnosć tola dostanu.“

„„Čiń pokutu a polěpš so““,
 Psyk džeše, „„wujo šedziwy,
 To rěka: wostaj rubjeństwo,
 Budź jako wowca pobožny
 A spěwaj a čiń dobrotu,
 Hdžež wěš a móžeš, z wutrobu.““

Wjelk, troštowany wot psyka,
 Tu wěc sej derje rozpomni
 A běži zaso do lěsa,
 Tam pokutu sej wumysli;
 Wón da so bratram zežiwić,
 Z jich rubjeństwom so nasycić.

(Wokoło 1865.)

112. Stary a młody ročk.

Ročk stary džeše k młodemu:
 „Před prudlom a před bozanku
 Nětk nazymu so hladaj
 A radšo hlodu tradaj —
 Hy hy! tu prudło lečene,
 To skaženje ći přinjese.“

A młody ročk tež fifoli,
 Hdyž jene prudło naleći:
 „„Aha, ja znaju tebje —
 Tón naporjatk, tón jebje —
 Što mysliće sej, ludžička,
 Tu lesć naš jedyn wusměwa!

Ach čakaj! ale luboznu
 Njeh moje wóčko bozanku
 Raz khwilu wobhladuje —
 Ta z falšom njewikuje! ““
 Pak tu pak tam so posynje —
 Šnap — njejabcy so popadže.

* * *

Tam slaby rozym pěstón je,
 Hdžež lóšta plómjo njehasnje;
 Trošt ćělnosć wšelki rěči,
 Hač noha tći we syći.
 Po padže pak te hajkanja
 Do kajawkow so wobročá. (30. 5. 1866.)

— * —

113. Přeceženy wosoł.

Po drjewo z wósłom do lěsa
 So podał bě Jan Syrwatka.
 A wóslej šćěpow pjatnaće
 Po kóždym boku nakładže.
 A dokelž zwěrjo pěknje dzěše,
 Jan wulcy spokojeny běše,
 Zo šěrak telko mocy ma
 A z hordom dže a njestona.

Što ducy dom Jan zastanje?
 Při puću šćěpow dwanaće
 Wón zhubjenych tam namaka —
 A wóslej k přěnim přimjeta.

Kusk přeměrný tón přidawk běše,
 Što wadži? wšako wosoł džeše.
 Jan z troštom jeho powučí:
 „To hišće tež će njemori“.

Kónc lěsa smólne, lučwjane
 Tam leža pjeńki rozsyte.
 „Te štyri, wósle, dyrbiš njesć“,
 Jan woła, „to cí dawa česć!“
 A runjež přez mocy to běše,
 Nó, šerak tola někak džeše.
 Wón huza so a zdychuje;
 Jan šwika křud: „Hy, wšako dže!“

Duž přińdže bród tam blóćany,*
 „Ej ha!“ Jan zasta prajicy:
 „Najsłabši rozym zapřimnje,
 Zo přezo njesć tu dyrbiš mje!

* 1. recens.: Duž přińdže bród tam blóćany
 A bur Jan džeše smějicy:
 „Sy jene móhł, to druhe tež,
 Mój wóslika, mi zamóžeš!
 Sčiń sebi w swěće sławne mjeno,
 A přenjes mje tu zdobnje jeno;
 Wšak sym twój knjez, ty poddan mój
 A hewak dobrej sebi smój.

Z tym skoči Jank na wóslika,
 Zo by so zmynyl njerjada atd.

Sudź sam, što budža ludžo prajić,
 Chcył twojom' knjezej ty so stajić,
 Sy jene móhl, to druhe tež
 Bjez dwěla hišće zamóžeš.“

Z tym słowom skoči Syrwatka
 Na khribjet swojoh' šeraka;
 Srjedź žumpadla najhlubšeho
 Pak zrudny podawk poda so.
 Móc nošerja tu k kóncej džěše,
 A Jan, kaž wulki, dolhi běše,
 So wali z wóslom do tunki
 A žnješe mzdu, kiž zasłuži!

* *

Tón, kiž dawkow nakładuje,
 Kedźbuj mocy dawarja;
 Hewak woboj' spóžeruje
 Z dohom khlama njezboža.

(1867.)

— * —

114. Mrowja a šwjerč.

~~Mrowja~~
 Mrowja wleče husańcu,
 Šwjerč ju ducy zetka:
 „Phi! na wašu kolbasu,
 Moja luba ćetka!“

„„Pokuta će njezminje!““
 Mrowja k šwjerčej praji,
 Za tón wusměch pilnosće
 W zymje hlód će daji.

(1867.)

— * —

115. Worjoł a wrobl.

„**W** prócny bohačko, přemócný,
 Ty wšědnje kermušuješ porno mi!
 Ja khudy raws mam wbohi, sprócný,
 Za mjaso lědma čerwje, husańčki.“
 Tak wrobl něhdy wuwrěska
 Na krala ptakow, worjoła.

„„So přestworić daj, luba duša,
 Čas je!““ duž worjoł wotmołwi;
 „„A potom, kaž so wě a słuša,
 Tón přestwork přinjes na džěci!
 Hlaj, moja krasnosć worjołska
 Kraj pjelni wšudže bjez kónca!““

* * *

Tu nadžěcacy zawistnicy
 Plac maće na hubu a womjelkće;
 Štož wjacy w móšni mam a w lžicy,
 To džě wam z rukow ničo njebjerje.
 Mak syć a z teho pšeńcu žnjeć,
 Tón son sej njedaj nichtó džěć!

(Wokoło 1870.)


— * —

116. Łopać a kosyca.

„**Š**tó wjacy přinjese swět do přědka
 A wjacy wobroćenjow čini,
 Hač łopać ja abo ty kosyca,
 Z kotrejež pisař pjero sčini?“

Tak praša lopać kosycu,
Kiž jemu leži po boku.

„„Po swojim kóždy wot naj' wažny je,
Swět wobroća a wužitk dawa,
Ja horda nohcyla być přez tebję,
Wěm pak, zo najrjeńša je slawa —
Štó sy? što móžeš? přewaži,
Nic próca sama na sebi!““ (Wokoło 1870.)



Njedodžěłane basnje.

117. Strach za trach.

(Zlamk.)

„Čekń, wjelko! poběž lećicy!
Sy słyšał podawk zatrašny?
Ty njejsy? o, hdže sy ty był?
Kornykel je so wottorhnył!
Law čěka a tež elefant —
Smjereć njeje žadyn cokorkant.“

— — — — —
— — — — —

* * *

So mnoho ludžom spodoba,
Štož móža, stajić do stracha,
A pozběhuja malinki
Hač k najtrašnišej wulkosci.

A wěrić to najtrašniše,
Tež wjele słabych wašnje je.

(Měrc 1849.)



118. Lišcyna wótčinska lubosć.

(Njedodžělane.)

Při kurjencu psyk lišku zaslapa
A herjekajo na nju zawrěska:
„Što činiš jow, ty njeporada,
Je čas a khwila nětko składna
Při nocy lazyć do dwora?“ — —

„Wěr khroble“, šepce liška stróžena,
„Mje k wótnom' krajej lubosć honi —
Swět poňny nětko demokratow je,
Kiž twarić republiku chcedža,
A přisłušny dżak zapojdža,
Kiž derje wukhować so wědža
A z mječom swój čas wustupja.

Ty pak na stronje konservativnej
Džě ze mnu stejiš, na tej kralowskej. —
Wěš, kajkeho su kury ducha,
Te škódne wšědne hrjebaki?
Duž wótčinski mój nós tu nucha,
Hač tajki njedočink so njetaji
Tu něhdže tež mjez kurymi.“ — —

„O falšny demokratow čucharjo,
So njepročuj na pokrasnjenje
Złych twojich mysłow, ludako —
Mje njewoblazni přimołwjenje,
Smjeré tebi, hódnom' šibjeńcy! —
Ja znaju svojich hrjebakow. —

(16. | 2. 1854.)



Lišcyna wótčinska lubosć

119. Młody hač a jeho mać.

(Zlamk.)

Pod burskej hrjadu prochnawej
 Při picy khudej, njejědnej
 Sej kobla zrěbjo woćahny
 A wucycana mocow zby,
 Mjez tym zo džěčo narosće
 A najrjeńši kón buwaše.

Hač swojej nahladnosće dla
 Tež z pluha přińdže do města —
 W karejće z hłowu mjetaše
 A hnadnym knježim słužeše,
 Mjez tym zo kobla jeho mać
 Ma na rolach so dračować.

— — — — —
 — — — — —



120. Wosoł — nawoženja.

(Njedodžělane.)

Na žeńtwu cheył je wosoł hić
 A da so konjej spodobnić:
 Da sebi wuši přitřihać
 A hriwow dosć sej nadwjazać.

Na zadku wopuš konjacu
 Na włosankach ma bohatu.
 Wón bě so runje wulinał
 A staru pjelšć so zeswlěkał.

Kaž z jejka wuběleny
 Wón swoju rjanosć wobhlada
 A džeše: „Rjany kadlička
 Sym z nowa narodženy.

Nětk póndu jutře na žeńtwu
 Najrjeńšu kobłu jendzelsku
 Za njewjestu mam wěstu.“
 Wón po wšech hródzach běhaše,
 Hdžež jeno něšto za njoh' bě,
 Tež ćeri hordy k městu.

„„Phi!““ pluwachu wšě koblički,
 „„Što sej tón kadla njemysli,
 Je swět to widził, słyšał?““

(1863.)



Nabožne spěwy.

Předspomnjenje.

Nabožnych spěwow abo kěrlušow, kaž so wšědnje praji, mamy wot Handrija Zejlerja radnu ličbu. Tute spěwy buchu z wjetša basnjene k wšelakim cyrkwiskim a šulskim składnosćam, kaž k nowemu lětu, k róčnym časam, k swjedženju žni, kermuše, měra atd., čišćane pak w Tydžeńskich resp. Serbskich Nowinach pak w nabožniskich časopisach a knihach, kaž Missionskich Powěsćach, Zionskich Hłosach, Zerničcy atd., wjacore pak tež hač dotal w rukopisach zawostachu. Někotre buchu wot K. A. Kocora skomponowane. Najprjedy chcemy wšelake zhromadne (A.—F.) a na to te jednotliwe spěwy po času zrjadowane podać. Wšě tu wočišćane kěrluše su přenjatne, přełožki pak namakaju so mjez druhimi přełožkami we wosebitym wotdželenju.

Redaktor.

A. Šulske spěwanja.

Krótke kěrluše a spěwańčka za serbske šule
z l. 1842.

I. Při spočatku šulskich hodžinow.

P ó n d ž e l u.

a)

Hlós: Najlubši Jezu, što je twoja atd.

Ja z Boha zaso witam zwjeseleny
Tón nowy tydzeń, z hnady wobradženy,
Mój duch, o Božo, žadosćiwje z nowa
So k tebi woła:

Daj nowy lóšt a móc a žohnowanje,
Na mudrosći a radže přiběranje,
Zo budžemy, kaž Jezus, twoje džěci
Tu na tym swěći.

Njeh budžemy přez pěkne zadžerženje
Tež wučerjow a staršich zwjeselenje,
Zo wostanje nam do wěčnosće wěsta
Ta hnada Khrysta.

b)

Hlós: Stań wutroba a spěwaj atd.

Ja žiwjenje sym dostał,
Zo na swěće bych wostał,
Kaž dolho Boža rada
To wote mnje sej žada.

Ja pak we njemudrosći
 A lěnej njewušnosći
 Tu w swěće njesměm pobyć,
 Ja mam sej lěpše dobyć.

Ja k wužitnosći wěrnej
 A k pobožnosći swěrnej
 So dyrbjū přihotować
 A w šuli priwučować.

Wutoru.

a)

Hlós: O božo lubozny atd.

Ky, Božo, džělaš sam
 We twojim wulkim swěći,
 Hdyž wšitko zastaraš
 A wodziš twoje džěci:
 Daj z teho póznać mi,
 Kiž twoje znamjo sym,
 Zo ja tež k džělu so
 Měć dyrbjū po prawym.

Ty sy tež wobradzil
 Mi čiche spanje w nocy,
 So k džělu khmaniše
 Bych zložil wšitke mocy;
 Za tajku dobrotu
 Chcu, Knježe, khwalic će
 A tebje zwjeselić
 Přez džělo khwalobne.

b)

Hlós: Ja přez Khrysta so džakuju atd.

O, luby Jezu, ty sy měł
Na džěćoch spodobanje,
Sy swoju ruku wupřestrěl
A dał jim žohnowanje.

Ach měj duž džensa nad nami
Tež swoje spodobanje,
Njeh k harje, zwadže, k próznosci
Njej' we nas požadanje.

Naš rozym bóle rozswětluj,
Zo wjacy nawuknjemy,
A našu prócu požohnuj;
Tak khmanje wotročemy.

Srjedu.

a)

Hlós: Ja přez Khrysta atd.

Kiž ty w mojej młodosci
Twój puć mje wučiš, Božo,
Zo ja bych khodzil pobožni
A nam'kał moje zbožo:

Wzmi ze mnje hrěšnu wjesołosć
A złoboćiwu wolu;
Płodź do mnje twoju podobnosć,
Zo k dobremu ja zwolu;

Zo wyše wšeho lubuju
 To, štož so lubi tebi,
 Zo zjewju mysl zwukliwu;
 Tak derje radžu sebi.

b)

Hlós: Ach wostań při nas z hnadu atd

Ja drje sym štomik młody
 We božej zahrodzi,
 Ja bych pak přinjesl plody,
 Kaž plódne štomiki.

Duž prošu, Božo, tebje,
 Wuč twoju wolu mje,
 Zły swět mje hewak zjebje
 A k hrěcham zawjedže.

Daj tež, zo wolu twoju
 Bych rady dokonjał
 A zo so činić boju,
 Štož ty sy zakazał.

Tak, hač sym runje młody
 A khodžu do šule,
 Ja njesu dobre plody
 Tu bohabojosće.

Štwórtk.

a)

Hlós: Wocuć, tón hlós tebje wola atd.

Bože slónčko złote, rjane,
 Mi z nowa k zbožu zeskhadzane,

Ty zbudžiš mje a zwjeseliš;
 Boža móc a wótcna rada
 Z tych twojich pruhow na mnje hlada,
 Ty k khwalbje ert mi wotewriš;
 Česć tebi, Božo, dam,
 Džak tebi zaspěwam,
 Ty mój Wótče!
 Haj, spěwa wšak
 Swój rańši džak
 Či samo zastarany ptak.

Ale mój džak prawy, wěrnny
 Budź tón, zo, Božo, tebi swěrnny
 Ja swjeću swoje žiwjenje;
 Njeh je moje prócowanje
 A moje horce požadanje —
 Być hódny twojej' lubosće;
 Haj, tebje posłuchać
 A tebje lubować
 To je zbóžnosć!
 My zradujo,
 Kaž jandželjo,
 Či zahe k službje damy so.

b)

Hłós: Budź khwalba Bohu samemu atd.

Ty, luby Jezu, znamjo sy
 Wšej' prawej' poslušnosće,
 Ty wot Boha bě lub'wany
 A poľny zwukliwosće;

Po tebi rade zložī so
Tež kóžde pěkne džěcatko,
Kiž chce so Bohu lubić.

Tež my po twojim wopismje
So chcemy nałożować
We wuknjenju a pěknosci,
Zo móhl nas něhdy wołać
Do twojoh' rjanoh' kralestwa,
Hdžež při tebi so zhromadža,
Kiž běchu tudy twoji.

Pjatk.

a)

Hlós: Štož čini Bóh, wšo dobre je atd.

Bóh wotpočink nam wobradži,
Přez njeho kóždy stawa,
Haj nóc a džeń jo wobswědči,
Zo dobre dary dawa;
Štož trjebamy,
Wón wótcowscy
Nam rady wšitkim zdžěli
Na duši a na čěli.

Daj wšak nam, Božo, strowotu,
Kiž k džělu potrjebamy
A lóšt a mocy k wuknjenju,
Zo hódnje přibywamy

Na khmanosći
A na hnadzi;
Tak mlodosće čas rjany
B'dže derje dokonjany.

b)

Hlós: Džens khwalće Boha, křesćenjo atd.

Budž, Božo Wótče njebieski,
Nam miły, pomocny,
Zo bychmy Khrysta póznali,
A kajki Bóh ty sy.

Daj tež, zo my so bojimy
Će zrudzić z hrěchami,
A zo ći za wšě dobroty
Smy radži poslušni.

Na twoju móc a dobrotu
Daj so nam dowěrić,
A twojom' mudrom' wjedženju
So cyle poručić.

Sobotu.

a)

Hlós: Božo Knježe teho swěta atd.

Strowy rozym, čile stawy
Je mój Bóh mi wobradził,
Zo bych, hač sym runje mały,
Je tu derje nałožil;
Hewak sym ja njuhódnny
Tajkej' Božej' dobroty.

Staršich lubosć, zastaranje
 Hewak podarmo tež je,
 Tež to wulke žohnowanje,
 Kotrež šula přinjese,
 Hdyž ja składnosć k wuknjenju
 Na kedźbu sej njobjeru.

Ně, my k Božej česći chcemy
 Čas a dary naložić,
 Z lěpšim džakom njemóžemy
 Lubosć wšitku zaplaćić
 Bohu, staršim, wučerjam
 A wšěm našim přecelam.

b)

НІОС: Будź česć a khwalba wjeřšnemu atd.

Hlej, mlodosć je čas wusywa
 A čas ma wotdžěleny;
 Štóz tutón čas sej njehlada,
 Tón budže zahańbjeny.
 Duž, džěco, wukń a wusywaj
 A dalších časow nječakaj,
 So hewak wěsće kaješ.

O Wótče, ty pak požohnuj
 Nam symjo twojoh' słowa
 A plody zdžerž a přisporjaj
 Hač tamnu stronu rowa,

Hdžež něhdy žnjeć zas budžemy,
 Štož tudy wusywali smy,
 Zo njebyli tam khudži. (1842.)



II. Při skónčenju šulskich hodžinow.

Pónđzelu.

a)

Hłós: Nětk wotpočuje hola atd.

Nětk šulu wobzamknjemy
 A z džakom domoj džemy,
 Smy prócy wjeseli;
 Wšak smy we tutej khwili
 Sej kubla hromadžili,
 Kiž tyja k zbóžnosći.

Njeh nas po prawej pući
 Duch Boži khodzić nući,
 Zo stajnje pěkne smy;
 Tak prawy džak my damy
 Za hnadu, kotruž mamy,
 A šule čas je žohn'wany.

b)

Hłós: Luby Jezu, my smy tu atd.

Štož smy džensa wuknyli,
 Njeh kaž symjo w dobrej roli
 Płody njese w mnohosći
 K žiwjenju po Božej woli;
 Njeh tež, Božo, hdyž dom džemy,
 Ničo złeho njespóčnjemy.

W u t o r u.

a)

Hlós: Ja z njebjes dele přińdu atd.

Mŕy zaso kročel k wěčnosći
Smy z Boha džensa stupili,
Tón dzeń swědk našej' prócy bě
A přibjerk našej' khmanosće.

O derje tym, kiž z wužitkom
A z Bohu lubym wjeselom
Tu kóždžički dzeń wobzamknu
A mudriši a lépsi su.

b)

Hlós: Njeh Bohu džakuje atd.

My so cí z wutrobu,
O Božo, džakujemy,
Zo z twojej pomocu
Wšo dobre nawuknjemy;
Daj nam jo zakhować
We pěknej wutrobi,
Zo tebi lubi smy
A swětej wužitni.

S r j e d u.

a)

Hlós: Mój křescijano, za mnu dži atd.

O swjaty Božo wšudžomny,
Ty slyšiš wšo a widžiš,

Štož rěčimy a činimy
A njepočinki hidžiš;
Njeh kóždy na to spomina,
Hdyž na dompuć so podawa.

Před strachom tež a njezbožom
Cheył naš puć wobarnować,
Zo přińdžemy my strowi dom
A móhli podžakować
So twojej wótnej dobroći
My ze staršimi lubymi.

Njeh křiwdu abo njeprawdu
Tu sebi nječini my,
Tež nihdže našom' bližšemu
Na ničim nješkodžimy;
Njeh přede strachom žiwjenja
So kóždy pěknje wobhlada.

b)

Hlós: Luby Jezu, my smy tu atd.
Božo, daj, zo podarmo
Bychmy w šuli njepobyli,
Ale zdžerž a žohnuj wšo,
Štož smy dobre nawuknyli;
Njeh tež twoja móc nas wodži
A nas wutorhnje wšej škodži.

Št w ó r t k.

a)

Hiós: Štó je, kajkiž ty atd.

Boha pónawac,
W dobrym přiběrac:
To je naše postajenje
A tež naše wozboženje,
Do kotroh'ž nam je
Džensa pomhane.

Za to džakomni,
Wótče, khwalbu cí
Wobzamknywši přinjesemy
A tu próstwu pozběhnjemy:
Wodž nas přez Khrysta
Wšón puć žiwjenja.

b)

Hiós: Mój křesćijano, za mnu dži atd.

Štož Bože lube džěci su
A Boha lubo maju,
Te hidža lžu a njeprawdu
A wučby zakhowaju,
Kiž dostachu přez wučerja
Za zemju a za njebjesa.

Tym wšitkim Jezus bratřik je,
Ma na nich zwjeselenje.
Duž prosymy, o Božo, će:
Daj k woli dokonjenje,

Zo z tajkej česću, dobytkom,
My nosymy so won a dom.

Pjatk.

a)

Hłós: Dha je so tón dzeń dokonjał atd.

Když něhdy mój dzeń posledni
Po prócy žiwjenja
Tež zańdže, kaž tón džensniši
A ćahnu ze swěta:

Dha, Božo, daj mi z radosću
A z česću dokonjeć,
Njeh móhł po twojim slubjenju
Tam krasne płody žnjeć.

b)

Hłós: Jezus moja nadźija atd.

Před strachom a njezbožom,
Wótče, chcył nas wobarnować,
Přewodźej nas strowych dom!
Nětk so chcemy podźakować
Ze staršimi lubymi
Twojej wótčnej dobroći.

Sobotu.

a)

Hłós: Štóž Bohu wjeřšnemu so poda atd.

Wće Khrysta mjenje dokonjamy
Nětk prócu teho tydženja,

Džak lubom' Wótcej zaspěwamy,
 Kiž pomocny so pokaza,
 A kiž wšo džěło přisłušne
 Ze słódkim mytom krónuje.

O derje tym, kiž dokonjeja
 Swój skutk bjez hańby, poroka,
 Či troštni, wjeseli dom džeja,
 Bóh na nich spodobanje ma;
 Tym žohnowanje njebieske
 Za čas a wěčnosć wěste je.

b)

Hłós: Jezusa ja njepušću atd.

Hdyž přez Božu šćedriwosć
 Nětko tydzeń dokonjamy,
 Je nam swjata přislušnosć,
 Zo džak Bohu zaspěwamy,
 Kiž nam popřa dobroty
 A bě z nami sćérpliwy.

Staršimaj a wučerjej
 Zaplać, Božo, z twojej hnadu,
 Dokelž starosć, prócu sej
 Nas dla činja, na so kładu;
 Za to njech so na wěčne
 Tutym lubym derje dže.

— * —

Raňši kěrluš.

Wojich džěci raňši wopor,
Luby Wótče, horje wzmi;
Džak a khwalbu přinjesemy,
Wótče, z wjesołosću ci.

Twojich džěci raňšu próstwu
Chcył ty hnadnje wusłyšeć,
Chcył ze žohnowanjom twojim
Našu prócu přewodžeć.

Čiń nas pěkných, čichich, dušnych,
Tebi lubých, poslušnych,
Za žiwjenje prawje wušnych,
Njebja něhdy dostojnych.



Při spočatku šulskeje wučby.

a)

Na tebje, Jezu, hlada
Ta syła džěčatkow,
Přińć k tebi lubje žada
Do twojich njebjesow. ∴

Duž daj, zo prjedy znaja,
Štož ty nas wučil sy,
A kak do Božoh' raja
Puć ma być nam'kany. ∴

Haj, połni zwukliwosće
 Puć bychmy póznali,
 A w pyše njewinosće
 Tež ponižnje jón šli. :|:

b)

Ty, Božo, swět wšón wokřewiš
 A mi wšo dobre přidželiš;
 Duž bjez lěnjósće, njerody
 Njeh činju swój skutk wjesoły.

Na tebje staju nadžiju,
 Zo budžeš z twojej miłosću
 Tu moju prócu žohnować,
 Kaž íi so budže spodobać.

Daj, zo bych ze wšej swěrnosću
 Ja sprócniwy był k wuknjenju.
 A wuknył, kaž mam kazane:
 To moja česć a zbože je.

— * —

Při składnosći.

(Z rukopisow wočišćane.)

a) Džěćace hrónčka.

Bóh słyši, widzi wšo,
 Duž njesměm činić zleho,
 Ja hewak wostać njemóhło
 Džě lube džěćo jeho.

Štóz z Bohom spočina a z Bohom přestawa,
Najrjeńši puć ma žiwjenja.

Do Boha wěř, měj k njemu nadźiju
A lubuj jeho z wutrobu.

Sym tež mlode, małuške,
Bohu cheu być poslušne!

Ach luby Božo, prošu će,
Njeh bywam džěčo pobožne,
A njechał ja pak posluhać,
To chcył mje radšo wotsal wzać.
Haj z časom wzmi mje k njebjesam
K tym lubym swjatym jandželam!

(Wokoło 1850.)

b) Spěwk.

Był ja kaž jandželki,
Lubozny, njebjeski,
Ja spěwać chcył
Kěrluš najrjeniši
Khrystusej Knjezewi
Mój žiwy dzeń.

Poruno jandželkam
Hladał bych k njebjesam
A klaknył so;
Rady bych k Wótcej šoł,
Wopušćo zeński doł
A khwalił 'ho.

Džěcatko pobožne,
Jandželkam podobne
Bych rady był;
To mi spožč, Knježe mój,
Zo sym přec' luby twój
A wuswjec mje.

(Wokoło 1850.)

c) Bibliske hrónčka.

Hebr. 3, 4.

Kaž khěža žana jenička
So sama njeje twariła,
Tak swět so sam nej' sčinił;
Hdžež jeno wóčko pohladnje,
To wšudže Bóh wšo stworił je
Přez swoju móc a mudrosć.

Bóh, dokelž wšitko stworił je
A z ničeho wšo sčinił je,
Bóh stworićel so mjenuje.

Rom. 1, 20.

Njech woči Boha njewidža,
Te skutki jeho pokaža;
Haj cyła stwórba wuči će:
Bóh mójny, mudry, dobry je.


Bóh je, Bóh je! cí powjeda
Tu zemja, morjo, njebjesa;
Bóh je, Bóh je! to praja cí
Tež kwětki, žita, trawički.

Jez. 40, 26.

Na měsačk, hwězdy pohladaj,
Kiž w nocy swěća krasne;
Štó je tam staji, dźerži, praj,
Štó stwori slónčko jasne?

Štó wětrej, blyskej, mróčelam
A dešćej poručuje?
To sy ty, Božo Knježe, sam,
Twój skutk će překrasnuje.

(Wokoło 1850.)



B. O Sanctissima!

(Tři přenjotne spěwy k znatemu sicilianskemu hłosej.)
5./12. 1855.

Jutrowny spěw.

(Pjekarjowe spěwy za serbske šule I, 8.)

O najswjećiša, o najzbóžniša,
Hnadu dawařka jutrownička!
Zbóžnik naš miły,
Jezus je žiwy.
Wjesel syła so křescanska!

O najswjećiša, o najzbóžniša
Hnadu dawařka jutrownička!
Smjerće móc zlemi
Khrystus na zemi.
Wjesel syła so křescanska!

O najswjećiša, o najzbóžniša
 Hnadu dawařka jutrownička!
 W smjerći Khryst poby,
 Prawdosć nam doby.
 Wjesel syła so křescanska!



Swjatkowny spěw.

(Z rukopisa.)

O najswjećiši, o najzbóžniši
 Hnadu dawařski swjatkow čas!
 Duch Khrysta swjaty
 Je dušam daty,
 Khwalće, khwalće 'ho kóždy čas!

O najswjećiši, o najzbóžniši
 Hnadu dawařski swjatkow čas!
 Zbudź, Ducho, hnuće,
 Wuč Bože puće,
 Rozswěć, rozswěć a posylń nas!

O najswjećiši, o najzbóžniši
 Hnadu dawařski swjatkow čas!
 Ducho ty hnady,
 Trošta a rady
 Zwjesel, zwjesel a přewodź nas!




Hodowny spěw.

(Z rukopisa.)

O najswjećiši, o najzbóžniši
Hnadu dawański Boži dnjo!
Zhubjenym radu,
Hrěšnikam hnadu
Džěco Bože je přinjesło.

O najswjećiši, o najzbóžniši
Hnadu dawański Boži dnjo!
Khryst w čłowškim ćeli
Zbóžnosć nam zdžěli —
Zraduj čłowstwo so žiwjenja!



C. Při poswjećenju noweje šule we Łazu 1864.

a)

Nětk w Božim mjenje chcemy
Dom tutón wopušćić,
A to sej wuprosemy:
Bóh chceł nas přewodzić.

My Bohu zaspěwamy
Džak, česć a khwalenje,
Zo wulku hnadu mamy
A Bóh nam pomhać wě.

Budź khwalba Knjezej swěta
 Za wšitke dobroty,
 Kiž my přez dolhe lěta
 Tu wužiwali smy.

Kaž prjedy, tak tež nětko
 Sy, Božo, był při nas,
 Někotre lube lětko
 Tu swoje stadło pasł.

Kak wjele w khłódnej zemi
 Jich hižo dawno spi,
 Kiž tudy z kěrlušemi
 Su tebje česćili.

A pod tej krytwu snadnej
 Sy k nam tež přikhadzał
 A z twojej ruku hnadnej
 Tych mólčkich žohnował.

Ja swědk sym Božej' hnady,
 Nam praji stary dom,
 Toh' dopomńće so rady
 A z džaknym wjeselom.

Njeh nětko žohnowanje
 Toh' domu z nami dže,
 Kaž drohe wotkazanje
 A při nas wostanje.

My ničo njejsmy sami,
 O luby zbóžniko,
 Duž pój a stuń ty z nami
 Do domu noweho!

b)

Swjaty spěwajće Knjezej hlós,
 Wšitcy zbóžni khwalbu jom' dadža!
 Swět cyły khwal
 A štož tu wodych ma
 Po cyłej zemi, wšitko khwal tu miłosć.
 Z džěcacych ertow pak klinči,
 Zynči najrjeńšo
 Bohu na njebju česć a džak.

Duž tež wopruje tutón dzeń
 Z čistej dušu wjesoła młodosć
 Jom' khwalbu, džak.
 Wón na nas pohladał
 Je z wulkej hnadu.
 Česć a džak budź jemu!
 Našeho žiwjenja złote, zbožowne lěta
 Bohu njech samom' swjate su.

c)

O wučerńja ty rjana
 Budź lubje powitana,
 Kaž Boža swjatnica;


We tebi žohnowanje
Njeh na nas dže a panje
Wot naroda do naroda.

Tu njeh so na nas zložī
Wša hnada a škit Boži
A swětlo njobjeske.
Ty budź nam dom a hěta
Wot zbóžnišeho swěta,
Kiž załožil syn Boži je.

Tu njeh so w kóždym času
We zbóžnej wučbje pasu
Te duše młoduške;
Z tych Jezu zhotuj sebi
Móc, kiž so lubi tebi
A kiž ěi khwalbu wopruje.

Tu wulij ducha hnady
A darow a wšej rady
Tež na wšěch wučerjow.
Tón dom pak w Božej mocy
Stej wo dnjo a tež w nocy
Pod škitom twojich jandželow.

(1864.)



D. Psalmske wothłosy.

(Časopis M. S. 1868, 4—6. — 28. febr. 1868.)

[Zawód.

Ty, Knježe, činiš džiwy,
 Sy poľny dobroty,
 A spominaš tak miľy,
 Zo proch a zemja smy.]

a) Ranje.

(Hdyž rano wocuću, rěču ja wo Tebi.)

Štó, Božo, twoju krasnosć měri,
 Štó dostojnje ju wopiše,
 Kaž po zemi so cyłej šeri
 A swětło z nocy wuwjedže?
 Na zerjach přikhadžeš ty Mócnny,
 Dzeń skhadža z twojej' powokow,
 Dzeń přewinje a směrk tón nócny
 So překhowa do žlobinow;
 Duž ranje zaswita
 A Tebje pozběha!

* * *

So hory, doľy kurja,
 Swój wopor znošuja.
 Wón skřidľany so nurja
 Do mróčnoh' podnjbja.

A tysac ertow w haju,
 Na wodach, na poli
 Česé Božu zaspěwaju
 We nowej radosći.

Tež čłowjek nětko stawa
A swój hlós pozběha,
Džak wjeršny Tebi dawa,
Zo nowu hnadu ma!

* * *

Wšitko, štož wodych ma,
Daj Bohu česć! Halleluja!

b) Wob džeń.

(Tehdy dže čłowjek na swoje džěło a na swoju prócu won
hač do wječora.)

So mjerwi zemja wubudžena,
Džeń wšitkim džěło přikaže,
A sčěrpný, k česći Božoh' mjena,
Na swoju prócu čłowjek dže;
O Knježe, rjeknje, pomhaj nětko,
Skhil ke mni hnadne wobličo,
Ja słaby poručam Ći wšitko,
Njeh by so derje radžilo.

* * *

Skutk prawych požohnuje*
Bóh Knjez a zbože da
A khlěb jim přihotuje
A z nuzy wupomha.

* 1. recens.: Štó je, kiž wusłyšuje
Tu próstwy čłowjeka,
Klin zemje wotamkuje
A žohnowanje da?

Nas kryje z mócnej ruku,
Hdyž bija njewjedra,
A mača brózdu, łuku
A hory z wysoka.

Wón wróca měr do kraja,
Nas bratrow wujedna
A kiž so rudzić maja,
Tych z troštom napoja.

* *
Bóh Knjez je dobrociwy
A jeho dobrota traje wěcnje!
Halleluja!

c) Wječor.

(Hdyž so do loža lěham, spominam na Tebje.)
Swój dom a zachod slónco znaje,
Dzeń haša z mučnym swjatokom,
Česć Božu zynčo muška hraje
A čłowjek khwali z kěrlušom.

Měr zerjow złote wobliča
A »božmje złote« mikaja,
Měr sparna nóc po zemi syje
A mjelk a ćišina ju kryje!

* *
[So džěla wuprózdnjeja
Nětk ruki sprócniwe,
A stadla domoj džeja
Pod třěchi hospodne.]


Won Bože wójska džeja
 Kryć bydla čłowjeske,
 Hdžež w komorkach tam steja
 Te dżakne wołtarje.

A pastyr hwězdow jasny
 Won stadło wuwjedže;
 Mój škit, mój pastyr krasny,
 Tón zbóžnje wodzi mje.

O Knježe všehomócnny,
 Ty njespiš, njedrěmaš,
 Ty slódky pokoj nócnny
 Nětk twojej zemi daš!

* * *

Khwaltej Boha Knjeza
 Nóc a dzeń,
 Khwal Boha Knjeza
 Tež moja duša! Halleluja!



E. K žnjeńskemu swjedženjej.

(1. oktobra 1871.)

a)

Kak je twój dom tak lubozny,
 Tych njebiesow předhěta,
 Hdžež, Božo, tebi služimy
 A zabywamy swěta,

Hdžež pytamy so k njebjesam
K tym našim zbóžnym wostatkam
A posylnjamy wěru.

Twój dom cí, Božo, debimy
A džensa k česći twojej
Twař z kěrlušemi swjećimy
We pokornosći swojej,
Swět pytaj swět, čahně do přědka
Swój lóšt a přispork mamona,
Twój lud so wyše nosy.

Před trónom Božej' krasnosće
Tam jandželow je syła,
Ta wyšše psalmy njebjeske
A swjaty, swjaty spěwa,
K tym Boži lud so towařši,
A z nimi chcemy po smjerći
Česć Božu powyšować.

Kaž David hudźbu naprawi
Česć Bohu rjeńšu džělać
A Izraela zahori
We wyššim chorje spěwać,
Tak žołńće, naše kěrluše
Na křidlach hudźby swjateje
W najhlubšej nutrnosći.

b)
Džak woprujemy z nowotka
Džens swěrnny Božo cí,

Zo twojich dźiwow dobrota
Bě nowa nad nami.

Klin zemje hnadnje wotewriš,
Zo by ju žohnował;
Štož žiwe je, to nasyćiš,
Zo by jo zwjeselał.

Sy sprócne lěto krónował
Tež zaso z hnadnej mzdu,
Nam darił žně a pokazał,
Kak maš k nam wutrobu.

A njech tež žně su wšelake
Po swojim wunošku,
Móc twoja z tym nam pokaže,
Što čłowśke mocy su.

Štom, luka, brózda přěduja:*
Bóh słowo dźerži nam,
Syw ze žnjemi so wotměnja,
Khlěb zrostł je čłowjekam.

Kak wulke blido kryte je,
Kak wjele jědźkow tu,
Štó přeměrić ju zamóže,
Tu wulku potrjebu?

* 1. recens.: Štom, luka, brózda přěduja:
O čłowče, wopruj džak,
Kaž w haju, polu na zdala
Je spěwał kóždy ptak.

Wón swojich darow bohatstwo
Kaž sam chce, wudžela.
Wón njeskomdži pak žaneho,
Kiž so 'mu dowěrja.

Přez dary k dawačerjej dži,
Mój duch a wutroba,
We próstwje, khwalbje, modlitwi,
Kaž Bóh ju lubo ma.

Dom z wójny běchu na polu
Zas' ruki žnjeńcařske;
Měr zloty knježi po kraju
A króna darow je.

To z ponižnosću před so wzmi
A duša přemyslej,
Po našim džaku, pěknosći
Bóh ničo měřił njej'.

My hrěšni ludžo, hordzići
Duž prošmy přez Khrysta:
Njeh dale bóle polěpši
Nas Boža dobrota.

K tym časnym, Knježe, připolož
Tež kubla njebjeske,
Naš srědniko, ty za nas proš,
Wuč nas puć prawdosće.

Daj z ponižnosću póznać nam,
 Kak dobroćiwý sy,
 Kak wabiš duše k njebjesam
 A k twojej lubosći.


Nam zwarnuj, štož smy dostali,
 Před škodu, njezbožom,
 A kóždy čin so po česći
 Tež z mjeńšim z pokojom.

Njeh skupu ruku pošwikać
 Bóh nihdy njetrjebał,
 Chcył wotlemjeć ja, lichować —
 Tež to by zatamał.

Nas njestrózbosć a brójerstwo
 Tež nihdy njewohidź,
 Z tym Bože dary hanja so,
 Bóh z nuzu měł nas bić.

Wón nasyćej nas we měrje,
 Nam pomhaj k zbóžnosći
 A hdyž strach, nuza přičehnje,
 Tež rukuj nad nami!

Duž halleluja spěwajmy,
 Džak Bohu na njebju,
 Wón zdžerž nam swoje dobroty
 A khlěb tež za dušu.



F. Kantaty při swjedženju měra.

(Serbske Nowiny 1872, 203.)

1. džěl. *Andante sostenuto.*

Ǧazyk, wutroba česć Bohu dawaj,
Kóždy njech ju powyša!
Brónje mjelča, z wójny, krajo, stawaj,
:: Měra palmy zmahuja; ::
Štóž ma wodych, z džakom džensa spěwaj,
:: Witaj měra swjedzeń k nam! ::
A :: psalm nowy :: harfa naša džělaj,
Kak Bóh krasnje pomha nam,
:: Jasnje, krasnje :: pomha nam Bóh sam!

2. džěl. *Andantino.*

Kraj wótcny wumóženy je
Ze slawu wěčneje wuznamity,
Bóh popřa jemu dobyće,
A hordy njepřećel bu zbity;
Swój směch a přah kraj rozlama
A kubla so pod lipu měra,
A žohnowany z wysoka
Lud sylni so a prawa wěra!

3. džěl. *Andante.*

Bóh Knjez pomha nam,
Znaje so k nam zjawnje,
Wótře khwal cyły swět jeho džiwy,
A dajmy džak jeho mjenu!

Wumóhl je nas;
Wšak sylne ramjo wón slabym je dawał,
Milosć tu sylnym a trošt
Zbóžneje smjerće!

4. džěl. *Andantino.*

K wótcnym honam howrjachu wozy,
Dom wróćichu sławni so bitwarjo.
Jich psalm a naš so bratři:

5. džěl. *Allegro con spirito.*

Bohu, Bohu budź česć, česć na njebju,
Budź česć, česć na njebju,
A pokoj, pokoj na zemi,
A měr čłowstwu a spodobanje!

G. Jednotliwe spěwy.

K nowemu lětu 1843.

(Tydź. Now. 1843, 1.)

~~1843~~
Kwařmy, twařmy na Boha,
Wón budź hród a skała;
Bóh njech nas tu přikrywa,
Naša móc je mała.
Hlaj, kak bórzy njezboža
Naše kubło skaža
A nam krónu wjesela
Z našej hłowu zraža!

Słaba tež je wutroba!
 Prošmy Božu hnadu,
 Zo nas ničo njezluda,
 Njezawjedže k padu.
 Njeh so lišči k wjeselu,
 Smějo na nas laka —
 Z kaćom pak a ze zlej mzdu
 Had na khrobłych čaka.

Mějmy Boha k přećelej,
 Wón njeh za nas řeči:
 Hada přeco słyšeć njej',
 Kiž tu na nas syči!
 Srjedža w našim pokoju
 Njepřećeljo stanu,
 Wjedu bitwu přislodnu,
 Do winy nas ćahnu.

Lubosć, prawda přiběraj,
 Krónu dostań swěrnosć!
 Złoty měr koš wótcny kraj,
 Swoju česć měj wěrnosć!
 Strowosć, čerstwosć, žiwjenje
 Džaknje wužiwajmy,
 Za wšě dary lubosće
 Bohu khwalbu dajmy!

Prošmy Boha wo tu móc,
 Zo we našim horju
 Wobstać móhli dzeń a nóc,
 Jako skały w morju;

Srjedža w našej starosci
 Njeh nam pomoc skhadža,
 Rada, trošt njeh přistupi,
 Zo so skutki radža!

Radzić, radzić chcył so dać
 Našemu Bóh džělu,
 Našu žiwnosć žohnować,
 Hojić wšemu ćělu!
 Slónco, dešč a ćoplota
 Njeh we prawej měrje
 Zemi plódnosć wobradža!
 Njeh smy sylni w wěrje!

Džělajmy a spěwajmy,
 Dónž nas zemja nosy;
 Dobry wusyw sćěrpliwy
 Ponjese wšak kłosy.
 Tamny dzeń nam z miłosću
 Bože myto khowa,
 Hdyž po swěrnym džělanju
 Smjerc nam „swjatok“ woła!



Jutrowny kěrluš.

(Tydž. Now. 1843, 59.)

Ніс: Hdy bych ja z tawzynt jazykami atd.

Alleluja! tak zaspěwaju,
 Kiž widža slónco jutrowne
 A swojoh' Knjeza powitaju,
 Kiž w smjertnym jastwje ležeše;

A khorhoj jeho dobyća
We rańšich zerjach zejhrawa.

Što tebi je, ty zemja kruta,
Kiž stejiš hewak ćichowni,
Što w twojich załožkach sy hnuta
A zaržiš takle z hronami?
Twój třepot z teho nastawa,
Zo Boži morwy wocuća.

Štó w bělej drasće, kaž wot sněha,
Tón ćežki kamjeń wot rowa
Kaž lohke lisćičko tam zběha
A z mócnej ruku wotwala?
To jandžel row tam wotewrja,
Hdyž Khryst so žiwy pozběha.

Što je, zo padaće wy k zemi,
Wy sylni rowa wajchtarjo,
Što strach wam wšitke mocy zlemi
Při rowje Khrysta morweho?
Wšak Boži morwy z rowa dže,
To waše zastróženje je.

O žónske k rowu pokhilene
So wróće z wašej' lubosću;
To žalbowanje nakupjene
Njej' trjeba Khrysteje žiwemu;
Wy wot jandžela słyšiće,
Zo Boži morwy stanył je.

Khryst stanył je! wón sam je strowi,
 Te žónske tam we zahrodzi,
 Wón rěči k nim we lubym słowi
 A wutroby jim polóži;
 Tež mi so moja wutroba
 We zradowanju přeliwa.

Džak, lubosć Khrysteje přewinjerjej
 Njeh smjertni nětko wopruja,
 A halleluja dobyćerjej
 Njeh wšitke ćělo zaspěwa!
 Wón swoju móc nam pokaže,
 Kak z rowa tež nas powjedže. (1843.)



Na žnjeński džakny swjedzeń.

(Tydź. Now. 1843, 153.)

Džak tebi, Božo, zaspěwamy
 Za žnjowe dary bohate,
 Z nich twoju lubosć wuhladamy
 A twoje džiwy njeskónčne;
 Ty z twojej wulkej dobrotu
 Nam rozwjeseliš wutrobu.

Nic nam, nic nam! — je słowo naše —
 Ně, Bohu słuša khwalenje!
 Wón našu prócu žohnowaše
 A wotwobroći njezbože,
 Zo polo, luka, zahroda
 Nam krasnych darow nadawa.

Přez naše mysle, požadanja
Bóh hospodařstwo zasteja,
Wón naše tyšne postaranja
Je wobročil do džiwanja;
Wšo činił je po miłosći
A nic po našej zaslužbi.

Kak su te próstwy wusłyšane,
Kiž, Wótče, k tebi sćelechmy!
Kak je nam wjele narunane,
Štož lońše lěto pobrachny!
Ty z darom wšelkim žohnuješ,
Jón w wšelkim času wudželeš.

Štó twoje bohatstwa móhl měrić,
Štó twoje dary přehladać?
Štó njechał, Božo, sylvje wěrić,
Zo chceš nas wšitkich zastarać,
Nas zežiwić a zwjeselić
A k njebju mysle wobroćić?

Duž džaknje dary wužiwajmy,
Kiž Boža miłosć wobradzi,
Na khudych sobu spominajmy,
Tež za nich smy dom khowali;
Tež stari njech so najědža
A popřaty khlěb wužija.

Haj, Bohu k česći, k spodobanju
Njech dary nałożene su,

A při tym našim wužiwanju
 Nas žohnuj Bóh ze strowosću;
 Njeh spokojny a po česći
 Tu kóždy swój khlěb zasłuži.

Pod swojej třechu zakhowanej
 We lubosći ze swojimi
 Njeh njezhonimy škody žanej'
 Na duši, česći, na kubli;
 Njeh nichtó khlěb, kiž wužiwa,
 Ze sylzu maćeć njetrjeba.

Bóh chceł nam kóždu srjódku sporić
 A skublać nas, zo dosaha;
 Nam wutroba pak dyrbi horić
 So k njemu hnuta, poslušna,
 Hač dđeržimy tam rjeńše žně,
 We kraju jeho krasnosće! (1843.)

—*—
Hodowny kěrluš.

(Tydź. Now. 1843, 201.)

Hłós: Jezu, pomhaj mi křiž nosyć atd.

Kžłobej w duchu pokhwatajće,
 Česć budź Bohu! wjes'li prajće,
 Kaž tam syła jandželska
 K Božej khwalbje zaspěwa.

Hlajće bratra njebjeskeho,
 Z njebja powěsć dže wot njeho;
 Teho Boha-čłowjeka
 Boža syła přewodža.

Zbóžnik daty hrěšnej zemi,
 Narodženy w Bethlehemi,
 Khrystus, naš Knjez, přišoł je;
 Pokornje joh' witajće!

O tych dźiwow Božej' rady,
 O tej' lubosće a hnady!
 Cyłe Bože njebjesa
 Z nami so tu zraduja.

Pastyrjam tam na tym polu
 Zjewjeny bu z Božej wolu
 Swěta pastyr' njebjeski,
 Kiž nas pase k zbóžnosći.

O tych dźiwow Božej' mocy!
 Swětło swěći so tam w nocy;
 Swětło, wěrnosć wot Wótca,
 Přinjese wón do swěta.

Trošt a měr pod třěchu khudej
 Chce wón podać zrudnom' ludej;
 Sam we cuzbje, podrožstwi
 Podrožnych nas zwjeseli.

O kak budu wozboženy,
 Hdyž ja něhdy powyšeny
 Jeho móžu wohladać
 A jom' rjeńšo zaspěwać!

Haj, při syle wuzwolenej,
 Wšeho hrěcha wumóženej,
 Tam při stole zbóžnika
 Rjeńše hody swjeću ja!

(1843.)



K nowemu létu 1844.

(Tydź. Now. 1844. 1.)

Hlós: Mój křesćijano, za mnu dži atd.

Me Božim mjenje započńmy
 To lube nowe léto.
 Naš čas a přichod njewěsty,
 Naš skutk a naše myto,
 Wšo, wšitko Bohu poručmy,
 Wón budź nam dobry, šćedriwy.

A ty, naš luby zbóžniko,
 Khodź tuto léto z nami;
 Na tebje zloží duša so,
 My nochcemy hić sami;
 Pój, budź naš wodžeř lubozny,
 Tak derje, zbóžnje póndžemy.

Njeh twoje słowo swěći nam
 A twoje znamjo tudy;
 Sy wěrnosc a puć k njobjesam
 Za nas a za wšě ludy;
 Twój měř a twoje póznaće
 Płodź do wšěch nowe žiwjenje.

Tež Boži Duch nas přewodźej
A jeho žohnowanje;
Wón našu wěru přisporjej
A wučisc požadanje;
Wón zahoř nas za modlitwu
A polož tyšnu wutrobu.

Njeh wěra, lubosc, nadźija
Swět wšednje wozbožuje;
Wšo dobre njeh so přisporja
A naš puć wupyšuje!
Tak kóždy derje dokonja,
Kiž lěto z Bohom spočina!



Njesmjertnosć.*

(Tydź. Now. 1844, 53.)

☉ rjana wěstosć njesmjertnosće,
Ty zahroda we puscini,
Ty žórlo zbóžnej' wjeselosće
A slónco we tej smjertnej émi!
O wokřewjenje njebjeske,
Ja z džaka sylzu witam ée!

Do procha strase wožoltnjene
Wětr nazymski wšě lisčićka.
Te, te su k tlaću položene
A žiwjenje wjac' njewidža;

* Tutón spěw bu jako choral do hudźby zestajany wot K. A. Kocora
a na spěwanskim swjedženju 1845 w Budyšinje spěwany.

Nas pak tu wusywa Bóh sam
A hromadzi zas' k wěčnym žnjam.

Kak džělenje nas móhło stužić
We zachodnym tym přebytku?
Smjerc k žiwjenju nam dyrbi słužić
A krónu podać njebiesku;
Haj, z kóždej' sylzy džělenja
Kće w njebju róža wjesela.

Mjelč tyšna skóržba, žaloscenje,
Row svojich morwych njeskhowa;
Jim skhadza rjeńše wocučenje,
Smjerc wjacy njeje přez Khrysta;
My njesmjertnosće džěci smy,
Tam horkach so zas' widžimy!

(1844.)



Třoje knjejstwo.*

(Hudanje a zhudanje.)

(Tydžeńske Nowiny 1844, 117.)

✱ Āři sotry knježa po šěrokim swěci,
Jich knjejstwa sceptař mócný, miły je;
Pod njón so zjednoćeja swětla džěci
A wužiwaju zbože njebieske;
Štóž nej' pod škitom tychle trójnikow,
Tón žaruj wurubjeny radosćow,
Na česćach swójby křescánskej'
Tón nima džěl, staw jejny nej'.

* Tutón spěw bu wot K. A. Kocora za mužski chor skomponowany
a na spěwanskim swjedženju 1845 w Budyšinje spěwany.

Ta přenja sotra jako hwězda wodźi,
Khód čłowski z božim swětłom rozswětla,
Móc ryčeřsku a měr do dušow płodźi
A z procha čłowstwo k bójstwu pozběha.
Łódź žiwjenja so nihdy njezlemi,
Hdyž jejna ruka je při prawidli.

To sy ty, křesćan zawoła,
Ty naša wěra njebjeska!

Ta druha sotra, z njebjes narodžena,
Tu khudu zemju čini k njebjesam,
Móc jejna we wutrobach zahorjena
Je sylniša hač smjerć, to njeludam,
We tysackrócných pruhach blyšći so
A wšědnje womłodźuje čłowjestwo.

O lubosć, knježna kralowa,
Přez twój dych kće tež puscina!

Hdyž plačo džemy čmowu dróhu časnu,
Hdyž dostatk požadanjow hinje, mrěje,
Hdyž płomjenja we młodym wóčku hasnu,
Pak smjerć, pak žiwjenje nas rozwjedže:
Nam přichod, třeća sotra lubostna,
We rjeńšim směwku, swětłe pokaza.

To złota je ta nadźija,
Trošt ćeče z jeje kelicha!

Duž, smjertni, krasnej hołdujće tej wěri,
Trón jejny pyšće, stwjerdźće, powyšće;

Tu lubosć dzeržće — lubosć njech was ćeri,
 Je lubosć zbože, zbože lubosć je;
 A košće nadźiju, tu troštarčku
 Přez žiwjenje a smjerc wam přećelnu;
 Njech wěra, lubosć, nadźija
 Nam zemju z njebjom zjednoća!

(1844.)

— * —
Hodowne spěwančko.

(Tydź. Now. 1844, 201.)

Hłós: Nětk wjeselće so, křescenjo.

Ožens k twojom' žlobej přistupju,
 Mój Jezu, moje zbožo,
 A z wutrobu ći přinjesu,
 Štož sy mi darił, Božo:
 Mój rozym, pomjatk, myslički,
 A wutrobu, wšě počinki!
 Njech wšo so lubi tebi.

Sy z lubosću mje zwjeselił,
 A z twojej zbóžnej hnadu,
 Sy mi we duši zaswěćił
 Wšu twoju bójsku radu.
 Kak móhlo nětko hinak być,
 Hač zo će dyrbjju lubo měć,
 A njepušćić će nihdy.

Hdyž hišće z ničim znajomny
 Tu njeběch we tym swěći,
 Ty hižo hnadnje wobzamkny
 Tu zbóžnosć za wšě džěći;

Haj, prjedy hač běch stworjeny,
A ležach w swěće hubjeny,
Bě ty so za mnje podał.

Ja ležach w wulkej ćemnosći,
A ty bu moja jasnosť,
Bu slónco, kiž mje rozswěći,
A da mi prawu krasnosť:
O, tale swětłosć rozjasni
Mi wšitko w mojej wutrobi,
Zo ničo njeje ćemne.

O, kak je tole wopaki,
Zo tajke džěčo jasne,
Tu leži w žłobje na syni,
Hdžež brachuje wšo krasne;
Mi somot, drastu židžanu
A rjanu, zlotu kolebku
Měc dyrbjało to džěčo.

Duž wzmiće přeč to syno mi,
A tež tu słomu prostu;
Ja jemu tam ze zahrodki,
Hdžež pyšne kwětki rostu,
Chcu přinjesć rjane róžički,
Tež hwěžki, módre fijałki,
A chcu je k hłowam naslać.

Dwě rjanej bělej liliji
Chcu na stronje tam stajić,

A demanćik a naliki
 Tu tujku dyrbja hajić.
 Tak dyrbi tuto džěčo spać,
 A wocućić a potom hrać
 Tu z kwětkami so smějo.

Mi drje je derje wědome,
 Zo teho njepožada,
 Štož prjedy běše prajene;
 Na krasniše wón hlada:
 Wón pyta duše rozswěćić,
 Wot hrěšenja je wučisćić,
 Zo bychu zbóžne byle.

Ja tehodla so zraduju,
 Zo chceš mi tajke podać;
 Nětk hišće to sej wuprošu,
 Jo chcył mi lubje dodać:
 Přińdź ke mni, bydl w wutrobi,
 Zo wona tebje wopomni,
 A ma tak zbóžne hody.

(1844.)

—*—
Ratarjowy džakny kěrluš.

☉ džak ći, miły Wótče, džak!
 Ty sy nas skublać žadał.
 Khwal ert a duša jeho wšak,
 Wón khlěba je nam nadał.
 Česć, džak a khwalba! jeho móc,
 Ta džěla za nas džen a nóc
 A da, štož nam je trjeba.

Ty stupi z miłym dešćom k nam,
 Hdyž rólnik wobsy rolu,
 A twoja móc bě blizko nam,
 Hdyž kosa žnješe w polu.
 Česć, džak za klósku kóždžičku,
 Kiž syckam žrješe pod kosu —
 Ty, Wótče, bě ju darił!

(1845.)

— * —
Hodowny kěrluš.

(Tydź. Now. 1845. 205.)

Džeń twój narodny nam skhadža
 Z nowa, luby Jezuso,
 Wjesele sej mysle radža,
 Z čim dže by so hodžilo
 Tebje rjenje zwjeselić,
 A ći lubje posłužić,
 Kaž tym džěćom do křćenicy
 Dary swjeca mótra wšitcy.

Khudy sym ja, kaž je znate,
 Što bych měł sam wot sebje?
 Z hnadnej ruku je mi date,
 Na čož woko pohladnje,
 Na čož hladam, pomyslu,
 Tebi, Jezu, poskiću;
 Wzmi mje k sebi a to moje,
 Njech sym wobsedžeństwo twoje.
 K woporej ći, Jezu, podam
 Cyłu moju wutrobu;

Wobnoŭ ty ju k dobrym płodam,
 Wodź ju k sebi přez wěru.
 Wěra njech pak džělawa
 Wěrnju lubosć pokaza,
 Kiž so k Bohu, k bratram hori
 A wšě njeprawdosće mori.

Njech mój ert je wopor tebi
 Dale, luby Zbóžniko,
 Mój džak chcył dać lubić sebi,
 Chcu će khwalić wysoko,
 Mój hlós, moje modlenje
 Njech će česći do smjerće,
 Hač ći rjeńšo z kěrlušemi
 Horkach spěwam z jandželemi.

Wšitke stawy, ćěło, duša
 Njech su tebi swjećene,
 Štož sym a mam, njech ći słuša,
 Njezacisń dary khudobne;
 Tebi chcu je wšitke dać
 A je k poslušnosći hnać,
 Jako křescijan chcu z nimi
 Tebi słužić ze wšitkimi.

Wyskaj, wyskaj mysl moja,
 Ćěło, duša, zraduj so,
 Jezu! wulka miłosć twoja
 Wobdari mje khudeho:

„Ty so daš mi za to sam“,
 Kajku zbóžnosć přez to mam!
 Najbohatši sym ja khudy
 W njebjesach a swěće tudy.



Kěrluš k nowemu lětu 1846.

(Tydź. Now. 1846, 1.)

☉ Wótče wjeršny na njebju,
 Ty žórlo dobroty,
 Před tebjě stupa z nadźiju
 Naš hlós a modlitwy.

We twojim mjenje najprjedy
 To lěto spóčnjemy,
 So twojej hnadže podamy;
 Budź ty nam šćedriwy!

Njeh kóždy dom a wosada
 A kral a wyšnosće
 So twojej hnady wjesela,
 A wrócej njezbože.

Móc, hnadu, swětlo wšitkim sćel,
 Kiž wuča, wuknjeja,
 Njeh žadyn blud a njepřecel
 To stadło njetorha.

Njeh po wšěm kraju kapaju
 Nam dale k žiwnosći
 Te twoje stopy z tučnosću,
 Zo smy my skublani.

We měrje a při strowosci
 Njeh próca přislušna
 Nam plódniwje so poradzi
 A njeh će pozběha.

Hdyž sylzy běža po licu
 A pada žel je nam,
 Ty polož tyšnu wutrobu
 A wodaj hrěšnikam.

Hdyž ćělo pada do procha
 A ćěka žiwjenje,
 Ty być naš trošt a zepjera
 A přiokróť bolosće.

Duž chcemy tebjě pozběhać,
 Zo wótcnje pomhaš nam,
 A wěčnu khwalbu zaspěwać
 Ći chcemy tu a tam.



Kerchow.

(Tydž. Now. 1846, 48.)

Bolosćow kónc, woćichnjenje,
 Pokoj mučnych, kerchowje,
 Ty mi skićiš wokřewjenje,
 Polo Bože, drěmanske;
 Rjana nóc, mój ćichi rowje,
 Husto spomnju na tebjě —
 Město, hdžež mój proch so khowje,
 Jandžel z njebjes wachuje.

Na mój row so njebjo směje,
 O tej' rjanej bolosće;
 Do procha ta smjeré mje wěje,
 Sym, kaž kwětka wotpadnje.
 Dobry syw za khwilu krótku
 Krónu sprócnym podawa,
 Mzdu tym smjertnym skića slódku
 Tamne časy bjez kónca.

Wumrěc dyrbju! trašne słowa,
 Mje pak njem'ža nastróžec,
 Hižo widžu z čěmnoh' rowa
 Jasnosć bójsku zeskadžec.
 Haj, mi wóčko budže hašec,
 Tola polny nadžije
 Wyskajo smjeré budu prašec:
 Hdže je twoje dobyće?

Přez proch a swět pozběhnjeny
 Něhdy zaso wožiwju,
 K wótcam rowje stowařšeny
 Budu stanyć z krasnosću.
 Halleluja! wulka krasnosć
 Mi přez row a tlaće kće,
 Mi so swěći zbóžna jasnosć:
 Smjeré mje skazyć njemóže.



Boža nóc.

(Tydź. Now. 1846, 204.)

Chor. **Z**njebjes klinča hłosy krasne
 W Bethlehemje na poli,
 Swětło z njejba skhadža jasne
 Pastyrjam we nócnej ćmi;
 Boži swjeći jandželjo
 Přinjesu k nim póselstwo:

Solo. So njestróžejće, njebojće!
 Tón Zbóžnik, kotryž Khrystus je,
 Je so wam džensa narodził,
 Zo by wšě ludy zwjeselił.

Chor. Powite we žlobje leži
 Z pjeluškami džěcatko.
 Tón, kiž wot wěčnosće knježi,
 Nas dla ponižuje so.
 Bože džiwy wuhladamy,
 Syna Božoh' powitamy.

Duo. Wón je tón Knjez a kraluje
 A hrěšnych ludźi wumóže:
 Duž spěwa ert a wutroba,
 Kaž tam ta syła jandželska:

Chor. Česć budź Bohu we wysokosći,
 Měr na zemi a čłowjekam
 Dobre spodobanje.



K nowemu lětu 1847.

(Tydź. Now. 1847, 1.)

Džak přinjesće,
 Wy džěci wobhnadźene,
 Psalm spěwajće,
 Wy mysle zwjeselene!
 Bóh džak a khwalbu lubuje.

Kaž ze škitom,
 Nas kryje Boža hnada
 A z wjeselom
 Nas wobohaćić žada;
 Duž česćmy Boha z kěrlušom.

Swój skutk a puć
 Jom' dale poručamy,
 Wón chcył nas hnuć,
 Zo dobre wuzwolamy;
 A daj nam pomoc zhonić, čuć.

Česć, modlitwa
 Naš wěčny wopor budže;
 Štož wodych ma,
 Khwal Boha tu a wšudže;
 Wón je naš hród a dobrota.



K nowemu lětu 1848.

(Tydź. Now. 1848, 1.)

Nowe lěto nastupjene
 Z Bohom zaso witamy;

K njebju zdychnu wobćežene
 Z khwalbu, z džakom wutroby,
 Zo je starosć, zrudoba
 Staroh' lěta přeetrata.

Nowe lěto nastupjene
 Z džakom, z khwalbu witamy,
 Dobroty, nam wudžělene,
 Křewja hišće wutroby;
 A nas hišće přewodža
 Dalši puć do žiwjenja.

Nowe lěto nastupjene
 Z dowěrjenjom witajmy,
 Boža ruka roznjemdrjene
 Stužila bě wichory;
 Wona změje dale móc,
 Rozjasnić nam horja nóc.

Ćma a puće zaplećene
 Budža nam so rozjasnić;
 A nas mocy spřećiwjene
 Njezamóža k zemi zbić;
 Z dowěrjenjom k dobyću
 Sylni Bóh nam wutrobu.

Bóh budź z nami, pomhaj k wšemu,
 Štož je dobre, njebjeske,
 Z próstwu khroble džimy k njemu,
 Ach, nam wjele trjeba je!

Džěławi a spokojni
Bjeřmy pak, štož wobradzi.

Nowe lěto nastupjene
Z Bohom chcemy powitać,
Jemu budź wšo poručene,
Wón chcył Serbstwo žohnować.
Polo, lud, dom, wutroba
Njehch přez njeho hnadu ma. (1847.)



Missionstwo.

(Missionske powěšće 1848, 40.)

Luby Jezu, hnadu daj
Tym, kiž prócuja so swěru,
Zo by pjelnił so twój raj
A jich wjele přišlo k měru;
Přewodžej jich prócu hnadnje,
Zo jich wusyw rosće radnje.

Luby Jezu, swětło daj
Tym, kiž w smjertnym scěni sedža,
Zwjazki błuda rozwjazaj,
Zo će póznaju a wědža,
Wjedź jich na tu prawu dróhu,
Jezu, wěrnny pučo k Bohu.

Luby Jezu, mocy daj
Tym, kiž mučni wustawaju,
Troštne słowčko wšak jim praj,
Zo na pomoc počakaju,

Zo so ryčérscy přec' bédža
A za tobu sčérpnje slédža.

Luby Jezu, lubosć daj
Tym, kiž we liwkosći khodža,
Zahoř jich a pokazaj,
Kak z tym sej a tebi škodža,
K twojej službje, k twojom' słowu
Zahoř wšědnje lubosć nowu.



K nowemu lětu 1849.

(Tydź. Now. 1849, 2.)

Kaž rěka běžo pyta morjo,
Tak naše lěta zaleća,
Přez přeměnjenja, prócu, horjo
So naše puće wijeja;
Na to pak skoržić njechajmy,
Tón dónt je čłowstwu sudženy.

„Bóh lubosć je a wón je z nami“,
To přichod čmowy rozswětluj,
A z tyšnosću a ze sylzami
So nchtó sprawny njekrjuduj;
A postanu-li hroženja:
Bóh swój lud hnadnje přewodža.

Na wusyw rjeńšej' přichodnosće
So zložimy čím swěrniso,
Čas přiwjedze tež wjesolosće,
Žně dočakaju syjerjo;

Z tej nadziju so wobróńmy
A nastupmy te nowe dny.

Hlaj, mrowja nosy małe próški
A tola horu nakopi,
Jej' pućik njeje přeco lóžki
Přez hory, doły, trawički;
Duž wudźeržmy tež sćerpliwje
A pomhajmy sej towařsnje.

Kaž dolho ludy zemju khodža,
Tu wěrnosć stajnje zhonichu:
„Bóh, čas a próca čłowstwo wodža
Po skhodžeńkach přec' k lěpšemu.“
Z tym dowěrjenjom, bjez stracha
Łódź našu hnujmy wot brjoha.

Haj, won na łódź! Preč lěnje spanje!
Wšak zbože khrobłych pytać wě,
Bóh pak daj dobre łódźowanje
Po žołmach našej' časnosće
A pomhaj k měrej kóždemu,
Kiž nosy tyšnu wutrobu.

Bóh žohnuj lud a kiž jón wodža
A zastupuja swobodu,
Bóh žohnuj tych, kiž zemju płodža
A wobradź wšědnu potrjebu;
Tež z khlěbom wěčnoh' žiwjenja
Njeh so wšě duše nasyća.

Bóh ze wšěm tež na Serbstwo hladaj
 We swojej wótcnej miłosći
 A jemu dobreho dosć nadaj
 A rosćenje we jednoći:
 Tak mamy lěto zbožowne
 A měr a mysle wjesole.

(1848.)



Džěcaca próstwa wo njewinnosć.

(Zernička 1849, 153.)

Pycha rjana,
 Njewinnosć ty lubowana,
 Pyš mje w mojej mlodosći,
 A mam khwalbu před wšěmi.

Parla jasna,
 Moja česć a króna krasna,
 Luba, zbóžna njewinnosć,
 Na tebi mam česće dosć.

Wodź mje stajnje,
 A mam zboža njewuprajnje,
 Mój puć budže wjesoly,
 Swjaty, měrny, dostojny.

Pycha miła,
 Njewinnosć ty róža žiwa,
 Pyš mje moje žiwe dny,
 A wěnc nošu njezwjadły!

(24./8. 1849.)



Blidowy spěw.

Česć Bohu, Knjezej, damy
 Za dar, kiž wužiwamy,
 We pokoju a strowosći;
 Džak, bratřa, wótcej dajće
 A kěrluš zaspěwajće,
 Zo z dobrotu nas nasyći.

Wón žohnowanjow wjele
 Po cyłej zemi sćeje;
 Plód brózda a štom přinjese.
 We wodach, lěsu, holi,
 Na lukach a na poli
 Su jeho džiwy widome.

Hdžež mróčeje tež džeja,
 A wyše zemje steja,
 Te jasne, módre njebjesa:
 Tam, hač k najdalšom' kóncu
 Wón swěćić kaže slóncu
 A zemju z deščom napoja.

Tam zwěrinje a ludžom
 Wón blido kryje wšudžom
 A smilnu ruku wotewri;
 Za tajke žohnowanje
 A miłe wukublanje
 Česć jemu dajmy džakowni.

(Hapryl 1850.)



Swjatkowny spěw I.

(Zionske hłosy I, 77.)

Česć dajće Duchej swjatemu,
 Wšě ludy na zemi,
 A wotamkńće jom' wutrobu
 We swjatej radosći.

Bóh Wótc a Syn joh' pósće
 K nam dele z darami,
 Wón k wěrnosći puć pokaže,
 Měr, trošt nam wudźěli.

Wón žadanje za zbóžnosću
 We dušach wubudža
 A wěru, lubosć, nadźiju
 Nam z nowa posylnja.

Duž, wuswjećene křesćanstwo,
 Daj jemu bójsku česć
 A jeho hnady wjesel so,
 Zo chce će k njebju wjesć.

(Hapryl 1850.)



Swjatkowny spěw II.

Pój, swjaty Ducho, z njebjesow,
 Přińdź k nam do našich wutrowow,
 Je zahoř z nowej lubosću
 A čin je zwólne k modlenju.

Swjeć, swjeć nas k domu Božemu
 A přispoř mysl njobjesku
 A pokaž nam puć zbóžnosće
 Přez prawe Boha póznaće.

Daj, zo kaž dobre štomiki
 Plód radny bychmy přinjesli
 A wobtwjerdź naše wutroby,
 Zo Bože lube džěći smy.

(9./5. 1850.)

— * —

Do jědze a po jědźi.

(Tydź. Now. 1850, 265)

Do jědze: **B**ožo! přecelniwje
 Na nas spominaš
 A nam lubosćiwje
 Dary podawaš:

Twoja wšědna dobrota
 Njeh je wot nas khwalena!
 Hamjeń.

Po jědźi: Božo! twoja wobrada
 Je nas wokřewiła,
 Twoja ruka šćedriwa
 Je nas nasyćila:

Džak ći wutrobny
 Za to prajimy!
 Hamjeń.

(1850)

— * —

K nowemu lětu 1851.

(Tydź. Now. 1851, 1.)


Kaž do wody so žołma podnuri
 A póžrěta so zlehnje:
 Tak leći kóžde lěto k wěčnosći,
 So zhubi a přeč čehnje;
 Kak čeka naš čas žiwjenja,
 Nam spěšne lěta wobswědča.

Njeh je! njeh knježi zachodnosće móc,
 Što so jej' postróžimy?
 Bóh je naš škit, wón je naš wótc,
 Duž troštnje dale džimy;
 Njej' tón naš hród a khowanka,
 Kiž bě a je a wostawa?

Wón je! wón pućowny kij do ruki
 Nam dawa džensa z nowoh',
 Duž wzmimy jón a rjekúmy dowěrní:
 Na twoje, Knježe, słowo,
 A w twójim mjenje wuńdzemy,
 Budź dobry nam a šćedriwy.

Zdzerž měr, a wjerchow sceptar požohnuj,
 A wozbožej wšě ludy,
 Daj plódne wjedro a žně přihotuj
 Wšěm ludžom tam a tudy;
 Haj, kóžda próca přislušna
 Njeh twoje žohnowanje ma.

Tež naše lube Serbstwo wótcowscy
Ty z přibywanjom krónuj
A šulu, cyrkej, dom a wutroby
Ze smilnej ruku žohnuj;
Njeh wěra, lubosć, nadźija
Nas tež to lěto wozboža! (December 1850.)




Wužiwanje žiwjenja.

Chceš rjenje žiwjenje tu wužić:
Na Božej stwórbje wjesel so,
Ze šćěpjom zboža daj sej słužić,
Wzmi nizki dom tež za lubo.

A lubuj šćežku njewinnosće,
Na kóždy stork so njemjerzaj,
A piješ-li kelch wjesołosće:
Spěw džakny sebi zaspěwaj.

Džerž za dobre, kaž Bóh će wodži,
A zabudź, štož so njewróća.
»Černí kalaty tež róžu plodzi«
To budź twój trošt a nadźija!

(20./5. 1851.)



Žnjeński spěw.

(Tydž. Now. 1854, 244.)

Džak a česć měj Bóh, tón miły,
Kiž nam brózdu žohnuje,

Z kóždym lětom nowe džiwy,
Móc a krasnosć pokaže.

Džak a česć za žohnowanje,
Kiž smy z pola khowali,
Jeho wótčne wobstaranje
Dešć a slónco wobradži.

Džak a česć tom' Knjezej dajmy
Spěwajo a we skutku,
Bratrow hlódných njewostajmy,
Smilni smilnosć dostanu.

Džak a česć! dóńž zemja Boža
Nosy plód nam k potrjebi —
Hač do rowa, smjertnoh' loža,
Khwalmu Boha wjeseli!

(1852.)



Poswjećenje noweho duchowneho.*

(Tydź. Now. 1852, 387.)

Naš Wótče, tebje khwalimy:
Džens w domje twojim swjatym
Sy zjewił krasne dobroty
Wšěm zrudym, khudym, jatym.
Do našej' wosady
Nam luboh' póslał sy

* Tutón spěw bu pěsnjeny za skladnosć nastupjenja duchowneho zastojnstwa k. fararja Bergana w Zdžarach.

Prědarja noweho,
 Wotročka twojeho;
 Wot nětk wón nam wšón slůša.
 My polne wěrnej' lubosće
 Wutroby za njoh' mamy;
 Před Bohom k wěčnej swěrnosći
 Jom' ruku zawdawamy.
 Wón chce nas k Bohu wjesć
 A pytać jeho česć.
 Duž prawoh' zboža dosć,
 Měr, radosć, přecelnosć
 Mjez nami knježić budže.
 Bóh drohe pjeńčki róžowe
 Tři pola nas sej sadža.
 Město, hdžež rostu, swětle je;
 So róže rjane radža;
 Hdyž Khrystus mjez nami
 Bydli we wutrobi.
 Wěra a nadźija,
 Lubosć pak najwjětša,
 Njeh pyša našu cyrkej.

(1852.)

—*—
Poswjećenje Božeho doma.*

(Tydź. Now. 1852, 410.)

Hlós: Njeh Bohu dźakuje atd.

Pój, wosada, pój nutř,
 Twój Boži dom će woła

* Tutón spěw bu spěwany při poswjećenju dowutwarjeneho Božeho doma we Wóslinku 23. njedźelu po swj. Trojicy 1852.

We pyše swjatočnej,
 Kiž wudebi jón z nowa;
 Poswjeć swój Boži dom
 We džaknym wjeselu
 A Boha wjeršneho
 Khwal z nowej lubosću.

Praj, Bože stadleško:
 To je dzeń zbóžny, jasny,
 Kiž činił je Bóh Knjez,
 Tón mócný, miły, krasny;
 Wón z nowej hnadu k nam
 So džensa póżnawa,
 Duž z nowym kěrlušom
 Klinč Boža swjatnica!

(Wotspěwanje a wotčitanje před woltarjom.
 Spěwanje při pišćelach.)

Před Bože wobličo,
 O syła wobhnadžena,
 Z čim wjetšej žadosću
 So skhadźuj zwjeselena;
 Bóh Knjez će pyšić chce,
 Tu pozběhnyć a pasć
 A słowo žiwjenja
 Či do wutroby klasć.

(Wotčitanje před woltarjom. Spěwanje při pišćelach.)

O Khryšće zbóžniko,
 Duž prosymy će swěru,

Daj twoje zbože nam
A posylń našu wěru;
Pas, wyšši pastyrjo,
Tu wowcy, jehnjata,
Wšěch póznaj za swojich,
Wšěm wotamkń njebjesa.

(Zawod přědowanja.)

Pój, swjaty Ducho, swjeć
Nas Khrystusowe stawy,
Daj swětło, lubosć, móc
A k modlenju lóšt prawy;
Njeh naša wutroba
Kaž twój dom rjana je,
Kiž je ći swjećeny
Přez mysle njebjeske.

(Po přědowanju.)

A nětk tu swjatnicu
Zdžerž, Božo dobroćiwy,
Před škodu, njezbožom
A budž nam dale miły;
Njeh tebi služimy
Tu stajnje z wjeselom,
Hač horje bjerje nas
Twój wěčny Boži dom.

(Po požohnowanju.)

Budž Bohu Wótcej česć
A khwalba w wysokosći,

Budź, Božo Syno, či
 Česć w runej majestosći,
 Česć Duchej swjatemu
 My wšitcy spěwajmy,
 Hač w Božim kralestwje
 Jo rjeńšo móžemy!



Próstwa mandželskeju při wěrowanju.

Stup sem ke mni, bydli we mni,
 Kiž ty moje zbože sy,
 Tebje hlada, k tebi žada
 Moja duša w swjatnicy.

Z njebjes daty Ducho swjaty,
 Pój, swjeć moju wutrobu,
 Daj mi čistu lubosć wěstu
 K zbožownemu mandželstwu.

Boža hnada, Wótca rada
 Wjedła je naj' hromadže,
 Ty pak sylnje, njerozdźělnje
 Wjazaj nětk naj' wutrobje.

Žołmi morjo, hrozy horjo,
 Zdžerž nam kubla darjene.
 Skublaj, žohnuj, wšědnje krónuj,
 Zo so derje radža wšě.

Z twojim jasnym swětłom krasnym
 Čěmne puće rozswětluj,

Hdyž so hrima a křiž přima,
Z troštom wěry posylnuj.

Wuč naj' slědźić a so bědźić
Za tej krónu njobjeskej,
Kiž tam rjana zakhowana
Blyšći duši wěrjacej.

K rjeńšom' kraju, k zbóžnom' raju
Jedyn druhoh' přinjesmoj,
Hač po času k tamnom' kwasu
Wobaj zbóžnaj dónďžemoj.

(K swojemu kwasej 1853.)



Božemje staremu lětu.

(Tydź. Now. 1854, 397.)

Budź stare lěto božemje,
Hdyž k wěčnosći Bóh woła će
A skónči twoje hodžinki
Za nas, tu hosći na swěći!

Čehń wot nas lětko božemje!
Štó zamóhl zabyć na tebje?
Nam twoje slónčko, hwězdźički
Džěl bjerjo su tu swěćili.

Bóh žohnowanjow do ruki
Bě wjele za nas podał či
A sylzy, kiž tež ronjachmy,
Nam z troštnej ruku trělo sy.

Po prócach a po starosći,
Po wjeselach a zrudobi
Čehń lěto k wrotam wěčnosće,
Wzmi sobu naše rudženje.

Čehń z Bohom, luby přećelo,
My njewidźimy wjac so;
Za přetrate a wužite
Budź Bože mjeno khwalene!

(December 1854.)



Wječorna hwěžka.

(Zahrodka kwětkojta I, 58.)

Wječornička,
Ty lubozna škra,
Sy daloko tež,
Mam lubo će tola, hdyž zablyšćuješ.

Mi lubowana
Ty zybolawka,
Ja powitam će,
Wšak wóčko to twoje tu widzi tež mje.

Sym tudy, sym tam,
Ja k tebi hladam,
Wšak njobjeska ty
Mi do wóčka mikaš a do wutroby.

Kak měrnju maš ćěr,
Mi pokiwaš měr,

Hdyž nětko so ćmi;
Mi podaj twój pokoj, zo runam so ći.

O najrjeniša
Ty blyščata škra,
Duž zwjeseluj mje,
Kaž husto će widžu, zo derje mi je!

(1855.)



Hodowny kěrluš.

(Zahrodka kwětkojta II, 53.)

✱
Kak je Bóh lubował hrěšnu tu zemju a khudu,
Zo je jej Zbóžnika póslał, so smilił na ludu;
Boža ta nóc přewinje skaženja móc,
Wěrjacy njepřińdu k sudu.

Khwalbu, česć Božu tam k pastyrjam jandželow syła
Na našim zbožu tež wjesoła pojda a spěwa:
Spodobanje wot Boha z wysokosće,
Boži měr, hnada wam kćěwa.

Spěwajće sobu, wy zachodnej' zemine džěći!
Njebjeska lubosć k wam dele so z Khrystusom swěći;
Njebjesa so wottamknu zablyščuju,
Swěća so trónej a hěći.

Z kěrlušom wysokim Knjeza a Zbóžnika witaj,
Džakowna zemja, a rjenišej swětłosći switaj,
W Bethlehemi w žłobiku džěćatko spi,
Lubosć a hnada tam spitaj.

(6./12. 1855.)



Boža móc a wulkosć.

Ach Božo, wulki, trašny, mócný,
Što cyly swět je před tobu!
Ty naša skała a škit wótcny,
Zjew nad nami so z pomocu.

Twój wichor trašny howri, čehnje
A naše bydło zatřase,
Na twoje słowo pak so zlehnje,
Ruć, wuč a torhać přestanje.

Ty rěčiš, a my womjelknjemy,
Ty hrimaš, a my zaržimy,
Ty kiwnješ, a my wotsal džemy,
My proch a pjeršč před tobu smy.

Strach sadža na nas, šumi hrožo,
Strach naše duše zajima,
Ach pomhaj nam, naš luby Božo,
Njeh naša tyšnosć přestawa.

By naša khwalba so ći zdała
Za pomoc, kiž nam trjeba je,
To by ći duša woprowała
Česć, khwalbu, džak, štož zamóže.

Chceš naše polěpšenje widzić
Za pomoc, kiž nam poskićeš;
Duž chcemy stajnje wšitko hidzić,
Štož njedobre ty mjenuješ.

Tu khwilu, Wótče, sym ja žiwy
 A hišće prosycé zamóžu;
 Duž budž, ach budž nam miłosćiwy
 A dopjelní próstwu ponižnu.

Praj, Knježe, k našej próstwje hamjeń,
 My na tebje so spuścamy,
 Wzmi wot wutroby tyšny kamjeń,
 Wšak ty naš Bóh a Wóćec sy!

(Wokoło 1855.)



K Božej nocy.

(Pjekař, spěwy za šule II, 17.)

Ó pójće sem, wěrjacy, kěrluš sławny spěwać,
 O pójmy sej wobhladać Bethlehem,
 Bože to džěco k zbóžnosći nam date.
 O pójće sem so modlić k tom' kralej!

Pój, wójsko ty jandželow, džensa Knjezej wyskać,
 Haj khwalće, wy zbóžni, so zradujće;
 Bohu budž česć na njebju a na zemi!
 O pójće sem so modlić k tom' kralej!

O kralo tej' česće, ty knježe wójska Božoh',
 O Wótče ty wěčny a měra knjez,
 Rodženy wěrný Bóh sy wot wěčnosće.
 O pójće sem so modlić k tom' kralej!

O tebi, kiž džensa so narodził sy za nas,
 Či, Jezu, budž khwalba a česć a džak,

Słowo wot Wótca, čłowjek narodźene.
O pójće sem so modlić k tom' kralej!

(Wokoło 1855.)

— * —

K nowemu lětu 1857.

(Serbske Now. 1857, 1.)

Nětk nowe lěto witamy
Do žiwjenja na zemi,
Džak njech su přenje wopory,
Džak Bohu z kěrlušemi,
Zo nam je nastupić zas' da
A zo nas hišće přikrywa
Ze škitom swojej' hnady.

Wón budź tež dale pola nas
Ze swojim wobstaranjom.
Njech kraj a lud kće kóždy čas
Pod jeho žohnowanjom,
Njech Bože kralestwo pak je
Nam naše kubło najdróžše
A Boža wótca hnada.

Bóh wudźěl wšitkim spokojnosć,
We starosćach daj radu,
We horju spožč nam sćerpliwość
A pomhaj bórzy z hnadu;
Njech bohatstwo nas njeblazni,
Njech khudoba nas njestuži,
A zawisć z kraja čekaj.

Njeh dobre wšo so poradźi,
 Měr, lubosć njeh so spori,
 A prjódcy w našim Serbowstwi
 Njeh dobry duch so hori,
 Haj, cyły serbski lud a kraj
 Tež w tutym lěće wužiwaj
 Wšu hnadu a wšo zbože! (11./12. 1856.)

— * —

Kěrluš.*

(Serbske Now. 1857, 219.)

Česć, khwalba, džak! je naše zaspěwanje
 Do hłosa nowych pišćelow,
 Kiž nutrne nam zbudža dušow pozběhanje
 A powyša móc kěrlušow.

Haj, k njebjesam njeh klinča naše hłosy,
 Hdžež Seraf swój hłós zanoša.
 Bóh njezacpi, njeh tež najkhubši swój džak nosy
 We džěćacym halleluja.

Zynk miły pišćelow tón přewodźuje
 Do njebja próstwu wěrjacu,
 Wón tyšnym wutrobam křiž zeński polóžuje
 A swjeći dušu wjesołu.

Kaž wětry lódź přez mórske žolmy ćerja,
 Zo wona swój puć dojedže:

* Tutón spěw bu spěwany při poswjećenju Klětnjanskich nowych pišćelow w juliju 1857.

Tak z hłosom piščelow so spěwaju a wěrja
Do njebjes duše křescanske.

Jich hlós do mandželstwa puć poswjećuje
A wyska sobu wjesoly,
Plač zrudnych poćiša a zrudźbu pomjeńšuje
A troštjuje jich njebjescy.

Duž Božu česć tón swjaty twar njech spori
We wjeselu a zrudobi,
A hdyž we swjatych časach wutroba so hori,
Njech k jandželam nas stowařši. (1857.)



Spěw při powitanju noweho duchowneho.*

Do winicy swojej
Bóh wotamkuje
Wam džensa nowe wřota
A Was k nam přiwjedže.

Duž z wutrobu, z ruku
Was powitamy
We Božim swjatym mjenje
Do našej srjedźiny.

Bóh žohnuj Waš přikhad,
Budź z wami tež tu,
My dowěrnje pak damy
Wam našu wutrobu.

* Knjezej fararjej Wanakej při nastupjenju zastojnstwa wot
Wóslinčanskeje, Jitčanskeje a Wysočanskeje šulskeje mlodosće spěwany.

Naš přećel a pastyr
 Wy budžeće nam;
 Naš luby zwjazk pak žohnuj
 Tón wyšši pastyr sam.

Wón zwěruj nas džensa
 A hnadu nam daj,
 A něhdy wotamkń wšitkim
 Swój zbožny Boži raj.

(4. 7. 1859.)



Boži dzeń.

(Pjekař, spěwy za šule II, 19.)

Lubosć jasna naš Bóh je,
 Swět chce wumóc lubosć luta,
 Lubosć lama hrěšne puta,
 Runjež hela hněwna je.

Jandželjo měr spěwaju,
 Boži měr wšěch dobrych křewi,
 Hwězda dobyća so zjewi,
 Z mutnych žołmow zeskhadža.

Džěčo, hlaj, syn Boži bu,
 Njebjeski hósć w hródzi bydło
 Ma za złoty hród a sydło,
 Trónuje we žlobiku.

Kajka miłosć krasni so
 Z tutym džěsćom nětk nad nami,
 Bratruje so lubje z nami,
 Štóz ma ducha čisteho.

Ponižnosć nas wuswjeći,
 Horda mysl wjedže k padu,
 Džěcaca pak dawa hnadu,
 Z Jezusom nas stowařši. (Wokoło 1860.)

— * —

Na swjatki.

(Pjekař, spěwy za šule II, 16.)

Ó wěrnosće ty Ducho,
 Pój bydlić we nami,
 Za wěrnosć wotamknj wucho,
 Błud a ćmu wot nas wzmi;
 Nam zahoř našu wěru,
 Křći ert a wutrobu,
 Zo Khrysta z wjetšej swěru
 By kóždy póznał tu.

Błud z njewěru so šeri
 Džeń kóždy khroblišo,
 Duž brón we wyššej měri
 Nam podaj, ryćerjo;
 Ty dyrbiš sćerpnosć dawać
 A swěrnosć we wěri,
 A k pomocy nam stawać,
 Zo swět nas njestróži.

Tam w pohanskim tym kraju
 Twój hlós tež slyšec je,
 Zo swój přah rozlamaju
 A puta přibójske.

Duž přińdu ze wšěch stronow
Do twojoh' kralestwa
A wocuća ze sonow,
Nětk chcedža Zbóžnika.

O Ducho, zhotuj wšudžom
Džeń swjatkow na zemi,
Daj póznać wšitkim ludžom
To zbože we Khryscí,
O pomhaj k prawej wučbje,
Nam posylí wutroby,
Zo w wjeselu a zrudźbje
Wot Khrysta swědčimy. (Wokoło 1860.)

— * —

Rańši spěw.

(Zionske hłosy I., 265.)

Nětk w Božim mjenje wustupju,
Swój dom a swojich wopušću,
We Božim mjenje won chcu hić,
Swój puć a dróhu nastupić.

So njestaraj mi, wutroba,
Štó nětk wšo moje zakhowa,
Štó mojich lubych budže kryć,
Hdyž njemóžu ja při nich być.

Tam horkach Knjezej na njebju
Ja wšitko ze wšěm poruču;
Wón ma tak wjele jandželow,
Nam lubych swěrných pěstow.

Tón budže swěrnj k mojim stać,
 Mój dom a kubło wobhladać,
 Tež na mni chcył so překrasnić,
 Mój won- a dompuć ze mnu hić.

Bóh požohnuj a zwarnuj mje,
 Njeh jeho škit mój přewod je,
 Wón chcył mje strowoh' domoj wjesć,
 A chcu jom' spěwać wěčnu česć.

Duž chcu so džaknje zradować,
 A Božu miłosć pozběhać,
 A wšitcy moji zjednoća
 Swój hlós do mojih' kěrluš.

(1862.)



K nowemu lětu 1864.

(Lužičan 1873, 1.)

Štož tu swět zbože mjenuje,
 Hdyž wono twój dom hlada
 A kóždu kročel z tobu dže —
 Hlaj, to je Boža hnada.

A skhowaš kruće w rukomaj,
 Štož maš za twoje zbože,
 Daj Bohu česć, to wšitko, hlaj,
 Je žohnowanje Bože.

Hdyž pak so njebjó počěmni
 A hwězdy hasnyć hroža,

Rad podćisni so Knjezewi,
Hlaj, to je lubosć Boža.

A hdyž we tyšnej hodžincy,
Kaž Hagar, žórło měra
Sy namakał, budź džakowny,
Hlaj, to je Boža swěra.

Duž hladaj troštnje do swěta,
Njeh njemóc tež a nizekosć
Će přerži, moja wutroba,
Hlaj, to je Boža blizkosć!

(1. januara 1864.)

— * —

Khwalba Boža.

(Zionske hłosy I, 248.)

Xhwalene budź twoje mjeno,
Božo, Ducho najwyšši,
Kiž ty džiwne we třoch jeno
Jene swjate byće sy.
Prjedy, dyžli hory běchu
A na njebju hwězdy kćěchu,
Sy ty był a budžeš wostać,
Hdyž wšo budže swój kónc dostać.

Tolsta ćemnosć přikrywaše
Wysokosć a hłubinu,
A ty všehomócnny džeše:
Swětlo budź! a swětlo bu;

Slónco, hwězdy zaswitachu,
 Stejachu, so překhodžachu;
 Sucha zemja stupi z wody,
 Wětr bu wyše njej' a spody.

Smuhi horow pozběhachu
 Swoje hlówy k njebiesam,
 Morja zemju wopasachu,
 Pěsk so zeńdže k pusćinam;
 Hory, lěsy, pola, wody
 Porodžichu žiwe plody;
 Wšudžom mjeřwjachu so waki,
 Ryby, zwěrina a ptaki.

A tón čłowjek — z procha zemje
 Sy ty jeho zhotował,
 A to, štož ze zemje njemě,
 Jemu sam ze sebje dał.
 Jemu sy ty wšitko daril,
 Štož sy z twojej ruku stwaril,
 A na wšitkim knježić kazał,
 Haj, z nim sam so twjerdže zwjazal.

Kak je twojich skutkow wjele,
 O kak dziwna twoja móc.
 Hladam horje abo dele,
 Zjewi mi ju dzeń a nóc.
 Štó to stworjenje chce měrić
 A bjez spodžiwanja wěrić,
 Zo ty, Božo, hdyž sy prajil
 „Budź!“ wšo do swětla sy stajil?

Wšitko jara dobre běše,
 Štož je z twojej' ruki šlo.
 Swětow kóždy swój puć džěše,
 Swoje město pózna wšo;
 Wšo bě krasnje dostworjene
 A wšo mudrje wustajene;
 Twoju mudrosć pozběhuje,
 Štož so myśli a so čuje.

Ty sy Wóćec nade wšěmi,
 Kotrymž džěći rěkaja;
 Twojej woči stej nad tymi,
 Kiž će swěrnje lubuja.
 Rozlamanych wobaluješ,
 Panjenych ty pozběhuješ,
 Z twojej dobrotu so pasu
 Wšitcy žiwi we wšěm času.

Žadyn jazyk njedokhwali
 Twoju lubosć k čłowjekam,
 Kiž će běchu rozhněwali,
 Zo ty jim, tym hrěšnikam,
 Jezom Khrysta dla sy wodał,
 Hdyž sy jeho za nich podał,
 A kiž su so wujednali,
 Wěčnu zbóžnosć herbowali.

Hdžež ja khodžu, hdžež so khowam,
 Wšudže sy ty nade mnu,
 A wěš mysle k mojim słowam,
 Prjedy hač je wurjeknu.

Ty mje widziš, hdyž ja plakam,
 Abo z wjesołosću skakam;
 A hdyž strach so ke mni snowa,
 Twoja prawica mje khowa.

Swjaty sy ty, swjaty, swjaty!
 Spěwaju ći jandželjo,
 A tež čłowjekam sy znaty
 Jako swjaty, prawy Bóh.
 Ty maš na wšěm spodobanje,
 Štož so k twojej česći stanje,
 Zbóžnosć lubiš wuswjećenym,
 Čwilu hrozyš zatwjerđenym.

Wěrnosć je, štož ty sy prajił,
 A tež wěrnosć wostanje.
 Štož sy před woći mi stajił,
 To mje zjebać njebudže.
 Štož sy hrozył abo slubił,
 Njejsy nihdy z mysle zhubił;
 Njeh je tudy abo druhdže,
 Stać so z časom wěsće budže.

Hdyž so minu moje lěta,
 A mi smjerc so přibliža,
 Chcu ja troštnje z teho swěta
 Hić do twojoh' kralestwa,
 Hdžež ći lubi, kiž mje znaja,
 Z horcosću mje powitaja,

A hdžež při tym zbóžnym ludu
Tebje wěčnje khwalić budu. (Wokoło 1865.)



Njedźela a swjaty dzeń.

(Jordan, čitanka, str. 6.)

Kuby Bóh je z njebjes prajił:
 Šěsć dnjow, čłowče, sym ći stajił,
 Na tych prócuj so a džělaj —
 Sedmy ke mši khodź a spějaj;
 Česć mój dzeń a słowo swjate,
 Twojej duši k zbožu date;
 Štož sy słyšał njedźelu,
 Duši khlěb je w tydženju.
 Štož to njecha, — žohnowanje
 Najlěpše sam sebi kranje;
 Tole, lube džěćatka,
 Zapišće do pomjatka! (1865.)



Bóh wjele krasniši.

(Přecelne zbožopřeće Pětrej Mlónkej w Džiwoćicach k jeho
přichodnemu narodnemu dnjej.)

(Časopis Mać. Serbsk. 1869, 107.)

Khodzjach z nalěćom po zemi
 Jeho pychu wohladać,
 Wukhwalach ju z kěrlušemi,
 Chcych so na njej zradować:

Ale krasniši sy, Božo! —
 Běše moje wuznaće,
 Najwyšše sy moje zbožo,
 Kěrluš mój a wjesele!

Ćoplych krajow wjetšu krasnosć
 Duch mi staji před woči,
 Kajka hakle barbow jasnosć
 Je tam a swět zaronski:
 Ale krasniši hač skutki
 Je jich wulki stworićel,
 Wón wzmi khwalbu, wón samlutki,
 Jemu duša wopor sćel.

Narodnišća źórłow, rěkow —
 Hory, doły překročach,
 Srěbach tam srjedź bukow, šmrěkow
 Čisty dych a womłodzach:
 Ale krasniša je ruka,
 Kotraž to wšo natwari,
 Je to wotsćěń jeno bluka
 Porno Božej krasnosći.

Morjo šumić slyšach w duchu,
 Hrózby ma a potajnstwa;
 Klakń so! klinčeše mi w wuchu,
 Kajka móc to wulkotna:
 Ale krasniše je mjeno
 Teho, kiž knjez morja je.
 Maš strach před nim? pos'chaj jeno,
 Lubosć wón so mjenuje.

Pohladach na krasne, mócne
 Bože džiwy z wječora,
 Widzach hwězdne njebo nócne —
 A hlós we mni zawoła:
 Hišće krasniši je teho
 Trón, kiž knježi nad nimi —
 Wačka procha podslónčneho!
 Wón ma stoł tež we tebi.

Kak tam budža hakle krasne
 Bydla našej' zbóžnosće!
 Ma swět rjeńše něšto časne,
 Kiž wón předom njebo je? —
 Je pak přeni dom tak rjany,
 K rjeńšemu so narodžu —
 K tamnym honam powołany
 Rad so jednam ze smjerću!

(7./3. 1868.)



Křesćanow mandželstwo.

(Serbske Now. 1869, 59.)

Kak jasnje a krasnje so mandželstwo swěći
 Wšěch křesćanow, přećelow Jezusowych,
 Jich zbože so zeleni w zymje a lěci,
 Je pěston jich swěrný w dnjach dobrych a zlych;
 To čini jich wěra, jich lubosć a swěra,
 Kiž Jezus ju swjeći, ju sylni a spori,
 Zo wutroba k wutrobje bójscy so hori.

Na wjesole město přez jednotu pada
 Lós dobry jim wšědnje we spokojnosći,

Su prawdosće štomy, kiž Boži Duch hlada,
 Su Knjezowej' khwalby šćěpk mjenowani;
 Jich dom je dom měra, to džěla jich wěra,
 Jich wójwoda měrny a wujednař krasny,
 Kiž płomjenja hidy a hněwa tu hasny.

Kaž swětej dny dobre tež derje jim słodža,
 Tež pjenjez jim pohoji tule a tam,
 Trošt lěpši, šac rjeńši pak wědža a rodža,
 Jich złoto a slěboro Jezus je sam;
 By časnych pak mało jich kubłow so zdało:
 Tón spokojny Jezus, kiž khudy tu běše,
 Jim z bohatym troštom wšak do přědka džěše.

Z nim wobstupja blido a wot jědže stanu,
 Haj, modleřski wołtař jich wutroba je,
 We zbóžnika mjenje won do džěla čahnu
 Ze sćěrpliwej ruku a z lóštom wšo dže;
 Tež Jezus je džělał, so modlił a spěwał —
 Duž ródne a sprawne z nim dopjelnja džěło
 A jeho měr wokřewja dušu a čěło.

Swět njewě, kak z wulka by dawał so widzić
 A přibójstwo čěri sam ze sobu rad,
 Chce poměrných směšić a spokojnosć hidzić,
 Njej' blyskot to blazny a mandželstwow pad?
 Štó za tym by hłodził, štož Khrystus njej' rodził,
 Haj, z hněwom je wrócił, zo spytowař čěka!
 Swět tola jo khwali a witane rěka.

Duž krasnosć njech swoju swět hordy přec' trubi,
 Te rjanosće z njenahła woblēduja,

Knjez Jezus tu svojich tak žohnować lubi,
 Zo woda do wina so přewobroća;
 To krasnosć je prawa, kiž widžeć wón dawa!
 Da z posledka lěpše we swoim tym času,
 Kaž něhdy to zjewi we Kana na kwasu.

A přińdu tež hrimanja, što tež te wadza?
 Tež sylzowe dešće jim k lěpšemu su,
 Kaž zeńske te plody čím lěpje so radza,
 Čim husćišo njewjedra wyše nich du,
 Po Khrystu njehnući su sčěrpnj a krući
 A znosyc rad pomhaju ćežkoty sebi
 A nadzija z wěru jich dzerži a debi.

Haj wolu hdyž swoju so wutroba swlěka,
 Pod křižom tež jeje chce cyle so wzdać,
 To pruhu we žiwjenju wobstać tu rěka
 A njebieske mocy wot zbóžnika brać.
 Hdže swětne pak džěci to zamóža w swěci?
 Duž mandželstwa jich su tak mutne a ćmowe
 A wěrneho zboža tak prózdne a hołe.

Duž zbóžne so mandželstwa křescánow radza,
 Zo jandželjo sami so zwjeseluja,
 Kaž štomy, kiž po kromach rěkow so sadza,
 Kaž winicy Bože so zazelenja;
 Jim přichod so jasni, přez miłosć so krasni,
 A myto jow w času a w njebiesach změja
 A rjeńšo hač róže a lilije kćěja! (1869.)



Kěrluš před pućowanjom.

(Jordan, čitanka, str. 53.)

Mój Abba, wótče njebjeski,
 Ja chcu so na puć podać
 A Tebi, štož mam na mysli,
 Chcu poručić a dodać,
 Duž wjedź mje z Twojej prawicu,
 Zo wuzwolam a nadeńdu,
 Štož mojom' zbožu słuži.

Pój sobu, luby zbóžniko,
 Nětk moja duša prosy,
 Njeh by so derje radziło,
 Štož wona w myslach nosy;
 Do ruki twojej' mudrosće,
 Kiž derje wšitko wuwjedže,
 Ja bojazny so podam.

„Sym při tebi, duš njeboj so“,
 Mój zbóžnik ke mni praji.
 Wzmi na puć, duša, słowo to,
 Kiž bojosć twoju staji —
 Njeh zakhadžeja wichory,
 Wón z tobu je na lódzičcy
 A njeda ji so nurić.

Ja lehnu so na wutrobu
 Ći, mócný Knježe swěrný,
 Swět powal so, ja z tobu du
 A zawostawam měrný;

Ja křiž a horjo překročam
 A »haleluja« zanošam,
 Hdyž chce so swětej zecnyć.

Budź, domo mój, duž božemje
 A bož'mje wšitcy lubi,
 Mej duše přećel sobu dže,
 Škit a swój trošt mi slubi,
 Mje wodnjo slónco njespari —
 Z nim swětlo mam we ćemnosći,
 Mój puć so derje skónči. (5./7. 1869.)



Khrystusowe k njebju stpiće.

Na Khrysta k njebju stpiće
 Ja kruće založam
 Tež moje za-nim-hiće
 Tam k zbóžnym bydlenjam;
 Mje za sobu ta hlowa,
 Swój staw, tež počehnje
 A při sebi mje skhowa,
 Hdžež nětko z trónom je.

Na Khrysta k njebju stpiće
 Ja wšón so dowěrju,
 Mi z dwělowanjom džiće
 A swětnej mudrosću.
 Khryst date ma nětk mocy
 Tych swojich překrasnić,

A jich po čmje a nocy
Do swětla přesadzić.

Na Khrysta k njebju stpiće
Ja něhdy wusnyć chcu;
Najlubše wšo mi wzmiće
W tym zeńskim přebytku:
Tón poklad dyrbi wostać,
Tón slub so njehnuje,
Zo žiwjenje mam dostać
Tam, hdžež mój pastyr je.

Na Khrysta k njebju stpiće
Duž rady spominam,
O zbóžne domojhiće,
Zo zabywam so sam —
O swětlo, měr a hnada!
Smjerc čekaj ze strachom —
Mje domoj něhdy hlada
Tónsamy wótc a dom.

O mróčałki wy jasne,
Wy wozy njebjeske,
To běchu služby krasne,
Kiž wy tam činješće.
Na jenej křiž tam knježi,
Kiž z hrěcha wumóže,
Na druhej khorhoj k rejži
Mi k njebju zmahuje.

Duž měrny chcu so spěwać
 We wěrje do njebja,
 Smjerć njemóže mje hněwać
 A stajić do stracha;
 Je Khrystus jeno hnadny
 Mi khudom' hrěšnikej,
 Ja trošta njejsym žadny
 We dobje poslednjeje.

Budź, Khryšće, tebi krasnosć
 A khwalba najwyšša;
 Sy našich dušow jasnosć
 A dróha do njebja;
 Pod nohomaj nětk cyła
 Či zemja hołduje,
 Česć twojom' mjenu spěwa
 Džens a do wěčnosće. (26./5. 1870.)

— * —
Hdže.


(Jordan, čitanka, str. 37.)

Na tebje, Jezu, hlada
 Ta syła džěčatkow,
 Přińć kóžde sebi žada
 Do twojich njebjesow.

O daj, zo wšitke znaja,
 Štož ty nas wučil sy,
 A kak do Božoh' raja
 Puć budže nam'kany.

Njeh połni zwukliwosće
 Za tobu, Jezu, du,
 A w pyše njewinosće
 Tež twój raj dostanu.

(1870.)



Raniši spěw.

(Jordan, čitanka, str. 45.)

Wě slódkich drěmkow stanu,
 We měrje křewjeny,
 Duž khwalbne spěwy ćahnu
 Mi z wjes'lej wutroby.

Ty móc a derjehiće
 Nam słabym darješe.
 Ty džeše: „Z měrom spiće
 A strowi stawajće!“

Nětk radosć, žohnowanje
 Na wšitko rozsywaš,
 A všemu žiwe ranje
 A nowy wodych daš.

O Božo, jasne steja
 We rosy zahony;
 A hdžež mi wóčka džeja,
 Su twoje dobroty.

We hajkach a we lěsu
 Chor tebi zaspěwa,
 A k njebju kwětki njesu
 Ći wopor wonjenja.

Tež my toh' Knjeza khwalmy
We cyłym žiwjenju,
A khwalobne jom' psalmy
Njeh naše skutki su!

(1870.)



Što tyši a što posylni.

(Missionski Posol 1870, 98.)

Xu Bože domy starja,
Haj zemja, njebjesa:
To słowo Bože traje
A wěčnje wostawa.

Tu wumrjeć widžiš, ćahnyc
Wšěch Božich wotročkow;
Tón hospodař njej smjertny,
Kiž pyta winicow.

So minu wuklinčane
Tu Bože swjedženje:
Nam krasnosć Boha Knjeza
Pak wšědnje zjawna je.

Tam z błukej lampku džělba
Wot Khrysta wotpadnje:
A krasnosć jeho mjena
Přez kraj a morjo dže.

Tam słaba črjódka mała
Chce pomhać pohanam;

K njej Bóh Knjez tež so znaje
A k jejnym studničkam.

(1870.)



Tež jena protyka na lěto 1871.

(Serbske Now. 1871, 117.)

Sej wjedro wěšćić dawaš!
Ach, to so z měrom lehń;
Čim lěpši rano stawaš,
Čim rjeńši změješ dzeń,
So budže čolo jasnić,
Měr w wutrobje so krasnić,
To tež je jena protyka.

Ně! znamjenja a časy,
Ty prajiš, wědźec chcu;
To wědomstwo staj zasy
Sej k šěršom' wužitku:
Štóž Boha so tu boji,
Najlěpje sebi hoji,
Wšěm znamjam, časam rozemi.

Aj! protyka tež rjanu
Ma powěsc někotru;
Te, rjeknješ ty, mje ćahnu
A skića zabawu.
To bož'mje njech tam kuknješ,
Zo z padow stejeć wuknješ
A hrěchi z hrěchom njeplataš.

Kak Bože młyny mlěja,
 Kak zorno čisći Bóh,
 Kak hrěch a lóšty drěja,
 Z čim hoji sebi štó?
 Hdžež w proty cy to čitaš,
 Tam złoty špihel witaš,
 A z mjedom kapa pčolnica.

Na Bozy njewuhraješ,
 Kaž mócný, mudry sy,
 Wón syć, kiž lesnu tkaješ,
 Či z ruki wurazy;
 Bóh njeda prawdže spanyć,
 Nic ze swěta ju kranyć,
 Tu protyku měj w wutrobje.

Pušć lohku mysl a bludy,
 Hidž hrěšne skomudy,
 Bóh wjaza swoje sudy
 Na čłoŵske wusywy;
 Štož sypaš, to so mjele,
 Je mało abo wjele!
 To protyka je njemylna.

Tej wěrcě ludžo w kraju
 A swědčić dajće sej,
 Tu złoby njepomhaju,
 Nic železo a krej,

Kelch hrěcha Bóh pić dawa
Do třěcoh', štwórtoh' stawa,
Duž bój so jeho swjatosće!

(Hapryl 1871.)

—*—
Wěrowanski kěrluš.

(Časop. M. S. 1871, 14, I.)

N njebjes daty Ducho swjaty!
Pój, swjeć moju wutrobu
A daj čistu lubosć wěstu
K zbožownemu mandželstwu.

Boža hnada, dźiwna rada,
Wjedła je naj' hromadže,
Ty pak sylnje, njewotdźělnje,
Wjazaj nětk naj' wutrobje.

Wachuj, žohnuj, wšědnje krónuj
Z tyćom kubła darjene
A daj hnadu, zo naj' k padu
Žane zbože njenjese.

Z twojim jasnym swětłom krasnym
Ćěmne puće rozswětluj,
Hdyž so hrima a křiž přima,
Z troštom wěry posylnuj.

Wuč naj' slědźić a so bědźić
Za tej krónu njebjeskej,
Kiž tam rjana zakhowana
Blyšći duši wěrjacej.

Duž k tom' kraju, krasnom' raju
 Jedyn druhoh' přiwjedźmoj,
 Hač po času k tamnom' kwasu
 Wobaj zbóžnaj dóndžemoj. (1871.)

✻

Wuznaća.

K spěwanskemu swjedženjej w Łazu, 8./10. 1871.

(Tydź. Now. 1871, 325.)

✻ był ja Marja Madlena,
 Mój zbóžniko a skała,
 Če by tež moja wutroba
 Tak lubje žalbowala;
 Wšě na tebje bych wažil šacy,
 Te maš pak sam a hišće wjacy:
 Duž wonjo tamne nardowe
 Budź nětk mój psalm a sylzy džakowne!

A bych, kaž Jozef, row tež měł
 Do skały wułamany,
 Ty, Boži morwy, njeby směl
 Mi tam być pohrjebany;
 Ja zahrodu a różowišćo,
 Či lěpše wěm za pohrjebnišćo:
 Twój row a sparna khowanka
 Budź, Knježe, moja hnuta wutroba.

A budžech był ja mróčačka
 Na horje wolijowej,
 Kiž přileća tam služowna
 Njesć tebje k Wótca stołej:

Kak zbóžne było mi to džěło,
 Što woko wuhladać by směło?
 Ta jasna mróčačka chceł być,
 Pod nohu twojej w njebju rozplunyc!

(1./10. 1871.)



Poswjećenje nowych pišćelow.*

(Serbske Now. 1871, 277.)

Ožens, wulki Božo khwaleny,
 My w pokornosći swojej
 Ći sławny grat tu swjećimy:
 Wón k česći pomhaj twojej —
 Wón rěkaj twoje „hefata“,
 Kiž wucho, jazyk rozwjaza
 A pomha tebi služić.

Kaž z pišćelemi, z trunami
 We wyššim chorje spěwać,
 Tam David hudźbu naprawi:
 Tom' porno chcychmy džělać,
 Zo nutrniše kěrluš
 Přez ducha hudźby swjateje
 Tež tón grat budže žołmić.

Kak lubšo, radšo, wjeselšo
 Nětk noha k templu póndze,
 Naš wopor pak njech wysoko
 Kaž Abelowy dóndže;

* Tutón spěw bu spěwany při poswjećenju Łazowskich nowych cyrkwinskih pišćelow 27. augusta 1871.

A wěra, lubosć, nadźija,
A mysle, čuća, hibanja
So wěrujće přec' rjeńšo.

Duž witajće wšě njedzele
A rócne časy rjane,
Wšě krasne, lube swjedženje,
Nětk wutle njejsće žane;
Naš kěrluš je wam hotowy,
Na připrawach tak bohaty
Na křidla brać chce duše.

Tych zynkow nowe žórleška
Křćić z nowym duchom wjedža,
Móc wyššu lija do słowa
A z nami kemšić chcedža,
Nas w trošće, wěrje pěstonić
A słabe mocy pokrućić
A zahorjenje płodzić.

Swět nas te zynki swlěkaja
Při swjatym wotkazanju,
Nam Khrysta bliže pokaža
We zbóžnym začuwanju;
Jich potajna móc cuniša
To njewuprajnje wupraja
A do pokuty nurja.

Kak smilenje tež rěča k nam,
Hdyž wóčko sylzy roni,
Pod křižom — abo přecelam,
Hdyž pohrjebny zwón zwoni —

Kaž na klin bjerje troštuj
 Mać khore swoje džěcatko,
 Tak zrudnych pozběhuja.

A hdyž Palmarum zaklinča:
 Kak wjedža wone krućić
 Tón slub! a Knjezej žiwjenja
 Do jeho stadła nućić,
 So swjaty woheń płomjeni
 We wěrje, swěrje, lubosći
 W tych hnutyh młodych dušach.

A stupitej ze swědkami
 Před wołtař w Božim mjenje
 So zjednoćić dvě wutrobi:
 Kak pišćele du rjenje
 Do wěrowanskoh' kěrluša
 A zwjazk a lubosć poswjeća!
 A wšo so radži derje.

Duž, Božo, ty nas wusłyšuj
 A wobličo nam swoje
 We zwarnowanju pokhiluj,
 Pas, žohnuj herbstwo twoje,
 Hač něhdy „swjaty, swjaty sy“
 We wěčnych hětach spěwamy
 Přez Knjeza Jezom Khrysta.



Křiž.

Dom so njesu z křižom swojim
 K wěrjacemu stadlešku,
 Knježe Jezu, za tobu,
 Posylnjuj mje z křižom twojim,
 Zo bych, kaž sy prikazał,
 Tež tón mój rad na so brał.

Kak tež chcył tu derje pobyć
 A puć nam'kać do njebja
 Bjez sylzow a bjez křiža?
 Króny njem'že nichtó dobyć,
 Kiž tu njeje wojował
 A pod křižom zbity stał.

Pokorjenje, poniženje,
 Sylzowanje, styskanje
 Rěka puć, kiž horje dže,
 Potom přińdže powyšenje,
 Zbóžne swětło po tej ćmi,
 Paradiz po pusćini.

Tak sy sam, ty Boži swjaty,
 Něhdy w twojich čloŕskich dnjach
 Płuwał w sylzach, tyšnosćach,
 Z křiža k paradizej wzaty,
 Sy dom šoł do krasnosće,
 Hdyž bě nimo ćěrpjenje.

Bych-li z teje wěry panył,
 Derje by mi njebyło,
 Nic minutki ručišo
 Njebych z mojoh' křiža ćahnył,
 Ale Boha rozhněwał
 A mój trošt sej zasypał.

Samoprawdne morkotanje
 Z Bohom jenož rozkorja,
 K wutraću móc posłabja,
 To njej' žane dowołanje
 Božej' lubej' pomocy —
 Ně, ja njesu sćérpliwu!

Z křižom na ramjenju rady
 Wotsal hić, duch přizwoli,
 Lěpje budže w Zalemi,
 Wzmi mje bórzy jeno z hnady,
 Jezu, k Tebi, za tobu,
 Zo tam zbóžny doćahnu.

(1872.)

—*—
Dowěrjenje na Boha.

Dokelž jeno smy tu ducy,
 Ničo tež njej' naše tu,
 Duž so poruč Božej rucy
 Z wěrypołnej' mysličku;
 Hladaj z krutym dowěrjenjom
 K našej zbóžnej domizni —
 Tam ze slódkim spokojenjom
 Čłowjek hakle wotkhoru.

Kaž za mjetelami honi
Džěco husto po łucy
A hdyž misnje, sylzy roni:
Ničo njejsmy lěpši my,
A štož mamy zapojdžene,
Čini tyšnosć wutrobam;
Wěra praji: Rozswětlene
Zapowjedki budža tam.

Wěra jenož, sčěrpna wěra
Přewinje a spokoja,
Žiwjenje ze smjerće čěra,
Z njejba křidla rozšěrja:
Pod tej kryciznu a khlódkom
Khodž we zeńskim přebytku,
Palmy dobyća po krótkom
Wojowanju wěste su!

(18./2. 1872.)



Składnostne spěwy.

Mandrija Zejlerja składnostne spěwy maju so zdobnje
w dospołnym wudawku jeho zhromadženych spisow sobu
woćišćeć. Wone swědča nam jasnje wo tym, kak wysoko
sebi naš basnik swoje přecelstwa a znajomstwa wažeše, a
połne krasnych mysličkow nam bóle hač druhe pěsnje jeho
něžne wutrobine začuwanja wotkrywaju, słužo tak wosebje
sobu k wobswětlenju jeho wosoby a powahi. Wšěm jeho
přecelam, we nich swjećenym, abo jich potomnikam pak
budža wone wěsće luba dopomnjeńka na našeho njezapom-
niteho basnika.

K wopomnjenju

k. kand. theol. Handrija Juraka z Brězynki.

† 22./1. 1847.

(Tydź. Now. 1847, 19.)



u zeńsku drastu sy ty wotpołożił,
Sy proch a popjeł wuswlekl so,
Twój duch je k rjeniším so honam zložil
A wopušcił to podružstwo:
Sy zemstwa jastwo rozlamał
A k žiwjenju so přećišćał.

Sy k wyššej wosadze tam powołany
Před trónom Božoh' jehnjeća,
K tej zbóžnej swjećiznje sy požadany,
Óe Khrystus pastyr postaja;
Tam twoje prócy krónuje
To zbóžne myto njebjeske.

Tam dychi Zalemske a měra palmy
Ói tyšnu dušu wokřewja,
Tam wona modlo spēwa wyšše psalmy
Najkrasnišeho dobyća;
Tam so twój kćew zas' wobnowi
A smjerće móc jón njezlemi.

Ta hola zelena so plačo hnuwa,
By rada palmy dała ói,
A woko přećelow we sylzach pluwá —
Wzmi, přećelo, tón wopor, wzmi!
Cesć, lubosć tebi wostanje,
Njeh trawnik tež óe přikryje!

(1847.)



**Při serbskim spěwanskim swjedženju 1847
w Budyšinje.**

(Tydź. Now. 1847, 167.)

Tri stworićelske mocy mjenuju
Při našim lubym serbskim swjedženju:
Ze štučkami za khójnu
Ma přenja prócu, wójnu;
Nic wulka njej' pak jejna zaslužba,
Hdyž so ta stwórba prawje wobhlada.

Hlaj, što je ćelo — tež to najrjeńše —
Hdyž nima dych a mocy žiwjeńske?
Što kwasne hrónčka chcedža,
Hdyž něme w knižkach sedža?
Duž khwalbu zdobnje wjetšu zasłuži
Ta druha móc, kiž hrónčka wožiwi.

Što něhdy běše tež wot Hadama,
Hdyž hišće ležeše tam bjez dycha?
Duž, lube, złote džěci,
Ta druha móc so swěci
We rjeńšej khwalbje teho stworjenja
A Stróža praji: ta mi přisluša!

Oho! wy Stróženjo a Stróžanki,
Wy njejsće dołho sami na swěci!
Wy chcyli moje „ale“
Tež hišće słyšeć dale;
Ta wulka třeća móc we stworjenju
Je pódlu tu ze swojej wažnosću.

Ta třeća móc ze swojej dobrotu
Je spomhała tom' džěsću na nóżku.
Přez nju „Tri Lipy“ klinča,
Hač Łužicy wšě brinča —

A kraj a zhromadźizna swjedžeńska
 Ji rěka: serbska lubosć, jednota.

A dokelž spěwarjo a spěwarčki
 Kćew kwasej hakle dachu žiwjeński,
 Duž třećej mocy prawa
 Klinč móčna, dzakna slawa,
 A do najdalšich časow Łužica
 Njeh z česću, z khwalbu na nich spomina!

(1847.)



Kěrluš

k čescownemu dopomnjenju na njebo k. J. K. Smolerja,
 wučerja we Łazu.

(Tydź. Now. 1848, 16.)

W Božim měrje wotsal ćahnu
 Khrystusowi wotročy,
 Džeja swětłu dróhu rjanu,
 Hdyž jich čas je skónčeny.

Česceni a wopłakani
 Ćahnu k Knjezej swojemu,
 Z winicy dom zawołani
 Zbóžny swjatok dostanu.

Božmje, rjeknu, próca časna!
 Božmje, moji najlubši!
 A w jich wóčku sylza jasna
 Poslednja so slěborni.

Witaj, rowje wobhladany,
 Witaj, rjeknu, komora!
 Z tebe chcu być zawołany
 Z hłosom mojoh' zbóžnika.

Pój dom! pój dom! Zwony zwonja,
Wustup z teho podružstwa,
Twoje džěło njech so skonja,
Myto skića njebjesa.

A kaž Bože slónčko jasne
Blyšći so jich rjana mzda
Za to wusywanje krasne
Wot ranja do wječora.

A kaž zrudnje zwony brinča
K wutrobam a k pohrjebu,
Z njebjazynki sobu klinča,
Rěča k nam rěč troštniwu:

„Swleč so popjeł, swleč so čěło,
Dzi dom, duša wěrjaca,
Što by tebi škodzić směło,
Škrička Boža njesmjertna?

Stawy njech we rowje tłaju,
Njeh so k pjeršći towarša,
Nowe slónčko w Božim raju
Tebi, duša, zeskhadza.“

Hamjeń! sčěrpnj na to prajmy,
Hdyž Bóh žada džělenje,
A na tón trošt spominajmy:
Přez smjerc dze so ze smjercé!

(1848.)



Serbskim buram w Smječkecach.*

(Tydź. Now. 1848, 146.)

Nam Bože pismo pokaže:
Kak Bóh sam bura stajl je,
Ta wěrnosć steji njehnuta
Kaž hory pola Kamjenca.

Bur ma so prócować a drěć,
Duž dyrbi so we česći měć.
Wón husto studzeń wužiwa,
Hdyž wino křewi měšćana.

Bur ma so zlutnje přez swět prac,
Zo přec' móhl dań a dawki dać,
Wón z twarohom so spokoji
A butru njese na wiki.

Bur wjele potu rozlije,
To grat a polo přěduje,
Haj, husto wjedra, nuzy dla
Njej' hišće žana njedźela.

Štóž bura prócu wopomni
A kak wón krošik zasłuži,
Tón budže džensa zdobnje rjec:
K nam witaj, luby, do Smječkec!

A štož je džensa w Smječkecy
Na serbskej wěcy wjeselý
A serbskich burow lubo ma,
Njeh wšitkim „Slawa!“ přiwoła! (1848.)

* Tuta slawa bu wot basnika wunjeseana při 5. spěwanskim swjedženju 13. junija 1848 w kupjelach Marijneje Studnje.



Wonec Jurjowe wobzamknjenje,
jako bě wozjewjenje Hodzijskeje kermuše před
tydženjom w Nowinje čitał.

(Tydź. Now. 1848, 237.)

Posl'chaj, žona, sapyrliška,
Noš te lumpki hromadu,
Njezabudź mi na rubiška,
Kiž so hodža k brēmješku —
Zjawnje steji w Nowini:
Kermuš ma kraj Hodzijski.

Skót a ryby rězac lubja —
Hańža, kak ói k myśli je?
Mi, hdyž z tajkej trubu trubja,
Woda we rée zběhuje;
Khort naj naj, to wolbyr njej'
Z kermušu tej Hodzijskej.

Mlónkec wuj ju wozjewjuje,
(Njej' to dobra wutroba?!)
Teho darniwosć mje hnuje,
K wobjedu nas požada.
Sława serbskej Nowinje,
A tej Mlónkec dobroće.

Hólče, éř do Budyšina
Mi po nowu kholowu,
Krawca, jeli njeje hina,
Ja sam skazać poběhnu;
Žona, bjeř so hromadže,
Tydzeń dołho njetraje.

W swětłych škórnjach, šponsku w horšći,
Potom w nowych kholowach —
To b'dža hladać w Małej Boršći,
A tež w wšitkich druhich wsach!

Za knjeza mje dyrbja znać,
Tajki chcu so zwoblekać.

Hańža, ty pak za mnu pónďžeš,
Duž so pyšna wupikaj,
A zo hólćim syćam wuńďžeš,
Čěpc twój nowy tež so staj;
Přetož to ma djaboła
Rjana žónska bjez čěpca!

Nože, widlički a lžicy
Z časom, žona, wobstaraj;
Mlónkec wujej w Dźiwoćicy
Wuši dawno klinčitaj:
Kajka budže kórdija,
Hdyž naš jedyn přikhadža.

A kak naj' tež budža witać
Wón a hosćo za blido,
Hdyž na mojej trubcy čitać
Budža serbske napismo!
„Bratře, hdže sy kupował,
Hdže sy serbsku hłojčku wzał?“

Darmačkow mje njelóštuje,
Kermušu pak njespušću,
Bože dla, mi žoľdk žno wuje,
Hdyž na tykanc pomyslu;
Prawy čas, to přisaham,
Dźiwoćicy powitam.

Kermuš naša na Měrcina
Wšitko zaso wotruna,
Haha, tehdy kitka wina
K pojedźi so přidawa;
Tež my chcemy grychtow dać,
Hač b'dža blida rjapotać.

(September 1848.)



Kermušna depeša.

(Tydź. Now. 1848, 311.)

Přez knjeza Mlónka zajěło
 Do Nowiny je wašničko,
 Zo kermuša so wozjewi,
 Hdžež hotuja ju w wosadzi.

Duž wosada ta Łazowska
 Swój hlós tež tudy słyšeć da,
 Zo džewjatnaty, dwacety
 November ma dzeń kermušny.

Duž přińdžće z časom, najlubši
 Wy přeceljo a znajomni!
 Štóž nima khwile njedželu,
 Sej wuzwol radšo póńdželu.

(1848.)



Pokermušne rozpomnjenje.

(Tydź. Now. 1848, 327.)

Wšitko zańdže a so minje
 A tak tež ty, kermuša,
 Kaž so woda z boła linje,
 Tak ty ruče zaleća;
 Škoda, škoda! prajimy,
 Zo tak ruče nimo by.

Hač do srjedy přihrěwanki
 Pječenjow a tykanca,
 Jako zrudne powostanki
 Nosy hišće hospoza;
 Dopomnjenje najrjeńše
 K troštej pak tež zbytku je.

Přečelstwa dla bě so stało
 Wonjedženje z kermušu,
 A hdžež je so spodobało,
 Bě lošt k zasopřindženju,
 Ze škleńcami klinkachu:
 „K lětu, dal' Bóh, zaso tu!“


Hudźby krasne zwjeselenje
 Kocorec knjez džělaše,
 To bě móčne wokřewjenje
 Za wutroby serbowske;
 Porno ćělej wutroba
 Kermuše bě wjesoła.

Samokhwalbu kóždy znaje,
 Duž chcu mjelčec ponižny,
 Štóž njej' přišoł, njech so kaje,
 Zo je skomdžił dobroty,
 Čakany wuj z Džiwoćic
 Njepřindže tež nihdy nic.

„Njej' wón přišoł?“ džachu wjele,
 „Što je so jom' zapřěło?
 Do Nowiny pěknje mjele,
 Duž cheył jeho znajomstwo;
 Wěsće šewc tón šwabelski
 Škórnje jemu njesćini.“

Pšeńca droha abo tunja —
 Kermuš k lětu zaso je,
 Kermuše njej' w swěće runja,
 Duž je słowo poslednje:
 Wostać dyrbja kermuše,
 Dónž tu traja syw a žně.

(1848.)



Wotmołwjenje
knjezomaj J. a W. w Lipsku.

(Tydź. Now. 1849, 15.)

Kak zahorjena wot lubosće
So čuje naša wutroba,
Hdyž Serbja połni horliwosće
Nam z cuzby zbože přewaja
K nowemu lětu lubozni,
Do kotrehož smy stupili.

Duž njech tu čuća wšitkich znatych,
Waj' bratrow, sotrow, staršeju —
A ze wšěch serbskich dušow wzatych
Přez Nowiny wam wozjewju:
Zo wamaj zboža přewaja,
Kaž wjele njebjo hwězdow ma.

Bóh zdźerž waj' strowaj w tutym lěće
A žohnuj tón čas wosebje,
Hdžež kóždy za swój staw na swěće
Sej rozswětlenje hromadzi:
To přeje wamaj Łužica,
Wój nadźija jej' přichoda!

(1849.)



Přeprošenje.

(Tydź. Now. 1849, 280.)

Njedźelu tu dźesatu
Po Swjatej Trojicy
Swjeći Łaz domkhowanku
A pječe tykancy,
Štóž ma tam žane znajomstwo,
Tón namakaj so za blido.

(1849.)



K česćownemu dopomnjenju

na njebo knjeza Handrija Pjencka z Bělčec,
duchowneho za wučahowarjow do Awstralije,
wumrě 6. augusta 1849 w Barlinju ducy do Awstralije.

(Tydź. Now. 1849, 295.)

Ze sylzu želnej poplakamy
Wo tebjje, luby přećelo,
A k njebja hwězdam pohladamy,
Hdžež tebi nětk je wjeselšo,
A prajimy: Kak dźiwna je
Ta ruka, kiž će wodžeše!

We duchu jeno widzał běše
Ty zbožownu Awstraliju,
Twój puć pak hišće dale dźěše
Na hamt a službu rjenišu:
Ta swjećizna we Křišowi
Je była za kraj njebjeski.

„W Barlinju budu wěrowany!“
Bě twoje słowo wěšćeńske.
Haj, kwas tam běše zbóžnje rjany:
Tón wěnc so krasnje blyšćeše,
Kiž dźěći něhdy dachu ći,
Wón běše króna k wěčnosći.

A tak dźě nětko je so stało,
Zo z Jezusom kwas swjećił sy
A njebjo je ći zaspěwało
Twój kwasny kěrluš swjatočny:
Pój k twojoh' Knjeza krasnosći,
Pój nutř k tej wěčneje strowoći!

Ze zachodnosću wujednany
A ze wšěm, štož će boleše,

Sy nětko zbóžnje wobstarany,
 Ói bědna starosć zašla je,
 A droha parla pytana
 Tam horjekach bu nam'kana.

Ze sylzu želnej' poplakamy
 Wo tebje, duša bjez falša,
 A k Božim hwězdam pohladamy,
 Kiž nětko twój row wobswědča,
 A prajimy: „Spi ćišinko,
 Ty njezabyty přećelo!“

(1849.)



K lubemu a džakownemu wopomnjenju
 k. Jana Korle Smolerja, druhoho wučerja we Łazu,
 † 8. měrca 1850.

(Tydź. Now. 1850, 90.)

a) **Wot Z. a druhich Łazowskich přećelow.**

Zrudne zynki zwony zwonja,
 Zažny row so wotamka,
 Sylzow tysacy so ronja
 Młodym, starym přez lica;
 Zrudna powěsć přez wjes dže:
 „Ach, naš Smoleř wumrjeł je!“

Haj, ty luby dokonjany,
 Zahe smjertne spanje spiš,
 W smjertnej pyše, w wěncach rjany
 Našu časnosć wopušćiš,
 Šulska młodosć wo tebje
 Kaž wo nana žaruje.

Młodži přećeljo a znaći
 Za kašćom tež zrudni du,

Přecelstwu jich sylza płáci,
Kotrež z tobu mějachu,
Wěnc na row ći połoža,
Róža zwjadła dopoľnja.

„Spěwarjo naš luby, rjany!“
Žaruje tež wosada,
Ach, kak zahe wotwoľany
Bu ty k naněj do rowa.
Džak a lubosć přewodźi
Će do smjertnej komorki.

Hórkich, hórkich sylzow wjele
Pada tebi k woporu,
Same Serbstwo tebi sće
Na row njezapomničku,
Praji z Łazom žarujo:
Dobra nóc, naš Smolerjo!

b) **Wot wjele Serbow Łazowskeje wosady.**

Čyła wosada će wobžaruje,
W kóždym domje jara žalosća,
Přecelstwo će zrudnje woplakuje,
Znaći twoje dla so wurudža.

Stari, młodži, šedźiwcy a džěci,
Wšitcy wo tebje nětk sylzuja.
Ničo dokonjane njej na swěći,
To přez twoju smjerc zas' póżnaja.

Horco bě ty wot nas lubowany,
Drohi sy nam stajnje wšitkim był;
Wot nas sy pak nětko wotwołany:
Bóh je tebje hišće lubšo měł.

W mjenje wjele Serbow Łazowskeje wosady:

Jan Šubert z Běleho Kholmca;
Handrij Misnař z Třoch Žón;
Jan Symank z Radski;
Jan Pačka z Radski.

e) **Wot džakowneje šuleřki z R.**

Žens z horcej sylzu wusywamy
Tu symjo drohe styskniwje.
Ach, zorno, kotrež pjeršći damy,
To sam mój luby wučer je!
Ach, wón tu wjacy njewučí,
To mje tak jara wurudzi.

Wón starał je so za nas swěru,
Kaž dobry pastyr za stadla,
Zo by nas přinjesł k temu měru,
Kiž do wěčnosće wostawa.
Bóh Knjez pak nam joh' ruče wza:
Nam styskna zrudnosć zawosta.

Tak husto hač ja składnosć změju,
Tam na keřchow přińc do Łaza,
Ja krjepić budu z horcej' sylzu
Tu powyšenu hórčičku,
Zo zeleni so rjeniša
A budže přeco mlódnisha. (11./3. 1850.)



K wopomnjenju
Hany Šoćic z Łaza.

(Serbske Now. 1854, 214.)

W najrjeńšim kćewje, w młodych lětach
Sy, luba Hanka, wumrjela.

Ach — ale što w tych swětnych hětach

By sebi dlěhe nabyła:

Bóh Knjez će k swojej krasności

Tam k nanej, sotře zhromadzi.

Sy spřah toh' swěta přewinyła

A štož twój Bóh či wotsudzi,

Če Jezus k swojej česći woła

Po swojej bójskej mudrosći;

Nětk widziš wěčne wjesela

Tam, moja luba towařska.

Do twojoh' rowa pohrjebana

Bu na dnju twojoh' naroda;

Sy sydomnaće lětkow byla

Jow naša sotra Łazowska.

Haj, wjesela a zrudoba

W tych lětach nas tu zetkaja.

Duž spi nětk, luba, slódke spanje,

We ćichim rowje skhow twój je,

Wšak nam tež skhadza rjeńše ranje,

Hdyž wšech nas Jezus zbudzić chce,

Zo wón nas jónu zhromadzi

We tamnej wěčne krasności.

Hana, Łazowska towařska.

(1854.)



S p ě w

při rozžohnowanju našeho přecela k. vicedirektora
Jakuba Buka z Bjesadu.

Što swjedžeńscy sy džensa wuhot'wana,
Kom' pyšiš so tak Bjesada?!

Aj, barba twoja ćemna njeje khmana
Za radowanki wjesela!

∴ So w wjeselšich barbach sy hewak smjała,
We čerwjonych, módrych nas powitała. ∴

Syn swěrnny, kiž chce wopušćić će wbohu,
Wšak njeb'dže cyle zhubjeny!

Wón wróco přińdže z cuzby swoju dróhu,
Hdyž swjećiš džen hdy wjesely.

∴ A hdyž jeho město pot'm prózdne njej',
Ćim wjeselši budže naš dyrdomdej! ∴

Duž božemje khodž, přecelo naš drohi,
Njech zbože tebje přewodža!

Tež džěleni přec' wostanjemy swoji,
Tón zwjazk je naša Bjesada.

∴ Haj, strony a mězniki daloke
Wšak swěra a přecelstwo njeznaje. ∴

(12./2. 1854.)

Ponižna njezapomnička

na row

swojeho něhdušeho wučerja, njebo k. dr. Gebauera,
† 9./2. 1855 w Budyšinje.

(Serbske Now. 1855, 62.)

Na row, kiž nětk će kryje,
Džak Serbstwa našeho
Tež swoje sylzy syje,
Ty swěrnny wučerjo!

So na row, kiž će taji,
Tež Serbstwo poklajnje,
„Sy njezabyty!“ praji
A tebje žohnuje.

Na row, kiž měr ći dawa
Po prócy skonjanej,
Tež kładže Serbow sława
Wěnc česće njezwjadłej!

Na dnju jeho pohrjeba 12./2. 1855.

H. Z. w Łazu.



Česćowne božemje


derje dostojnemu a tež wo serbski lud
wulcy zasłuženemu lěkarjej knjezej dr. Timpfej
při jeho wotkhadže z Wojerowskeho wokrjesa (1850).

Ādyž hodžinka ta hórka bije,
Zo přeceljo so wopušća:
To po licu so sylza lije,
Swědk lubosće a česćenja;
 Bóh přewodź će,
 Budź božemje!
To su jich słowa džěleńske.

Tež tebi bož'mje přiwołamy,
Naš Timpfo lubši, zaslužbny,
A džakownu ći ruku damy
A z pońej' duše rjeknjemy:
 Bóh přewodź će,
 Budź božemje!
Lud serbski tež će žohnuje.

Žel čini, zo sy wot nas wzaty,
 Ty njezabyty přecelo,
 Wěnc česće budź ći na puć daty
 A Serbow lubosć do njeho.

Bóh přewodź će,
 Budź božemje!
 Njech stajnje so ći derje dže! (1850.)



Wopomnik na row

knježny Khrystiany Henrietty Louisy Imišec,
 narodži so 25. septembra 1828 w Bukojnje,
 zemrje 11. augusta 1856 we Wóslinku.

(Tydź. Now. 1855, 270.)

Zbožowna duša, tak luba tym swoim, kaž Jezusej swěrna!
 Krasne je Tebi so myto a rjane so dostało herbstwo. —
 W strowych, zbožownych dnjach bě twariła bratrowe zbože:
 K lubemu bratřej će sotrowska wutroba čehnješe swěrna,
 Jako we staršej domje ći strowosć so nochcyše wrócić.
 „W Wóslinku budže mi lěpje, hač tam; tam so dajtaj mi podać!“
 Prošeše staršej ty a Bělčanskich přecelow lubyh,
 Kotřiž tež z lubosću tebe do Wóslinka sem přewodźachu.
 Bratra a swakowej' lubosć tež tudy će powita swěrna;
 Želniwa potom we khorosći miłosć će wothlada swěru,
 Žarujo, woplakujo to hórke bėdženja z horjom,
 Jako ći smjertny strach so přibliža w styskniwej nocy.
 Bratra a sotrow ći Bóh hišće přiwjedže před smjertnej nocu;
 Zrudoby sylzy so ronjachu z pláčitych wóčkow tych lubyh,
 Kotrychž bě žadała k sebi, jim poslednje „Božemje“ prajić:
 „Njeplačće! Widźiće wy tamle horka tu njebjesku jasnosć?!“
 Z duchownym wóčkom we wěrje sy widžala Jezusa krasnosć.
 „Njeplačće! Džeržće so Jezusa a jeho hnady; tón ženje
 Njebudže wopušćić was!“ — Tak troštowaše tych swoich;

Sama wšak pomocy trěbna, so zdychujo modleše k njemu:
 „Pomhaj mi, Knježe, o pomhaj! o pomhaj mi přez twoju hnadu!“
 Wusny pak číše a zbóžnje, haj zbóžna we Jezusu Knjezu;
 Do jeho rukow a klina duž pokhili sprócniwu hłowu
 K zbóžnemu měrej. Tym svojim pak wostaji hłuboku zrudźbu;
 Po cyłym domje bě płakanje słyšeć, a zrudobne zynki
 Zwonow znjachu po kraju, kaž slěbroklinčate hłosy:
 „Pój, Boži domčk je zhot'wany rjenje, pój dom wšak!“ čí zwonja.
 Zrudna će přewodža swójba staršich a bratrow a sotrow,
 Wulka tež přećelow syła tam k rowej; dom duša pak čehnje
 K hnadnemu Wótcej w njeju a k swojeho Zbóžnika měrej;
 Njebjeska njewjesta k Jezusej dóndže na jehnjeća kwas tam
 W póćiwej njewiny drasće, a widžeć kaž lilija běła.
 Widziš nětk horka tu jasnosć při Bozy w njebjeskim rajju,
 Kotraž bě wěrjacej duši so zjewiła hižo na zemi. —
 Čěło pak wotpočuj číše pod cyrkwinym khłódkom we rowje
 W bratrowej blizkosći tudy, hdyž daloko wot lubej' staršej'.
 Wóslinka, lubeho Wóslinka zemja će přikrywa měrnje,
 Doniž b'džeš jónu přez poslednju trubjel hłós Boži ty słyšeć,
 K wjes'lemu staću wot morwych a k zasowidženju lubych
 Swojich, kiž nadzija, z tobu so zjednoćić jónu na wěčnje.

(1856.)



Najhnadnišej knjeni z Criegern.

Hdžež wěra je,
 Tam do wutroby twari
 Tež lubosć swoju swjatnicu;
 Hdžež lubosć je,
 Tam knježi měr a dari
 Móc njebjesku najslabšemu;
 Hdžež bydli měr,
 Tam žnje so žohnowanje,
 A hdžež je to, Bóh sobu je,

A hdžež je Bóh,
 Tam nuza, přesčěhanje
 Mje zbić a přemóc njemóže.

Wot H. Zejlerja.

(Hapryl 1856.)



Čescowny přispěw

na wěrowanskim swjedženju k. dr. Bohuwěra Pfula,
 gymn. wyżš. wuč. w Drježdžanach,
 z knježnu Hedwigu Jakubec z Budyšina,
 11./10. 1856.

(Z přiložka k Serbsk. Now. čisło 52, 1856.)

Bělčenjo.

Što na horach Budyskich zelenych
 Štomy džensa zazynča,
 A Sprjewja po dolinach skałojtych
 Sobu šumi wjeselša?

Što swjatočnje pyšny je Budyšin,
 Kajku radosć wusywa,
 Zo leći hač do Bělčec pod Lubin,
 Same Łobjo posłucha?

Što Łužica serbska so zraduje,
 Rjane wěncy nawija,
 Ze slěbornym hłosom tež Michałske
 Zwony džensa zazwonja?

Łužica.

Khwalena budź knježna rjana
 W čestnej pyše njewjesta,

Z wuzwolenym přewodžana
 K wołtarjej do mandželstwa,
 Sylzu wjes'la rozliwaj,
 Hrajam frejnym bož'mje praj!

Ruku, pjeršćen, swój wěnc dawa
 Džensa ći twój nawožen,
 Jeho króna, radosć prawa,
 Budžeš nětk twój žiwy džen;
 Wšitke lučki po boku
 Wěncujće puć k woporu!

Budyšin.

Knjez doktor Pful čestny je nawožen
 Z rjaněj' knježnu Budyskej,
 Wón krasni so jako najrjeńši džen
 W žiwej pyše nalětnjej.

A čestna ta Jakubec Hedwiga
 Jemu k bokej zakćěje,
 Nic rjeńša njej' róžowa zahrodka,
 Ani kwětki zaronke.

Ta džensa z nim postupi k wołtarjej,
 Jeho čestna njewjesta —
 Duž zraduje w pyše so swjedžeńskej
 Cyła serbska Łužica.

Kwasarjo a někotři druzy.

Lóštne konje, klinkotajće,
 Złote mamy wjesele,
 Ptački w hajach zaspěwajće
 Z nami swoje kěrlušy;
 Kóžda hałžka zelena
 Njeh so hiba wjesela.

Zradujće so wšitke strony,
 Kiž nas ducy widziće,
 Klinčće rjenje, jasne zwony,
 Postrowjenje swjedžeńske;
 Z Bohom njech so poradzi
 Slub a zwjask Waj' njebjeski!

Drježdžany, Łužica a wšitcy přećeljo.

Jako janski swjedzeń krasny
 W poľnych róžach zakčěwa,
 Jako slńco njewuhasny
 Blyšč a dzeń za syna ma:
 Tak njech lubosć Wamaj kće,
 Złote zbože k bokej dže! (11./10. 1856.)



Złota swoboda.

K dr. Pfulowemu kwasej.

Na horach wysokich
 Ma złota swoboda
 Swój trń, tam přebywa.
 Tak w staršich, nowišich
 Su časach zaspěwali
 A su ju požadali:
 Stup dele do swěta,
 Ty džowka njebjeska!

O złoty přećelo,
 Ty syno swobody
 Ze serbskej' Łužicy,
 Ty prajiš směwajo:
 Mi z wysokosćow jenych,
 Haj, z njebjes wotewrjenych
 Džens lubosć přikhadža
 A mój puć wuzboža.

O złoty přećelo,
 Či lubosć naliwa
 Swój khelich wjesela
 Džens hišće poľnišo;
 Tńn so přez złoto krasni
 A twoje wóčko jasni
 Po stroni Hedwigi
 We swjatej radosći.

(11./10. 1855.)



Swjedzeński spěw

wysokočesćenemu knjezej Khrystianej Kubicy,
wyššemu duchownemu a kralowsk. superintendentej,
na 25lětnym swjedženju jeho duchownsk. zastojnstwa,
poswjećeny wot Wojerowskeho Serbowstwa

26. małego rózka 1857.

(Serbske Now. 1857, 91.)

By hižo nalěće tu było
Na krasnych rózach bohate,
By wusypać na tebje chcyło
Džens pychu swoju darniwje;
By tebje džens tež wěncowało
Z najrjeńšim wěncem přecelstwo,
Na wutrobu ći hwězdu dało
Kaž jasne złoto, slěboro:

To wšitko njemóhło dosć prajić,
Će z hódny mýtom dočesćić,
Nic wopomnik dosć rjany stajić
A Serbow džaknosć spokojić,
Kiž z nowa džensa wubudžena
Přez duchownski twój swjedzeń je,
A zbožopřeca zwjeselena
Ći přinjese najswěrnije.

Ně, rjeńše česće Tebje pyša,
Wěnc lubosće a zaslužby,
Tak zo, hdžež twoje mjeno słyša,
Tam z česću mjenowany sy;
Lět pječ a dwaceći so krasni,
So lubosć twoja slěborni,
Haj, wona Serbstwu tež so jasni
We duchapołnym biskopstwi.

Duž dowol džensa česćowanje
 A našu sławu džakownu
 Za škit a swěrne postaranje,
 Za twoju prócu, dobrotu;
 Wěnc njezwjadły pak serbska sława
 Ći, mužo Boži, lub'wany,
 Za twoje zaslužby džens dawa
 Wo serbske Bože winicy.

Na wołtař lubosće a džaka
 Tež horce próstwy kładźemy,
 Zo přichod, kiž na tebje čaka,
 Był stajnje jasny, zbožowny;
 Bóh daj Ći strowje, žohnowanje
 A radosć w hamće, po domi,
 Tak wutrowow wšěch požadanje
 So k wjesołosći dopjelni.

(1857.)



Posmjertniny

njebo knjeni Marji Karolini Hustowej,
 rodź. Smolerjec,
 zemrjetej we Łazu 24. januara 1858.

(Serbske Now. 1858, 40.)

Bo ćerpjenjach a wojowanju,
 Po wjele tyšnych zdychnjenjach
 Sy nětko dóšla k ćichom spanju —
 Duch pak je w wyššich radosćach,
 Hdžež rostu palmy dobyća
 Tym, kiž tu z Bohom doćerpja.

Spi derje džě, ty wumóžena,
 A zemja njech Ći lohka je,

Ze syłu zbóžnych stowařšena
 Tam žněješ myto njebjeske,
 Hdžež hižo lube duše su,
 Kiž prjedy tebje wuńdžechu.

Twój wopomnik maš na wšě časy
 We našej swěrnej wutrobi,
 Hač widźimy so horkach zasy
 We njerozdźělnej lubosći,
 Hdžež spěwamy halleluja
 Při trónje Božoh' jehnjeća! (1858.)



Swjedžeński spěw

česćedostojnemu knjezej fararjej Janej Mjeřwi
 w Sprjejach z Burkhamorom,
 na dnju jeho 25lětneho duchownskeho jubileja,
 30. junija 1858.

(Serbske Now. 1858, 235.)

Wot hamtskich lět so džensa minyl
 Ći, bratře, pjećadwacetk je,
 Je so kaž rěka nimo linył,
 Kaž ptačk, kiž nimo lećeše;
 Na Božej winicy sy džělał
 Ty w Sprjewicach a Hóznicy,
 Pak wjesoły pak zrudny spěwał
 A stadło hladał spróćniwy.

Duž bjerjemy džěl na tej hnadži,
 Kiž Bóh Ći wopokazał je,
 A witamy twój swjedžeń radži,
 Kiž slěborny Ći skhadžeše;

Na ćeži, w hamće přewinjenej,
 Smy džensa sobu wjeseli,
 Kaž na hórkosći zalećenej,
 Kiž nadeńdže će po domi.

Džens wopor džakny Bohu Knjezu
 Ty pak tež njeseš z wutrobu,
 Zo tajku jubilańsku mjezu
 Sy dokročił tu přez hnadu;
 Na wšelke dźiwne Bože puće
 Džens spodźiwajo pohladaš
 A Božej rucy dale kruće
 So z dowěrjenjom podawaš.

Na tajki puć a dalše dźěło
 Ći džensa zbože přejemy,
 Zo by so wšitko derje měło,
 Kaž po domje, tak w winicy;
 Duž wostań hišće dołho twojich
 Nan zbožowny we strowosći,
 A pas a hladaj duše svojich,
 Kiž tudy Bóh ěi porući.

Hač do najdalšich lětow kéřwaj
 Dom Mjeńwic w lubej Sprjewicy,
 Ty pak ze žohnowanjom dźěłaj,
 Hač swjatok přińdže Knjezowy;
 Bóh njech ěi dale zbože dawa,
 Swój měř a pomoc wudźěla,
 Hač něhdy pyši džak a sława
 Row swěrnoh' serbskoh' pastyrja.



Přispěw

česćedostojnemu
knjezej Bjedrichej Augustej Berganej,
fararjej w Wulkich Zdžarach,
a čestnej, sławnej knj. Klari Kubicec z Wojerec
na dnju jeju mandželskeho zjednoćenja 6. oktobra 1858
wot susoda H. Z.

Jako zymske sněhi tachu,
A so štom zas' woblisći,
W hajach, polu zaspěwachu
Sołobik a škowrončki:
Stara lubosć njezhubja
Nihdy swojoh' korjenja.

Tajki spěw so pěkny zdaše
Čestnom' knjezej Berganece
A duž husto zjězdźowaše
Na primarstwo do Woj'rec,
Wutroba tež jemu rži
W bójskej přenjeje lubosći.

Wěrne hrónčko wuspěwala,
Bohu džak, je ptačina —
K wjes'lu wšěm je namakała
K wutrobi so wutroba,
Zdžarowski knjez fararjec
Dosta knježnu Kubicec.

Sława! zbože! waju slubej,
Waju zwjazkej swjatemu,
Kiž je džensa, čestnej, lubej,
Dostał Božu swjećiznu;
Cyłe serbske krajomstwo
Wyskajo da słyšeć so:

Daj Bóh zbože, žohnowanje
 W winicy a po domi,
 Strowosć, čerstwosć, přiběranje
 Na wšěm, štož waj' zwjeseli,
 Kóždy dzeń waj' mandželstwa
 Njeh waj' z něčim wuzboža!

(1. oktobra 1858.)



Palmowa hałoz
 na kašć k. Marčki w Budyšinje,
 sobustawa „Budyskeje serbskeje Bjesady“.

(Serbske Now. 1859, 379.)

Kak džělenje nas móhło stužić
 We zachodnym tym přebytku?
 Smjereć k žiwjenju nam dyrbi słužić
 A krónu podać njebjesku;
 Haj, z kóždej sylzu džělenja
 Kće w njebju róža wjesela.

Mjelč, tyšna skóržba, žaloscenje,
 Row svojich morwych njeskhowa;
 Jim skhadža rjeńše wocučenje,
 Smjereć wjacy njeje přez Khrysta;
 My njesmjertnosće džěci smy —
 Tam horkach so zas' widžimy.

(1859.)



Slawa spěwarjam a spěwařkam
 při 11. serbskim spěwanskim swjedženju,
 1860 w Budyšinje.

Nic złoto a nic slěboro,
 Nic kamjeń drohi, jasny
 Mi njeda tajke wjeselo,
 Kaž tutón swjedzeń krasny;

A čehodla, hdyž wobhladaš?
Wón je tak prawje cyle naš!

Nic róže, kwětki, lilije,
Nic krajiny najrjeńše
Mi njeposkića radosće,
Nic dolho dokonjeńše,
Kaž tutón swjedzeń serbowski
Centralne slónco w Serbowstwi.

Olympska něhdy runina,
Kiž Grichow zjednoćeše,
Njej' rjeńše spěwy słyšała,
Hdyž swjaty haj tam ržeše,
Hač hosćenc tu Třilipowski,
Hdžež Serbow kčěw so zhromadzi.

A što naš swjedzeń překrasni,
Sto wobstaće jom' dawa?
Nic spěwarjo a spěwařki?
Nic myslička jich prawa?
To je jich lubosć wótčinska,
Ta lubosć wulcy česćena.

Duž spěwarjow a spěwařki
Ja ze wšěm prawom khwalu,
Z jich hłosow spěw naš serbowski
Je klinčał w tutym zalu —
A štož je ze mnu přezjene,
Jim slawu mócnu wunjese!



Swjedžeński spěw

wulcy lubemu bratrej a wujej,
knjezej **Pětrej Ryćerjej**,
kantorej w Burkhardźicach,
na poštalětnym swjedženju
jeho šulskeho a cyrkwinskeho zastojnstwa,
třeći swjaty dzeń jutrow 1861,
wot Ryćerjec swójby we Wóslinku.

Twój čestny swjedžen witamy
Tež my we serbskim kraju,
A lube přeća přez mjezy
So k Tebi přelamaju;
Wón jasni twoje wobličo
A ducha pozběhuje,
Wón žadny je, duž złoći so
A nas tež mócnje hnuje.

Sy w Božej swjatej winicy
Poštotka lět Ty džělał
A sył a kěrluš někotry;
We prócy, křižu spěwał;
Bóh pak bě twój hród, nadźija
A před woči wšěm staji,
Kak, štož je lubił, dopjelnja,
Kaž Jezaias praji:

Do starych lět was nosyć chcu,
Hač woběla wam włosy,
Ja zběham, nošu, wumožu
Dónž zemja was tu nosy!
Budź khwalena ta dobrota,
To rěka złota hnada,
Kiž krónuje će do džensa
A smilnje k tebi hlada.

Bóh žohnuj syw a syjerja!
Ty pak wěř, sprócnj luby,
Zo Bóh će dale přewodža
A dopjelnić chce sluby:
Zo ći, kiž su tu wučili,
Tam změja hwězdow jasnosť,
A kiž su wjedli k prawdosći,
Tam změja wěčnu krasnosť.



Přezpolo ducy wot wěrowanja.

Kwasne łopješko
Pjetřkec Lejni a Šudakec Janej
w Radcy p. Łaza.

Nětk wołtař Boži swjećił je
A čestny nawdank a swjaty zawdank
Waj' mandželstwo.

Duž čestnej nětk waj' wjezemy
Dom klinkotajo a zaspěwajo
Na pyšny kwas.

A praša štó so dźiwajo:
„Što rjane maće a zaspěwaće
Tak wjesele?“

To powjedźimy zjawnje wšěm:
„Nětk je so stało, štož je so bało
A huđało.

Zwjazk lubosćow je swjećeny,
Tej čestnej rjanej, nětk zwěrowanej
Staj k mandželstwu.

Jank z Leńku wěnc je wuměnjał,
Je pjeršćeń nawdał a ruku zawdał
Před wołtarjom.

Kaž róža Leňka blyšći so,
A jejny rjany, Jank lubowany,
Ji po boku.

Tej čestnej, młodej, nadobnej
My k bokej mamy a přewodžamy
Wot wěr'wanja.

Nam wujo Braškec ale praj,
Hdže bychmy jěli a radosć měli
Tu kwasowsku?“

„Widziš tam wjesku na horje,
Na Šibjan horje, na Mušic dworje
Tam wupřehůmy.

Tam stary nan a maćeřka
Nas dawno hlada a lubje žada,
Tam stuńmy nutř.

Tam kryte blida běla so,
A swěcy kwasne so swěća jasne,
Nam kiwaju!“

(1861.)

— * —

Džakna sława

J. E. Smolerjej,

podata wot towarstwa „Maćicy Serbskeje“
jutry 1863.

Corne mroki narod serbski přikrywachu,
Njezbožowne mrěješe wšo wótčinstwo;
W nocy ćežkoh' horja twjerde spanje spachu
Sławnoh' słowjanskeho roda synojo;

Zrudny kónc so serbskom' ludej bližeše,
Wutroba wšu nadžej' hižo spušćeše.

Tola hlaj, tu purpurojte ranje swita,
Ćmowej nocy zawješć ćemny roztorhnje;
Jasne slóncó z Boha zeskhadzane wita
Narodnosće hona serbsko-łužiske;
Lipu serbsku mlódnú drastu wobleka
Wocućaca zahorjenosć wótčinska.

Štó je do wutrobow tajku lubosć plódził?
Štó je serbski narod budził k žiwjenju?
Štó je serbskich synow k horliwosći wodził
Za rěč, slawny narod a za wótčinu? —
Ty sy z procha zběhał narod serbowski,
Zo so nětko w mlódněj krasy zeleni.

Zo by dale Serbow stadło k pastwje wodził,
Džělał njesprócnje za narod swój,
Njejsy počesćace slawne město rodził,
Spěwaš: „Mjez Serbami statok mój!“
Serbam swojoh' ducha mocy poswjećeš,
Z pjerom slawu serbskoh' mjena rozšěrješ.

Twoje zaslužby wo serbski narod znaju,
Slawny mužo, serbskoh' kraja synojo;
Tebje Serbja jako swojoh' lubo maju,
Rjeknu: „Džak a slawa ći, naš Smolerjo!“
Twoje slawne mjeno, džělo wótčinske
W Serbach stajnje w žohnowanju wostanje!

X[R.A. Fiedler]

x Lužica lětn. 14, 1895 str. 12

Přecelne hrónčko
 ke kwasej knjeza fararja J. Rycerja
 we Wujezdze,
 wot Łazowskeho susoda

2./6. 1863.

(Serbske Now. 1863, 237.)

Príjěl přez sakske pomjezy
 Pan pruski čestny, nadobny,
 Fryc železny wóz čehnješe,
 Do Minakała zejhrawje.

Stań nětko, stań, knjez fararjo,
 Radź mi, mój swěrnny přecelo,
 Mi w wutrobje wšo styskno je
 Na mojej farje w Wujezdze.

Mój hrodźik, statok ryčeński
 So z nowej' pychu zyboli;
 Mi wuzki, samotny pak je,
 Najlěpše mi tam pobrachnje.

Duž japoštolska rada ta
 Tom' přecelaj so tehdy da:
 Při garbarju na hospodźi
 Bě něhdy Pawoł na rejži.

Tón lubje jeho powita
 A ze wšěm dobrym wobstara:
 Za Božich mužow, přecelow
 Su garbarjo džě dobry skhow.

Njej' garbańjow tu w swěće wjac'?
 Mi chce so džeć, tam je twój šac.
 Kaž zwony paradiziske
 To Juliusej klinčeše.

Wón wuńdže pytać garbańnje
 A trjechi prawu, kaž so wě.
 Dom dale fary poda so,
 Tam nam'ka knježnu, holečo.

Kaž jandželk rjana, pěkna je
 A zbóžnje so jom' lubješe,
 A z luboznosću nalětnjej
 Tež lube słowčko šepny jej.

Te žady wona wusłyša
 A jeho pjeršćen na porst wza.
 Přez miliony bohaty
 Wón zejhrawaše wjesely.

A hołbik woko'lětacy
 Je nam'kał podnošk wotpočny,
 A Ryćeř nam'ka Ryćeřku,
 Tu prawu wona wutrobu.

O zwony jasne Milanske,
 Kak wy džens rjenje zwoniće
 A witaće do mandželstwa
 Sej Ryćeřku a Ryćeřja.

Duž biskopej a ryćeřjej,
 A jeho lubej' mandželskej,
 Tej krónje jeho žiwjenja —
 Klinč sława, klinč halleluja. (1863.)



W ě n c

na row njeboh M. Bórnoweje z Khrósta.

(Serbske Now. 1864, 160.)

Tu spi, sprawna mandželska,
 Tu we rowje khlódnym,
 Zahe ty sy wumrjeła
 Džěéom svojim ródnym.

Hórke sylzy zaplače
 Mandželski, hdyž praša
 So joh' džěčo najmlódše:
 „Hdže je maćeř naša.“

Bjez poroka steješe
Prjódk ty domej swojom',
Wšo bě prjedy wjesele,
Nětk je zrudnosć wšudžom.

Trošt pak rjany wostanje:
Zas' so widžeć w njebju,
Hdžež je wěčne wjesele
Tam při Božim trónu.

Ty nětk kěrluš zaspěwaš,
Bohu khwalbu daš ty,
Z jandželemi radosé maš,
To trošt za nas rjany.

Nam pak, kiž tu wostachmy,
Daj we wěrje khodzić,
Zo so móhli jónu my
Z nimi tež tam wodzić.

(1864.)

— * —

Powitanje

knjeza kantora Jurka do Łaza, 1. hapryla 1864.

(Serbske Now. 1864, 207.)

I.

Krasny dzeń je zaswitał
Džensa z Božej hnady,
Za nas je so postarał
Bóh Wótc wšeje rady;
Woła, dawa pastyrja —
Noweho nam wučerja —
Khwalmy mjeno Bože!

Božemje na winicu
Pójće k nam, muž Boži!
Wóčko poľne z dowěru
Na was kóždy zloží;
Z lubosću was witajo
Džemy wam nětk napřećo.
Budźće postrowjeny!

Miła ruka najwyšša
Daj wam zbóžne džěło,
Žohnuj syw a syjerja,
Zo by wšitko kćěło,
Wy a šula Łazowska
Do najdalšoh' přichoda —
To daj Bóh, tón miły.

II.

So wěncuj wjesela
 Džens šula Łazowska,
 Wzmi khorhowje!
 Džens Boha khwalimy
 A z hłosom česćimy:
 Tón wuzwoleny dže,
 Naš hižo je.

Bóh swoje stadleško,
 Kiž bě so zrudziło,
 Zas troštuje;
 Nic wjacy syrotka
 Njej' šula Łazowska,
 Nan druhi z lubosću
 Je nowy tu.

We próstwi, modlitwi
 Nas Bohu poručí
 A chce nas pasć;
 Wón chce nas wothladać
 A k Bohu zwjedować,
 Zo bychmy přinjesli
 Plód k zbóžnosći.

Wotamkńíce šěroko
 Sej wučerńju;
 Bóh wam tu zbože daj,
 Was před złym zakhowaj!
 Was žohnuj kóždy čas
 Bóh, pola nas!

III.

Ja pozběham
 Tu woči k horam.
 Wot kotrychž dele
 Mi pomoc přińdže z ruki wjeršneho.

Wón stražnik je,
 Kiž njedrěmuje
 A njeda padnyć,
 Wón škituj twoju dušu a twój dom.

Wón budź twój khłódk,
 Wón požohnuj će,
 Twój won- a nutřkhód
 Wot teho časa hač do wěčnosće.



Swjedzeński spěw

wysokod. k. diak. **T**aflī, duchownemu w Njeswačidle,
k jeho 25lětnemu zastojskemu jubileju
wot někotrych zastojskich bratrow poswjećeny 10. meje 1865.

(Serbske Now. 1865, 156.)

Wot stotkowych lět wotběžala
Je džensa sławna štwórčina,
Zo Boža miłosć přepodała
Bě tebi prócu zastojnstwa,
Hdžež nětk ze žohnowanjom płodźiš
Ty Khrystusowu winicu,
A k strowej pastwje stadło wodźiš
A k njobjeskemu žórlešku.

Ty z mocu, z duchom žalbowany
Tu hišće džělaš do džensa
A česćeny a lubowany
Rad paseš wowcy, jehnjatka.
To miłosć je! Bóh zbóžnje wodźił
Bě tebje z ruku wótcneju
A won a nutř je z tobu khodźił,
Twój škit před wšelkej strachosću.

Duž powitamy džensa z tobu
Twój rjany swjedzeń slěborny
A hnući hłosujemy sobu
Do džaka twojej' modlitwy;
Z tym njech tež pódlu wuznawamy,
Kak česćimy će, přecelo,
Kak swěrnje lubo tebje mamy,
Naš drohi bratře, towařšo!

Kaž pak Bóh Knjez so pózna k tebi
A k džělu rukow twojeju,
Tak porjeńš krónu česće sebi
Tež dale z jeho miłosću!

Džak, lubosć krónuj twoje mjeno,
Ty džělačerjo Knjězowy,
Najlěpše wšo, štož wěmy jeno,
Za přichod twój my přejemy.

Twař strowy, čerstwy, posylnjany
Do přichoda najdalšeho,
Wot žohnowanjow přewodžany,
Twař mócnje Khrysta kralestwo,
A twoje japoštołske džěło
Njeh stajnje so tež poradzi,
Njeh zbóžnych płodow dosć by měło
Tu časnje a tam w wěčnosći!

A něhdy, hdyž Bóh swjatok staji
Tu twojej prócy na zemi,
Njeh jeho ert to słowo praji:
Pój nutř ty k mojej krasnosći!
A mróčel swědkow w tamnym kraju
Njeh přistupi a zawyska:
Haj, tón je spomhał k Božom' raju
A k zbóžnosći nam přez Khrysta!

— * —
Swjedžeński spěw

wysokodostojnemu knjezej Jurjej Libušej,
wyššemu fararjej w Komorowje,
na poštalečnym jubilejskim swjedženju
jeho duchownskeho zastojnstwa 1. oktobra 1865
wot serbskich hamtskich bratrow Wojerowskeho wokrjesa
přez H. Z.

Na džewjatnaće stotetkow
Je zašlo wot tych zbóžnych dnjow,
Zo sam Bóh Knjěz je khodził
Po tutym swěće hinitym
We čłowskim ćěle widomym
A winicu sej płodził.

A tule swjatu winicu,
 Tu swoju cyrkej křescansku,
 Wón škituje a hlada,
 A na torhojšćo žiwjenja
 Do džensa hišće přikhadža
 A džělačerjow žada.

Jich powoła a póscele,
 Hdyž a hdžež jeho wola je
 A žohnuje jich džělo
 Přez dary Ducha swjateho,
 Zo kóždy šćěpk a zornješko
 By zbóžnych płodow mělo.

A poł sta lět džens minje so,
 Zo tebje, drohi přecelo,
 Bóh Knjez tež wołać džěše,
 A staji će do winicy,
 We kotrejž do džens džělawy
 Ty swěrnny wotročk běše.

Kaž w winicy Knjez přikaza,
 Sy mužscy pjelnił njebjesa
 A helu pusćil, rubil,
 Syl, plěl a šćěpil, wobalał
 A z modlenjom sy kedźbował,
 Zo njeby ničo zhubil.

We prócy tajkoh' zastojnstwa
 Džens měri so poł stotetka —
 O žadna mocow měra!
 Poł sta lět swěrnny winicař,
 Poł sta lět Boži wojowař —
 O krónow hódna swěra!

Duž, mužo Boži, na tebje
Tež naše wóčko pohladnje
A radosé mamy sobu
Na džensnym zlotym swjedženju,
Kaž na wšěm miłym wjedženju,
We kotrymž Bóh bě z tobu.

Naš dzakny wopor bratřimy
Z tym twojim za wšě dobroty,
Kiž ty wot Boha zhoni;
Wón tež će dale přikrywaj,
Ći strowosé, měr a hnadu daj,
Twój škit po kóždej stroni.

Twój luby dom a winica,
Kaž cyła swójba potomna
Će hišće dołho skhowaj;
Bóh pak će k palmam dobyća
A k mytu swěrnoh' pastyrja
Po swjatoku dom wołaj! (September 1865.)



K česćiwemu dopomnjeću

jeje excellency njebo knjenje hrabiny a generaloweje
z **Riesch** nad **Njeswačidkom** atd.

zemrje džen 19. meje 1866.

Što Njeswačilske zwony zrudnje zwonja
Z tak zrudnym ertom řečniwym?
Kom' plaća sylzy, kiž so ronja
Za kašćom w ćahu swjatočnym?
Hlej, kajki je to přewod ludny,
Praj, koho k měrej wunjesu?
Ach, cyły serbski kraj je zrudny
Wo sławnu lubu Serbowku.

W najkhuďšej khěžcy, štož so praša,
So sylzna powěsć dostawa:
Ta luba hrabina, mać naša,
Ta sćěrpliwa křižnošerka,
Je w Boži raj dom wołana!

Mi čestne wěncy, palmy dajće,
Chcu wěncować tu ćerpjerku;
Hlós dobyća jej zaspěwajće,
Kaž dobyła je přez wěru.
Nětk z twojim křižom wujednana
We Božej rucy wotpočuj
A w Salemje tam powitana
So rjeńšej' króny zwjeseluj!



Česćowne postrowjenje

wulcy lubowanemu zastojnskemu bratřej a česćedostojnemu
knjezej **Handrijeje Hadankej**,
duchownemu w Parcowje,
na jeho 25lětnym jubilejskim swjedženju.
Poswjećene wot zastojnskich bratrow Wojerowskeho wokrjesa
7. małego rózka 1866.

Kak krasny dzeń džens zaswita,
Najlubši bratře, tebi!
Dzeń džaka a dzeń wjesela,
Kiž twój puć zemski zdebi,
Hdyž lěto pjeć a dwacete
Je zašlo w twojim zastojnstwje.

Kak je Knjez wjeřšny winicy
Ći pomhał z dźiwnej mocu
A žohnował tak šćedriwy
Twój skutk a twoju prócu,
To džensa z khwalbu spóznawa
Twój rot a twoja wutroba.

Hlaj, twoji bratřa a twój dom
 So z tobu stowařšuja
 A Božu miłosć z wjeselom
 Džens z tobu pozběhuja,
 A zbožopřeca z lubosću
 Ći, luby bratře, přinjesu:
 Bóh Knjez, kiž tebje wodzil je
 Tak dołhe lěta w hnadže,
 Wodź dale twoje žiwjenje
 Po swojej zbóžnej radže,
 A hišće pječ a dwaceći
 Lět měrných, zbóžnych přizwol Ći!

—*—

Swjedžeński spěw

wysokodostojnemu kralowskemu superintendentej a primariusej
 knjezej **J. Khr. W. Karasej**
 we Wojerecach,
 na jeho 25lětnym duchownskim jubileju
 wot serbskich zastojskich bratrow poswjećeny
 25. winowca 1869.

(Serbske Now. 1869, 358.)

Opomnjenja nastupjenja
 Japoštołstwa twojeho
 Lija do nas wokřewjenja,
 Zraduja nas wysoko;
 Přetož džensa z Bohom skonja
 Wot sto lět so štwórcina,
 Zo Ći z templa zwony zwonja
 K službje dušow pastyrja.

Sławnje telko lět sy hladał
 Sprócnje Božu winicu,
 Hač bě tež tón Knjez Će žadał
 Domoj k serbskom' biskopstwu;

Bratrowscy duž powitamy
 Tebje w krónje slěbornej
 Zbože, strowje! zawyskamy,
 Slawa našom' Karasej!

Morjo wšel'kej' Božej' hnady
 Dwoju lódz je nosyło,
 Džensa džiwy wyššej' rady
 Wustupja čím swětlišo;
 Čeji ert pak domjenuje,
 Što po swójbje, zastojnstwje
 Bóh Knjez svojim wudžěluje,
 Činješe tež na tebi?!

Zhłosujće duž derje lyru
 Teho dla nam, jandželjo,
 Spěwnych darow pěknju měru
 Wudžělcé nam poľnišo —
 Božej khwalbje chcedža klinčec
 Naše truny dostojnje,
 Božej česci dyrbja zynčec
 Přez wše hona lužiske.

Wopor khwalby chcemy sobu,
 Z twojim naš džak zjednoćić,
 Zo tak widomje bě z tobu
 Tón, kiž móc ma powyšić,
 Džak za miłosć, žohnowanje,
 Za wšo zbóžne wodženje,
 Wusłyšenje, wupomhanje,
 Trošt a škit a wjesele.

A štož přichod w swoim klini
 Khowa hišće za tebje,
 To tón, kiž wšo derje čini,
 Wobroc' zbóžnje, škituj će;

Sytwa twojej' ruki časna,
Kaž twój dom a winica,
Kóžda kročel bóle krasna
Kćěj a tyj dosć widžena.

Jako łuki powodžane
Hordža so we płódnosci;
Pobožne tak Serbstwo rjane
Kćěj we twojej nakedźbi,
Kryćiznu zo mělo wěstu
W twojej rucy mócnijej,
Naš pak zwjazk we Knjezu Khrystu
Wěrna lubosć potwjerdźej!



Njezapomnička

na row njebo knjeza barona
ze Schönberg-Bibran-Modlow,
rodź. w Khołmcu 5. aug. 1800, † we Łuzy 1. febr. 1870.

(Serbske Now. 1870, 64.)

Ŕy džě, našich sylzow swědko,
Boža zemja, khowaš nětko
Přecela, kaž lědma druhdže
Postanyć nam žadyn budže —
Tysac ertow poskorži:
Ach, ach! što smy zhubili!

Měj džak! smilny, lubowany,
Khrysteј swěrnny namakany,
Spi džě derje, wumóženy,
Procho k procheј stowařšeny,
Dobra nóc a božemje,
Zemja njech ći lohka je!

Ale ruka Božej' hnady,
 Kiž wšo dobre plaći rady,
 Wotrunaj ći w tamnu stronu
 Z njezachodnej čestnej krónu,
 Štož ći Serbja dołžimy,
 Drohi njezapomnity!

(24./2. 1870.)



Swjedzeński blidowy spěw

k 22-lětnym swjećinam

Budyskeje serbskeje Bjesady

12. febr. 1872.

(Lužičan 1872, 33.)

Hlós: Ha widžu-li ptačata ćahnyć.

Boh postrow a žohnuj će, luba
 Ty Bjesada Budyšinska;
 Ta črjódzička twojeho sluba
 Ze sławu budž wěncowana!

Tak druhe a dwacete lěto
 Džens wuznawa pupkojty haj,
 Duž škowrončki, róžowy swěto
 Će woběahnu witajo kraj.

Pod winowym pjeńkom a kiću
 Tón postrow nam k wutrobje dže,
 Nan Noah nam nažimał k piću
 Najlěpšich tež jahodkow je.

So k swjećinam Bjesada měri
 A zanoša radostny spěw,
 A wótčinska „Meja“ so šeri
 A zwjeduje pyšny sej kěw.

Wšě wokolne hory te skalne,
 Kaž jehnjatka poskakuja,
 A Lubin a zahony zdalne
 Jim z radosću přihłosuja.

Kčěj, Bjesada, dale njech krasni
 Bóh tebje, kaž banian-štom,
 A wobličo Musow njech jasni
 So nad tobu z lubowanjom!



Mój přewod

lubemu přećelej Jórdanej při jeho přesyddenju
 do Popoje 1. winowca 1872.

(Časopis M. S. 1872, 53.)

Swět swojich ludźi wočehní sebi
 Za wužitk swój a kralestwo:
 Ty winicariš! to će debi
 A woli Božej lubi so;
 Duž bibliju* éi podam sobu,
 Wšěch ludow paedagogiku,
 Tón dosahacy šac dži z tobu,
 Z tym hoj ty ludej Božemu.

Swět cyły tón šac wobohaća,
 Wšěch pismow króna wostanje,
 Je swětla zdžeržk a mudri plaća
 Člo khwalby jemu najwyšše;
 Wšě druhe swětne błyskotnosće,
 Ministeri a kralojo,
 Šik, mudrosć, brón a naše kosće
 Su khuda móc jom' poruno.

Šac tón a studžení zdžělanosće
 Ty stajnje zdžeržuj wotkrytej,
 Z tej' krjep, zo Boži čłowjek rosće,
 A duch a wěra prochno njej';

* Mjenujcy delnjołužisku serbsku. Popojske serbske šulske džeći
 maju dotal jenož němsku bibliju. Přisp. basnika.

Je Němc, je Serb z tym bohaćeny,
 K wšěm dobrym skutkam hotowy:
 To lemjaz prawy dokročeny
 Je hakle — a lud „zdžěłany“.

To twoje póselstwo by było — —
 Bóh pak će we nim požohnuj!
 Wón, zo by prjódcy Serbam tyło,
 Kaž Pawoła će wuhotuj;
 Wzmi sčérpnje tajke džěło na so,
 Ty wěrný Serbow přěcelo!
 A njecha hić, to wróc so zaso,
 Jich proch sej z nohow ćepajo!



Předspomnjenje.

Kaž kóždy basnik, tak je tež naš H. Zejleř husto pak wot sameho sebje pak wot přećelow a znatych wabjeny był, tón a druhi cuzy spěw, kiž so jemu abo jim spodobaše, tak zo bychu jón rad abo radšo serbski spěwali, do našeje lubeje serbšćiny přeložić a našemu narodej přiswojić. Na Zejleřowych basniskich přeložkach hodži so z dobrym prawom to khwalić, zo wšě swój original w rěči a duchu derje dosěhnu, haj mnohe wšelako přesčěhnu. H. Zejleř je stajnje swobodnje přeložował a předžělował, wšě cuze wobwroty a mysle pak na serbske přestworil pak z přenjōtnymi serbskemu wašnju přihōdnymi wuměnil, z cyła wšě te spěwy na serbske wobstejnoscě zložil. Husto je jim jenu abo někotre strofy přidat.

Mějo za najlěpše wot dźělenja do wšelakich wotdželow wothladać, podawam tu wšě přeložki po času zřadowane z trěbnymi přispomnjenjemi.

Redaktor.

Kukečanske zamołwjenje.

(Tydź. Now. 1842, 95.)

Ein Schlosser hat einen Gesellen gehabt.

Bur w Kukecach něhdy je wotročka měł,
Tón drjewo je dzělał, njej' nihdy so zhrěł;
Wón rězał a kałał tak pomałku je,
Zo kabat lědma zatřasł so je.

Kaž bórzy pak wot dzěla k jědźi je šło,
To khwatał njej' nichtó nic surowišo,
Wón do šklě tež přeco najprěniši bě
A wěčničko posledni běše ze šklě.

Tak skhwatliwy, sprócný njej' nichtó wjac' był
We cyličkim domje a k jědźi so měł,
Tak za jědźu nichtó nic požerał njej'
A z połnymi lžicami podawał sej.

Duž džeše raz hospodař k wotročkej tak:
„Praj, kadla, mi, kajki ty jeno sy rak?
Mój žiwy dzeń přisłowo plaćilo je
A po cyłym kraju tež hišće přec' dže:

Kaž dzěla tu čłowjek, tom' runja wón jě!
P'la tebje pak nastajnje hinašo bě —
Tak pomałku nichtó njej' do dzěla stał
A skhwatnišo, dyžli ty, za blidom žrał!“

„Haj“, džeše duž wotročk, „to wěrić žno chcu,
 Wěc kóžda pak zamysl ma wučinjenu —
 Kak dołho to traje, zo pojedli smy?
 A džělać je wot ranja do slepej' émy!

By dyrbjał štó cyły džen jěsć a tež pić,
 To bórzy tak pomałku dyrbjało hić,
 — Haj, na to wam słowo a wopismo dam —
 Kaž rězanje, kałanje pod kólnju tam.“ (1842.)

— * —

Pruha.

(Tydź. Now. 1843, 195.)

Wenn zu meim Schatzerl kommst.

Přińdžeš k mojej holičcy,
 Rjekń, zo dam jej prajić,
 Hdyž so praša, hdže ja sym:
 Zo sym hišće w košli!

Přińdžeš k njej a praša će,
 Kak so mi dže tudy,
 Rjekń, zo dawam prajić jej:
 Po dwěmaj přec' takle!

Přińdžeš k mojej holičcy
 A će wona praša,
 Što jej dobroh' prajić dam,
 To praj: W mlócy całty!

Přińdžeš k njej a praša će,
 Hač mam žanu druhu,
 To rjekń, zo jej prajić dam:
 Zo mam wjac', hač jenu!

Přińdžeš k mojej holičcy
 A će wóna praša,
 Hač ja hišće strowy sym,
 To rjekú: Zo sym khory.

Takle rěč — a wuhladaš,
 Zo nětk zrudna plače,
 To praj: Zo chcu jutře k njej,
 A zo sym ja strowy!

Praj jej wjele dobreho,
 Zo je moja jen'čka,
 Praj, zo čestne pacholo
 Šelmskej' mysle nima.

(September 1843.)

— * —

Spěwančko při kolebcy.

(Tydź. Now. 1844, 80.)

Schlaf, Herzenssöhnchen, mein Liebling bist du.

Spi, złote džěčko, mój jandželk sy ty,
 Začini sej módrej tej kukuladcy,
 Čicho a změrom, kaž w rowje, wšo je,
 Spinkaj, tym mucham ja wobaram će.

Nětk, moje wóčko, šće złoty je čas,
 Tajki, ach, nihdy wón njepřińdže zas';
 Łožo hdyž starosće wobstupja cí,
 Nječíše, kurko, ach tehdy so spi.

Jandželki z njebjes tak lesne kaž ty
 Tujku wobzmawuja posměwajcy;
 Pozdžišo dele tež stupaju drje,
 Ale trěc sylzy cí wuronjene.

Spi, lube kurko, a přińdže tež éma,
 Při ložku sedži mać wocućita;
 Zahe ab' pozdže njech, hołbiko, je,
 Maćerki lubosć wšak njepozdrěmnje.

(Februar 1844.)



Pětyr w cuzbje.

(Tydź. Now. 1844, 191.)

Der Peter will nicht länger bleiben.

Naš Pětyr njecha domach wostać,
 Won do swěta so jemu chce;
 A tajku zważnosć wróćić ćežo
 Tej maćeri přec' padaše.
 „Što“, džeše wona, „chceš tam činić?
 Ty cuzych ludźi njeznaješ!
 Kak bórzy njeswleće će drastu
 Tam paduch, zo ćělnahi stej'š.“

Naš Pětyr khroboli so zważny,
 So směje, hdyž mać plakaše.
 Džeńk jako džeńk jej w wušach leži,
 Zo jeho zbožu zadžěwje.
 Wón měni: „Doma njekée zbože,
 Přec' cuzba ludźi činješe“;
 Zo so tak ruče wróćić budže,
 To do dycha jom' njepřińdže.

Wšě ćety nětko powołachu,
 Jich radu słyšeć žadaja,
 Wšo podarmo! Wopjerak chcyše
 Do cuzby bjez wšoh' prašenja.
 Mać rěči jemu přec' a zaso:
 „Na našoh' nana jeno hlej!
 Tón njej' był w cuzbje a je mudry,
 Kaž džesać pućowacych njej'.“

Mój Pětyr sebi rěčeć njeda;
 Nan džeše: „Na! nětk posłuchaj:
 Wšo dobre! Bóh daj swoje zbože!
 Ty dyrbiš hić, duž pokhwataj!“
 Nětk wudrasěichu pyšnje jeho
 Wot plěcha dele do nohow,
 A zwichu, zo włósk njeby zmjerznył,
 Najtołši bant jom' do włosow.

Hdyž nětko zły dzeń běše přišoł,
 Hdžež dyrbyeše hić po jědźi,
 To z časom zrudne „Bož'mje!“ šepny
 Wón z pačosnymi wočemi.
 A staršej jeho přewodžeštaj
 Hač do wsy bližšej', do korčmy —
 Na swačinu tam nutř so dachu,
 Sej zahnać prečkow hórkoty.

Sej blešku wina před so wozmu —
 Kaž myška Pětyr womjelknje.
 Na strowe wróćenje nětk pija —
 A Pětyr zdychny: „Kaž Bóh chce!“
 Wón tójšto razow woči trěje
 A rjane „Bož'mje“ wot nich wza
 A džeše: „Wostańće tu sedžo,
 Što trjeba dalšoh' khodženja?“

A naposledk so dale šmjata,
 Hač runje skoro kaje so;
 Po kóždej trójcy kročel zasta
 Na wulki swět sej pomyslo.
 Jom' wjedro někak njeje prawe.
 Wětr rězny so jom' zezdanje,
 Wón wěšći sněh sej hišće džensa
 A njeńdže džens, to jutře dže.

Nětk wohladnje so tyšny! Nětk dže!
 A hóda, wjele džens by šoł.
 Nětk přińdže rozpuć; nětk tam steji —!
 A nima, kohož prašeć móhł,
 „Ach, što sym dočakał?“ wón skorži,
 „To, Bohu žel, sej njemyslach,
 Běch mudry posłuchał ja maćeř,
 Bych w mjehkom sedzał při kachlach.

Kak sym ja swoje zbože teptał,
 Sym hlupiši hač hlupy był,
 Ach, kak by mać mje wokošala,
 Bych jowle dom so zawjertnył.“
 Při rozpuću so hnydom wróci
 Wón, kaž by něšto zabył był —
 A k wótcnom' domej z khwatom saha;
 Ja jeho lećo widžeć chcył.

Tam staršej mjez tym w korčmje sedžo
 We dobrym měrje swačeštaj
 A styski z jědžu přemóc chcyštaj
 A zrudnej k temu piještaj.
 Tu hosćinu jim Pětyr přeje,
 Wón zbože domu žadaše;
 Po nabočnym je puću wróco
 Wón domoj hnał štož móžeše.

A wjesoły, zo z dala, z blizka
 So noha zabłudziła njej',
 Wón njewidženy domoj dóńdže
 Před hwězdu hišće wječornej.
 A jako domoj nětko přińdže,
 To wšitcy w domje směja so;
 To skoro za zło wzał jim běše,
 Hdy by sej z teho sćinił što.


„We škórnjach milownych drje činił
Sy rejžu?“ klubu rěčachu.

„Na! Wodych za kachlemi trošku,
„Hoj za to brjuchej po horju.“
Wón čini to! Duž do jstwy zrudnej
Staj runje staršej stupiłoj.
Mać zdychuje a styknje rucy:
„Ach! hdže tež nětk je Pětyr mój?“

Duž wulěze prjódk Pětyr smějo:
„Što žalosćiš? Hlaj, ja sym tu!“
Mać wyska! Nan pak khmuri čolo:
„Žno zaso dom a za helu!?“
Na, kaž sej myslach, je so stało
(Mać z wjes'lom bě bjez rozyma),
Kak daloko ta rejža póndže,
Na kadli hnydom widzach ja.“

Duž pobožneho džaka połna
Mać rjekny: „Tak wšak lěpje je!
Nětk domach mojoh' hóleca strowoh'
Mam zaso, štož mje zraduje.“
A přez plač džeše Pětyr: „Njebych
Ja měnił, zo sněh póndže so,
A njeby přišoł tam tón rozpuć,
To běch, što wě, kak daloko!“

(1844.)



Missionstwo.

(Missionske powěsće 1845, 72.)

Ja, Gottes Wort allmächtig ist.

Haj, Bože słowo móčne je,
Móc bójska wšitkim ludžom,
Kiž zbóžnych činić zamóže
A přelamac so wšudžom.

Hdžež Jezus wojuje,
 Błud wobstać njemóže:
 Wón k wěrnosći wšěch wodźi.

Duž njewustawaj přédować,
 Ty missionska syla,
 Wot Khrysta hnady powědać
 A Božej' rady z cyla.
 Hdžež je Immanuel,
 Tam žadyn njepřećel
 Najhórši njem'že škodźić.

(1845.)



Bože džěći.

(Missionske powěšće 1845, 88.)

O zage nicht, du Häuflein klein.

⊙ mólčke stadło njeboj so,
 Knjez sylny je sam z tobu!
 Ty dyrbiš swěta kralestwo,
 Raj Wótca dobyć sobu.
 Žno časy bliže du,
 Hdžež z Božej' krasnosću
 Wšón swět so napjelni,
 Kaž morjo z wodami.
 Wšěch jedyn pastyr wodźi.

Wot ranja a wot wječora
 So bliža čłówske džěći!
 Ach, powitaj je z daloka,
 Wšak Knjeza česć so swěći.
 Móc, česć a kralestwo
 'Mu daj, kiž čini wšo.
 Wón swój skutk njekazy,
 Hač jemu kraje wšě
 A jeho Khrystej słuža.

(1845.)



Wjesele wonka.

(Zahrodka kwětkojta II., 11.)

Tam na zelenej holi,
 Tam je dosć wjesela,
 Tam pod zelenej hałzu
 Je khłódk a rjana hra. —
 Haj — je khłódk a rjana hra.

Tam horkach na tej horje
 Być móžeš zradowny,
 Tam delkach po tym dole
 Maš wjele dobroty —
 Haj — maš wjele dobroty.

Kak luboznje je wonka
 Pod njebjom smějatym,
 Hdžež nam te kwětki kćěja
 We blyšću pisanym —
 Haj — we blyšću pisanym.

(1846.)



Jezusowy narod.

(Tydź. Now. 1846, 204.)

Stille Nacht, heilige Nacht.

Ćicha nóc, swjata nóc!
 Wšitko spi, při žłobi
 Marja z Jozefom njedrěmuje,
 Synk jej' lubozny zwjeseluje.
 ∴ Ćišinko synko ty spi! ∴

Ćicha nóc, swjata nóc!
 Pastyrjo zhonja to.
 Přez tych jandželow haleluja
 Klinči z blizka a wot daloka:
 ∴ Jezus naš zbóžnik tu je! ∴

Ćicha nóc, swjata nóc!
 Boži syn přińdže ždyn.
 Lubosć w wobliču posměwa so,
 Zbóžnosć zhubjenym připowjedžo.
 :: Jezu, twój narod ju da. ::

(1846.)



Khwalba domowiny.

(Tydź. Now. 1850, 114.)

In der Heimat ist es schön.

Doma, doma rjenje je,
 Wjerchi horow złoćiše,
 Hdžež du sćežki po skalinach
 A po dolach, po runinach
 Khodža stadła pisane:
 Doma, doma rjenje je!

Doma, doma rjenje je,
 Milišo wětr zadunje,
 Hdžež tam rěčki pluskotaja,
 We nich lóštne ryby hraja,
 Hdžež naš dwór a khěža je:
 Doma, doma rjenje je!

Doma, doma rjenje je,
 K domu lubosć čehnje mje,
 Hdžež sym džěčo wotujany,
 Z rjanym bantom powijany,
 Tam mi lóšt a zbože kće:
 Doma, doma rjenje je!

(Junij 1849.)



Nalěćo.

(Pjekarjowe šulske spěwy 1873, I., 11.)

Wie reizend, wie wonnig ist alles umher.

Kak lubozne, žiwe to nalěćo je,
Hdyž slónco tak miłe po njobjesach dže!
Swět w zelenej pyše so wotmlóduje;
A škowrončka słyši, štož do pola dže.

Spěw škórcy a zyby tež ponowjeja,
A za mušku ryby zas poskakuja.
Na lúcy, na poli kće róžička zas,
Na horach, po doli je plódnivy čas.

Duž nalěćo žiwe mi pozběhujće,
Hdyž slónco tak miłe po njobjesach dže,
A swěći do rosy, ju poslěbornja,
A džěcata bosy zas wuběhnjeja. (17./4. 1850.)



Džěsćowy jandžel.

(Tydž. Now. 1850, 161.)

Es geht durch alle Lande.

Přez wšitke kraje ćiše
Dže jandžel wokoło,
Joh' njem'že wóčko widžeć,
Wón sam pak widzi wšo,
Wón w njobjesach je domjacy,
Wot luboh' Boha pósłany.

Dom wot domu wón khodzi
Po pěkných džěcatakach,
Kiž z maćerju, pak z nanom
Su w ćichich komorkach.

Tam bydli rad a wostanje
A tajkom' džěsću blizko je.

Wón hraje z tajkim džěsćom
 Tak rjenje, smilniwje,
 Jom' pomha pilnje wuknyć
 A pos'chać wobstajnje.
 To džěćo rade posłucha,
 Duž lube, pěkne wostawa.

A dže-li džěćo lehnyć,
 Tón jandžel njecofnje,
 Při łožku hač do ranja
 Wón swěrnje stražuje.
 A k nowom' džěłu, k radosći
 Je z ćichim košom wubudzi. (5./9. 1850.)



Rajtarjowy stary plašć.

Schier dreissig Jahre bist du alt.

Žno třiceći lět stary sy,
 Wěš wichor někotry;
 Kaž bratr sy na mnje dzeržał ruki
 A hdyž hrimachu te wulke štuki,
 Naj' dwejt' hroza třasła njej'.

Nóc ležachmojt tež někotru
 Mokrej hač na kožu;
 Ty stary sy mi wohrěł ćěło
 A štož wutrobu je žrało, drěło,
 To ći šepnych, dowěrich.

Nic słowčka njejsy plicał, bał,
 Sy ćichi ke mni stał;
 W wšěch kruchach swěrnj namakany
 Tež mi wostać dyrbiš njeplātany,
 Ty mi hewak womłodziš.

A runjež wusměchuja mje,
Mam tola lubo će;
Hdžež šlebjerdka hdže wisy žana,
Tam je kula přešla a je rana,
Kóžda kula džěru zdrě.

A dóndže kula poslednja,
Kiž wutrobje smjerc da:
Luby plašćo, daj mje khować z tobu,
Dale ničo ja měc njecham sobu,
Do tebje mje zawala.

Tak haě k appellej ležimoj
A w ćichim rowje smój;
Appell wšo žiwe ćini khětre
A duž cyle nuzne su mi wěcy,
Zo tež něhdy mój plašć mam.

(1850.)



Jutrowny spěw.

(Tydž. Now. 1851, 125.)

Ich weiss, dass mein Erlöser lebt.


Ja wěm, zo Jezus žiwy je,
Ćesć jeho mjenu spěwajće!
Tón ryćeř z rowa postany,
Smjerc hrěch a helu předoby.
Haleluja.

Ja wěm, zo Jezus žiwy je,
Wón zemju hnujo zatřasnje;
Pod jeho nohu zlemjena
Móc njepřećelow přěhrawa.
Haleluja.

Ja wěm, zo Jezus žiwy je,
 Duž pójće sem a poddajće
 So jemu z dźaknej wutrobu
 A k wobsedźenštwu swjatemu.
 Haleluja.

Ja wěm, zo Jezus žiwy je,
 Hdyž něhdy row tež kryje mje:
 To přinďže dzeń, kiž zawoła
 Mje do rjeńšeho žiwjenja.
 Haleluja.

Ja wěm, zo Jezus žiwy je,
 Česć jeho mjenu spěwajće,
 Hač něhdy w Božej swjatnicy
 'Mu rjeńši kěrluš swjećimy!
 Haleluja. (20./3. 1851.)



Dźakny kěrluš.

(Zahrodka kwětkojta II., 13.)

Danket dem Herrn.

Bohu budź dźak!
 Naš wopor budź dźak,
 Tón Knjez je smilny,
 A jeho smilnosć traje bjez kónca,
 ∴ Ta traje bjez kónca. ∴


Bohu budź česć!
 Khwal Knjeza, haj khwal
 Tež moja duša
 A njezabudź tu jeho dobrotu,
 ∴ Tu wulku dobrotu. ∴

Kral je Bóh Knjez,
 A jeho je móc!
 Wón je ta mudrosć
 A jeho lubosć, jeho swěrnosć wša
 :: Je nowa kóždy dzeń. ::

Wulki je Bóh!
 Haj sławny je Bóh,
 Je swjaty, krasny,
 A cyły swět česć jeho přěduje,
 :: Česć jeho přěduje. ::

Modlitwu, česć
 Njech bjerje Bóh Knjez!
 Naš swjaty kěrluš
 A modlenje so jemu spodobaj,
 :: So jemu spodobaj! ::

(8./11. 1851.)



Při wusywjje.

(Zahrodka kwětkojta II., 12.)

Bur wora, symjo syje
 Do brózdy na polo;
 Zo rosće pak a tyje,
 Da ruka wjeršneho.
 Bóh sće dešće, rosy
 A slónčkej swěćić da,
 Zo zemja płody nosy,
 To wón sam wobstara.
 Wšitke dobre dary
 Te přińdu z wysoka,
 :: Duž džak budź džak, ::
 Stož Bóh nam da!

Je daloko, je blisko,
 Wot Boha wšitko je,
 Pěsk, morjo, trawa nizko,
 A hwězdy wysoke,
 Sad, žita, lisće w haju —
 Su wšitke wot njeho,
 Kaž sněh a zyma w kraju
 Wón miłe nalěčo.
 Wšitke dobre dary atd.

Wón da, zo slónco khodži,
 A měsačk přiwjedže,
 Wón loft a wětry wodži
 A njejbo wotamkne.
 Wón zwjeseli nas jajra,
 Da strowosć, čerwjenosć;
 Za skót so wšědnje stara,
 Da džěcom khlěba dosć.
 Wšitke dobre dary atd.

(8./11. 1851.)



Wužiwanje žiwjenja.

(Zahrodka kwětkojta II., 37.)

Freut euch des Lebens, weil noch das
 Lämpchen glüht.

Wužiwaj radosć, tu radosć žiwjenja,
 Šćipaj sej róže, donž kćěwaja.

Hlaj, kwětki přeco njerostu,
 Nam lěta mlode nimo du,
 A starosće so přibliža,
 A zańdže róžow čas!

Wužiwaj radosć, tu radosć žiwjenja,
 Šćipaj sej róže, donž kćěwaja.

Wužiwaj radosć, tu radosć žiwjenja,
 Šćipaj sej róže, donž kćěwaja.

Štóž wóstam, černjam z puća dže,
 A winnikej rad wodawje,
 Na kóždy próšk so njekhmuri,
 Tom' złote róže ktu.
 Wužiwaj radosć atd.

Wužiwaj radosć, tu radosć žiwjenja,
 Šćipaj sej róže, dónž kćěwaja.
 Štóž bjez falša ma wutrobu
 A njezawistnu, spokojnu,
 A pilnej rucy do džěła,
 Tom' złote róže ktu.
 Wužiwaj radosć atd.

Wužiwaj radosć, tu radosć žiwjenja,
 Šćipaj sej róže, dónž kćěwaja.
 Štóž na pućiku žiwjenja
 Je swěrnoh' nam'kał přecěla,
 Kiž sobu plače, směje so,
 Tom' złote róže ktu.
 Wužiwaj radosć atd.

Wužiwaj radosć, tu radosć žiwjenja,
 Šćipaj sej róže, dónž kćěwaja.
 Štóž móže rjane spěwančko,
 Česé waži, Boha boji so,
 A čini ludžom dobrotu,
 Tom' złote róže ktu.
 Wužiwaj radosć atd.

Wužiwaj radosć, tu radosć žiwjenja,
 Šćipaj sej róže, dónž kćěwaja.
 A bychu róže wšitkuške
 Po cylej zemi zwjadnyłe:
 To tola lubosć, njewinosć
 We wutrobje přec' kće.
 Wužiwaj radosć atd.

(1851.)



Bóh tón Knjez.

(Tydź. Now. 1851, 198.)

Weisst du, wie viel Sternlein stehen.

Wěš, kak wjele hwězdow steja
 Na njebieskej módrinje?
 Što tych mróčelow tam džeja
 Wšudžom wšudže po swěće?
 Wšitke ma Bóh zličbowane,
 Zmylene tu njejsu žane,
 Wón jich wulku syłu wě.

Wěš, kak wjele muškow hraja
 W ćopłych pruhach na slónčku?
 Wjele rybow pluskotaja
 W jasnej wodže tam a tu?
 Bóh wšě stwori, wě jich mjena,
 Skublana a zwjeselena
 Kóžda je přez jeho móc.

Wěš, kak wjele rano džěci
 Wšudžom z lóžkow stawaja,
 A džens wjesele na swěći
 Křiž a starosć njenoša?
 Bóh wšě widzi kóžde ranje
 A ma na nich spodobanje,
 Znaje, lubuje tež mje.

(1851.)



Lubosć k Jezusej.

(Tydź. Now. 1852, 118.)

Wärst du doch bei uns geblieben.

Ach, zo by ty při nas wostał,
 Luby, dobry Jezuso! ∴
 Lubo mjeć će wšitke chcyli,
 Miły, drohi přěcelo.

O my slyšeli smy dawno
 Słowa twojej' lubosće ::
 Džěćatka njech ke mni přińdu,
 Wobarać jim njechajće.

Kajki je to rjany wobraz
 Wot tebje, naš smilniko ::
 Maćerje před tobu kleča,
 Džěći steja wokoło.

Njechaš so ty tež k nam wróćić,
 Bratřiko naš wutrobny? ::
 My će chcyli lubje česćić,
 Dokelž nam tak dobry sy.

Hdyž ty přińdžeš, wšitke džěći
 Lóštnje k tebi khwataja,
 Chcedža rad při tebi wostać,
 Jezu, lubosć najrjeńša. (1852.)



Kwětka po doli.

(Tydž. Now. 1852, 62.)

Wie schön ist diese Blume.

<p>Kak rjenje so tu směje Ta kwětka po doli, To pak, zo khwilku kěje, Česć jejnu pomjeńši.</p>	} } } }	<p>Blyšć jejny dyrbi ćeknyć Po khwiley nalěća! Mi zda so, zo chce rjeknyć, Zo kwětka sym tež ja.</p>
--	------------------	---

Ta pycha wša je časna,
 Kiž prózdnju rjanosć ma.
 O, zbóžna, wěčnje krasna
 Je rjanosć dušina. (1852.)



Wječorne slónco.

(Tydź. Now. 1852, 150.)

Goldne Abendsonne, wie bist du so schön.

W zlotym blyšču rjane
Slónco wječorne,
Budź mi powitane
Lubše, wjesole.

Nětk chceš nam so minyc
K morju za hory,
Z twojim swětłom zhinyć
Dale khwatajey.

„Božmje“ zaspěwaja
Zwony na cyrkwi.
„Přewodź Bóh“ ói praja
Na puć daloki.

Wšudže wšitke ruki
Modlo styknu so,
Kaž hdže zwonow zuki
Khwala Wjeřšneho.

Pruhi pozłócuja
Wěži wobličo,
Hišće doswětluja
Wjeřški horow so.

Nětk je zašlo! hlajće,
Nóc nas přikrywa,
„Nam pak njej'strach“, prajće,
„Naš Bóh njedrěma.“

Njeh tež slónčko hasny,
Tón, kiž w njeju je,
Naš wótc miły, krasny
Nihdy njezańdže.

(1852.)



Lětni spěw.

(Tydź. Now. 1852, 157.)

Tra ri ra! Der Sommer, der ist da!

Tra ri ra!
Hlaj, lěco nastawa!
Won do zahrody chcemy,
Spěw jemu přinjesemy —
Haj haj haj!
Štóž móže, zaspěwaj!

Tra ri ra!
Hlaj, lěco nastawa!
Won chcemy hić do haja
A wołać je do kraja —
Haj haj haj!
Štóž móže, zawołaj!

Tra ri ra!
 Hlaj, lěco nastawa!
 To lěco knjejstwo dosta
 A zyma přehračk wosta —
 Haj haj haj!
 Kak zyboli so kraj! (1852.)

✻
Róžička na holi.

(Tydź. Now. 1852, 182.)

Sah ein Knab' ein Röslein stehn.

Widzil hólčik róžičku,
 Róžičku na holi,
 Młodušku a lóštniwu,
 Blizko měc wón žada ju
 Z radosú na čoli.

Róža, róža čerwjena,
 Róžička na holi.

„Šćipać chcu“, wón praješe,
 „Róžičku na holi“,
 Róža džeše: „Kaľnu će,
 Žel ći budže na wěčnje,
 Kaž to mje tež boli.“

Róža, róža čerwjena,
 Róžička na holi.

Tórny pachol wotłama
 Róžičku na holi,
 Róža kló, so wobara —
 Podarmo khłopc zapłaka,
 Jeho tež to boli.

Róža, róža čerwjena,
 Róžička na holi. (1852.)

✻
Zahrodka.

(Tydź. Now. 1852, 183.)

Kommt, Schwestern und Brüder, in's Gärtchen.

Won, sotry a bratřa, won na zahrodu,
 Tam zakćeľe z nowa te róžički su.

My chcemy je šćipać a do włosow plesó
 A wonješko z lóštom na wutrobje njesć.

My ryjemy, symješko wusyjemy,
Zo zrosće nam radosć a wjesele smy.

A potom do šule so wróćimy zas'
A spěwajo khwalimy zbožowny čas. (1852.)



Spokojnosć.

(Zahrodka kwětkojta II., 52.)

Freund, ich bin zufrieden.

Spokojnosć ja dycham,
Njeh dže, kaž Bóh chce!
Mam pod měrnej třěchu
Bydło zwjeselne.
Něchtóžkuli blazyn
Nima nihdy dosć,
Mje pak wobohaća
Złota spokojnosć.

Njeswěći rjad swěcow
Mi za wječerju,
Njeblyšći so wino
W złotym sudobju:
To mój trěb so přeco
Tola namaka
A mi słodzi kreńčka
Z prócu dobyta.

Njeh tež moje mjeno
Wšón swět njeznaje,
Njepyša mi drastu
Hwězdy kralowske:
Tu česć njedam z rukow,
Zo sym serbowska
Wužitna a sprawna
Duša nadobna.

Njeh tež horde hrody
Kryw mi zapojdža:
Wšak tež khěžku nizku
Słónčko wobswěća.
Hdžež ma radosć bydło,
Tam so derje spi,
Hač na židže, mošku
Abo na słomi.

Mój row pyramida
Něhdy njećišći,
Mój kašć njeb'dže debić
Sceptar maršalski,
Ale róže měra
Budža na mni rosć,
Dwaj, tři swěrnj splaknu
Pře mnje, to je dosć!

(1853.)



Hońtwański spěw.

(Zahrodka kwětkojta II., 51.)

Mit dem Pfeil, dem Bogen.

<p>Ze šipom a z prokom Přez doł, přez horu Z přenim swětłom rańšim Hajúk je na puću. La, la, la, la, la atd.</p>	<p>Kaž pod njebjom módrym Kanja kraluje: Tak po skalach, žlobach Z knjezom třěleř je. La, la, la atd.</p>
--	---

Jeho je swět cyły,
 Hdžež šip doleći,
 Wšo je dobytk jeho,
 Lětak, běhaki.
 La, la, la atd. (1853.)

Puć k spokojnosći.

Gut sein lasst uns Alt und Jung.

(Zahrodka kwětkojta I., 55.)

Stari, młodži pěkni być,
 Polěpšeć so chcemy;
 Služmy Bohu, Knjezu,
 Hač nas k rowej wjezu.
 Pras do ruki, zo kóždy chce
 Być dobre džěćo poslušne:
 Dha nam so derje dže
 A wjesele nam kće.

Zdalujmy so zawisće,
 Swojej' wole złowow,
 To wšu radosć zmući
 Na žiwjeńskej pući.
 Pras do ruki, zo kóždy atd.

Lubujmy a posl'chajmy
 Wučerjow a staršich:

To jich žohnowanje
Mamy kóžde ranje.
Pras do ruki atd.

Přečelstwu tež wutrobu
Našu młodu swjećmy;
Mało nuza wadži,
Hdžež je přečel k radži.
Pras do ruki atd.

Wotsudžene ćežke dny
Njeskhumurjeni znjesmy;
Křiža česne tuhi
To su Bože pruhi.
Pras do ruki atd.

A hdžež džemy, přińdžemy,
Wjele róžow kéěje,
Njewinosće radosć
Da nam dosć a na dosć.
Pras do ruki, zo kóždy chce
Być dobre džěćo poslušne:
To nam so derje dže
A wjesele nam kće.

(1853.)



Pohrjebny spěw.

(Zahrodka kwětkojta I., 62.)

Du frommer und getreuer Knecht.

Ty sprawny, swěrnny wotročko!
Tak wołaše Bóh twój,
Sy derje džělał, dzeržał so,
Duž k měrej nětko pój;
Ty swěrnny na małym tu bě,
Na wjele staju će,

Zo žnjał twój duch by wjesele,
Hdyž twój dzeń zašoł je.

Pój k twojoh' Knjeza krasnosći,
Hdžež zbóžne myto maš,
Kiž njekće wjac' we nadźiji,
Ně, nětk je wužiwaš;
Po sprócnym džěle wokřew so!
Nas woła wšěch twój Wótc
Za tobu zažo, pozdžišo —
Spi derje, dobra nóc!

(1853.)



Zymske wjesela.

(Serbske Now. 1854, 5.)

Hólcy: So zyma k nam je dała
We bělej drasćičcy
A róže nam je wzała,
Sněh kryje zahrody.

Hólcy: Nětk hić po sanki chcemy
A je-li prosyće:
Was pěknje přewjezemy,
Hdžež ćěr najrjeńša je.

Hólcy: Lód rěku twjerdže kryje,
Njej' widžeć rybičku,
Sněh w polach němymch wěje
A rězne wětry du.

Hólcy: Loft čerstwy nam so hodźi
A čeknyć wuzkej jstwi —
A smykać so na lodźi:
To nam je po mysli.

Wšitke: Tež bórzy přikhadžeja
K nam hody wjesela,

Hdžež džěcom zabljšćeja
Te štomy swěckate.

A knihi, lube hrajki,
Psyk, wowcki na polu
A pupy, rjane majki,
Nam wobradžene su.

Duž sy nam zyma prawa
A witaj sněhojta,
Sy róže tež nam wzała:
Nam kćěja wjesela.

(Januar 1854.)



Wótčinska lubosć.

(Serbske Now. 1854, 93.)

Ich hab' mich ergeben.

Ja z wutrobu, z ruku
Sym podał so ći,
O krajo lubši, sławny,
Mój krajo serbowski.

Mi wutroba sapa,
Tak dobra ći je,
Ty krajo wěry, swěrnny,
Hdžež serbska lubosć kće.

Chcu pobožnje dźeržeć
Na prawdu a česć
A Serbstwu swěrnny wostać
A w wutrobje jo njesć.

Bóh luby cheył krućić
Tu młodu mi krej,
Zo žołmi strowa, čila
We mocy ryćeřskej.

Bóh sylnu mi ruku
A wutrobu daj,
Nětk žiwy być a wumrjeć
Za swjaty wótceny kraj!



Jěcharjow spěw.

(Serbske Now. 1854, 36.)

Morgenrot, Morgenrot.

::: Zerja wy :::
Swěćiće mi do bitwy.

Bórzy budže truba trubić,
Potom žiwjenje mam zhubić,
Ja a wjele towaršow.

∴ Njeskoro ∴
Radosć a lóšt minje so,
Wčera 'šće na hordym konju,
Džensa smjereć přez kulku zhonju,
Jutře w khlódnym rowje spju.

∴ Nahle wšak ∴
Mócnny, rjany panje znak:
Njehordž so na róžowate
Twoje ličko zybolate,
Ach! te róže zwjadnu wšě.

∴ A što je ∴
Wšitkich mužow wjesele?
Pod starosću a bjez spanja
Bědža zahe so wot ranja,
Hač je dzeń so pominył.

∴ Tehodla ∴
Kaž Bóh zechce, chcu tež ja.
Wojować chcu khrobly, sylny,
Panu, — Bóh mi budže smilny,
Wumru z česću ryćerskej!



Zyma.

(Serbske Now. 1854, 29.)

Der Winter ist ein rechter Mann.

Njeje' zyma kruta mužica,
Suk-twjerda a na traće!
Na jěre, slódke njehlada,
Je tyranka na zdaće.

So wonka košlu wobleka,
Zhrěc prjedy ju sej njeda,
Ból w zubach wona za směch ma
A w črjewach drjenje předa.

Zańc nima ptačkow spěwanje,
Kčěc róže njerad' widži,
Spěw miły, ćopłe napiće
A ćopłe drasty hidži.

Hdyž pak nam liška zašćowka,
Hdyž drjeho w khachlach praska,
A knjez a wotročk huhota
A zyma ludži třaska,

Hdyž z mjerznjenjom wšo kwěka so,
Hdyž hat a rěka rjapa:
To je jej rjane spěwańčko,
Dha ze směchom so čapa.

Kónc zemje lodžany hród ma,
K pońocy k morju leži —
Kraj serbski pak tež wopyta
Na swojej lětnej rejži.

Duž pokaže so tam a jow,
My pak jej knježić damy
A kukamy jej do wočow
A zmjerzli dyrkotamy!

— * —

Božemje wótcnemu domej.

(Serbske Now. 1855, 86.)

Quelle meiner Jugendfreuden.

Wótcny domo, žórło jasne,
Młodostneho wjesela,
Budź tu božmje, bydło krasne,
∴ Wopušćić će dyrbju ja. ∴

Božmje rjane brjóžki, hona,
 Hdžež bě zbožowny mój swět,
 Hdžež měd džěćaceho sona
 :: Woptach wjele krasnych lět. ::

Tu bě radosć porjeńšila
 Nalěće mi žiwjenja —
 Nětko wyšša móc mi kiwa,
 :: Wot tudy mje wobroća. ::

Božmje lubši, lubo měći,
 Zbože krónuj waše dny,
 Hač tón krasny dzeń so swěći,
 :: Hdžež so zaso widźimy! :: (8./2. 1855.)



Wotzynk w lěsu.

Wie herrlich ist's im Grünen.

So trawnik pyšny krasni,
 Edyž nalěće so jasni,
 Kž w polu, tak na holi
 Nan z wjeselom je k woli.
 Won, won do lěsa zelenoh',
 Tan wotzynk hiba so.

Nic v stuchłej stwi ma krasnosć,
 A babna kwětka jasnosć,
 Duž rdšo wonka w haju
 Měc cícemy lóšt a hraju.
 Won, won do lěsa atd.

To wjesěmy so česnje
 Kaž pěkn džěći lesnje,
 Kaž wěnc nas dušnje pyši
 A lěs naš sěw rad' słyši.
 Won, won do lěsa atd.

Kaž ptački radosć maja
 A w lěsu zaspěwaja:
 Tak chcemy skakać, spěwać,
 Hač budže so lěs džiwać.
 Won, won do lěsa atd.

(9./2. 1855.)



Pućowarjowy trošt.

(Serbske Now. 1855, 133.)

Mag auch die Liebe weinen.

Njeh lubosć sylzu syje, Přińć ma dzeń Knjezowy A zernička ze ćmy, Hdžež wjesele so žněje.	}	Njeh wěrje słabnu mocy Dzeń swětła přikhadža — A dompuć rozswětla — Dzeń switać dyrbi z nocy.
--	---	--

Njeh nadžiju strach prudži,
 Smjerć, row njeh zawyska:
 Dzeń jedyn zaswita,
 Kiž drěmacych próch zbudži!

(12./2. 1855.)



Luby wóteny kraj.

(Serbske Now. 1855, 139.)

Treue Liebe bis zum Grabe.

Swěrnju lubosć hač do rowa
 Z ruku, ze rtom přisaham
 Tebi, wóteny krajo, z nowa
 Za wšo, štož přez tebje nam:
 Nic ze słowom, nic ze spwom
 Chcu swój dźak ći wotrnać,
 Z mojej krwju a z mojím dźěłom
 Chcu we nuzy k tebi sać.

Wěrnje, swěrnje wšitćim praju,
 Njepřećelej, přećelej

Zo zwjazk wěčny wježe naju,
 Njech zle abo derje stej';
 Swěrnju lubosć hač do rowa
 Z ruku, ze rtom přisaham
 Tebi, wóteny krajo, z nowa
 A so tebi k službje dam.

(16./2. 1855.)

— * —
Nazyma.

Näher rückt die trübe Zeit.

Blize stupa mutny čas
 A ze strachom widžu:
 Lětnja krasnosć dze wot nas,
 Młodosće kćew mrěje;
 Holow, polow najrjeńša
 Pycha hinje, wotkhaźa —
 :: Dželenje to rudži! ::

Ćiše hłojčku pokhila
 Kwětka 'žno na honach,
 Rěznym wětram twochuja
 Mile dychi lěčne;
 Ptačik z horow skałojtych,
 Mjetel z łukow zelenych
 :: Dyrbi wot nas čahnyć. ::

Lisće pada do procha,
 Wětřiki z nim hraja,
 Na puć lipa zelena
 Swoju pychu sćeje.
 Kaž kłok leća mróčeje,
 Howrja zymske šumjenje,
 :: Kryja lube hwěžki. ::

„Jutře dyrbju wot tudy“,
 Spěwa zyba w haju,

Róža hinje spadajcy,
 Dyrbi božmje prajić;
 Ach, to boli wutrobu,
 Hdyž so dyrbja džělic tu,
 ;: Kiž so lubo maja. ;: (29./11. 1855.)

—*—
Wječorny kěrluš.

Wie kōnnt' ich ruhig schlafen.

Kak móhl ja z měrom drěmać w nócnej ćmi
 A tebje, Wótče, zabyć we wutrobi?
 Mje rozpróšuja hary te wodniše,
 Při tebi, tebi pokoj a zbóžnosć je.

O přikryj moju słabosć ze sćěrpnosću,
 Wšak Božo sy ty lubosć, maš hnadu wšu;
 Wo wutrobu će prošu, daj čistu mi,
 Zo w wjeselu a horju rad' słužu ći.

Tež pomhaj, zo rad' wodam, kaž wodaš ty,
 Zo bližšemu sym dobry, kaž ty mi sy:
 To wusnu bjez starosće we pokoju
 A tež we sonje słódkim će wopomnju. (30./11. 1855.)

—*—
Khrystus, zahrodnik.

Ein Gärtner geht im Garten.

Wě zahrodže Knjez khodži,
 Hdžež tysac róžow kće,
 Je hladać, kaž so hodži,
 Wón jenož lubuje.
 Dešć miły jenym dawa
 A druhim slónca dosć;
 To próca rěka prawa,
 Duž dyrbja kěćć a rosć.

We mysli lubosćiwej
 Wšě lóštnje zakčěja
 A cheyle z pychu žiwej
 Rad wobplesć płodźerja;
 Wón kładže, hdyž dže k kóncej,
 Sej wšě na wutrobu,
 Je njese k rjeńšom' slóncej,
 Hdžež zbóžni fromni su.

Do paradiza rjenje
 W raj Boži nosy je,
 Kiž, jako naš swět, ženje
 Do procha njespanje;
 Tu knježi wuhasnjenje,
 Tu zorno zezhnić ma,
 Tam plaći róst a kćenje,
 Kiž wěcnje wostawa.

Ty zahrodniko miły,
 Daj zlóštnu pobožnosć,
 Zo kóždy žiwy, čily
 Móhł k njebju kěćć a rosć.
 Daj zrostlinam jich włohu,
 Zo krasnje steja tu,
 Spožč słabym móc na dróhu
 K tom' wěčnom' nalěću. (3./12. 1855.)

— * —
Khwalba Boža.

(Jordan. čitanka, str. 5.)

Lobt froh den Herrn, ihr jugendlichen Chöre.

Rad Boha khwal,
 Khwal jeho, młoda syła!
 Wón pos'cha rad,
 Hdžež so česć jeho spěwa,
 Česć jemu daj!

Njeh kěrluš naš
 Hač k jeho stołej klinči!
 A wšitkich hlós
 Njeh jeho khwalbu zynči!
 Česć jemu daj!

Česć, khwalbu, džak
 Rot z wutrobu daj jemu,
 Před jeho trón
 Naš kěrluš dostup k njemu,
 Česć jemu daj! (4./12. 1855.)



Tři najrjeńše kwětki žiwjenja.

(Zahrodka kwětkojta I., 63.)

Was ist das Göttlichste auf dieser Welt?

Što swjatosć ma najwjetšu na swěći?
 Što w smjertnym přebytku je žórlo měra?
 Što k jandželam nas tu 'žno towařiši?
 To ducha šac najkrasniši — je wěra.

Přez čo smy bójscy, z njbjes rodźeni?
 Što bójscy slódke zmili zeńsku hrubosć?
 Što přichod róžowy nam zaruči?
 To zbóžne hnuće wutrowow — je lubosć.

Što horjo z troštom mile polóža?
 Što pomha róže sćerpliwosće sadžeć?
 Što njejbo nam tu hižo wotewrja?
 To manna njbjeske to je: so nadžeć. (1855.)



Lětne časy.

(Zahrodka kwětkojta I., 60.)

Wie schön ist der Wechsel der Zeiten.

Khód lěta, o přeceljo hlajće,
 Kak luboznje přeměnja so,
 Duž slóžić tym daram sej dajće,
 ∴ Kiž wusypje na kóždeho. ∴

Ze žiwjenjom nalěčo wita
Kraj z rjanosću ponowjeny,
So zelenja štomy a žita,
∴ Wšo rosće a mile su dny. ∴

Z dnjom horejšim w lěcu plód zrawi,
Kiž nalěčo porodžilo,
Z nim po prócy wulcy a maši
∴ Po horcoće wokřewja so. ∴

Čas třeći najkrasniše skići,
Tak prawje chce žohnować nas,
Nas přeprosny k winowej kići
∴ A bohaty hotuje kwas. ∴

A zamknje tež zyma nam hona
A tróši swój moškojty sněh:
Što wadza jej' wichorne hrona?
∴ Lód, sanku nas zwjeselić wě. ∴

Duž, přečeljo, khwalće khód lěta,
To luboznje přeměnja so,
Je pycha a wjesele swěta
∴ A dobrota za kóžděho! ∴ (1855.)



Pohrjebny spěw.

(Zahrodka kwětkojta II, 44.)

Wie sie so sanft ruh'n alle die Seligen.

Kak w éichim měrje wšitcy éi zbóžni spja,
Na kotrychž bydło wjedze nětk duch mje mój.
Kak éichi pokoj maja w rowach
K přetlaču hłuboko ponurjeni.

Plač njej' tu wjacy, skóřžba tu womjelknje,
Tu njezdychuja k bokej tych wjeselych,

W cypresow khłódku słódku drěmk spja,
Čakajo, hač jich tón jandžel zbudži.

O njesmjertnosće słódka ty nadzija,
Ty wšitkich wodžiš do rowa k pokoju
Puć zahi, pózdni z teho procha
K žiwjenju zbóžnemu w Božim raju.

Tam sylzow wjacu njeronja ćěrpjerjo,
Jich přerži radosć, njebjeske wjesele,
Přez dušu žołmja rěki Bože
Zbóžnosće njebjeskej', wšitkim datej'.

My drje tu hišće z lubosću w wutrobach,
Ze sylzu w wóčku zdychnjemy hnute: „Ach!
Kak ćí spja ćíše!“ ale snano
Bórzy row wšitkich nas wobkhłódkuje! (1855.)



Lěsoróžk.

(Pjekarjowe šulske spěwy II., 41.)

Wie lieblich schallt durch Busch und Wald.

Ƙak wjeselo přez holu, kraj
Zynk lěsoróžka rži,
A dolina zuk roznoša
Tak do dala, dala, dala, dala!

A zeleňši so kóždy mi
Zda w rumnym lěsu štom,
A žórleško tam jasnišo
Spěch dze přez kraj, přez kraj.

Duž womłódzi lóšt w wutrobi
Z tym hłosom dwojitym;
So pominje, štož boli mje,
Kaž młha přeč dze, přeč dze. (1855.)



Bědzerjo za wóteny kraj.

Hinaus in die Ferne.

Won trarira klinča

Nam róžki do pola,

Duž čehúmy won lóštnje,

Njeh kóždy zaspěwa;

Duch wjesela swět sylnje přečehnje,

Móc jeho tež nas krući a žohnuje.

Smy wutroba jena,

Kaž bratřa prawi su,

Njeh kčěje měr złoty,

Njeh smjertne strachi du;

Nas jedyn duch we čistej lubosći

Za česé a prawo čěri a rozsylni.

Bróni ryčeńska česna

Je naše wjesele,

Z tej slubjeni džemy

Na dobre bědženje

Za wóteny kraj a trón a swobodu

A k dobrom' džělu mamy lóšt, wutrobu.

Před smjerću, před strachom

So boječ hańba je,

Bóh přikrywa dobrych

A jandžel z nimi dže;

A komuž Bóh smjerec w cuzbje wotsudzi,

Je tež tam w wótenym kraju a zbóžnje spi!

✱

(2./9. 1856.)

Płódny štomik.

(Tydž. Now. 1852, 199.)

Ein Bäumchen trug schon jung.

Njesl štomik je žno młoduški

Płód bohaty a najlěpši,

Duž zahrodnik ma wjesele

A štomik česé a khwalenje.

Tom' štomej zahe runaj so
 Na pěknosćach, ty džěcatko,
 To zwjes'li staršich wutrobu
 A pomha k zbožu wěstemu.



Bože wjedženje.

(Serbske Now. 1857, 13.)

(Za Njeswačilsku njedźelsku šulu.)

Po francowskim: Le dieu guide.

Štó w strachosćach dawa móce swoju
 Słabemu mi?

Štó powjedže mlodosć tu moju

K zbožomnosći?

Štó žiwjenje zbóžnje mi zloží.

Měr mi da swój?

To přećel mój hnadny tón Boži

Zbóžnik je mój!

Wón, runjež sym džěćo ja snadne,

Česći wšak mje

A k próstwam mi wucho přec' hnadne

Nakhiluje;

Wón sylzy kaž wjesela tudy

Wobhlada wšě,

Wón wšudže mi tyšnosćow krjudy

Wotewzac wě.

O zbóžniko dobry, kiž wołaš

Z lubosću mje,

Pój wutrobu wodzić, zo khowaš

Při sebi mje;

Přińdź pomoc ty słódka mi k wučbje,

Zdžerž mje před złym,

Pod twójimaj rukomaj zrudźbje

Skhowany sym.

Hdyž wuzwoli zemju ty sebi,
 Žohnować nas;
 Kaž k nanej přińdź móžachu k tebi
 Wšitcy tón čas,
 Haj, džěćatka słabe a wbohe
 Horjebrał sy,
 Je česćil přez dobroty drohe,
 Kralo móteny.

Hač k nam so ty přecelo nižiš,
 Dobry nam sy,
 A z njobjeskim hłosom so bližiš
 Přiwołajcy:
 „Pój, zwukliwe džěćo, přińdź ke mni,
 Tebje měć chcu.“
 To słowo móc Boža je we mni,
 K tebi ja du!

(4./12. 1856.)



Božemje zymje.

(Serbske Now. 1857, 109.)

Winter, ade! Scheiden thut weh!

Zyma, adej!

Woteńć lóšt njej';

Ale twój wotkhód mi

Dawa lóšt wutrobi.

Zyma, adej!

Woteńć lóšt njej'.

Zyma, adej!

Woteńć lóšt njej'.

Rady će zabudu.

Dži jenož na stronu!

Zyma, adej!

Woteńć lóšt njej'.

Zyma, adej!

Woteńć lóšt njej'.

Njechaš hić na měsći,

Směje so kokla ći.

Zyma, adej!

Woteńć lóšt njej'.



(1857.)

Žiwjenja wjesołosć.

(Zahrodka kwětkojta I., 57.)

Schnell fliehen uns die Stunden.

So lećo časy minu
 A młodosć wjesoła,
 Najrjeńše wěncy zhinu
 A róža wotpada;
 Najwjeselšeho spěwa
 Zynk bórzy wuklinči,
 Wšo zwjadnje, štož tu kěwa,
 Štož bě, so njewróci.

Duž z wjes'lom powitajmy
 Kěw swojoh' nalěca
 A z lóštom wužiwajmy
 Dzeń jasny žiwjenja,
 Bóh na njebju sam rady
 Nam radosć popřeje
 A khwalbje swojej' hnady
 Rad wucho wotamknje.

Ćekń starosć ,čwilowanje
 A njeskaž naše dny;
 O młodosć, jasne ranje,
 Kak rjenje swěćiš ty!
 A hasnu twoje pruhi
 Hdy z ćežu žiwjenja,
 To radosć a měr druhi
 Njeh mi so přibliža!

(Aug. 1857.)

— * —
Nalěće.

(Serbske Now. 1857, 148.)

Schön ist das Feld zur Frühlingszeit.

Blajće, njebjo, kak jasne!
 Lisća, róžički krasne

Pyša hona a štom.
 Wětrik séele wón slódku,
 Hnězdo w hařzach a w khłódku
 Twarja ptačata z hwizdanjom.

Pčoła leći won bórčo,
 Žórlo w přerowje šwórčo
 Čeri po kamuškach.
 Šeračk fifoli w ploći,
 W zerjach wječornych zloći
 Štom so w wonjatyh kéničkach.

Sorna skače po holi,
 Jehnjo w zelenym doli,
 Z lóštom rejwa wšo tu;
 Ptački hraja na štomach,
 Ryby w hatach a žołmach,
 Muški, kuntwory na slónčku. (1857.)



Jozefowa skóržba w Egiptowskej.

(Zahrodka kwětkojta II., 51.)

Ich war ein Jüngling noch an Jahren.

Hišće młodźenc po starosći
 Lědma štyrnaće běch lět,
 Bjez stracha we dowěrnosći
 Pytach svojich bratrow slěd.
 Sichem da nam pastwu rjanu,
 Našej swójbje słušeše,
 Křiwdu nječinjach ja žanu,
 Běch kaž jehnjo bojazne.

Hdžež tři palmy same steja,
 K Bohu klečo modlach so,
 Tu swój njeskutk spočinaja
 Njebratrowscy bratrojo.

Pódlu běše zymna jama,
Do teje mje tyknychu,
Ach, mje zyma třase, lama,
Spomnju, kak bě trašnje tu.

Naposledk mje wučahnychu,
(Smjerec bě ke mni na puću)
Pjenjez lačni dobytk cheychu,
Cuzy kupcy běchu tu;
Tym mje přepodachu radzi,
Złoto džěla hrabajo,
Ach, to hrěšne myto snadzi
Bě smjerec nana lubeho!

(1858.)



Urianowe pućowanje po swěće.

(Pjekarjowe šulske spěwy I., 35.)

Wenn Jemand eine Reise thut.

Je pobył něchtó we cuzbi,
Wě słowčko poj'dać tebi;
Duž hrabnych kłobuk a swój kij,
A wzach prjódk rejžu sebi.

To njeje ničo hlúpe, ničo hlúpe, ničo hlúpe, čestny pan;
Rěč dale, rěč dale, knjez Urian.

K połnocy džěše najprjedy,
Tam, dušu, zyma kćěje!
Ně! pomyslich we mysličcy,
Naš kraj nas lěpje hrěje.
To njeje ničo hlúpe atd.

We Zelenskej bě wjesele,
Zo sym k nim kročel stupił,
Jich napoj, naš tuk na škórnje,
Ja njejsym krepki wupił.
To njeje ničo hlúpe atd.

Wot tam do Mexica so dach,
 Hdžež su te złote hory,
 Najšěrši mječ sej přihot'wach,
 Na popad žadny, spory.

To njeje ničo hłupe atd.

Ach ale, ale, ale, ach,
 Kak bład na ludžoch knježi!
 Ščerka, pěk tam jeno namakach;
 Mój mječ tam něhdže leži.

To njeje ničo hłupe atd.

Duž wužich zymnej' kuchiny,
 Dórtk tykanca sej kupich,
 A z póstom dale pućujcy
 Do Asiskeje stupich.

To njeje ničo hłupe atd.

Muž wulki, miły, mudry je
 Tam Mogul nimo měry,
 Zub jeho runje boleše,
 Duž da jón torhać jěry.

To njeje ničo hłupe atd.

Hm! myslach, kajke hubjenstwo
 Při wulkosci a sławi!
 Što pomha cyłe mogulstwo?
 To tež ei druhdže zrawi.

To njeje ničo hłupe atd.

We hosćencu so zaroćich,
 Zo bórzy plaćić budu,
 Z tym k Chinesam so nastajich
 A k Bengalskemu ludu.

To njeje ničo hłupe atd.

We Africy so rozhladach,
 Do Indiskej' so podach,

Sta měst a ludow wopytach
Na suchim a při wodach.
To njeje ničo hłupe atd.

Kaž pola nas lud wšudže bě,
A wšudže něšto klaca,
Měšk někajkeje blaznosće
Wšěm po khribjeće placa.

O to je něšto hłupe, něšto hłupe, něšto hłupe, čestny pan;
Mjelč dale, mjelč dale, knjez Urian. (Wokoło 1860.)



Trojjeničkemu Bohu.

(Pjekarjowe šulske spěwy II., 7.)

Danket dem Schöpfer! gross ist seine Liebe.

Česć, khwała Wótcej! džak za jeho lubosć!
Wótcowscy stara so za swoje džěći;
Wysoko khwalmy jeho mjeno w swěći;
Džak ći, Jehova!

Česć, khwała Synej! džak za jeho smilnosć;
Bratrowscy stara so za wšitkich ludži,
Slabemu pomhać jeho znamjo zbudži;
Džak ći, o Jezu!

Česć, hhwała Duchej! džak budź cyrkwje škitej!
Mile wón kedźbu ma na wumoženych;
Posl'chajmy jeho, wróemy zabłudženych;
Swjeć nas, o Swjaty! (Wokoło 1860.)



Jutrowny kěrluš.

(Pjekarjowe spěwy II., 13.)

Auferstanden, auferstanden ist der Herr.

Z rowa stanył — z rowa naš Knjez stanył je,
W jasnej drasće překrasnjenja
Žiwy so zas pokaže.

Wyše hwězdow krasny jasny trón nětk ma,
Skići přečelny nam dary,
Je tych swojich škit a mzda.

Njebójće so! — Přiwoła tón ryčeř nam,
Ja běch morwy, nětk sym žiwy,
Žiwjenje tež słuša wam.

O wy rowy, smjertnych džěći strachota,
Wašu ćemnosć přeswětluje
Dawař wěčnoh' žiwjenja.

Z rowa stanyć — stanyć haj tež budu ja,
Widžeć budu stanjeneho,
Kiž mój row tež wotewrja. (Měrc 1857.)



Na jutrowničku.

(Pjekarjowe šulske spěwy II., 15.)

Mein Heiland ist erstanden.

✱ Mój zbožnik tón je stanył,
Nóc rowa wopušćil;
Smjere, hdže su twoje puta,
Hdže, hela, twoja móc?

Mje njemóžeš wjac' trašić,
Ty tlaće rowowe;
Ty jeno kryć mje dyrbiš,
Hač mój Knjez woła mje.

Wón póndže na dnju snopow
Přez pola zemrjetych,
A swojich chce wón zbudzić
A dzeržeć swoje žně.

My z dowěru smy žiwi,
Wón sam smjereć přikaže!
Přez wěru k wohladanju,
Přez křiž so k swětlu dže.

(Wok. 1860.)



Zymy přikhad.

(Pjekarjowe šulske spěwy I., 17.)

A, a, a, der Winter der ist da.

✱ A, a, a,

K nam zyma přikhadža!

Lěće, nazymje je zašlo,
Běloh' sněha je nam našlo.

A, a, a,
K nam zyma přikhadža.

E, e, e,
Lód mjerznje, sanko dže!
Na woknach maš ha'zy, róže,
Kaž to kóždy widžeć móže.

E, e, e,
Lód mjerznje, sanko dže.

I, i, i,
Za khudych njehoji!
Njezabudž jim sobudžělić,
A so na jich nuzy smilić.

I, i, i,
Za khudych njehoji!

O, o, o,
Kak džěći wjes'la so!
Bože džěćo dary slubi,
Kěrluš k hodam tež so lubi.

O, o, o,
Kak džěći wjes'la so!

U, u, u,
Ja wěm, što činić chcu!
Bože džěćo z kěrlušemi
Chcu ja khwalić z jandželemi.

U, u, u,
Ja wěm, što činić chcu.

Y, y, y,
Wšě moje žiwe dny
Čiste swědomje chcu nosyć,
Swěrnje džělać, Boha prosyć.

Y, y, y,
Wšě moje žiwe dny.

(Wok, 1860.)



Boži dzeń.

(Pjekarjowe šulske spěwy II., 19.)

Liebe, reine Lieb' ist Gott.

Łubosć jasna naš Bóh je,
Šwět chce wumóc lubosć luta,
Lubosć łama hrěšne puta,
Runjež hela hněwna je.

Jandželjo měr spěwaja,
Boži měr wšěch dobrych křewi,
Hwězda dobyća so zjewi,
Z mutnych žołmow zeskhadza.

Džěčo, hlaj, syn Boži bu,
Njebjeski hósć w hródzi bydło
Ma za zloty hród a sydło,
Za trón leži w žlobiku.

Kajka miłosć krasni so
Z tutym džěsćom nětk nad nami,
Bratruje so lubje z nami,
Štóž ma ducha čisteho.

Ponižnosć nas wuswjeći,
Horda mysl wjedze k padu,
Džěćaca pak dawa hnadu,
Z Jezusom nas stowařši.

(Wok. 1860.)



Raňši kěrluš.


(Pjekarjowe šulske spěwy II., 26.)

Werde munter, mein Gemüthe.

Štań ze spanja, moja duša,
Zapomń křiž a rudženja,
Dowěrjenje Bohu słuša,
Wón budź twoja nadzija.

Njewidziš, zo z nocy ćěmnej'
 Złote ranje wukhadža?
 Njebě tež pod krytwu zymnej
 Něhdy krasnosć nalětnja?

Tak ze zrudźby skhadža ćmowej'
 Něhdy hwězda wjeselša,
 Překrasni će z mocu nowej,
 Zbóžny dzeń íi wobradža! (Wok. 1865.)



Přikhad nalěća.


(Pjekarjowe šulske spěwy II., 29.)

Der Lenz thut seinen Freudengruss.

Ĺěs, polo wita z wjeselom
 Knjez nalětnik,
 :: A z jasnym dnjom so směwa. ::

To zyma widzi z mjerzanjom,
 Ma božmje brać,
 :: So podarmo pak hněwa. ::

Jel' čaka z mydławjezenjom,
 To jutře snadź
 :: Swój wuhnanski spěw spěwa. :: (Wok. 1860.)



Lěsny wothłós w nalěću.

(Pjekarjowe šulske spěwy II., 32.)

Heut' ist's so wunderschön.

Ĺězens jasnosć nalětnja
 Doł, horu wupyša!
 Štó skomdźić džě chcył wjesele
 A tajke lube rjanosće?
 Lóšt je lěs zeleny,
 Hdžež hlós rži rěčniwy!

Wón kwětkow nalětnja
Loft mile překhadža.
Přez keřk a ćerní róžk hajniski
We wjes'łym doklinčenju rži.
Lóšt je lěs atd.

Hdžež wóčko pohladnje,
Wšo rjane, pyšne je;
Do ptačkow spěwa chorneho
Zynk našich hłosow měša so.
Lóšt je lěs atd.

Zynk spěwa, žołmuje,
Přez hory, doły dže,
Jón mile dychi roznjesu
Přez haj a holu zelenu.
Lóšt je lěs atd.

(Wok. 1860.)



Lěsne ptačatko.

(Pjekarjowe šulske spěwy II., 33.)

Ich geh' durch einen grasgrünen Wald.

Ja du přez zeleny, trawny lěs
A słyšu tam ptačata spěwać;
Te hwizdaju a zafifola
A kóždy huslički swoje ma,
Te słyšu ja lubjerad džělać.

O fifol jeno, knjez sołobik,
Štó pišćele twoje rad moli?
Štož žiwjenje ma w tej zelenej stwi,
To wucho nuternje nakhili,
Rad k twojemu kěrlušej zwoli.

Nětk měrić hory a doły mam,
Wot nazdala sołobik spěwa;

Duž derje mi je, puć njećeži mje,
 A runjež horje a dele dže,
 Wšak sołobik nazdala spěwa. (Wok. 1860.)



Nakrajne žiwjenje.

(Pjekarjowe šulske spěwy II., 34.)

Ihr Städter, sucht ihr Freude.

Chceš, město ćésne, radosć,
 To postup won na kraj;
 Wjes wšitku wobzelenja
 Tu swobodnosće raj;
 Tu bohačk njezatwarja
 Nic slónea, měsačka,
 A wječor wšudže widžeć
 Je kóžda hwězdzička.

Tu widžimy, kak mile
 Bóh ruku wotewri,
 Kak dešć a slónco holu
 A hona ponowi;
 Tu zahrody nam kějša
 A žita žołmuja,
 A w lěsku, hajku ptački
 Nam darmo hercuja.

Tež korjeni spěch, džěło
 Nam jědło snadniše,
 A mjerznjenje a horcosć
 Mysl dobra přewinje;
 Haj, chceće radosć widžeć,
 Wy lubi měšćenjo,
 To za ruku so přimńće
 Won na kraj pućujo. (Wok. 1860.)



Žnjeński spěw.

(Pjekarjowe šulske spěwy II., 37.)

Schön ist das Feld zur Frühlingszeit.

Hdyž nalěće přez hona dže,
 Wšo dycha z wjeselom,
 A młody trawnik kwětkuje,
 Sněhběly kćěje štom.

Klós zloty pak je rjeńši mi,
 Kiž wosrjedk porodža,
 Kiž dzakowny so pokhili
 A prócu zapłaća.

Hdyž dwacetore wróća so
 Po horje, po doli
 Na stwjelcu kóžde zornjatko,
 Njej' to čas wjeselši?

Duž wysoko wóz kopimy
 Z tym zlotym bohatstwom
 A snopařku tam sadžimy,
 Žnjeńc wyska za wozom.

Tak potom w dobrym pokoju
 Khlěb naš so z česću jě,
 Šwjerč mjez tym rad při wohnišću
 Nam hrónčko piskać wě.

Njewusměš, něžny dwórniski,
 Tu ruku mozlatu;
 Ta wjercha a kraj zežiwi,
 Pušć hordosć měšćansku.

Mječ, wojacy, waš njeblyšći,
 Kaž kosow błyskot naš,
 A žnjeński wěnc nas přewaži
 Wěnc lawrjencowy waš!

(1857.)



Čołmowanje.

(Pjekarjowe šulske spěwy II., 38.)

Dort winkt zum grünen Strande uns der Kahn.

Čołm k brjohej pokiwajo steji tam
 A wotwjazany hrajo jědže k nam;
 Nutř khroble zwažmy so
 A na čołmje, hladkej žołmje
 Jědźmy z wjes'lom wyskajo.

Nam radosé přihłosuje ptačina,
 Do płachtow wětr duje do přědka;
 Skok brjohi nimo du,
 A po stroni ješćo honi
 Žołma žołmu slěbornu.

Słyš! sołobika hłosy w haju tam,
 Je wothlós jasnje nosy, sćełe k nam;
 Tak naše spěwy rža,
 Lubje klinča, zaso brinča,
 Z horow k nam so wróćeja.

Přez mróčne měsačk kuka wot ranja
 Jón wobličo a ruka postrowja,
 Wón lubozny směwk ma,
 Hwěžki rjane, slěbornjane
 Módre pyša njebjesa.

Čołm domoj zawróćamy k swjatokej,
 A jězbu dokonjamy nětkolej;
 Džen pěknje skonjeć móc,
 To sej prajmy, zaspěwajmy:
 Wón daj wšitkim dobru nóc! (Wok. 1860.)



Pěsikhodzeř.

(Pjekarjowe šulske spěwy II., 39.)

Zu Fuss bin ich gar wohl bestellt, juchhe.

Pěši sym a dobry na nohi, juchhej!

Duž přeměrjam swět šěroki, juchhej!

Štóz čerstwje stupać komdži so,

Sej pytaj muža druheho;

P'la mje wón njetrjechi.

Juchhej! Juchhej! Juchhej!

Pěši hić jeno za krutych je, juchhej!

A słabušk bórzy wupřehnje, ow jej!

Pak wožidnje, pak wokhromi,

Pak spina jeho w khribjeći,

Duž posledni so drje.

Ow jej! Ow jej! Ow jej!

Pěši puć je za krej wjesołu, juchhej!

To bórzy mjerzy wobuzu, ow jej!

Hdyž wulku česć jom' njedadža

A so za „zwotkal“ prašeja,

To bórči přez měru.

Ow jej! Ow jej! Ow jej!

Pěši puć je za lud spěwaty, juchhej!

Ma z kwětkami puć posłany, juchhej!

Jom' kóždy kućik znaty je,

Hdžež w kraju žane wjes'le kće,

A tam je domjacy.

Juchhej! Juchhej! Juchhej!

(Wok. 1860.)

Wonješko k bjesadźinym zwjeselinam 7. febr. 1860.

(Serbske Now. 1860, 101.)

Ein Sträusschen am Hute, den Stab in der Hand.

Kij w rucy*¹ a wěnašk na kłobucy dže

Kraj wot kraja dróhař a njezastanje²,

Wón nawědža městow a někotru wjes,
Tam wostać pak nochce, je dale so njes'.

Z nim přecelne holčo da do rěče so:
„Budź rjenje nam witany pućowarjo!“
Do wóčka jom' kuka³ a ruku jom' da,
Wón hlada pak cuzby⁴ a dale so ma.

Pod horu drje krasny wón widži tam dom⁵,
Jón pyšachu kwětki a lubozny štom.
Tam lubi so jemu, tam chce so jom' zdać,
Wón nima pak měra, chce dale so dać.

Nětk dokonjał zeńske je pućowanje
A wyšše nětk dróhařstwo nastupuje,
Nětk steji při rowje a wohladnje so —
Jom' žiwjenja zbože bě⁶ rozplunyo.

Duž přeceljto serbscy a bjesadžinscy
Sej wažmy dom wóteny, hdžež žiwi tu smy,
A wjesela kwětku, kiž ducy nam kće,
Sej plećmy do wěncu, haj prjedy hač skhnje.

* 2. recens. z l. 1867 (př. S. N. 1867, str. 61): ¹ horšći, ² pokhwatuje, ³ hlada, ⁴ Wón čehnje pak w cuzbu,

⁵ Pod horu drje widži dom ze zahrodku,

A kwětki a štomy jón wupyšachu,

⁶ Do sonow bě zbože jom' . . .

(1860.)

Džělenje wot domu.

(Lužičan 1861, 150.)

Thränen hab' ich viele, viele vergossen.

Šylzow sym dosć ronił, wjele so rudził,
Zo přeč dyrbju wot tudy,
Tola mój wótc luby hinak je sudził,
Duž so džělu njetyšny.

Wóteny domo, z tebje du,
 Džens na přeco wučahnu,
 Duž adej, budź božemje,
 ∴ Duž adej, adej, adej, ∴
 Duž adej, budź božemje!

Bož'mje róže, kwětki lubše wy moje,
 W zahrodže, kiž hladach was,
 Njesměm dlěje wužić wjesele swoje,
 Přetož džělenja je čas;
 Płaćće ze mnu rjanuške,
 Prečku džens mój pućik dže,
 Duž adej, wam božemje atd.

Bož'mje kějate wy luki a pola,
 Hdžež wěnc wijach někotry;
 Bož'mje lěski, hajki, zelena hola,
 Hdžež běch nam'kał khłódnicy;
 Hórki, hona, džělošća,
 Wopuścić was dyrbju ja.
 Duž adej, wam božemje atd.

Bož'mje wołam zrudny z hory do doła
 Wam tež, moji najlubši,
 Waše lube znamjo wutroba khowa,
 Z teje njeprěndžeće mi;
 Sylza wóčko začmiwa,
 Čěžka je mi wutroba,
 Duž adej, duž božemje,
 ∴ Duž adej, adej, adej ∴
 Duž adej, duž božemje!

(Oktober 1861.)



Jědla.

(Serbske Now. 1861, 310.)

O Tannenbaum, o Tannenbaum.

⓪ jědleńka, o jědleńka,
Kak swěrnú nosyš pychu,
Ty w zymje, w lěće jenajku
Maš zelenatu hałozu.

O jědleńka, o jědleńka,
Kak swěrnú nosyš pychu!

O jědleńka, o jědleńka,
Sy moje spodobanje!
Kak husto štom twój zeleny
Mi běše radosć na hody.

O jědleńka, o jědleńka,
Sy moje spodobanje!

O jědleńka, o jědleńka,
Sy zdrasćena mi z wučbu,
Zo wobstajnosć a nadźija
Je trošt a móc čas žiwjenja.

O jědleńka, o jědleńka,
Sy zdrasćena mi z wučbu.

(1861.)



Božemje.

(Lužičan 1861, 129.)

So leb' denn wohl, du stilles Haus.

⓪ už bož'mje, domo ćichowny,
Won zrudni z tebje ćehnjemy;
Naš ćežki puć přeč z tebje dže,
Hdže wjedže nas, je njewěste.

Budź krajo rjeńši božemje,
Hdžež nam'kach wjes'la wysoke,
Ty hoješe mi z lubosću,
Će nihdy zabyć njemóžu.

Tež bož'mje cí, mój přečelo,
A hdyž je slónčko hasnyło,
Ja spomnju husto na tebjě,
Ty bě mi zbože najwyšše.

A njewidžu wjac' tutón kraj,
Mi twoju lubosć zakhowaj —
Ta stajnje wobohaća mje,
Mi hewak wšo, wšo jene je! (1861.)



Na meju.

(Lužičan 1865, 83.)

(Št. 1 a 4 w 1. 1865, 2 a 3 1872 pěsnjena.)

Komm, lieber Mai, und mache.

Pój, luba meja, džělać
Haj z nowa zeleny,
A fijałkam daj kěčwać
Mi drobnym při rěcy;
Kak rady chcył ja tola
Zas widžeć fijałku
A čerstwy won do pola
Hić sćežku zelenu.

So rjanosć woblekaju
Drje tež tu zymske dny,
Lód, sněh a sanki maju
Swój njeměr wjesoły.
Wot drjewkow khěže džělać,
Přasć, pisać, bajki bać,
Hrać hrajki, wječor spěwać,
To chce so małko zdać.

Ně, ptačkow zahwizdanje
A kwětki na brjóžku
A wonkach zejhrawanje
Mi lubše wěcy su. —
To nětk tam steji w kuće
Mój konik drjewjany,
Mi nohi wjaznu w blóće
Přez puć a zahrody.

Duž meja čin na swěći*
Kraj młódnny, ćopliši,
To žebrja wšitke džěći:
Ach smil so nađ nami!
O pój a prjódcy dele
Dosć přinjes róžičkow,
Tež sołobikow wjele
A rjanych kokulow!

(1865.)

* 1. recens. z 1. 1865: Pój, přeřrěj bórzy hona,
Zo wšitko zaso kće,
To džěćo, kiž nětk stona,
So z hłosom zraduje.



Mejowy spěw.

Alles neu macht der Mai.

Nowe wšo hiba so
 Z rjanej meju wocuó.
 Pójće dha do pola,
 Šćipaé wonješka;
 Slónčko miłe zaswěći,
 Polo, haj so zyboli,
 Ptačata spěwaja,
 Hač wšě lěsy rža.

Zeleny přeńdzemy
 Wosrědk a haj kějaty,
 Po zymje w lěsu je
 Pyšne žiwjenje;
 W khlódku žórło slěborne
 Wulkim, małym pluskoce,
 Zahľ'kojta mošina
 Mjehke sydło da.

Tam a tu, hdžež tež du,
 Wšudže džiwy widžeé su,
 Młódneje rjanosée
 Wšo so zraduje,
 A ta stwórba kějata
 Čěło z dušu wožiwja,
 Nowe wšo hiba so
 Z meju wocuó!

(1865.)



Pólny maršal.

(Lužičan 1865, 84.)

Was blasen die Trompeten? Husaren heraus!

Sto duja te trompety? huzarojo won!
 Tam pólny maršal jěcha ze šumjenjom won;
 Wón jěcha tak žiwy, — leé, koniko, leé —
 Wón zwija tak wótry swój blyšćaty mječ:
 Juchhaj rasasa! wětr Pruskich tu ma,
 Lud pruski je wjes'ly a woła: Hura!

O hlajće jom' do wóčka, kak zazybola,
 Sněhběle włosy, hlajće, kak zejhravaja!

Kaž wino čas lěpši, wón w starobje kće,
 Duž zdobnje tež hetman na bitwišću je;
 Juchhaj rasasa! wětr Pruskich tu ma,
 Lud pruski je wjes'ly a woła: Hura!

Tón kruty muž wón běše, hdyž ze wšěm bě wšo,
 Kiž hišće k njebju zběhny mječ zejhrawajo,
 Při železu z hněwom wón přisahaše:
 „Francowzow cheu wučić, kak po prusku dže.“
 Juchhaj rasasa atd.

Tu přisahu je dźeržał, hdyž wójna zaru,
 Do sedla běly młodženc so šwikny, bu tu,
 Wón běše, kiž wumjetł je wšudžom a wšo
 Ze železnym khošćom kraj wučisćil jo.
 Juchhaj rasasa atd.

Joh' Lützen, Katzbach znaje, što mištr bě tam,
 A Wartburg, Lipsk njech praji, što njepräčelam
 Je kabaty klepał a z kraja jich hnał
 A mjeno maršala sej wuwojował.
 Juchhaj rasasa atd.

Duž dujće, wy trompety: huzarojo won!
 Knjez pólny maršal jěchaj kaž wichory won.
 Francowzam do kraja ty dobywař leć,
 Přez žołmy mi rheinske jich z tesakom zmjeć!
 Juchhaj rasasa, wětr Pruskich tu ma,
 Lud pruski je wjes'ly a woła: Hura! (1865.)



Napominanje.

Der Mensch soll nicht stolz sein.

Tu čłowjek so njehordź,
 Zo bohatstwo ma,
 Móc wjeršna jo měri
 A, komuž chce, da;
 Jed'n dosta móc, pjenjez,
 Zo móže je wěc,
 Tón druhi so wo kroš
 Ma do smjerće drěc.

Tu čłowjek tež njeměń,
 Zo družu stepě su,
 Slěpc jedyn kaž druhi
 Smy před Bohom tu;
 Tam sławu a česće
 Jed'n wot swěta žnje,
 Tak zbóžnych bjez mjena
 Sto pod zemju dže.

Tu čłowjek pušć hidu,
 K tej khwila jow njej',
 Wón wodaj rad křiwdu
 Tež přećiwnikej;
 Kak wjele sej wójnu
 Tu připojdźichu:
 Nětka z měrom pod zemju
 A zjednani su.

Tu čłowjek tež njetwař
 Sej khěžu za džak,
 A z hnadnej' šklě njejěz,
 To dočaka bjak.
 Štóz wšitko přeč zdawał
 Sej z dobroty je,
 Tón hlódny pod zemju
 Ze sylzami dže.

Tu čłowjek moř zawisé,
 Wša krasnosć je són,
 Swój pokoj a horjo
 Ma ławka, ma trón.

. (28./8. 1867.)

Spěwarjowe pokleće.

(Serbske Now. 1867, 181.)

Es stand in alten Zeiten ein Schloss, so hoch und hehr.

Kród w zastarsku tak wulki a twjerdy steješe,
 Přez krajiny hač k morju so módom' swěćeše;
 Wot zahrodow wěnc pódlu tam běše w krasnosći,
 W nim zybola so žórła w najrjeńšej jasnosći.

Tam knježeše kral mócnu, na krajach bohaty,
Na swojim trónje sedžo tak blědy, zaćmity;
Štož mysli, to su strachi, štož hlada, zlobjenje,
Štož řeči, to su krjudy, štož piše, morjenje.

Raz k jeho hrodej džetaj dwaj sławnaj spěwarjej,
Bě młodženc jedyn, druhi pak z hłowu šědžiwej;
Tón stary z harfu sedži na pyšnym koniku,
Tón młody towarš spěšnje jom' kroči po boku.

Duž stary džeše k młodom': „Nětk, syno, hotuj so;
Spomń na najhlubše spěwy, je znoš najpołnišo!
Wzmi hromadu wšě mocy, tu radosć, zrudobu:
Džens plaći namaj zbudzić zloh' krala wutrobu.“

Žno do stolpowoh' twara staj zašoj spěwarjej,
Hdžež kral a jeho knjeni na trónje sedžitej;
Kral k postróženju krasny, kaž krwawna swětlina,
Kaž měsac poľny směwa so mile kralowa.

Duž do trunow tón stary nětk přima na dobo,
Zo mócnje k wucham klinči to přeco bohatšo;
So wuliwa kaž slěbro hlós ze rta młodeho,
Spěw stareho kaž hoľy spěw duchow do teho.

Spěw jeju lubosć khwali a zbóžny, zloty čas,
A swobodnosć a mužskosć a swěrnosć swjatu zas',
Wšo słódke, při čimž zarži we wjes'lu wutroba,
Haj, khwalitaj wšo wyšše, štož dušu pozběha.

Duž zabudu směch wšitecy we črjódže dwórnicy,
So pokorja před Bohom tež krala wojacy;
A kralowa tak hnuta we wjes'lu, zrudobje,
Ta ćisny jimaj róžu, kiž ma na wutrobje.

„Mój lud staj zawjedłoj mi, tež moju mandželsku?“
Kral woła njemdrje, zo jom' wšě stawy zaržuju,

Mječ ćisnje, kotryž předrě wutrobu młodźenca,
Z njej' město zlotych spěwow so krej won wuliwa.

Ta črjóda rozpróšena bu, kaž by wětr ju wzał;
We rucy swojoh' mištra je młodźenc wudychał.
Tón z plašćom jeho wodžě a sadzi na konja,
Joh' runje horje zwjaza a z hrodu wukroča.

Při wrotach pak, při wulkich, tam šedziwc zastanu,
A harfu swoju zhrabny, wšěch harfow kralowu,
Hlej, wo stołp marmorowy tam wón ju rozrazy
A woła, zo rži mócnje přez hród a zahrody:

„Wam běda, horde twary! Nic spěw, nic truna zas'
Přez waše rupy njeklinč a njewjeselej was;
Ně, njewólnikow khody, plač, skóržbne stonanja,
Hač roztepce was k procej duch zleho wjećenja.

Wam běda, w mejskim swětle zahrody wonjate!
Wam pokažu tu morwoh' wobličo zblědnjene,
Zo nad tym byšće zwjadle, wam žórła wuskhnyłe,
Zo byšće zeskaliłe a puste ležałe.

Ći běda, krwawny mužo, ty spěwa pokleće!
Njeh podarmo wša próca za krwawnej sławu je;
So zabudź twoje mjeno, budź do ćmy nurjene,
Kaž zemrěwacy wodych do wětra dychnjene!“ —

Štož šedziwc je tam wołał, je njebjo słyšałe;
Při zemi leža murje a twary spadane.
Stołp jedyn hišće steji, swědk pychi stareje;
Tež tón, žno rozpuknjeny, snadź přez nóc dopadnje.

Hdžež zahrody su kćěle — hlej, pusta hola je.
Khłódk žadyn, žórlo nihdže přez pěsk so njepředrje,
Spěw žadyn krala mjeno a kniha njeznaje:
Je zabyte a zašlo, štož spěwar poklał je. (1867.)



Moja lubosć.

(Serbske Now. 1867, 227.)

Wie könnt' ich dein vergessen!

Kak móhl ja tebje zabyć!

Wěm, što mam we tebi,

Hač runje swět najlubše,

Najlěpše zapomni.

Ja wótrě wołam, zaspěwam:

Za njewjestu kraj wóteny mam!

Kak móhl ja tebje zabyć!

Wěm, što mam we tebi.

Kak móhl ja tebje zabyć!

Će nošu w wutrobje,

Sym z tobu zjednoćeny

We wjes'lu, zrudobje.

Chcu za tebje we wójnje stać

A z tobu zahubić so dać.

Kak móhl ja tebje zabyć!

Će nošu w wutrobje.

Kak móhl ja tebje zabyć!

Ja wěm, što ty mi sy,

Zo lubosće mi pokład

Wostanješ njewzaty.

Ja ničo, khiba tebje sam

A twoju lubosć njepytam;

Kak móhl ja tebje zabyć!

Ja wěm, što ty mi sy.



Serbska Hanka.

(Serbske Now. 1867, 227.)

Ännchen von Tharau ist, die mir gefällt.

Hanka ta serbska so lubješe mi,

Žiwjenje moje a wodych we mni;

Wutrobu Hanka mi přikhili zas',
Radosé a sylzy žnjeć ze mnu tón čas;
Hanka, ty króna, swět dóznał će njej',
Duša ty moja a ćělo a krej.

Njewjedrow razy wšě móžachu bić,
Wobzamkłoj běchmoj so njewopušćić;
Khorosć, křiž, hida a přesćěhi wšě
Běchu naj' lubosćow pokrućenje;
Hanka ty serbska, kak wutrobnje smój
Ruka za ruku so wozbožaloj.

Jako čím rjeniše njebjesa su,
Hrimanja, zliwki hdyž přećežechu;
Palma kaž hakle so pozběhuje,
Hdyž dešć a wichor ju pozhibuje:
Tajka ty běše, ty Hanka, mój šac —
Porunu parlu swět nima mi wjac'.

Přesadzi hnada tež do njebjes mje,
Jandželko, přenju tam wuslědžu će;
Při tebi, z tobu b'dže zbóžniši čas,
Tebje hdyž změju tam w njebjesach zas';
Budžemoj, Hanka! tam njerozdžělnej,
Duša ty moja a ćělo a krej!

— * —

Pučowař při řezaku.

(Lužičan 1868, 170.)

Dort unten in der Mühle sass ich in guter Ruh'.

Tam delkach pola młyna měr slódki srěbach ja,
Na mikot kołow hladach a wodow žołmjenja.

Na pilu swětlu hladach, — kaž sonař zdach mi so —
Ta džěla dolhe čary do zdónka jědlowoh'.

A jědla bě kaž žiwa, hlós wot so zrudny da,
Wša cyła třepjetajcy te słowěka zaspěwa:

„Sem přišoł w prawym času, o pućowarjo, sy —
Ty sy, za kotroh'ž rana mi dže do wutroby;

Ty sy, za kotroh'ž budže so twarić za khwilu
Z toh' drjewa doměk pod zemju, twar k měrej dołhemu.“

A štyri deski padnu! — mje zaja ćežkota —
Cheych słowěko znjesć a prajić, duž koło pozasta! (1868.)

✱

Hodowny spěw.

(Serbske Now. 1868, 409.)

Heil'ge Weihnacht, Fest der Kinder.

Swjate hody, swjedzeń džěći,
Swjedzeń lóšta, wjesela
Cyleho tu křesćanstwa,
Zjewće přewinjerja w swěći,
Kiž krej, ćělo na so wza,
Džěćatko bu naše dla.
Ty sam, Khryšće, najwyšša
Sy nam radosć hodowna.

Njebjesku ma jandžel jasnosć
W polu pola pastyrjow,
Jako stupi z njebjesow,
Słódku připowjeda krasnosć:
Zbóžnik wam so narodži
Džensa Khrystus we ćěli!
Haj ty, Khryšće, najwyšša
Sy nam radosć hodowna.

Měr budź, měr budź nětk na zemi,
Bohu w wysokosći česć!
Z dobrym spodobanjom njesć
Cheemy wopor z kěrlušemi

Za skutk džiwny, kiž so sta
 Džens we měsće Davita.
 Haj ty, Khryšće, najvyšša
 Sy nam radosć hodowna.

Khwalbu swjatu Bohu dajmy,
 Kiž nam hnuje wutroby,
 Zo wšo jemu swjećimy.
 Z pastyrjemi pokhwatajmy
 K Bethlehemej, k hródzi tam
 Z jasnym hłosom k njebiesam.
 Haj ty, Khryšće, najvyšša
 Sy nam radosć hodowna.

Z džakom před tobu tež korja
 Džěćatka so, zbóžniko,
 Česćicy će spěwajo.
 Słyš nas, Jezu, njech so horja
 Z lubosću nam wutroby,
 Spěwać hlós ei dostojny:
 Tak naš spěw ei najlubša
 Budže radosć hodowna.



Boža krasnosć.

(Serbske Now. 1869, 217.)

Lasst mich geh'n.

::: Přizwolće :::

Čahnyć mi, hdžež Jezus je;
 Horco za nim duša hlada,
 Wěčnje woprijeć joh' žada,
 Stupić k jeho trónej chce.

::: Najslódše :::

Slónco, kiž nóc přelamje;

O, hdy zhromadženy budu
 Tam při wuzwolenym ludu,
 Hdže će woko wuhladnje?

::: Jandželjo :::
 Spěwaju tam krasnišo;
 Křidła sem! spěch hodlerjowy!
 Hišće džens přez hory, doły
 Leću Zion pytajo.

::: Duša rži :::
 Z wjes'lom, kak b'dže w Salemi;
 Hasy złote, město jasne!
 Božo, wěm ja džěčo časne,
 W kajkej budu radosći?

::: Edenje, :::
 Kak twój plód tak słódki je;
 Tam pod palmami nam wšudže,
 Kaž by so nam džało, budže.
 Knježe, tam tež dowjedź mje!



Rheinska straž.

(Serbske Now. 1871, 285.)

Es braust ein Ruf wie Donnerhall.

Wy lubi wojacy, njech tola
 Nimo wšej' njechwile
 So stanje z tutym waša wola —
 Tu dopomnjenka je!

Glós hrima, howri po kraju,
 Kaž mječe brinča, žołmy du,
 Před Rhein, před Rhein, Rhein wótčinski!
 Štó mi tón zliw tam wobstraži?
 Lubwóteny kraj sej pokoj daj,
 Twój Rhein ::: straž ma ::: kaž cheruba.

Sto tysac stanu zarženi,
 Haj! wóčko wšěm so zapyri:
 Syn fromny, sylny po prawdže
 Škit swjatyh svojich mrow je
 Lubwóteny kraj atd.

Wón k njebju k wóteam zhladuje,
 Jich znamjo česći ryčerske
 A přisaha: Ty Rheino tež
 Kaž mój bróst němski wostanješ!
 Lubwóteny kraj atd.

Dónž krepka krwě po žilach dže,
 Dłón žana mječ regiruje,
 Žad'n njepräcel, dónž dušu ma,
 So njedótk' rheinskoh' pobrjoha!
 Lubwóteny kraj atd.

Rhein šumi, sapaj přisaha,
 A khorhoj praskaj do wětra,
 Nad Rhein, nad Rhein, won na mjezy!
 Byé chcemy wšitecy stražnicy! —
 Lubwóteny kraj atd.



Lubjenja mlodeho pachola.

(K česćiwemu dopomnjenju na 2. septembra 1870 za Delnjowujezdžansku
 šulu. Swobodny přeložk E. Fürstoweho spěwa z „Daheim“ Nr. 49, hdžež
 je tež hlós.)

(Serbske Now. 1871, 341.)

Jako bubon mi w horach, po doli
 K Rheinej won, won zawrjeska,
 Před Pariz! traru! rózki dujachu:
 Ach, tehd' małki běch 'šće ja,
 Třělbu nosyć lědy móžach,
 Njepřecela zbić so stróžach —

Hdžež pak lud naš w polu bě,
Pasech jeho kročele.

Džěchu powjestwa, zo bě dale šta
Naša khorhoj z dobyćom,
Skakach z wjeselom — sobu juskach, hej!
Sława kralej Wylemej!
A hdyž wjedro surowješe,
Posoł sylzow přikhadžeše,
Prošach w ćichej komorcy:
Luby Božo, pomhaj ty!

Budu wulki ja — a zas' wójnuja —
Tehdy, aj! sym připódla,
Jako wótcojo muža swojeho
Steju tam hač do kónca;
Huj! pak poleću na konju,
Džělam mužscy z wótrej brónju;
Panu-li za wóteny kraj,
Krónuje mje Boži raj!



**Spěw füsiliera Kóčki
pola Saarbrückena 1870.**

(Serbske Now. 1871, 141.)

Was kraucht denn dort im Busch herum.

Štó tamle w keřkach čerwi so?
So zda, Napoleon je to —
Što ma tam lazyć pytajcy?
Haj, hóley, jeho wučěrmy.

Tam čisćinu tež přikryli
Su kholowcarjo čerwjeni —
Što maju tam so rozdžěrać?
Tych kadlow chcemy pózeznać!

Z kanonami, mitrejskami
 Tam praskaju, zo wšitko rži —
 Što maju praskać, z wohnjom hrać?
 Te prytle chcemy zakazać.

Napoleon, Napoleon,
 Twój parnik z kolije dže wšón —
 Pris, pras! će serbski zmlóćimy:
 To zrudnje wukejžorił sy!

Tu wulku blabu — wěš ty što?
 Na wěčne stulej, francmanstwo;
 W Parizu — čakaj — tam je mlón,
 Če mólčku domlěć, *grande nation!*

— * —
Hodowna kantata.

(Serbske Now. 1871, 406.)

Swobodny přeložk A. Bergtoweje hodowneje kantaty: „Betet an
 des grossen Gottes Liebe“.

(Přeložena za Delnjowujezdžansku šulu.)

1. džěl. *Andante sostenuto.*

Modlo khwalée lubosé Božu wulku,
 Swjećeće kěrluš jeho krasnosći,
 Wotehnata zašla nóc je mutna.
 ∴ Khrystus dawa trošt a měr. ∴
 Z wutrobu a z wěrypołnym wokom
 ∴ Hladamy na zbóžnika. ∴
 A přeč leća, přeč leća ból a rudžby zeńske:
 Jasnosć ma puć žiwjenja.

2. džěl. *Andantino.*

Nóc knježi éicha, samotna,
 Ju měsačk miły poswětluje;
 Duž w polu črjóda pastyrška
 Tam swoje stadla wobstražuje.

A hlaj, tam bu we jasności
 A měra drastu woblečeny
 Wot Boha posoł póslany,
 Zo připoj'dať by słowo zboža.

3. džěl. *Andante.*

Jandžel džeše k nim: „Njebójće so!
 Hlejće, ja wam připowjedam wulke wjes'le,
 Kiž všemu ludu so dostanje!
 Njebójće so!
 Wam je so džensa waš zbóžnik narodził,
 Kotryž je Khrystus, Bóh Knjez
 W Davitowym měsće.

4. džěl. *Andantino.*


A hnydom bu tam pola jandžela
 Syła tych njebjeskich wójskow,
 Te Boha khwalachu a džachu:

5. džěl. *Allegro con spirito.*

„**B**ohu, Bohu budź česć, česć na njebju,
 Budź česć, česć na njebju,
 A pokoj, pokoj, pokoj na zemi,
 A měr čłowstwu a spodobanje!



[Faint, illegible text, likely bleed-through from the reverse side of the page]



Kruški a tružki.

Přisłowne hrónčka.

Pomyslenki.

Předspomnjenje.

W tutym wotdžěle su zjednočene tři we wašnju nimala jenajke družiny basniskich wutworow „**kruški a tružki, přisłowne hrónčka a pomysleńki**“, kaž je basnik sam mjenuje. Wone maju wšě to přez jene, zo někajku mudrosć abo powšitkownu wěrnosć wupraja, a rozdžěleju so jenož we tym, zo kruški a tružki z wjetša ze štyri a wjacy, přisłowne hrónčka pak přeco jenož z dweju rjadkow wobsteja, mjez tym zo so pomyslenki z cyla jenož w nje-wjazanej řeči poskićeja. Naš basnik rad do tajkich krótkich hrónčkow swoje mudrowske myslički zdrasćowaše a přidawaše je husto jako powučby k svojim basnjam. Wosebje wočišćanych je jich hewak mało, z wjetša zawostachu rozpróšene w jeho rukopisach, z kotrychž buchu tu po započatkach zrjadowane wozjewjene.

Wot kruškow a tružkow namaka so pječ w Tydž. Now. 1847, str. 196 a w Serb. Now. 1855, str. 6 a 22, wot pomyslenkow pak přeni džesatk w Łužičanu 1868, str. 13 z napismom: Hrónčka za Serbow. Tež někotre jeho přisłowne hrónčka su w Serb. Now. 1855, str. 22 a w Łuž. 1868, str. 43 (ča. 1—3., 7., 11. a 12.) mjez wjacorymi přisłowami z ludu wočišćane. Zejleř mjenujcy hižo wot studentiskich lět z wulkeju pilnosću kaž ludowe pěsnje, tak wosebje tež ludowe přisłowa hromadžeše. Tute jeho zběrki tworja wjetši džěl wonych wot Jak. Buka w Čas. M. S. 1853—56 a 1860—62 a tež we wosebitym wočišću wudatych serbskich přisłowow. Zejleř sam wozjewi jich něšto w Łuž. 1860, str. 29 a 1861, str. 155. Druhe buchu wot podpisaneho z jeho zapiskow wupisane a w Čas. M. S. 1868, str. 19—24 a w Łužicy 1890, čo. 9—11 wozjewjene.

Redaktor.


I. Kruški a tružki.

1. Činiš-li ludžom směch a wjesele,
Ty žněješ wšudže česć a witanje;
Chceš-li pak wučić abo polěpšić,
To budža khribjet rad ći wobroćić.
2. Dawki džě su dobrota,
Kaž to kóždy widzi
A štóž jich so wobara,
Swoje zbože hidzi.
Daj to mjenje zwólniwy,
Njechaš-li być rězany!
3. Dosć lakomnych je na swěći,
Kiž bychu radzi widželi,
Zo by jich swět za boha měł
A za nich džěłał a so drěł.
4. Džiw často, husto spodžiwny
Tu na swěće so stanje,
Zo njenamaka widžacy,
Přez čož hdže slepy panje.
5. Hdyž běše kozoł kózlatko,
Bě puzorny a lesny;
Čim starši — hórše wohidło
A rjelpus je njeznjesny.
6. Hrěch překlepanej' mudrosće
Swět sebi radšo woda
A měni, tón so wuplóče
A mała je ta škoda.
Hdyž rěka pak: wón wosoł je,
Wón lěpje njewě, njemóže,
Jom' na wutrobu zwala
Wšě hrěchi, kiž jich pala.

7. Kak wšelaka je wołańca:
 „Na zad! na zad!“ a „do přědka!“
 A hdyž so prawje při swětli
 Tu přičiń wšelka rozpomni,
 To kóždy pleće prawizna,
 Kiž jom' najlěpje poslužna.
8. Kaž njewróćiš rój kuntworow,
 By pošta jich tež zabił,
 Tak njenawučiš hlupakow,
 A byrnjež by jich nabił;
 Hdžež čłowjek nima rozyma,
 Tež heja ničo njepomha.
9. Kiž nochcedža tak prawje lžeć
 A powjetšeć a překhwaleć,
 Po zastarsku swět měrja;
 Maš wjetšu abo mjeńšu lžu,
 Na dobre zbože položcu
 Tak abo tak ći wěrja.
10. Kóždy dzeń kermuša
 Je wěsta khorosć a wostuda!
 Zlě, hubjenje je na swěći,
 Hdyž rozym knjejstwo zhubi,
 Hdyž pjasć a brón wšo wobknježi
 A kóždy swój róžk trubi!
11. Khudy, nuzny, wobzajaty
 Bohatemu bojosć jo;
 Radšo widzi jeho pjaty,
 Dyžli jeho wobličo.
12. „Lubosć njebudź falšna“, praji
 Bože słowo; — čeho dla?
 Dokelž jich tak wjele haji
 Judašowske zmyslenja,
 Noša na jazyku měd,
 Ale we wutrobje jěd!

13. Najbóle z wjetša mudruje,
So šepjeri a klemi,
Kiž rozyma ma najmjenje,
A lěpšich tepce k zemi,
Kaž z cyła nam'kaš na swěći,
Zo khromy čert je najhórši.
14. Najprěńši korjeń wšeho złeho
Wot spočatka hač do kónca,
Wón rěka: bład a njewěra.
15. Na zbože twarić blaznosć je,
Tu kóstka wšelko panje;
Štož njemysliš, to najskerje
A runje won so stanje!
16. Při mućenjach a njeměri
Su radži zwjercha lakomni.
Njeh z Bohom abo z čertom dže,
To najmjenša jich starosć je.
17. Swět wšelakeje mysle je,
Wón wšelku nosy žadosć:
Štož jedyn horco woplače,
To druhemu je radosć.
18. Swobody a prawa zakład
Być ma zakoń zawěrnó;
Kóždu druhu móc we kraju
Mam za škódne přibójstwo.
19. Štož do pječ lět njej' lizane
A do džesaćich česane
A do pjatnaćich wučene
A do dwacećich zhib'wane:
To keřk a wozdónk wostanje,
Dónž rostu włosy na hłowje!
20. Štož wšo, štož słyši, njewěri
A wšo, štož wě, njepowjedzi,
Štož wšo, štož móže, nječini,
Tón zda so mi najmudriši.

21. Štóž w zbožu ćichi, ponižny
So zdžerži wusměwstwa —
Tón, hdyž rjad horja na nim je,
Směch słyšeć njetrjeba.
22. Wšě kćenička na štomiku
Plód dočakany njenjesu;
Tež lisćičko najzelenše
Do časa husto wotpadnje.
23. Wzmi wozej wojo, koleso
A wučbje přikład, wopismo,
To woboje, hač najrjeńše,
Bjez wužitka přec' wostanje.
24. Za khribjetom će wuhanja,
Kiž do wočow će pokhwala;
Duž hladaj, komu wěrił by,
Swět falšny je a jara zły.



II. Přisłowne hrónčka.


1. Bjeř předešćnik, hdyž wjedro je,
A kaž chceš čini, hdyž dešćik dže.
2. Bjez nižinow a bjez doła
Njej' žana hora wysoka.
3. Bóh z njebjes dyrbjał čeknyć sam,
By swoju móc dał blaznikam.
4. Budź wužitny a zwjeselej,
To nimaš smjerće popratej'!
5. Čim mjeńši wopor přinješ mam,
Čim wjetšu lubosć začuwam.
6. Čim wjetšu nuzu spytał sy,
Čim skerje budžeš spokojny.
7. Čmowa bróžeń bura žiwi,
Na swětlu wón hubu křiwi.

8. Darna ruka zaso bjerje,
Zawisć pak so sama žerje.
9. Dobre sebi samo pomha,
Ale złość je wěčnje khroma.
10. Dosć kupcow přec' na darmački
Bjez haniby so naćeri.
11. Dzakownosć je róža kćějata,
Ale, wěr mi, jara zachodna!
12. Hdyž mali k knjejstwu přińdžeja,
Ći lěs dla štomow njewidža.
13. Hdyž wulki strach so přibliža,
Wšě małe strachi wuskoča.
14. Hlej, mudrych hłowow dobyća
Tež blazni sebi připiša.
15. Hlej, wjeselow so kopi dosć
Za džěło a za spokojnosć.
16. Hunčej dobre wěcki dawachu:
Měni, zo je z lutej lubosću.
17. Husto je drasta wjac' winojta
Hač cyły tón čłowjek — ha ha ha
18. Hdžež so wjele swari,
Tam so mało twari.
19. Jejko nima kokoška,
Kiž sej ničo njehrjeba.
20. Kluč zloty wšudže wotamka,
Štož jenož nihdy njebjesa.
21. Kłok leći, hdyž ěi zbože kće,
A trjechi, hdyž ěe nuza škrje.
22. Lóšt k džěłu je poł žiwjenja,
Najkisalši khlěb lěnik ma.
23. Móc rozym prawje dobywa,
Hdyž přińdže włosow padanka.
24. Mrějo lubić wróćenje,
To je čropow lěpenje.

25. Najrjeńše ličko na swěci,
Kiž před hrěchom so čerwjeni.
26. Najrjeńši pjeršćen ruka ma
Ta smilna a ta džělawa.
27. Njeh je čłowjek tak hlupy hač chce,
Ma-li pak zbože, to krasnje z nim dže.
28. Njeh je čłowjek tak sylny hač chce,
Smjeré na kóždym wšak dobudže.
29. Pjeć skhodzeńkow je hordosće,
A štož najwyšši docpěl je,
So z hordosću wjac' njeznaje.
30. Pod horami najbóle
Rostu štomy najwyšše.
31. Połrozymnych sadź do zboža,
To hišće z nim so wobškodža.
32. Prjedy a nětko,
Luby mój džědko,
To je wulke rozdžělenje.
33. Přec' njehladaj na drascičku,
Ćim skerje pak na zaslužbu.
34. Před njepřecěla dobrotu
Bjeř najbóle so na kedźbu.
35. Přez hórku, twjerdu škorpawu
So přeńdže k jadrej slódkemu.
36. Rady dać a wodać sprawnje
Rěka Bohu słužić zjawnje.
37. Rozym, próca, dočakanje
Dadža hakle wužiwanje.
38. Sam bóhl'by knjez tych njeswari,
Kiž wjeseli su po česći.
39. Séerpnosé, próca, modlitwa
Su tři dobre zelička.
40. Sej něchtóžkuli rozkida,
Hdyž někom' dobru radu da.

41. Słowo wuleći kaž lastrojčka,
Štyri konje je wjac' njewróća.
42. Starym a młodym z jeneje šklě
Njesłodzi dolho, kaž zhonjenje wě.
43. Što pomha wulke nalubjenje,
Skutk je najlěpše wobswědčenje.
44. Što tež ći pomha wulki hród,
Hdyž nutřkach knježi samy hlód?
45. Štó sy? što móžeš? přewaži,
Nic próca sama na sebi.
46. Štož myslička, wutroba wuzwolitej,
To z Bohom tež něhdy dostanjetej.
47. Štož blazn je, so přeradží
Na směchach, hdyž tež njerěči.
48. Štož dobrych dnjow so naměł je,
Rad něšto hłupe započnje.
49. Štož hłubje lěze do wody,
Hač widzi dno, je njemudry.
50. Štož chce pyšny židu torhać,
Temu njedaj kopać, worać.
51. Štož je tak prawje njezbožowny ptak,
Tón zrazy sebi nós, hdyž padnje znak.
52. Štož kriwi prawo khudeho,
So k Bohu woła podarmo.
53. Štož na žnjach rady lěha,
Tón w zymje hlódny běha.
54. Štož ničo krasne njewuhlada,
Tež ničo krasne njepožada.
55. Štož njerozymi dočakać,
Tón dyrbi wjele parować.
56. Štož přec' na cuze kedźbuje,
To swoje z wjetša přepase.
57. Štož skupje syje, skupje žnje,
Khiba zo čorny kumštar je.

58. Štóž so tak prawje wobhlada,
Najstaršich lětow dočaka.
59. Štóž swoje puće z Bohom dže,
Tón přec' a wšudže kryty je.
60. Štóž wodnjo spěšnje dobre džěła,
So wječor w dobrej mysli směwa.
61. Štóž womazanej rucy ma,
Tón čistu wěc njech njeprima. | e
62. Štóž wo žni njeńdže na polo,
Ma w zymje hlód a prošeństwo.
63. Štóž z lóštom džěło započnje,
Poł dokonjał je hižo je.
64. Štóž z wulkim horjom wójnu ma,
Na malinki so njehněwa.
65. To česć je Božoh' mišterstwa,
Zo kóždy ptačk njej' sykorka.
66. To dobrota je wostudla,
Hdyž kóždy dzeń je kermuša.
67. Wěc njekhmana je hordžeństwo,
Kiž wohidzi najlěpšeho.
68. Wěrnó njej' wšo, štož so rěči,
Ani złoto, štož so swěći.
69. W tym nopje éma a sama fala je,
Kiž jenož swoje ma za najrjeńše.
70. Wukní ponižny so teho wzdać,
Z čimž Bóh é njej' cheyl žohnować.
71. Započatk bě z hordym duchom,
Skónčenje bě z hlódnym brjuchom.
72. Zhubiš sceptař, je wšak teptař
Bórzy tebi na šiji.
73. Zle wotmyslenja druhim přicpiwa,
Štóž złósć a lesć sam w svojich myslach ma.
74. Z prutom šwika dokonjatk
Njewustojny započatk.



III. Pomyslenki.

1. Serbske pola, jara dobre pola:
Wone tež swojich nje přeéelow žiwja.
2. Džiwny lud we serbskim kraju:
Někotry ma tu serbski žołdk a němski jazyk.
3. Serbski kopoł
Njeje wot němskeho rozeznać.
4. Zajědže Serbej hordosé do wutroby:
Dha zajědže jemu Němc do hlówy.
5. Čorne kruwy su w Němcach a Serbach,
Wšitke jenak čorne.
6. W holi je wšitko bóle we swojej woli,
W horach je bóle w začinjenych dworach.
7. Němske swětlene škórnje tež čišća
Kaž serbske mazane.
8. Holan pěsačny polan,
Horak tučnišu-brózdu-worak.
9. Wuńdže do Čěskej' a Budyskej' syłobika pytać:
A zady pjecy je spěwał.
10. W runym šórcušku do Němcow na službu,
W kušim šórcušku z kobjelku zasy do Serbow domoj.
11. Hdyž je so němski prošeř serbskeho khlěba najědl,
Počina tak z korbom mjetać, hač khlěb z njeho lěta.
12. Bóh mje zwarnuj před darniwosću bohatych ludźi
A před ponižnosću nowych zemjankow.
13. Štóž ma céžki měch pjenjez khować,
Pola teho je spěwanja a wjesołosće kónc,
A štóž na nim lěha, leži na twjerdym a nima měra.
14. Někotryžkuli čłowjek a twarožk mataj to přez jene,
Zo staj starej lěpšej hač za młode.
15. Požčowanje a zajimanje čini starosć;
Zbožowny je tón, kiž so wobojeho mudrje zminyć wě.

16. Swobodnosć je wulka suknja
Bjez rukawow, přédka, zadka a kornarja.
17. Štóž swět po krasnej zwonkownosći sudži,
Móhl na swojej khudej maličkosći husto zadwělować.
18. Rozym njewobćeži nihdy a tež nihdže njezeškodži.
19. Přecelstwo z česćenym mužom je kwětkowy wěnc,
Kiž woboje skrónje pyši.
20. Slěbročistu da Bóh wodu žórlić,
Ale jeje sudobje ju womaza.
21. Štóž nima lóšta svojich žadosćow so wotrjec,
Namaka přeco wurěč jim dosćičinić.
22. Do čim wjetšich česćow šelma zalěze, čím hórši ludak je
A zasłuži čím wjetše zacpjenje a plisty.
23. Njerozymni přeceljo wjacy zeškodža dyžli čisce žani.
24. Zwučenje pomjeńši hórkosć tež najwjetšeho horja
A najhóršeje hubjenosće.
25. To je wobžarowne hubjenstwo,
Zo je žiwjenje wjele ludži wobstajna robota
Bjez wšeho wužića žiwjenja
A wjesoleho pohladanja k njebjesam.
26. Nuza džěše něhdy na ženětwu
A po dołhim pytanju woženi so z druhej nuzu,
A bu wěčna nuza ze swojimi džěćimi založena.
27. To je pokleće njeprawdy, zo jej přeco druha njeprawda
za pjatami dže. — Přez bože wodženje pak porodži njeprawda spočatki nowych dobrotow.
28. Jako Bóh dobre a zle dary mjez zwěrjata wudžěleše,
dóndže so lesć na lišku, sprócniwosć na pčołu, pomjatk
na slona, móc na lawa a swěrnosć přińdže na — psa.
29. Próznistwo je domjacy paduch a lěnjosć lazy tak po-
małku, zo ju khudoba bórzy dosćěhnje. Sprócniwa
džělawosć je maćer zboža; štóž chce so ze zbožom
spřecelić, dyrbi z maćerju dobry być a ju lubować.
Sprócniwosć a džělawosć pak njeprinjesetej samej khlěba,
ale rjadownosć a ródnosć: wšo w prawym času.

30. Daj sebi pokoj a njeswar džěćo, hdyž w začuću přibjera-
ceje mocy so pěstona wobara zechcywši njewodžene
činić swoje kročalki, runjež tak spěšne a wěste njebyle,
kaž sebi mysli. Z tym činiš zwjeselenje a wubudźuješ
wěsćiše pospyty. Tak tež je ze Serbowstwom, z jeho
rěču a zdžělanosću poruno Němcowstwu.



Předspomnjenje.

Nimo bajkow we wjazanej řeči, kotrež su w přnim dźěle tuteho zwjazka wočišćane, je Handrij Zejler tež zběrku přenjotnych bajkow w njewjazanej řeči spisał, wot kotrychž je jenož połojca hižo pak w Časopisu Mačicy Serbskeje pak w Tydžeńskich Nowinach pak w Jordanowej Jutrničcy pak druhdže wozjewjena, mjez tym zo druha połojca w rukopisach zawosta. My podawamy tu wšě hromadže po času zřadowane. K temu je Zejler tež někotre Phaedruse bajki z laćanšćiny do serbskeje prozy přeložil a w Tydžeńskich Nowinach 1843 na stronach 143. 147. 148. 156 a 203 wozjewił; te pak my tu njejsmy z nowa sobu wočišćeli, dokelž po tajkim njejsu přenjotne basnikowe. Řeč bajkow smy tu a tam dyrbjeli trochu porjedzić dla postupa serbskeje njewjazaneje řeče w poslednich lětdzesatkach.

Redaktor.

1. Wrobel a syłobik.

(Tydź. Now. 1843, 2.)

Wrobel a syłobik wadžeštaj so něhdy w lěšćinowym płoće wo swoje wosebnosće a pruhowaštaj swoje spěwanje. Mjez tym přibliži so jimaj čłowjek kaž po skladnosći a při-posluchowaše jeju wurěčowanjam. Jako wonaj to pytnyštaj, prašeštaj so jeho, što so jemu zda. „Krasnaj ptačkaj“, džeše čłowjek, „wój staj wobaj mjez ludźimi wuwolanaj; po čim móhl ja lěpje waju wosebnosće z prawdu wuwažić, hač hdyž wój sam a sam na so dźetaj! — Kotryž je sylniši, temu słuša wjetša khwalba a po tajkim tež dobyće.“

Jako so nětko wrobel a syłobik kusajo po zemi waleštaj, dosahny čłowjek wobeju z lohkej prócu; wrobla rězny wón wo zemju, dokelž jeho k žanemu wužitkej njewědžeše, syłobika pak wza sebi sobu domoj a tykny jeho do klětki.

Kaž tudy wrobel a syłobik, tak dadža so tež husto ludžo we swojej nawalnosći a překorje nablaznić a zaslepić a našćuwaršcy, lestni nahrabnicy sčinja sebi to k wužitkej.

(27. junija 1828.)



2. Žaby.

Žabina bydleše we luži na pastwiščach. Tu so žabam poča njelubić, dokelž so často a husto sta, zo swinje přińdžechu a so we luži walachu. Zradziwši sebi teho dla, zo chcedža do pól čahnyć, zebrachu so z luže a skakachu w nocy při mēsačku do pola. Ale běše so jim we luži zlē šlo, w poli džeše so jim hišće hórje; tu njemóžachu so před ptačinu, kiž jim za žiwjenjom slědžeše, dowukhować. Duž składowachu zaso radu, hdže bychu kħmaniše bydło namakale. Džeše žabica, kiž běše hewak wjele kraja nawě-

džela: „Sotřički, njelutujmy prócy, znaju najlěpši wuček před našim njepřečelstwom, pójmy do rěki, tam je khowankow dosć a najlěpše ćěkanje, jeli tež hdy do stracha přińdzemy.“ Ta rada so wšitkim spodobaše a w přichodnej nocy podachu so k rěcy a skakachu po rjadu do wody. Tam stejachu pak runje někotre wulke šćuki z hlódnym brjuchom a duž tež, tak khětre hač žana do wody plusny, ju na měsće dosahnywši póžrjechu. Tutu tučnu žratwu pytnychu tež někotre druhe šćuki, stowařšichu so k nim a třělachu hišće wjele hórje za žabami zahubiwši jich přez položcu, prjedy hač te swoje njezbože pytnychu. Zastróžene wróćichu so zbytně do swojeje stareje luže a jena po druhej poča rjehtać: „Najlěpje je we starej luži!“

(4. julija 1828.)



3. Wósty a kopřiwy.

Wósty a kopřiwy dachu něhdy knjeza, kiž běše sebi kruch kraja k zahrodze kupił, přez pósołstwo prosyć, zo by tež jim jako wušnym a nadobnym zelum we njej smužku zemje k wobydlenju dał. Za zarěčnika mějachu wósla, pola knjeza rad widženeho, kiž přikhadnikow ze stareho znajomstwa wukhwalić njezaby. Jich próstwa so dopjelni, a zahrodnik dyrbjěše jim khětry kruch zemje dać. W krótkim pak rozkorjenichu a rozsymjenichu so wósty a kopřiwy wulcyšnje, rozplódzichu so tež hišće dale, hač bě jim wottykane. Po tutym rozkhodžowaše so knjez něhdy we swojej zahrodze a ducy nimo tych wóstow a kopriwow wuhlada jara rjanu kwětku mjez nimi; duž khwatajcy džěše ju wušćipnyć, zakopny pak so do zemje a padny do wóstow a kopriwow na woči. Skalany a zwožahany tak, zo měješe žalostny napohlad, woteńdže, zawoła zahrodnika a džělaćerjow, zo bychu tutych khwalenych, wušnych a nadobnych podružnikow na měsće wukorjenili a ze zahrody wumjetali.

(29. augusta 1828.)



4. Wosoł a kruwa.

„Preč jow! preč jow!“ přiběža smorčo wosoł na kruwu, kiž běše sebi na pastwišću homulku tučneje trawy nadešla. „Preč jow!“ smorčeše wón na nju; „mój knjez dže za mnu a chce so runje tu, hdžež ty jěš, do mjehkeho lehnyć“. — „To ty lžeš“, wotmołwi kruwa, „zechce-li twój knjez na mjehkim ležeć, njezechce jow přišedši mi trawu polěhać.“ — „A nimo teho“, poča wosoł zaso, „mój knjez je mi tule trawu za moju službu připokazał.“ — „To ty zaso lžeš“, rjekny kruwa; „twój knjez dyrbjal šelma być, hdy by tebje ze swojeho njezežiwił, ale mje prikrotšił, hdyž ty jemu službu činiš“. Z tym wotehna wona wósła wot sebje. (1828.)



5. Woł a liška.

Woł wuhlada něhdy na licy lišku a poča hnydom na nju ruć: „Hejda liška, čakaj wšak!“ Liška jeho dočaka a woł prošeše ju, zo by jako jara mudre zwěrjo jeho tež mudrosć wučila. „K temu słuša najprjedy, zo so tak spěšnje suwaš a tulaš, wobroćeš a skačeš kaž ja“, džeše liška a poča jemu to rozpokazować; woł pak to po njej činješe. „Psej skobano! woł je kołwrótny a wšón njemdry!“ počachu někotři burjo nazdala wołać a běžachu na woła. Liška so miny; woł pak bu dosahnjeny, zespinary a pomału domoj dowjedzeny. Doma dosta na měsće lékařstwo přez kołwrótnosć a to tak dołho, doniž kóždy njewidžeše, zo hinaši njeje, hač je hdy prjedy byl. (1828.)



6. Law a mjedwjedź.

Law a mjedwjedź zeńdžeštaj so w lěsu, a mjez tym a tamnym rjekny law k mjedwjedźej: „Mój smój džě tola najsylnišej na zemi.“ — „To njeismój, čłowjek je sylniši“, wotmołwi mjedwjedź. „Pokaž mi čłowjekow, to chceš ja

wohladać“, rjekny law. Mjedwjedź wjedžeše lawa k jenej wsy a nadeńdžeštaj črjódu ludži, kiž wote-mše džěchu, a nje-daloko wot njeju steješe tam honjer. „Hladaj, hladaj! tole su ludžo — a tamle steji tež jedyn čłowjek“, rjekny mjedwjedź a wróci so hlubje do lěsa. Law pak džěše w runej měrje na honjerja. Po khětrej khwili přińdže zaso k mjedwjedzej: „Ty maš prawje, čłowjek je sylniši; jako ja na teho zeleneho přińdžech, pluny wón mi z nazdala mjez woči, hač so zabłyška a lěs poropota; ja hišće sebi wjele z teho njesčinich, ale džěch přeco na njeho; duž wućeže wón tajki blyskotačk po boku a šwihaše mi z nim mjez woči; hladaj, hladaj, kak krwawy sym! To móhlo hišće hić, ale tež ta šěra wěc, z kotrejež wón tón blyskotačk wućeže, skakaše jemu wša njemdra wokoło žiwota; budžeše wón tu hakle na mnje pušcił, móžeše mi snadź tola žiwjenje wzac. Duž sebi ja myslach, lěpje je čeknyć, hač wěstu smjerć na so wabić“

(Wokoło 1830.)

7. Mucha a pawk.

Mucha zaleći sebi něhdy do pawčiny a zašmjata so we njej. W runym skoku přiběža ju pawk skóncować; wona poča pak přecelnje zynčeć: „O ty luby, ja sym so skhroblila tebje wo něšto prosyć, hdy by mje slyšeć chcył.“ — „Duž praj, što chceš“, wotmołwi pawk. „Ja mam pječ džěćiskow doma, te by móhł ty přasć wučić, njechaš?“ — „Što nic“, rjekny pawk na to; „wěsće so nchtó lěpje z nimi wobeńć a je dušnišo nawučić njezamóže, hač runje ja, to mi khroble wěr.“ — „Haj, teho so ja hižo prjedy nadźijach“, džeše mucha, „ale njech džě ja nětko po te moje džěći domoj leću“. Pawk w nadźiji hišće lěpšeho popada wuwu muchu ze swojeho koła a pušci ju wot sebje; mucha pak lečeše zynčo do šěrokeho swěta a nje přińdže ženje wjacy.

(Wokoło 1830.)

8. Jarowc a slowčina.

Jarowc džeše něhdy k slowčinje, kiž njedaloko wot njeho steješe: „Ja će wobžaruju, wboha susodžinka, zo ty žadyn tak spodobny zróst, tak wosebne lisčo, tak rjane a wonjate kćenje nimaš, kaž džě ja.“ — „To ja drje nimam, mój přistojny susodo“, wotmołwi slowčina, „ale čehodla zabudžeš ty moje plody z twojimi přirunać?“

(Wokoło 1830.)



9. Wowčer a wjelk.

Wowčer přinjese sebi cyle młodeho wjelka z lěsa domoj a mjenješe, zo sebi na nim dobreho rječaznika před wowčerńju wočehnje, dokelž wón wo rubjenju a torhanju ničo njewědžeše, tež ničo tajke hišće woptał njebě. Wjelk bě skludny wotrostł a zdaše so na swoju službu dobry być. Ale što měješe być? Něhdy skoči wón tola do wowcow, popadže jenu a poča ju žrać. „O ty njedušniko“, džeše wowčer rozhněwany, „duž ty tola swoje přirodženje po wšej mojej prócy a dobroće pušćil njejsy! Ja hižo widžu, zo dyrbbju će samsneje hroznosće dla zarazyć, kotrejež dla dyrbimy twojich starych zabijeć.“

(Wokoło 1830.)



10. Lisćik, hrochowe zornjatko a kamješk.

Lisćik a hrochowe zornjatko džěštaj něhdy do cuzby, lisćik so přewalowaše a zornjatko so kuleše. Ducey po puću nadeńdžeštaj tak wysoku a nahłu horu, zo so za cyły džen lědma na nju zdrapaštaj. Na horje prošeštaj kamješk wo hospodu; tón so jimaj džiwaše a směješe, bě pak jimaj k woli. Zornjatko přilehny so zady kamješka lisćikej a wotpočowaštaj. Lědma pak běštaj so dolehnyłoj, přičeže sylny wichor a zhrabny lisćik sobu přeč, a zornjatko kuli so po horje dele. Duž hakle poča so kamješk smjeć, zo so

wšón třaseše. Při tym pak so wón wobwali, šwikny so po horje dele, a štož bě najhórše, wón so ducy dele wo druhe kamjenje rozrazy.

(Wokoło 1830.)

11. Škowroněk a žolta pliška.

„Kak to tak, škowroněko“, rjekny žolta pliška, „ty tola do žnjow tak rjenje spěwaše, zo so wšě pola a druhe stowrjenja nad tobu wjeselachu a nětko po žnjach ty lědma zašćerčiš?“ — „Haj, tehdy mějach ja starosć a nuzu wo žiwnosć a młode, ale nětko je to wšo zašlo.“

(Wokoło 1830.)

12. Škraholec a hołb.

Na zelenym poli dosaže škraholec hołbja. „O běda mi njewinowatemu! Pušć mje, krwělačny rubježniko! Pohladaj k njebju! Njebojiš so sudženja a khostanja, kotrež wšěch zlostnikow dosćěhnje?“ — „Ach, blaznje“, džeše škraholec; „to mam ja dobry srědk, tutu bojosć přewinyć: Ja to ničo njewěrju!“

(Wokoło 1840.)

13. Spěwanski swjedžen ptačiny.

Nowe nalěće ze swojimi rjanosćemi bě přišlo, a wot ptačiny běchu z nim přišli wšitcy najrjeniši spěwarjo. Spěwanska ptačina připowjedzi k česći noweho nalěća wulki spěwanski swjedžen na postajenym dnju a městnje, a tež kurom bu wón wozjewjeny. „Njemóže so tam naš honak slyšeć dać?“ prašachu so kury; „nima tón kazane?“ A jako rěkaše: „Sćežka, sćežka; tón škrjebotak na hnojowej hromadcy njeje prošeny“, dzachu kokoški: „Što tam potom chcemy, naš honak tola najrjeńšo mjeze wšěmi spěwa, a to móžemy džen wote dnja domach slyšeć.“

(Wokoło 1840.)

14. Wrobela a sknadź.

Raz zběhny wrobela mały prućik drjewa a žwačk wołmy ze zemje, zleći z tym na lipu, połoži jo do hnězda, kotrež bě tam baćon nimale dotwarił, a poča na kromje hnězda šćerčec: „Widziš, mój bratře sknadžo, kajku wulku khěžu smój ja a baćon natwariłoj! To by sćežka štó druhi dokonjał, hač jeno mój.“ — „„To sebi ja njebudžech wot tebjemysli!““, džeše sknadź; „„česć, komuž česć słuša!““

(Wokoło 1840.)



15. Sknadź a wrobela.

(Jordan, Jutrnička 1842, 11.)

„Posłuchaj jeno“, praji sknadź k wrolej, „kak wjele rjeńšo hač mój tola tamle tón syłobik spěwa; a woni tež praja, zo je bjeze wšemi ptačkami pola čłowjekow hač najlubowaniši“. — „„Njewidziš ty pak tež““, wotmołwi wrobela, „„zo je wón bjeze wšemi ptačkami tež na mnje najpodobniši? Wón je po prawym z našeje wrolec swójby, a mój smój hišće džensniši džej kaž najbližšej wujej a najlěpšej bratraj.““ — „Jo, jo!“ rjekny sknadź, „ale čehodla džej ty tež tak rjenje njespěwaš kaž wón?“ — „„Ach što, spěwanje tu a spěwanje tam““, wotmołwi wrobela; „„njewidziš džej, kak wón ze wšim swojim wukhwalenym spěwanjom sebi hišće žaneje rjenjeje suknički zasłužił njeje, hač ja mam!““

(Wokoło 1842.)



16. Lisćowe a čorne drjewo.

(Jordan, Jutrnička 1842, 11.)

Lisćowe štomy džachu něhdy k čornemu drjewej: „Porkorjej so před nami; hlaj, kak wjele wyše nas čłowjekowo waža našeho rjaneho khłódneho lisća a młódnijeje zelenosće dla!“ — „„Haj““, rjekny čorne drjewo, „„ale wy so jeno w dobrym lětnim času zeleniće, tak zo ja tehdy přećiwu wam so mjenje być zdam; hdyž pak zły zymski čas

přinǎdže, njesteju ja porno wam zedrojene a čorne kaž kohošćo, ale wostawam za to kóždy čas jenak zelene““.

Něšto mjeńša, ale wobstajna khwalobnosć je lěpša, dyžli wjetša, ale načasna. (Wokoło 1842.)

17. Liška w psyčej koži.

(Jordan, Jutrnička 1842, 44.)

Liška namaka sebi něhdy wuharowanu psyču kožu a wjeseleše so jara na swojim namakanju. „Aj, to je njepodobne zbože“, džeše wona, „tu kožu chcu so hnydom woblec a do wsy běžeć, hdžež su dwory a zahrody poľne kur a hus, žadyn psyk mi njebudže ničo činić, dokelž sym jeho runjeća a žadyn čłowjek mje njebudže znać a mi za žiwjenjom stejeć, wjele skerje so bojeć; to budže mi tola prawa pomazka!“ Wona so wobleče a běžeše stroštnje do přenjeho dwora a čuchaše tam za kurymi a husymi. W tym přinǎdžechu ludžo z khěže, wuharowachu sylnje na nju, nječinjachu ji pak dale ničo. Wona pušći so do druhého dwora. Tam so drje nichtó na nju njedohlada, jako runje za kokošu skradžu po brjuše lěžeše a so hižo woblizowaše, kak dobra budže. Ale njemdry rječaznik Sultan so na měsće na nju wottorže. Liška sebi mysleše, zo ji tón tola ničo činić njebudže, dokelž je wona tež pos; duž jeho dočaka a poča: „Psyčko, luby psyčko, nječin mi tola ničo, hlej, ja však sym tež psyk a nic něhdže liška, tajka bjezbóžna liška kaž druge, kiž kury w dworach ľoja. Khiba zo zwoliš (přistaji bóle mjelčo), to chcemoj so džělic.“ — „Hoho!“ rjekny Sultan, „to by mi było, twoja wurěč a tajke zamolwjenje će přeradzi“, a bjeze všeho džiwanja na wosobu a slubjenje dosaže ju za šiju a překusa ju tak, zo na měsće ležo wosta. „O“, džeše liška slakajo, „ja hewak pře wšo mudre, lestne stworjenje, kak sym so ja truhnyła; mudrych ja zjebach, ale hlupi mje krydžechu. O na tu njeħblowanu sprawnosć.“

(Wokoło 1842.)

18. Kapon a sroka.

(Jordan, Jutrnička 1842, 54.)

Stary a šepjerjawy kapon steješe při škličcy bėrnaw před khěžu pak wołajo kury k sebi pak sam jědzo. Běše pak runje wulki sněh a zyma, a duž počachu so tam hlódně wroble hnydom k njemu towaršić; tež jena hlódna sroka z ponoška přihladowaše. Ale kapon běše njepopřaty, zły pachol a njeda žanemu wroblej blisko. Po khwili přileći sroka dele, sydže so kusk nazdala a poča rěčeć: „O kaponje, kajki starosćiwy muž ty tola sy za swoje žony, kak lubosće dostojny! kajki wutrobity, rjany młodźenc ty sy, kajka to pycha a krasnosć twojeho rjemjenja a twojich pjerjow, kajkej z wotrohami wobronjenej nozy ty jeno tola maš! To tebje wulcyšnje debi. Ale kak ja tebje wobžaruju, kajka to škoda, zo swojich hewak přistojnych wotrohow dla k ničemuh khodźić njemóžeš.“ — „Oho, to žno wěrnó njeje“, rjekny kapon, „ja móžu kaž zemjan hić, hladaj jow!“ a z tym džěše wón z horda wustupujo wulki kruch wot šklički přeč. Mjez tym přiskoči sroka, hrabny bėrnaw ze šklički a lećeše na třěchu. Zjebany kapon hladaše mjerzacy za njeju a dikotaše: „O ty tajka a hewajka khwaleńska padušnica, tak mi njedyrbi nihtó wjac přinć!“

Kaž tutón kapon, tak da so dosć bohačkow a nadutych wot hlódných khwaleńskich lišćakow zjebać.

(Wokolo 1842.)

19. Je to na čo podobne?

(Jordan, Jutrnička 1842, 57.)

Něhdy njeseše muž z blědym wobličom a šeseratomy włosami ze swojeje khěže zawjazany pošny měch a měješe mysle jón na puć ćisnyć. Džěše tam swjaty Jan nimo, lubowany wučobnik našeho zbóžnika, a prašeše so: „Što tola maš, bórčaty mužo, w tym měše, zo chceš jo na puć wućisnyć?“ — „Ach“, džěše muž, „ja so z mojeju

žonu jara wulcyšnje wadžu, duž sym jeje a mój rozym do tuteho měcha tyknywši zawjazał a njesu jón won ćisnyć.“ — „O mój luby“, rjekny swjaty Jan, „wróć so zaso nutř, sadź waju rozym z měcha won, wzmitaj kóždy swój dźěl zaso k sebi a potom ztykaj waju wobeju złoby a njekhmanosće do teho měcha a te ćisń won“. — „Z teho budže sćežka što“, rjekny muž k swjatemu Janej, „dokelž to wšo do jeneho měcha nutř njepóndže a tak dolho njejsmoj zawěsće přez jene, zo bychmoj te šepjerjawe złoby a njekhmanosće do wjacy měchow ztykało; zawostanje-li pak što wot naju njewućisnjene, hlej, tehdy wěš, zo jedyn čert druheho přeco zaso nutř woła.

(Wokoło 1842.)

20. Kuntworje.

(Tydź. Now. 1842, 11.)

Wě kuntworje lětaštej wječor překi a po dlu po woknowej škleńcy, přez kotruž we jstwje jasnu swěcu widžeštej a žadaštej sebi wulcyšnje jara do jstwje a k rjanej swěcy přińć. Po khwili pak wotewri něchtó to wokno, wonej namakaštej tež hnydom wočinjeny kukačk a lećeštej w runej měrje do swěcy, w kotrejž pak sebi swoje křidła spalištej. Dele padnywši počeštej žalosćić: „O mój blaznaj, o mój najhubjeńšej stworjeni! Štož mějachmoj prjedy za swoje wěste wjesele a zbože, to je nětko naju najwjětše njezbože!“

Takle by někotry zakrasnjeny króć čłowjek do swojeho njezboža zaběžał, hdy by Bóh luby Knjez jeho próstwy wusłyšał abo jemu poradženje teho dał, štož z wjele prócu pyta a čini.

(Wokoło 1842.)

21. Škowroněk a pocpula.

(Tydź. Now. 1842, 27.)

Škowroněk a pocpula měještaj zwadu mjez sobu, a sudnik bě kokula. Ta da škowroněkej najprjedy před so

stupić a praji, jako bě jeho slyšala: „Ty maš cyle njeprawje“, dosahny a zežra jeho. Na to přihladujo měnješe pocpula, zo džě je wona dobyła. Kokula pak džeše: „Hač runjež maš prawje, sy ty tola tež smjerće hódna“. — „Kak sym ja móhla smjeré zawinować“, praji pocpula, „hdyž měješe tola škowrončk njeprawje?“ — „Aj“, wotmołwi kokula pocpulu dosahnywši, „pola mje je prawda a njeprawda w jenym měše, hdyž mam tajki surowy hlód a tajku slódku žratwu kaž džensa na wamaj!“

Nic přeco přehraješ a dobudžeš, za tym hač maš prawu abo njeprawu wěc, ale za tym hač maš sudnika. Ale hladaj so, zo bychy nawalne žadosće sobu k sudu njesedžale.

(Wokoło 1842.)

22. Pawkaj.

(Tydź. Now. 1842, 31.)

Waj pawkaj měještaj w lěsu na khójcy swoje wobydlenje a běštaj lóžšeho horje a dele laženja dla wjele nicow wot zemje na štom a do hałozow horje napřadłoj. Jako tam něhdy mócný wichor nimale wšitke khójcy spowala a jeju wobydleńska khójca stejo wosta, džeše jedyn pawk k druhemu po wustatym wichorje: „Widziš, bratře, kak te naju postronki dzeržachu! Njeběchmoj mój khójcu tak twjerdže k zemi připřadłoj, budžeše so wona tež dušanečny wuwróciła, kaž te druge připódl!“

Takle činja so tež husto dosć ludžo wulcy a připisuja sebi, štož so cyle bjez jich mudrosće a mocy samo wot so stało by abo podało njeby.

(Wokoło 1842.)

23. Džěco a šeršeň.

(Tydź. Now. 1842, 39.)

Mały hólčec Pawoł přińdže něhdy do hornjeje jstwy svojich staršich, kotraž bě dołho začinjena byla, a namaka tam na woknowej descy šeršenja we womorje ležo, dokelž

njeběše tam dołhe časy žaneho čerstweho powětra a ničo k jědźi měl. „Ach ty wbohe zwěrjatkó“, rjekny Pawoł, „ty sy z njerozymom do jastwa přišoł, w kotrymž by kónc wzał, njebudžech-li ja k twojemu wumoženju přišoł; kak by mje ty prosyl, hdy by řećeć móhl abo hižo wjacý hač połmorwy njebył; čakaj, ja chcu ěi čerstweho wožiwjaceho powětra dać.“ Pawoł dychaše ćoplotu na njeho, wón woćini tež wokno a čakaše dołhe časy, hač so šeršeń woprawdže hibać poča, tež z křidłami pjerchajo šwórkotaše. „O ja widžu, mój luby lětačko, ty sy wěsće tak zawutleny a słaby, zo prawje k mocam přińć njemóžeš, ja chcu ěi po dobre jědło hić, zo by so posylnił a swój puć lećeć móhl.“ Pawoł džěše a přinjese zhnidličenu krušej a položil ju šeršenjej, kiž bórzy wot njeje cycaše a jědžeše a přez to nowe mocy doby. Šeršeń bě so do wole najědł a poča po woknowej descy běhać, tež lětajó do woknoweje škleńcy bić. Pawoł wza jeho do ruki, zo by jeho z kukačkom won sadzil. Lědma pak běše jeho zapřijał, skała jeho šeršeń ze swojim žahadłom a wuleći z woknom. „O ty zle, njedžakowne zwěrjo“, zawoła Pawoł plakajo, „je to nětko moje myto, zo sym tebi wot smjerće k žiwjenju pomhał?“ a běžeše žalósćo k nanej. Nan wobaleše a lěkowaše Pawołej skałany porst a džěše: „Mój synko, takle kaž tebi dže so někomužkuli pola ćłowjekow při wopokazanju dobroty. Nic jeno zo žadyn džak njedostanje, ně, wón ma so hišće hladać, zo by za njepřećela džeržany njebył, kaž měješe tebje šeršeń za njepřećela, a zo by křiwdu za lubosć njezhonił.

(Wokoło 1842.)

24. Mrowja a šwjerč.

(Tydž. Now. 1842, 63.)

Špróćniwa mrowja narěča hlódného a zmjerzłego šwjerča, kiž bě w zažnym nalěću k njej po prošenu přišoł, zo by z njej w přichodnym lěću mrowišćo za ćopłe wobydlenje

twarił a jědź z njej domoj nosył, zo by so jímaj potom w zymje derje šło. Šwjerč běše so pola mrowje zhrěl a najědl, a mrowja poča jeho wučić. Jako bórzy rjeńši čas přińdže, běžeštaj kóždy na džěło won. Šwjerč běžeše rano z časom po kiješki a chcyše prawje sprócniwy być, přińdže pak hakle wječor a to z jenym prućikom domoj. Mrowja swarješe jeho a džeše: „Što sy ty tola činił, zo njejsy za cylički dzeń ničo nosył?“ Šwjerč praji: „„Ach, tamle na tej hórcy zetkach swojeho wuja, z kotrymž mějach wjele wučinjenja, wón budžeše mi jara za zło wzał, njebudzech-li khwilu pola njeho wostał.“ Druhi dzeń njeprinješe šwjerč tež ničo wjacy hač prućik domoj a zamołwješe so z tym, zo je tam wonkach strašne stworjenja widzał, a zo njeje sebi z bojosću před nimi domoj wěrił. Třeći dzeń a te druge dny njebě šwjerč džělawiši, ale wurěčowaše so pak na to, zo je ducy skhoril abo so zabłudzil, pak na to, zo je tam hubjeny kraj abo zo je jara slónčko paliło; zo je tam wulki deščik šoł; zo njeje wědzał, hdže so wobroćić; zo je sprócny a sparny był; zo je nowe, lěpše město za njeju pytał; pak powoła so na to, zo je wšak hišće časa dosć a lěco hišće dolhe, a štož podobnych zamołwjenjow wjacy běše. Mrowja wróci tajke zamołwjenja, swarješe a nućeše k džělu. Duž džeše šwjerč: „Ach, ja mam dubowu hłowu, ja twoju wučbu njejsym dosć zrozumił, ty dyrbiš ze mnu won hić a mi wšitko tež k wočomaj rozpokazać.“ Mrowja to činješe. Šwjerč njekeďzbowawaše pak ani na jejne słowa ani na jejne pokazowanja, ale prašeše so přeco něšto druge, bledžeše to, baješe tamne, skoči pak tu na bok pak tam, hladaše do wšěch bokow wokoło so, zahlada so pak na to pak na něšto druge; pak njebě mrowine słowa dorozumił a prašeše so zaso, pak poča piskać a sebi hrajkki činić, zo jenož so čas miny a ničo činić njetrjebaše. Mrowja tehle syta poča: „Ty tola cyle k ničemu njejsy, runjež maš rozym a tež hišće sylniše stawy hač ja. Ty prózniko, chceš dha so ty jeno wote mnje žiwic dać a mi wošcerjejo přihladować, kak ja so

prócuju, a potom ze mnu džělic?“ — „Ty mje ničo prawe a hódne nawučić njemóžeš“, rjekny šwjerč, „a ja tež z cyła a ze wšěm wo twoju wěc a twoje džělo njerodzu!“ Na to praji mrowja: „O ty lěni ludako, jako bě ty hlódny a zmjerzły, rěčeše ty hinak; ty sy jedyn wot tych, kiž wšo móžne chcedža, jenož nic džělać; kiž maju same zadžěwki a wurěče, dokelž žaneje dobreje wole nimaju, a hdyž nikoho ze žanej wurěču wjacu zamolic njemóža, hanja a zacpja to, štož bychu wšak zdobnje činić dyrbjeli.“

Njeje tajkich šwjerčow tež něšto mjez čłowjekami? Hlej, wo šwjerču je tudy rěčane, čłowjek pak je měnjeny.

(Wokoło 1842.)

25. Kokoš a jeja.

(Tydž. Now. 1843, 64.)

Črjóda jejow, na kotrychž pata sydaše, zwadzi so, jako bě z nich zlězła, w hnězdze něhdy mjez sobu, dokelž so spódnym zdaše, zo su wot zwjeršnych bjez potrjeby čišćane a wobćežowane. Wone počachu so přewalować, so storkać a bić, hač běchu so wšitke naranile abo rozbiłe. Jako nětk pata zaso na hnězdo přińdže, poča wona žaloscić a swarić. Jene jejo pak, kiž bě so při tej bitwje wukuliło, rjekny: „O ty naša maćerka, nježaruj a njeswar našu njemudrosć, přetož hdy by ty lěpje za nami hladała a tak husto a dołho z hnězda njezběhowala, njeby so tajke njezbože wěsće stało!“ — Ródne kedžbowanje wobara njezbožu a zalutuje žalosć.

(Wokoło 1843.)

26. Mjedwjedź, wjelk, liška a sornik.

(Tydž. Now. 1843, 139.)

Mjedwjedź a wjelk běštaj so zwadziłoj a chcyštaj teho dla sam a sam na so hić. Liška dyrbješe swědčić a wupoznać, što je dobył abo přehrał. Wšitcy tři běžachu na

wěstu čisćinu w lěsu, zo bychu tam swoju bitwu dźerželi. Ducey po puću nadeńdžechu sornika, kiž so jich jara stróži a chceše hnydom w najdlějšich sahach čeknyć, jako jeho mjedwjedź ponižnje a přecelnje prosyć poča, zo by wšak sobu na swědčenje šoľ a zo so jemu ničo złeho stać nje-dyrbi. Sornik začu so přez to počesćeny, zo tajcy knježa jeho potrjebaju a zo dyrbi z jeho pomocu tajka čestna wěc wuwjedžena być. Wón dosta k tym jemu hewak strašnym zwěrjatam dowěrnju wutrobu a přimołwješe so k nim z nje-bojaznej přecelnosću. Woni čěrjachu tež móhł-rjec w bratrowskim wutrobnym rozrěčowanju cyły puć a zastachu na wuzwolenej wulkej lěsnej čisćinje, zo bychu tam wotrěčanu bitwu na sam a sam dźerželi. Wjelk wótřeše swoje zuby a mjedwjedź swoje pazory, a liška činješe wažne, starosćiwe a pokhmurjene wobličo, sornik pak pohladowaše dobroćiwe kaž wowca a mjenješe: „Ja drje chcu rady swědčić, ale ja praju, zjednajće so radšo, prjedy hač sebi škodu sćiniće a jedyn wot waju snadź tola žiwjenje přisadži. Liška rjekny: „I baj zjednać! Prawda dyrbi prawda być a wostać, přisadži-li žiwjenje, štožkuli je přisadži!“ Mjedwjedź a wjelk dźěštaj we wjele hronach samaj a samaj na so a krwawještaj wobaj z hłubokich ranow. Liška khwaleše wjelkowu zhibitu spěšnosć a jeho kónčojty zub a zechcywaše wjelkej dobyće přisudzić, sornik pak mjedwjedźej po prawdze přědnu khwalbu dawaše a swědčeše z řečniwej horliwosću přeciwo lišcy. Z teho nasta nowe wadženje. Wjelk a liška nadpadžeštaj na jene dobo sornika, daještaj jeho a bjerještaj jemu žiwjenje w mjedwjedźowej přitomnosći. Sornik poča wolać a skoržić: „Mjedwjedžo, mjedwjedžo! hladaj na tu njepodobnu njeprawdu, kotraž mi twoje dla so stawa, pomhaj, wumóž mje!“ Liška pak džeše z krwawej khlamu: „O sorniko, hdy by ty tak wjele mudrosće a rozyma we hłowje měľ, jako maš wysoke a kónčojte rohizna na hłowje, to njeby so hakle do našich naležnosćow měšaľ a do tajkich paslow šoľ.“ Mjedwjedź pak jenož wjelka a lišku jara

swarješe, potom po khwili so směješe a žerješe sornikowe mjaso sobu.

Hladaj so ludži, kotrymž poruny njejsy; njech so ći dobro njezda, hdyž tebje do swojich zwadnych naležnosćow ćahnu; na posledku so ći při najlěpšim mēnjenju a prócy najskerje zlě dže a sy wopušćeny. (Wokoło 1843.)



27. Khrobolenje zajekow.

(Tydź. Now. 1843, 179.)

Prři mlode, tola pak hižo wotrosćene zajacy wuběžachu z hłubokeho, ludži prózdneho lěsa, zo bychu so w swěće rozhladałe a něšto nawědźiłe. Połne dobreje mysle přińdžechu na čisćinu do hołeho pola a nadběžachu tam škowrončka, kiž začikotajo před nimi do powětra zleći. „O, kajke smy my trašne zwěrjata na swěće“, džeše jedyn tych zajacow; „hlejtaj, kak so nas tón ptačk naboja a zleći!“ Běžachu zaso kusk dale a nadběžachu tam žabu. Žaba w smjertnym straše skakaše w dolhich sahach hač do bližšeho přirowa a ćekny před nimi. „O, kajka hroza tola wot nas dže, kajke hrózbne zwěrjata my tola na swěće smy“, džeše zaso druhi zajac, „wšitko so nas boji!“ Běžachu zaso kusk dale a nadběžachu tam myš. Ta ćerješe před nimi, hač bě smuha za nej a skhowa so do swojeje džěry. „Woprawdže“, džeše třeći zajac, „strach a hroza wot nas sapa, hdžežkuli my přińdžemy; štož běha, skaka a lěta, wšitko so nas zatrašnje boji!“ Běžachu tam zaso kusk a nadběžachu hat, w kotrymž so dosć rybow při kromje na slónčku wohrěwaše. Te splunychu z wulkim pluskotom do hłubiny. „Roztejće!“ džachu zajacy, „cyły swět my začěrimy!“ Same před sobu skoro nastróžane, zo so jich wšitko boji, sedžachu zajekki pola hata a hladachu wokoło sebje. Duž dohladachu so na něšto, štož k nim džěše. „Pójće“, džachu, „chcemy jeho nadpadnyć, teho zelenka; wón tola dale ničo

njeje, hač tón prjedyši zeleny skakačk, kiž so před nami do přirowa skhowa, jenož tajki něšto wjetši!“ Tónle zelenk pak nječěkaše, ale sčini ze swojej pryskawu brdawe, hač so zakuri! Z dvěmaj zajacomaj bě nimo! Třeći khrobolak pak načahowaše swoje čekadla.

Něchtóžkuli so hnydom khroboli,
Hdyž so snadna wěc 'mu poradzi.

(Wokoło 1843.)

28. Njewěf kóždemu!

(Tydž. Now. 1846, 99.)

Liška připowjedaše kaponej a kokošam, kiž horjekach na štomje sedzachu, zo je wěčny pokoj a měr sčinjeny ze wšěmi zwěrjatami na zemi, tak zo změja přichodnje wjelki a wowcy, liški a kury wěčne přecelstwo mjez sobu. Z tajkimi řečemi pak chcyš wona rada kury ze štoma dele wabić. Ale kapon wotmołwi: „Aj, to je pěknje! to ja rad slyšu!“ a načahowaše při tym šiju a zakrjeholi. Liška so woprašaja: „Što dže tak hladaš?“ Kapon wotmołwi: „Ach, dale nič, ja tamle hajnika widžu z psami přikhadzaceho.“ Liška rjekny: „Duž tu ja njewostanu.“ Wotmołwi kapon: „Počakaj, potom chcemy tež my k tebi dele přińć, hdyž widžimy, zo maju psy z tobu měr.“ Liška praji: „Ně, psam snano měr hišće njeje připowjedany a znajomy; duž ja čekam.“

(Wokoło 1846.)

29. Móc a prawo.

Pro wuzkim čistym puću přijědžeštaj sebi móc a prawo napřećiwo. Žadyn wot njeju nochyš so wobwinyć, dokelž bě po boku blóto, wosebje pak, dokelž měješe kóždy sebje za wosebnišeho, kotremuž dyrbi nižši z puća hić. Kažkuli wótrje so wo swoju přewahu wurěčowaštej, žadyn njepřepokaza druhého a duž so zjednocištaj, zo chcetaj so přenjeju

dweju pućowarjow wo jeju měnjenje prašec, a třeci dyrbi potom wusudjenje dać. Tak so sta. Prěni džeše: „Praweho dyrbi podpěrać móc.“ Druhi džeše: „Mócneho dyrbi podpěrać prawo.“ Třeci džeše: „Prawo a móc dyrbitej sebi słužić, hewak z woběmaj klaca!“

(Wokoło 1850.)

— * —

30. Zeľhařna liška.

Liška běše w přitomnosći swojeho syna z husymi wo nowym porjadku a zakonškim wustawjenju mjez lětakami a štyrinohakami řečala a tu nowu wěc žalostnje wukhwalo-
wala. Jako so na to ze swojim synkom wot hata wróci, praji ducy młoda liška: „Ale maćeřka, mi so zda, zo sy tola njemóžnje lhała abo z najmjeńša z kuntworow slonow džělała! „„Blazniko! moje řeče běchu runje tak mudre jako přislušne““, wotmołwi liška synkej; „„přetož nam liškam, runje kaž někotrymžkuli čłowjekam, wěrja na dobre zbože tak hakle lědma položcu teho, štož řečimy!““

(Wokoło 1850.)

— * —

31. Zhubjene zbože.

Khudy muž prošese něhdy zbože, zo by chcyło jeho ze swojej darniwosću zwjeselić. Zbože, přećiwo swojemu wašnju, zjewi so jemu a džeše: „Duž měj so hotowy a zwočinyj wšě swoje durčka, wokna, křinje, kašće a sudobja, zo bych móhło do nich, je napjelnić. To činješe khudy muž a nabi tež hišće hozdzikow po wšěch scěnach we jstwje, zo by powěšał, štož w sudobjach atd. snadź městna njezměje. Z dobom přińdže knježi služobnik z hrodu a praji: „Štyri kórcy zemje dari tebi mój knjez, su pak hišće pusćina, duž dyrbiš sebi je k polu přihotować“ — „„Wčera budzech to hišće za wulki dar přijal, mój luby““, džeše khudy muž, „„ale džensa so džakuju; ja sym teho drjenja syty, džělać wjacy njebudu““. Po khwili ruješe a bječeše něšto na

dworje. Wón pohlada z woknom a hlej! rjana pisana kruwa a celo khodžeštaj po dworje a měještaj papjerku z napismom: »Tebi darjenej!« — „Ach ně“, džeše khudy muž, „konje budu sebi kupować, cyłu hródz tajkich skoćatow cheu měć a wulke kubło sebi kupić!“ Wón stupi před khěžu a hlej! splóšeny kón přileći po puću jězdneho w jenym třemjenju wisaceho po zemi wlečo. Khudy muž zdžerža konja a wumó jězdneho, wosebneho knjeza, wot trašneje smjerće. Knjez džeše: Wuproš sebi dar wote mnje abo wzmi jowle sto toler za myto.“ — „„Ach!““ mysleše khudžink, „„jutře změju miliony,““ a džeše: „„Ně, mój knježe, dajće te pjenjezy někomu khudšemu a zwjeselće teho.““ Džeń bu wječor, a khudy muž njeměješe hišće nič. Wón mysleše: „Slubjene bohatstwo přez nóc přińdže“, a wostaji tehodla nocy wšitko zwotčinjane. Rano wón stany a widžeše wulku tyzu na blidže stejo. „Aha, aha!“ džeše wón, tule džě tola něšto budže“; ruče ju wotčini a što tam bě? List tam ležeše wot zboža pisany: „Mój krótkowidžacy khudžinko, budž tu božemje; budžeše Ty wčera Twój rozym tež tak šěroko wotewrił kaž Twoje khěžne durje, a Twoju lěnju požadliwosć na jedyn tych hozdžikow na scěnje powěsnył, to budžeše był muž najbohatši!“

(Wokoło 1850.)

32. Hłódnny knot.

Knot ze swojeho doma a zamoženja přez powodženje wuhnaty přińdže smjerć hlódnny k myši a prošeše: „Daj so mi kusk najěsć!“ Myš naswari jeho a njeda jemu nič. — Duž džěše knot k žurkej, swojemu wujej, a prošeše: „Daj so mi najěsć, přetož ja sym jara hlódnny!“ Žurk jeho wuhna a začini durje za nim. Knot běžeše do lěsa k wjewjerčcy, kiž hable a bukwicy lušćeše a prošeše: „Luba ćeta, njedaj mi hłodu wumrjeć a smil so nade mnu! Zdžěl mi twojeho kubla něšto.“ Wjewjerca praji: „„By džě mudriši był a so lěpje wobhladał!““ a njeda jemu nič. W kamjenjach a

skalobach nadeńdze knot jěža; temu skoržeše swoju nuzu a prošeše: „Požč mi na dobru dań něšto jědze, přetož ja zawutlu!“ Jěž praji: „„To móhl něchtóžkuli přinć; staraj so dale!““ Knot přińdze k šwincej, kiž spaše. Knot jeho cybaše a šwinc wocućiwiši słyšeše knotowu skóržbu a potrjebu: „O, lubje rady bych tebi poslužil, ale hladaj, tu je wšo prózdne.“ — „„O, hubjenstwo!““ žalósćeše knot; „„najdarniši, kotrehož nadeńdzech, ma runje najmjenje k rozdaću!““

(Wokoło 1855.)

33. Zajac — winnik.

Styrinohaki přećiwo lětakam bitwu přěhrachu. Přičina tuteho njezboža bu přepytana wot najwyššeho hač k najnižšemu. Za winnika bu zajac póznaty, dokelž njebě prawje poslušal a njepracelow radu doslyšał. Duž wot rězachu jemu wopuš, kotruž hewak doľhu nošeše a k wušomaj ju přišichu. Wot teho časa nosy zajac dolhe słyšicy.

(Wokoło 1855.)

34. Woklep a rudowy kamjeń.

Woklep słomy a rudowy kamjeń ležeštaj sebi z napreća w dworje, a woklep poča: „Ty stara ruda, wjele dżesat lět jow ležiš? Hladaj, ja sym za jene narostla a słužu hižo čłowjekam a z kak maľeju prócu móže čłowjeska ruka wote mnje wudžělać třěšny walčk, słomjany klobuk abo druhe pletwo!“ „„Haj!““ rjekny ruda, „„haj, wjele wjacy časa trjebam k narosćenju a wjele prócy je trjeba, doniž čłowjek mje na wužitk staji, ale za to wudžěla wón wote mnje železo a worcl, a wužitk tuteju mojeju hólcow na swěće njeje snadny; haj, přemóžetaj tebe a cyły swět, a njeradžu tebi, so z nimaj měrić.““

(Wokoło 1855.)

35. Mucha a kachle.

Mucha, kiž bě we jstwje zymu dočakała, sydže so zmjerzła na kachle a zynčeše: „Nó, wohrěwaj, wohrěwaj, towařšo! — njewidžiš, kak wokna hałozuja?“ — „„Leć džě“,“ džachu kachle, „„lónčko šćěpkow připołožić, na nami nje-dyrbi žadyn porok ležeć““. Mucha widžeše swoju njezamóžnosć a huhotaše zrudna, kachle pak džachu: „„Swarić a porokować je lóže, hač wěc činić.““ (Wokoło 1855.)

36. Čelko a kózlik.

Čelko a kózlik dyrbještaj něhdy do města hić, čelko po cyblu, kózlik po poprjanc, a zo njebyštaj zabyłoj, što mataj přinjesć, spominaše kóždy mjelčo z kóždej kročelu: cybla, cybla, cybla — poprjanc, poprjanc, poprjanc! Duce na puću přinđžeštaj k hrjebi a dyrbještaj přez nju skočić. Skočištaj wjesele, ale z tamneho boka hrjebje njewědžeštaj žadyn, po čo džetaj. „Mi je zaskočilo, što dyrbju přinjesć“, rjekny čelko. „A mi tež moje mjeno“, mjakotaše kózlik; „štoha nětko?“ Wobaj wobzamknyštaj zaso přez hrjebju wróćo skočić we nadźiji, zo kóždemu jeho mjeno zaso naskoči. Ale nič! přeč bě přeč, žadyn njemóžeše so wjacy dopomnić. Wonaj džěštaj zrudnej domoj. Blizko při wsy pak dopomništaj so kóždy na swoje mjeno a džěštaj zaso k městu, ale nic přez hrjebju, zo by jimaj wospjet njezaskočilo. Jako město wuhladaštaj, spodžiwaštaj so njemóžnje jara a při tym zhubi kóždy poslednju zlóžku swojeje skazanki. Čelko njewědžeše nič wjacy, hač cy— a kózlik nič wjacy hač po— a džěštaj do města jedyn přeco cy—cy—cy a druhi po—po—po prajo. (Wokoło 1855.)

37. Zapowjedžena próstwa.

(Časopis Mać. Serbsk. 1856, 12.)

Njerunych wobćežnosćow a wšelakich podćišćenjow dla přińdže džělba mjenšich štyrinohakow krala lawa wo pomoc a polóženje prosyć. Wušikna liška bě wot nich za řečnika před kralom wuzwolena a řečeše jara mócnje a dušnje. „Wšo dobre“, wotmołwi kral, „ale ze wšěm prawom dwěluju na wěrnosći a prawdže wašeje wěcy, moji lubi, nic was skóržbnikow, ale wašeho zastupjerja dla, kotrehož lestnej hubje je čím mjenje wěrić, čím lěpje řeči. Duž džiće a dajće mi pokoj, doniž njezměju druhe dopokazma.“

Chceš być derje zastupany,
Hladaj, što će podpjera,
Jebak znaty, přewołany
Wěc najlěpšu rozkida;
Z wopluskom ždyn jeho mjena
Je tež twoja prawda křćena.

(Wokoło 1856.)

38. Křiwda a wječenje.

(Časopis Mać. Serb. 1856, 12.)

Njemdry a wólny woł rozbodže w lěsu mrowišćo a směješe so tyšnym mrowjam, kotrychž wjele při tym skón-cowa. Mrowje hrožachu z wječenjom, a to bě wołej hakle nimo měry směšne. Bórzy na to přińdže tam liška k roz-bodženemu mrowišću; mrowje skoržachu jej swoju křiwdu, namołwjachu ju na wječenje a wuradžichu je hromadže. Jako nětko woł zaso do lěsa na pastwu přińdže, běše tam tež liška, skakaše před nim k lubu činicy a hanješe jeho, kaž najlěpje wědžeše. Woł roznjemdrjeny pušći so za nje-přećelnicu, ta pak ćěrješe prosty puć do blizkich tonidłow. We sleposći swójeho hněwa njepytny woł swój strach prjedy, hač so tam přepadny, a čím bóle so prócowaše wulězć, čím

hlubje wjazny. K jeho přibjeracemu nurjenju a žalosćenju
čušachu liška a mrowje, hač lěs klinčeše.

Njezamóže něchtó tež so spječić,
Móže wšak wón na tebi so wječić!

(Wokoło 1856.)



39. Pokutny wjelk.

(Časopis Mać. Serb. 1856, 13.)

Stary wjelk, kusany wot zleho swědomja, jako widžeše,
žo z nim skoro ke kóncej khwata, wobzamkny so nakazać
a sčini pokutny slub: kóždy tyždeń jedyn dzeń so rubjenja
wostajić, to we druhich šesćich dnjach rubjene a roztorhane
pak z hlódnymi, khorymi a słabuškimi bratrami džělic. Wón
měnješe z tym nic jeno boži hněw a swoje swědomje po-
óišić, ale tež hišće khwalbu dobroćeřskeho stworjenja dobyć
a po sebi zawostajić. Powěsć jeho wotmyslenja zhonichu tež
wowčerjo, a jedyn wot nich džeše: „Zawěrnje, tón stary
ludak je sebi swoju pokutu na wěstych ludžoch wothladał,

Kiž falšnu pokutu za prawu
A jejnu dań sej postaja:
Za džesaćnowař wulku sławu
A za šěsć kroškow njebjesa.“

(Wokoło 1856.)



40. Myše a pasle.

(Časopis Mać. Serb. 1856, 13.)

Črjódka myši wuhlada w pincy groćane pasle, a
jena z jich srjedzizny džeše: „Hač-tež-to to tola žane pasle
na naš njejsu, wo kotrychž so přeco tak wjele słyši?“ —
„„Hm, pasle?““ džachu te druhe, „„te móhłe sebi runje při-
chodneho nakedžbubranja dla bliže wobhladać. — Aj aj!
kajka to přejasna, z ceńčkich prućikow do wysokeho wo-
bluka murjowana khěžka! — A što tež je nutřka? — Aj
aj! muka a poč, naše najlěpše jědło! — Ně, ně! tak hlupi

čłowjekojo wěsće njejsu, zo chcyli nas přehrymzarjow do tajkich čenkonitkatych scěnkow lojić, a k temu su jowle durje nutř, kiž so, dušanecy, njezačinjeja.“ — Duž rěkaše: fuk nutř přez wuzku gročanu džěrku, — a dachu sebi derje słodzić. Ale, ale, ze swojim žiwjenjom dyrbjachu samomudre womłodnicy swój spokoj plaćić, přetož za jich njewulězenje bě starane, prjedy hač bě žana pasle wohladała.

Nutř něhdžežkuli z lohka dže,
Nic tak tež won — to wopomńće!

(Wokoło 1856.)

41. Nižše steji číše.

(Časopis Mać. Serb. 1856, 14.)

Prři kromje wulkeho lěsa k njebjesam dosahacych štomow steješe jałorc a zhladowaše njespokojny a zawistny k jich wysokosći. „Ach, čeho dla“, džeše wón, „njejsy mje, Božo, jako tajki majestetiski štom stworił? Kak wjele prjedy a dlěje bych slónčko wužiwał a dale widzał!“ Blysk a hrimanje z powalacym wichorom přičeže, najwjetšeho hobra štomow rozrazy bože njewjedro, a črjóda druhich pódlanow, jałorcowych susodow, ležeše wuwróćena jałorcej k nohomaj a zdychowaše žalostnje na swoju škódnú wulkosć. To widžo hańbowaše so jałorc swojeje zawisće a džakowaše so Bohu za swoju nizekosć, kiž bě jeho zdžeržala.

Njezawidź nikom' jeho wysokosć,
Ty njewěš jeje strachotnosć!

(Wokoło 1856.)

42. Želny žurk.

(Časopis Mać. Serb. 1856, 14.)

Něhdy wo žni nadeńdže bur žurka na poli. Tón da so z burom do rěči a poča před swojej džěru: „O kak je mi tebje wutrobnje žel, wbohi rólniko, zo je lětsa tak njepłodny čas, a zo maš tak khude žně.“ — „Šelma ludařski“, wot-

mołwi bur, „lutuj swoje žarowanje, přetož ani khlamu njeby rozdajil, byrnjež ja kónc wzał, hdy by z mojej škodu sobu nječěrpił.“

(Wokoło 1856.)

43. Strach a njestrach.

(Časopis Mać. Serb. 1856, 15.)

Mać liška wjedžeše džowčičku přeni raz do swěta, zo by ju to a druhe nawučila. Daloko njeběštej přišloj, duž widžeštej nazdala wulkeho řezniškeho psa běžo. „Njedyrbimój před tym čekać?“ prašeše so šeptajo džowčička. „Ně, před tym nic!“ rjekny mać. — Hišće njeběštej poł hodžinki dale, a wuhladaštej košypsychka nazdala běžo. „Maći, njedyrbimój před tym so minyc?“ praji zaso mloda pućowařka. „Ně, wotmołwi mać, před tym tež nic!“ — „Ale maći“, džeše, mloda liška, „njejsy mi ty wosebje připoručila so psow hladać?“ — „To drje sym“, praji stara, „ale hlaj, wulki pos njeje nam ženje strašny swojeje njespěšnosće a mały swojeje słabosće dla; te srěnje pak, te su naši mordarjo, z tymi njejsu žane žorty.“

(Wokoło 1856.)

44. Mucha a wózher.

(Měsačny přidawk k Serb. Now. 1859, str. 27.)

Mucha a wózher zetkaštaj so něhdy na puću pola jeneje wjeřby. Tu wotpočowaštaj a na so hladaštaj. Mucha bě jara pokhmurjena a bórčeše z mjerzanjom. Wózher so jeje wopraša, što ji je a hdže je so nastajila. Mucha džeše: „Ja éahnu z města na kraj; w měsće njeje pěknje, ja dyrbjach wot swojeho přecelstwa.“ — „Ej, wotrazy wózher, ja sym kraj wobešoł a tam tola tež ničo činić njeje.“ Mucha znapřećiwi: „W měsće je zawěsće hórje, dokelž tam steja jenemu wšitcy za žiwjenjom a khodža z placawu za nami. Moja sotra je mi prajić dała, zo je na kraju pola jeneho bura; pola teho móžemy so z črjódami do škle synyc a sobu jěsć, nictó nam ničo njepraji a nječini.“

Wózher přistaji: „Moja luba, mi pak je so nawopak na kraju zlé šło, tam mje wusmorknjeja a wo zemju wrěsnu; w měsće pak — kaž sym słyšał — zawala našeho jeneho do najrjeńšeho rubiška a tyknu je do zaka. To so mi lěpje lubi, dyžli pola twojich burow.““

(Wokoło 1859.)




45. Moje pjenjezy ja hišće mam.

(Jordan, Čitanka str. 26.)

Waj pućowarjej, nadpadnjenaj ducy wot rubježnikow, dyrbeštaj jim cyłe zamoženje dać. Duž rjekny jedyn: „Nětk móžemoj so božemje domoj wróćić khudaj kaž cyrkwinej myši a ducy kradnyć abo po prošnju hić.“ — „Ani jene ani druhe““, wotmołwi tamny; „moje pjenjezy ja hišće mam!“ — „Ty hišće maš?“ džeše jeho towařš: „hdže na žiwym swěće sy je skhowane měl?“ Wón dosta wotmołwjenje: „Hlej, moja hłowa steji hišće na mojimaj ramjenjomaj strowa a mojej rucy stej sylnej dosć a rozymitej džěło, kotrež wšitecy ludžo trjebaju a płaća, — duž luta rada, žana nuza.““

(Wokoło 1870.)



Přidawk:

Žiwjenje a skutki Handrija Zejlerja.

Wopisał E. Muka.

Rozprawa wo zhromadnym wudawku.

Zestajał Jakub Šewčik.

Handwritten text, likely bleed-through from the reverse side of the page. The text is mirrored and includes the following words:

Pridawka:
Ziwienski a skutki Handlijskego
Rozprawy wo xristianskim wydawku
Zostajal Jakub Nowicki

Žiwjenje a skutki Handrija Zejlerja.

Motto: Za žiwjenje je cyły lud we wutrobje nosył,
Wumrěwši je žiwy we wutrobje cyłego luda.
Klácel.

Handrij Zejleř* narodzi so 1. febr. 1804 w Słonej Boršći, serbskej wjesy hodžinku k wječoru wot Budyšina, jako jenički syn serbskeju staršeju. Jeho nan Jan Zejleř, * w Słonej Boršći 30. nov. 1767 — † tam 27. sept. 1844, běše wobsedzeř małeje žiwnosće a wustojny studnjetwarjeř, a jeho mać Marija, * 18. hapr. 1773 — † 17. aug. 1847, pokhadžeše z Běrkec swójby na Sokolcy, wsy blisko Budyšina. Handrijowy džěd Jakub Zejleř běše rodzeny w susodnej wsy Bolborcach a woženi so z wobsedzeřku teje žiwnostki Hańžu rodź. Rynčec ze Słoneje Boršće. Do Bolborc běchu Zejlerjo z Hornjeje Boršće, wsy Hodžijskeje wosady, pričahnyli; tam a w susodnym Žičenju su hišće mužscy potomnicy Zejlerjec splaha, mjez tym zo je wot Słonoboršćanskeje wotnožki Zejlerjec mjeno z našim basnikom wuhasło; jeho jenička sotra, kotraž sebi muža

* Žiwjenjopisne naćiski wo H. Zejlerju mamy: wot J. E. Smolerja we Lužičanu 1872, str. 173 sll.; wot M. Hórniku w Časopisu M. S. 1874, str. 63 a w čěskim „Slovníku Naučném“ s. v.; wot A. Hilferdinga w „Russkaja Besěda“ 1856; wot J. Libša w čěskim illustrowanym časopisu „Světlozor“ 1882 č. 52 z wobrazom, kiž je přenjemu zwjazkej tuteho wudawka přidaty, a w „Almanachu serbskeje studowaceje młodosće“ 1884 (tež z wobrazom); wot Pypina a Pjecha w „Geschichte der slavischen Literaturen“, Bd. II, 2. Leipzig 1884 na str. 395 sll. (přir. J. E. Smolerjowy serbski přeložk str. 14). Anekdoty ze Zejlerjoweho žiwjenja podawaju Lužičan 1875 a Lužica 1890. Přehlad jeho spisow wot K. A. Jenča namaka so w Časopisu M. S. 1874, str. 58 sll.

wzawši wot nana Zejlerjec žiwnosć dosta, běše při Handrijowej smjerći 1872 hišće žiwa.

W přenjopočatnych wědomosćach bu Handrij Zejleř wot l. 1810—1818 najprjedy w Bolborčanskej wjesnej šuli wot tehdyšeho wučerja Kmocha a na kóncu we Wulkowjelkowskej šuli rozwučowany. Dokelž su mjenujcy ewangelscy Serbja ze Słoneje Boršće w nabožinskih naležnosćach (ad sacra) serbskoevangelskej cyrkwi swj. Michała w Budyšinje připokazani, měješe Handrij Zejleř při skónčenju swojeje šulskeje wučby do Budyšina na paćerje khodźić; Bolborčanska šula pak słuša do Hodźijskeje wosady, mjez tym zo je Wulki Wjelkow do Michałskeje cyrkweje w Budyšinje zafarowany; tehodla najskerje posła Zejlerjec nan swojeho syna poslednje šulske lěto do Wulkowjelkowskeje šule. Handrijowe wubjerne duchowne dary spózna tehdyši farař Michałskeje cyrkweje Bj. Wyl. Mička při paćeřskej wučbje, na kotrejž so Zejleř tak mjeze wšěmi sobušulerjami přez žiwe, jasne a duchapołne wotmołwjenja wuznamjenješe, zo bě fararja žel, hdy bychu dyrbjale tajke wurjadne dary njerozwite a njewužite wostać. Duž při sebi wobzamkny, zo chce so za to postarać, zo by tutón wobdarjeny pachol khudeju serbskeju staršeju na wyššu šulu přišoł, a přeprasy raz přez syna Zejlerjec nana na njedzelu popołdnju k sebi. Nastróžany tutón do města džěše sebi myslo, zo je jeho Handrij najskerje něšto zworał, a strachoćiwu zastupi na faru. Jeho strachoćiwe wobličo pak bórzy spokojny a radostny posměwk přeběža, jako knjez farař jeho syna jara khwalić poča a jemu wukładowaše, kak snadź by so hodźiło, zo by jeho Handrijk studował a wustudowawši ze swojimi duchownymi darami swojemu narodnemu krajej a swojim sobučłowjekam słužić móhl. Překłapjeny Zejlerjec nan do wšeho zwoli, a farař Mička prócowaše so w běhu zymy z pomocu swojeho kapłana H. Lubjenskeho, zo by přichodnemu gymnasiastej Zejlerjej přebywanje w Budyšinje zmóžnił: přimołwi jeho na gymnasiju, wobstara jemu tunje by-

dleňčko a někotre wobjedy w tydźenju pola smilnych zamožitych měšćanow. Jutry 1818 wobnowi Handrij wukhodźiwši wjesnu šulu w Michałskej cyrkwi w Budyšinje swój křćeński slub a bu po jutrach jako wučome na Budyški gymnasij přijaty. Tu wuknješe wón 7 lět pilnje a wuznamjenješe so před swojimi sobušulerjemi we wšěch wědomosćach tak, zo bu, jako jutry 1825 wuwuknywši gymnasij wopuści, ze znatej slěbornej medaillu, kotruž stajnje jenož po wědomosćach a wašnju najwubjerniši na universitu wotkhađacy šuleř dostawa, wot Budyškeje měšćanskeje rady mytowany. Hižo jako gymnasiast poča Zejleř, snadź wot jeničkeho tehdy w Budyšinje přebywaceho swědomeho Serba kapłana H. Lubjeńskeho někak pohnuty a wubudženy, mócnu lubosć k swojemu serbskemu ludu a k swojej maćeřnej rěči pokazować. Wón kedźbowaše hižo tehdy na naše narodne pěsnje a bajki a začu we sebi mócne pohnuwanje, so sam w spisanju serbskich pěsni spytować, kotrež jemu wulku česć a wažnosć mjez jeho serbskimi sobušulerjemi dobychu. Zdźeržalej stej so nam wot nich dvě pěsni ze spočatka l. 1824 (hl. zw. I, str. 3 sl.)

Po jutrach 1825* poda so H. Zejleř do Lipska na saksku krajnu universitu a studowaše tam hač do jutrow 1829 na duchownstwo wudokonjejo so pódla we wšěch trěbných a wužitných wědomosćach. Kaž z wjetša wšitcy serbscy studenci duchownstwa zastupi tež wón w běhu swojeho přenjeho studowanskeho lěta do tamnišeho „Lužiskeho přědařskeho towařstwa“, kotrež ma za Serbow, zo móhli so zdobnje w maćeřnej rěči rozwučować a zwudokojować, wot l. 1814 wosebity serbski wotrjad, tehdy „Sorabia“, nětko pak hišće mjenje derje „Sorabicum“ mjenowany. Tu rozwi Zejleř bórzy wobšěrnju, wjelestronsku džěla-

* We „Lužičanu“ 1872, 174 a w „Čas. M. S.“ 1874, 63 steji wopaki lěto 1826. My mamy wšě tu podate ličby ze Zejlerjowych samoručnych zapiskow.

Wosć na polu serbskeho pismowstwa, a runjež bě a wosta z woprawdžitym wodźerjom „Sorabije“ wot 18.6 hač do Zejlerjoweho wotkhada z Lipska jeho starši towarš a najlěpši přećel Hendrich August Krygař z Hrodzišća jako podstarši cyłego předařskeho towarstwa, bywaše tola Handrij Zejleř duša a duchowny nawjedowař tuteho serbskeho zjednoćenstwa, kotrež wón k najwyššemu, hišće njedocpětemu kćewej pozběže. Wón wučese svojich towaršow lěpje serbski powjedać a pisać, činjo jich kedźbliwych na prawidła a wosebitosće serbskeje rěče, kotrež woni hišće njeznajachu, a čitajo jim wot sebje sameho wudźělane přikładne nastawki; wón porjedžeše a rozsudžeše wot nich porjadnje podawane wudźělki, wón rozwučowaše jich w serbskim prawopisu a zestaja sebi nawabjeny wot Polaka Handrija Kuchařskeho, z kotrymž bě so we Łužicy zeznał, na zakładze pólsko-českeho nowy serbski prawopis z laćanskimi pismikami, kotryž pódla stareho w frakturje nałožowaše. Pod jeho a Krygarjowym nawjedowanjom přepytowachu sobustawy po swědčenju zakhowaneho tehdyšeho dnjownika Sorabije staršu serbsku literaturu a rozwiwanje serbskeje rěče wot časow reformacije, zapisowachu zestarjene serbske słowa a rjane wuprajenja dobrych staršich spisaćelow, hromadźachu wšelake powěsće z bližšeje a najdališeje zańdzenosće Serbowstwa, jednachu wo serbskich wašnjach při narodže, slubje, kwasu, pohrjebje atd. a spytowachu so tež w serbskim spěwanju. Při tajkej horliwej dźělawosći njedosahaše jim po wustawkach prikazana jena tydžeńska skhadźowanka, čehoždla so na Zejlerjowy namjet 8. aug. 1827 wobzamkny, zo chcedža so husćišo hač raz za tydžeń k zhromadnemu rozwučowanju a towaršnemu spěwanju skhadźować! W prózd-
ninach pućowaše H. Zejleř po serbskim kraju zběrajo wupłody ludoweho basnistwa a bajstwa a wabješe k temu tež svojich towaršow. Samo w Delnjej Łužicy wón raz poby najskerje přewodźujo Handrija Kuchařskeho, kiž tehdy serbski kraj přepućowa a hromadku hornjo- a delnjoserbskich ludo-

wych pěsni zezběra, wot kotrychž buchu delnjoserbske (12 čisłow) w „Časopisu Čěskeho Musea“ lěta 1830 (str. 380 sl.) wozjewjene. Zejler pak zapisa někotre do Lipsčanskich „Serbskich Nowin“. Zo bychu so mjenujcy wšě z luda zezběrane rěčne pomniki a mnohe wot njeho a towaršow spisane nastawki zakhowałe jako pohnuwanki za pozdžiše rody Lipsčanskich serbskich studentow k podobnej dźěławosći, běše Zejler z Krygarjom w nazymje 1826 wosebite rukopisne „Serbske Nowiny“ založil; do nich zapisowaše wón najpilnišo, tak zo wjetša položca jich narodnostnych a rěčnych zběrkow kaž poetiskich a prosaiskich wudžělkow wot njeho pokhadža. Za jeho čas je so wot 25. nov. 1826 hač do 16. dec. 1828 runje 60 čisłow tajkich pisanych Nowin wudało, kotrež z časom tajku wažnosć docpěchu, zo buchu samo domach po serbskim kraju w mnohich wotpiskach rozšěrjane a wot njeho tež hišće pozdžišo, jako běše hižo w Klukšu z duchownym, hdys a hdys z přinoškami podpjerowane.

Zejler měješe w Lipsku wobkhad nic jeno ze swojimi serbskimi a němskimi towaršemi předařskeho towarstwa, ale tež z druhimi słowjanskimi tam studowacymi nadobnymi młodźencami zeznawši a spřeceliwši so hižo w l. 1826 wosebje ze sławnym južnoserbskim basnikom a spisowaćelom Simu Milutinovićom a z młodym čěskim wučencem a stawiznarjom drom. Francem Palackim, kotrejž jeho kóždy po swojim wašnju w jeho dźělanju na poli serbskeho pisowstwa posylnjowaštaj a pohnuwaštaj.

Milutinović Zejlerja jako basnik w jeho basniskich popytach wobkrućeše a k přeco wyššemu wudokonjenju jeho pěsniskich darow pohonješe, tak zo bu tehdy we nim položk k přichodnemu serbskemu ludowemu pěsnjerjej položeny. Zejler spóznawši, zo móže jeho basniske skutkowanje jenož potom na wuspěch ličić, hdyž so na serbske ludowe basnistwo založi, zběraše a studowaše čím pilnišo serbske narodne spěwy. A kak hłuboko běše wón hižo tehdy jich

woprawdźite byće zapřijał, wo tym swědča wšelake jeho pěsnje ze studentiskich lět kaž n. p.: „Zady našej pjecy kuntwory hraja“ — „Sym Serbow serbske holičo“ — „Zezady hunow w zahrodže“ (dalše hl. zw. I, str. 1—157), kotrež na wosebitych papjerkach čišćane* bórzy do luda přeńdžechu, tak zo móžeše je J. E. Smoleř w l. 1841 z połnym prawom do swojeje wulkeje zběrki „pěsničkow hornych a delnych lužiskich Serbow“ (hl. zw. I, str. 96, 252 a 308) přijeć wo přeńšej ani njewědžo, zo je hakle nowiši wupłód Zejlerjoweho ducha, tak powšitkownje rozšěrjena běše hižo tehdy po serbskim kraju. Tola tež za zabawne skhadžowanki „Sorabije“ so Zejleř postara. Dotal spěwane, z wjetša špatnje spraskane přełožki němskich studentiskich spěwow so jeho poetiskemu ducej mało spodobachu; duž wudžěła wón swojim towařšam přeńjotne serbske bjesadne spěwy kaž n. př.: „Lubka lilija“ — „Rjana Lužica“ — „Štóha z tych Lipsčanskich murjow won dže?“ — „My w přećelnym towařstwje mamy“, kotrež buchu z wulkim zahorjenjom přijate a spěwane, z džěla po hłosach wot njeho sameho wumyslenych. Pěsnje, kotrež so towařšam zalubichu, zapisa Zejleř do rukopisnych „Serbskich Nowin“, a na to wašnje buchu wone nam zakhowane; čišćeć dał pak je wón hač do lěta 1840 nimo tych třoch horjeka mjenowanych pěsničkow jenož tři skladnostne spěwy, mjenujcy: přispěw sask. kralej Antonej z l. 1827, žalospěw zemr. towařšej Rachlowcej a přispěw něhdušim sobustawam, wobaj z l. 1828 (hl. zw. I, str. 29, 164 a 168).

Druha strona Zejlerjoweje džělawosće na polu serbskeho pismowstwa, wobstejaca we wědomostnym přepytowanju, zeznaću a zakhowanju serbskeje řeče, pokazowaše so tež hižo w Lipsku a bu wosebje spěchowana přez wobkhad z młodym čěskim wučencem drom. Fr. Palackim, pozdžišim

* Poslednišej na 4 stronach w 80 pod napisom „Dwje nowe serbske pěsničkow“ buštej 1829 čišćanej.

slawnym čěskim stawiznarjom, kiž jeho husćišo napominaše, zo by serbsku rěč tež wědomostnje wobdžělał; přetož wšitcy slavistoj začuwachu tehdy wulki njedostatk, zo nimo zestarjeneje małkeje Matthaeioweje rěčnicy (z l. 1721) serbska rěč ani grammatiscy ani leksikalnje wobdžělana njebě. Tehodla poča H. Zejler na serbskej rěčnicy a na serbskim słowniku pisać. Zo pak by wón to ćim skerje dokonjeć móhl, podpjeraše jeho Palacki ze wšelakimi čěskimi a pólskimi rěčniskimi knihami a dariwši jemu Šafarikowu němscy spisane „historiju słowjanskeje rěče a literatury“ wotewri jemu nic jenož puć do staršeho serbskeho pismowstwa, ale tež do literatury wšěch Słowjanow. Duž Zejler tež tu pilnje studowaše a džělaše, a plód tuteho jeho prócowanja běše serbska rěčnica, kotruž wón jako kandidata w němskej rěči pod napisom: *Kurzgefasste Grammatik der sorbenwendischen Sprache nach dem Budissiner Dialecte*. kónc l. 1830 w Budyšinje wuda, mjez tym zo jeho němsko-serbski a serbsko-němski słownik njedokónčeny w rukopisu zawosta.

Lipsk mjenujcy před jutrami 1829 na přeco wopušćiwši běše H. Zejler 20. meje samsneho lěta w Drježdžanach swoje zastojnske pruhowanje (pro reverendo ministerio) khwalobnje wobstał a bórzy na to we Wjelečinje z dobrym wuspěchom přeni króć serbski a němski přědował; dokelž pak tehdy runje žane ani pomocne duchowne město w Serbach wuprózdnjene njebě, dyrbyeše wón domach pola staršēju na zastojnistwo čakać a měješe duž dosć khwile za dopisanje a wudaće swojeje hižo w Lipsku započateje serbskeje rěčnicy. Hody 1830 pak bu wón skónčnje do Klukša wobstarnemu fararjej Jurijej Hennigej za pomocneho předarja powołany, hdžež wón pola wudowy dotalneho kapłana Jeremiasa, kiž bě runje kónc l. 1830 wumrjel, trochu wuzku hospodu namaka (hl. Łuž. 1890, str. 61), a jako bě so jeho přěćel Krygar, kiž w l. 1831 Klukšanske kapłanstwo zasztawaše, w l. 1832 za kapłana při Michałskej cyrkwi w Budyšinje postajil, stupi Zejler na jeho město a bu 13. njedželu po swj.

Trojicy (16. sept.) teho sameho lěta do swojeho noweho zastojnstwa swjatočnje zapokazany. W l. 1834 wumrě Klukšanski farar Hennig, a Zejler měješe nadžiju, zo so jemu fararstwo w Klukšu dostanje; tola kollator wjerch Reuss přepoda wuprózdnjene město Zejlerjowemu rowjenkej, Delnjowujezdžanskemu fararjej Konikej. Tuto njedžiwanje (hl. Luž. 1890, str. 62) pak bu za Zejlerja z přičinu, zo so wo druhe město staraše. A dokelž běchu w Sakskej na dalši čas wšě farske města wobsadžene, staji so wón konsistoriju šlezyskeje provincije k dispoziciji, sčini 20. sept. 1834 we Wrótslawju swój „colloquium“ a měješe wjesele, zo jeho bórzy na to za fararja do Łaza powołachu. Duž zložil Zejler Klukšanske kaplanstwo a bu 3. meje 1835 wot Wojerowskeho superintendenty Bola do swojeho Łazowskeho zastojnstwa zapokazany, w kotrymž je jako swěrný a woprawdžity pastyr dušow z najwjetšej swědomliwosću wysočesćowany hač do swojeje smjerće skutkował. Lěta 1829—1835 běchu najnelubozniši a najnjeplódniji čas w cyłym Zejlerjowym žiwjenju. Najprjedy měješe starosće wo duchowne zastojnstwo, kotrež tehdy w Serbach tak lohko dostać njebě kaž w našim času: wšě městna běchu wobsadžene a kandidatow bě dosć; potom jako běše skónčnje do Klukša za duchowneho přišoł, we wšelakim nastupanju to njenamaka, štož smědžeše wočakować. Duž zaprahny jeho basniske žórlo bóle a bóle; jenož hdys a hdys, hdyž so wón w swojej samotnosći na rjany studentiski čas dopomni, zeskhadza jemu poetiska myšlička, kotruž na papjeru čisnywši wón do Lipska lubym towaršam do jich „Serbskich Nowin“ pošla (hl. spěwy z l. 1829—30 we zw. I., str. 69—96). Haj w l. 1831—1835 njebu wot njebo snadź ani jedyn spěw zbasnjeny, z najmjeńša nam z teho časa žadyn zakhowany njeje. We Łazu Zejlerjej zaso spokojniše časy žiwjenja zaswitachu, a bórzy wocući we nim nowy nahon a nowa lubosć k spisowařskej džělawosći, wosebje hdyž młodeho horliweho a wutrajneho towarša po myslach a skutkach namaka w tehdyšim

studence J. E. Smolerju, synu Łazowskeho cyrkwinskeho wučerja a pozdžišim wodčerju serbskeho naroda, kiž tam stajnje na šuli pola staršeju swoje prózdniny wužiwajo sebi bórzy jeho přecelstwo doby; Zejler poča z nowa serbske pěsnje tworić, wupłody serbskeho ludoweho basnistwa a bajeřstwa hromadzić a swoje rukopisne, wosebje za přichodny dospołny serbsko-němski słownik wažne zběrki rjadować, přisporjeć a wudospołnjeć. Najwyšši skhodžeńk pak docpi jeho literarna dźělawasć w lětach '842—1851, po tym zo bě wón redaktorstwo „Tydžeńskeje Nowiny“ přijal a so z młodym serbskim komponistu K. A. Kocorom ze Zahorja zeznał. Hdyž bě mjenujcy dr. J. P. Jordanowa „Jutrnicka“, do kotrejež Zejler pod mjenom „Boršćan“ pilnje poetiske a prosaiske přinoški sćeše, po poľlětnym wukhadženju zašla, wza naš basnik na namołwjenje Smolerja, kiž bě tehodla z Wrótsławja runy puć do Łaza přišoł, dalše wudawanje Serbskich Nowin do rukow, zo njeby raz započata dobra wěc so přetorhnyła abo zaso z cyła spanyła, a wudawaše je pod nowym mjenom „Tydžeńska Nowina“ ze wšej prócu a z wulkej wustojnosću hač do swjatkow 1848, hdžež jich redakciju po zastupjenju swobodneho čišća Smolerjej přewostaji, kiž „Tydžeńsku Nowinu“ w l. 1854 do „Serbskich Nowin“ překřóci. Zo pak běše próca, kotruž sebi „Tydžeńska Nowina“ wot Zejlerja žadaše, woprawdže njewšědna, spóznajemy lohko, hdyž sebi pomyslimy, zo bě město jeje wukhadženja, Budyšin, 5 hodžin wot Łaza zdalene, zo bě póstki zwjazk mjez Łazom a Budyšinom přez Wojerecy, tehdy hišće dosć ředki a njewěsty a zo měješe redaktor mnohe jemu wot sobudželaćerjow připóslane wudžělki nic jenož přehladować, ale tež zwuporjedžeć. A k temu wšemu je hišće wjacy dyžli třecina wšěch prosaiskich nastawkow a wulka wjetšina wšěch pěsni z jeho samsneho pjera. Zejler wodžeše „Tydžeńsku Nowinu“ w dobrym wótčinskim duchu a prócowaše so swěru, Serbow za maćernu řeč a serbsku narodnosć zahorić a serbski lud

ná wyšši skhodženik zdželanosće pozběhnyć, štož bu powšitkownje tež wot Njeserbow připóznate (přir. n. př. Laus. Magazin 1842, str. 361 a Čas. Česk. Mus. 1845 zeš. 3). Duž nima jeho „Tydžeńska Nowina“ jenož džeńsku wažnotu kaž wjetši džěl nětčišich nowin a džennikow, ale wona je a wostanje drohi poklad našeho serbskeho pismowstwa. Pódlá založi Zejler w l. 1844 nowy cyrkwinski časopis a wudawaše jón hač do l. 1848 pod mjenom „Mission-ske powjesće“, kotrež mjez našim ewangelskim ludom wjele lubowarjow namakachu a hišće džensa jako „Missionski Posoł“ wobsteja.

Z K. A. Kocorom, kiž bě wot jutrow 1842 z wučerjom w Stróži p. Barta, zezna so H. Zejler w nazymje 1844 přez jeju přecela wučerja Bjara w Łupoj. Bjar běše Zejlerjej, kiž bě sam dobry znajeř a posudžeř hudźby, jenu wot Kocorowych najprěnišich kompozicijow, solowy hlós z přewodom piana k němskej pěśni „Der Trompeter an der Katzbach“ pokazal, kotraž so našemu basnikej tak zespodoba, zo wón dla teje składbny hnydom němsku pěseń do serbskeje „Trompejtar na krwawnišću pola Budyšina“ přebasni a młodeho hudźbnika k sebi do Łaza přeprosny. Jako bórzy na to Bjar jeju wopyt Zejlerjej připowjedzi, džěše jimaj wón na postajenym dnju wjesoly napřećiwo, a srjedz Złyčina a Łaza zetkaštaj a wohladaštaj so přeni króc naš serbski ludowy basnik a naš serbski narodny hudźbnik a zwjazaštaj hižo při swojim přenim zeznaću na hospodliwej Łazowskej farje mjez sobu twjerdy zwjazk swěrneho přecelstwa, kotrehož najkrasniši plód běchu serbske spěwanske swjedzenje: přez nje přendže najwěsćišo a najrućišo wulka ličba jeju po woprijeću a hlósu krasnych spěwow do serbskeho luda a sčini so k jeho narodnemu wobsedženstwu, přez nje wubudzi so naše spadowace Serbowstwo k nowemu, młódnemu žiwjenju, přez nje doby sebi serbska řeč a serbski lud wěstu nahladnosć tež pola Němcow, za kotrychž so Zejlerjowe teksty do němskeho přeložowachu. Hižo z tutymi spěwanskimi

swjedženjemi samymi, za kotrež Zejleř tež z wo přédka, hdžež bě trěbne, wšě pjenježne wopory zwólniwje na so bjerješe, staj sebi basnik a hudźbnik njesmjertne zaslužby wo swoju serbsku narodnosć zaslužiloj; wone su jeju najwulkotniši wótčinski skutk. Přeni tajki swjedžen připowjedźištaj wonaj při jutrownej skhadźowancy serbskich wótčincow na Budyšskej winicy 1845 pod zahorjenym přihłosowanjom wšitkich přítomnych a poskićištaj jón po přewinjenju wšelakich zadžěwkow hižo 16. oktobra teho sameho lěta w Budyšinje swojemu serbskemu ludej. Nětko scěhowaše bjez přetorhnjenja hač do lěta 1851* dolhi rjad džesać spěwanskich swjedženjow, kotrymž so w lětomaj 1860 a 1861 z nowa dwaj přizamknyštaj: wšitke staj Zejleř a Kocor hromadže wuradźowało, zarjadowało a do skutka stajiło. W Zejlerjowym žiwjenju je to čas najplódnijeje basniskeje džělawosće; we nim zbasni wón swoju najwjetšu lyrisku pěseń „Počasny“, kaž daloko je z cyła dodžěłana, we nim nasta „Serbski Kwas“, we nim „Wěnc hórskich spěwow“ a cyła syła jednotliwych wot Kocora komponowanych a po cyłych Serbach znatych krasnych spěwow. Zejleř pěsnješe pilnje a Kocor staješe pilnje do hudźby. Wjetše pěsnje tež hromadže na Łazowskej farje wuradźowaštaj a naćiskowaštaj, prjedy hač so basnik do džěła da; tak wuradźištaj sebi** n. př. podložk (t. j. metrum a kharakter) našeje krasneje narodneje polonezy „Serbska Meja“, z kotrejž so wobaj hnydom na přenim spěwanskim swjedženju 1845 jako wobdarjenaj a woprawdźitaj mištraj svojim Serbam předstajištaj; na to da so kóždy do džěła; tón króc pak běše Kocor prjedy

* Přetorhnjenje spěwanskich swjedženjow po l. 1851 ma swoju winu wosebje we tym, zo bu Kocor 1852 za cyrkwinskeho wučerja do Ketlic powołany a tak ze Zejlerjoweje blizkosće wotwjedženy, štož Zejleř sam we svojich listach na Kocora (hl. Luž. 1890, str. 59) hluboko wobžaruje.

** Po powěsći našeho hudźbneho mištra K. A. Kocora sameho mi listnje 21. sept. 1891 podatej.

hotowy hač Zejler,* duž je so w tutym padže basnik z džěla wot hudźbnika wodzić dał. Wosebje nadrobno rozpominaštaj a nastaještaj dispozicije za libretta k serbskim operettam resp. melodramam, kotrež chcyše Kocor rad komponować; su to „Jakub a Khata“, „Khatyržinka“, „Hanka“ a „Marja z Drěnowa“. Na naćisku „Hanki“ staj n. př. nimale cyły tydžeń hromadže wuradźowałoj a džělałoj. Nimo operetty „Jakuba a Khaty“, kotraž bu w Čas. M. S. 1870, str. 3 sl. wozjewjena a wot Kocora bórzy do hudźby zestajana, ale dla wšelakich zadžěwkow dotal hišće njeředstajena, wostachu pak wšitke w naćiskach.

Runje tak horliwje skutkowaše H. Zejler při založenju našeje „Maćicy Serbskeje“ w lětomaj 1846 a 1847 w jeje přiřadowacym wubjerku, za kotrehož předsydu běchu sebi jeho wuzwolili, a po jeje dozaloženju w l. 1847 staraše so wón hač do swojeje smjerće jako jeje stajny wubjerkownik mócnje a swěrnje za nju ze słowom, pjerom a mnohim pjenježnym darom. Do Maćičneho wědomostneho časopisa podawaše swoje pěsnjeerske wupłody a džělaše pilnje sobu na wulkim Pfulowym serbskim słowniku, kiž z nakładom Maćicy Serbskeje w l. 1866 wuńdže. Ale tež na wšitkich druhich serbskich časopisach a nowinach wobdžěli so wón z mnohimi basniskimi a druhdy tež druhimi přinoškami.

* Bě runje kaž husto wjesoła bjesada na farje. Jako běše Kocor ze składowanjom hotowy, sydže so za dótkadło (klavier) a Zejler pódla njeho ze swojej flejtu; Kocor přednošeše, Zejler kedźbliwje posłuchaše; hdyž bě Kocor dohrał, zawoła Zejler zahorjeny: „Kocorko, klimpaj, klimpaj hišće raz!“ nastaji swoju flejtu a piskaše sobu. To so něšto króć wospjetowaše, potom stany Zejler cyle hnuty a praji: „Hólcy, nětko dźiće na hodžinku do korčmy a wostajće mje sameho!“ Hdyž so woni po hodžincy zaso wróćichu, běše tež Zejler tekst dowuprasnył a „Serbska Meja“ bě hotowa, kajkuž ju hišće džensa ze zahorjenjom rejujemy a spěwamy. — Tak po powěsći K. A. Fiedlerja wot jeneho tehdy přítomneho Zejlerjoweho bjesadnika (wuč. Kochty) jemu zdžělenej. Duž měješe so z nastaćom „Serbskeje Meje“ tola trochu hinak, hač so dotal (hl. Luž. 1872 a Pjěch hist. slow. lit. II, 2) přeco powjedaše.

W lěće 1857 swjećeše Zejler džen 16. septembra swój 25lětny zastojnski jubilej a bu na tutym dnju ze wšěch stron wysocy počesćowany. Zo bychu jemu na swjatočne wašnje zbože přeli, zhromadźichu so na Łazowskej šuli deputacija serbskeho duchownstwa, wobstejaca ze 7 pruskich a 1 sakskeho duchowneho, deputacija wučerstwa Wojerowskeho wokrjesa a deputacija Maćicy Serbskeje, wobstejaca z kk. předsydy řečnika Rychtarja, kan. kap. Buka a redakt. Smolerja z Budyšina, kotrymž so knjeni kollatorka baronka z Löbensteina nad Łazom ze swojej swójbu přizamkny, a podachu so we swjedžeńskim čahu na faru. Tam přejachu přepodawajo česćace dary a khwalace přispěwy k. jubilaraj po rjadu zbože: knjeni kollatorka, superintendent Kubica z Wojerec a farař Khrěn z Delnjeho Wujezda w mjenje zastojnskich bratrow, řečnik Rychtar w mjenje Maćicy Serbskeje, farař Imiš w swojim a dr. Pfulowym mjenje a skónčnje wučer Kulman z D. Wujezda. Při tym přepoda Khrěn laćanski, Rychtar a Imiš pak serbskaj přispěwaj a Kulman rukopis knižki „Bonifacius“ wot sebje sameho spisaneje a Zejleraj poswjećeneje; nimo toho bě so jubilaraj serbski přispěw wot wučerja Wj elebze Židowa a zbožopřejacy list wot němskeho duchownstwa Wojerowskeho wokrjesa posłał. Maćičny přispěw, kiž bě ze zlotymi pismikami čišćany a rjenje do čerwjěneho somota zwjazany, wukhwaluje zdobnje Zejlerjowu ostajnu džělawosć maza Serbowstwo a serbski lud, kotraž je so wopokazowala w spisanjach serbskeje řečnicy, we lwudawanju „Tydžeńskeje Nowiny“ a „Missionskich Powěsćow“, w spěšnjenju wjelé krasnych spěwow a bajkow a w sobudžělaćerstwje na wulkim serbskim słowniku (přir. Serb. Now. 1857, str. 300 sl.).

A Woženil je so Zejler hakle w pozdnišich lětach swojeho žiwjenja 21. novembra 1853 z Hanu Kra w cec. ze Židziňohó, wobsedźerku žiwnosće w Radscy, kotraž jemu dvě dźowcy Magdalenu Hilžbjetu (Leńku) a Marju Olgu (Mařku) darila po 13lětnym zbožownym mandželstwje w l. 1866 wumrě.

H. Zejler běše w młodych lětach stajnje kruty a strowy a hač runjež w srjedź 1860tych lět hdys a hdys trochu khorowaćeše, tak zo někotre razy w strowjacej serbskej kupjeli Marijnej Studni pola Smječekec poby, móžeše so wón runje w poslednich lětach po zdaću dospołnje strowosće a čerstwosće wjeselić. Duž běše to přezrudna jeho mnohich přecelow a cyły serbski lud překhwataca powěsć, kiž so 16. oktobra 1872 po Serbach roznošeše, zo je H. Zejler wumrjel. Pjatk 11. oktobra w nocy bě jeho Boža ručka zajala sčiniwši jemu prawy bok prosty a njemócnny a jazyk sobu tak sylnje dótknywši, zo wón wjacy řečeć njemóžeše. Widženje a slyšenje běštej hač do kónca — wón wumrě wutoru 15. oktobra wječor w 8 hodźinach — dobrej wostałoj, ale řeč so jemu wjacy njewróci. Jeho čělo bu 18. oktobra na jara česćowne wašnje na Łazowske pohrjebnišćo khowane. Na khowanje bě wulka syła přewodžeri kaž z Łazowskeje wosady tak z bližšich a dalšich stron serbskeho kraja přišla, a běše mjez nimi nimo wubjerka Maćicy Serbskeje 10 ewangelskich duchownych, jedyn katholski farař a 16 wučerjow.

Poslednje ložo wótčınca, wot cyłego serbskeho naroda nanajwyšše lubowaneho, bě z palmowymi hałozami, z wěncami a kwětkami krasnje wudebjene. Wón tam na nim ležeše, kaž by spał; přetož jeho wobličo bě so mało přeměniło. Mjez palmowymi hałozami wuznamjenještej so wosebje ta wot serbskeho towarstwa na Budyškim gymnasiu a ta wot Maćicy Serbskeje; přenja měješe laćanske napismo: *Piis Manibus excellentissimi Sorabiæ nostræ poëtæ atque paterni amici nostri Andreae Zejleri societas slavica Budisina*, a druha nimo zwučeneho česćaceho napisma rjany žarowacy spěw z pjera wyššeho seminarskeho wučerja K. A. Fiedlerja (hl. Łužičan 1872, str. 186).

Jako běše čělo wot wosadnych rychtarjow do cyrkwy donjesene, měještaj tam farař Ryćeř z D. Wujezda serbsku a superintendent Karas z Wojerec němsku čělnu řeč, na čož

so z ćěłom na pohrjebnišćo podachu, hdžež bu Zejler blisko swojeje mandželskeje pokhowany; při rowje rěčeše hišće archidiakon Khrěn z Wojerec. Nimo pohrjebnych kěrlušow buštej wot wučerjow w cyrkwi a na pohrjebnišću dwě moteće spěwanej.

Kak wulcy lubowany a widženy naš H. Zejler po Serbach běše, spóznowamy tež z toho, zo so w Serbskich Nowinach*, lětniku 1872 wšelake česćace wopomnjenja a želace přispěwy wozjewjachu, mjenujcy wot redaktora J. E. Smolerja želne wozjewjenje na str. 340, wot serbskeho spěwanskeho towařstwa „Jednoty“ w Khrósćicach spěw na str. 354, wot ludoweho basnika a Zejlerjoweho stareho přecěla Pětra Mlónka spěw na str. 356, wot wučerja H. Jordana w Popjoch spěw na str. 358, wot Łužiskeho předařskeho towařstwa w Lipsku česćowace poslednje „Božemje“ na str. 362 a wot fararja Wjelana Slepjanskeho želny sonet na str. 378.

Z połnym prawom praji Michał Hórnik w Časopisu M. S. 1874, str. 63 wo H. Zejlerju: „W njeboćičkim zhubichmy jeneho najzaslužbnišich Serbow, sobuzaložerja a wožiwjerja noweho Serbowstwa, sławneho pēsnerja a pilneho spisowarja, kotrehož mjeno budže so w stawiznach serbskeje rěče a literatury wěčnje blyšćić.“ Woprawdže, Zejler běše w kóždym nastupanju přiřadny, wubjorny ćłowjek. Njeličomnje wjele je wón za naše Serbowstwo skutkował kaž z pismom tak ze słowom a z přiřadom. Jeho powaha běše wjesoła a spokojna, miła a ponižna, přecelna a lubosćiwa. Duž bě wón wšudže rad widžany a njeměješe přećiwnikow ani mjez Němcami. Wón njeje ženje ani jako mlódzenc ani jako muž za zwonkownej česću a swětnej khwalbu honił, ale bě do społnje spokojeny, hdyž smědžeše z měrom a njemoleny wot

* Serbske towařstwo „Lubin“ w Budyšinje běše k česći njeboh H. Zejlerja jako swojeho wótcowskeho radžerja laćansku odu do němškich „Bautzener Nachrichten“ stajić dało.

swětneho hołka za dobru a sprawnu wěc dźělać, wón so nihdže do přédka njetłóčeše a tola skutkowaše při wšěch wjetšich a mjenšich wótčinskich naležnosćach mócnje sobu ze słowom a skutkom. Dołhi čas bywaše wón, runjež husto njespóznaty a njewidžany, „factor movens“ při wšitkich serbskich hibanjach a prócowanjach. Jeho najwjetša radosć běše, hdyž so wěc wot njeho započata abo podpjerana radži, runjež druzy česé a džak za njeho žnjeli. W Lipsku n. př. bě wón duchowny wodźer „Sorabije“ a tola wostaji rad zwonkowne wjednistwo swojemu přećelej Krygarjej, po dołho-lětnym njesprócniwym zběranju běše wón wobšěrne připrawy k wudaću serbskeho słownika sčinił a tola wjeseleše so, jako dr. Kř. Pful z myslu wustupi, zo chce serbski słownik spisać a wudać, poskići jemu wšě swoje zběrki k wužiću a podpjeraše jeho wšomóžnje. Jeho Łazowska fara njesłušeše do lěpšich w Serbach, a tola njeje so wón ženje wo žane druge město zamołwjał, ale je spokojneje wutroby swoju jemu wot Boha připokazanu wosadu z najwjetšej swěru a lubosću wučil a wodził. To pak tež jeho wosada wědžeše a připóznaše: wón běše wot wšitkich svojich wosadnych, wulkich kaž małych, bohatych kaž khudych, Němcow kaž Serbow, jako jich duchowny wótc a radzićer wulcyšnje lubowany a česćeny; a wón wědžeše, runjež svojich Serbow pře wšo lubowaše, mjez woběmaj jemu připorúčej narodnosćomaj stajnje puć pokojnja a zjednanja derje namakać, hdyž běše druhdy tež mjez nimaj někajka překora nastala. Wosebje přiwisowachu jemu khudzi wosadnicy dla jeho dobroćiwosće a darniwosće; wšudže, hdžež bě nuza, wón z wotewrjenej ruku hnydom a w dosahacej měrje podpjerujo pomhaše.

Tutu stajnu hotowosć k pomhanju pokazowaše Zejler we wšěch wobstejnosćach, kaž tu přećiwo svojim wosadnym tak přećiwo svojim mnohim bližšim a dalšim přećelam, kaž w cyrkwinskih tak w narodnostnych serbskich naležnosćach. Wšě pohiby serbskeho ducha, wšitke serbske wu-

stawy a towařstwa, wosebje tež našu jemu k wutrobje přirosćenu „Maćicu Serbsku“ wón rad a husto z nahladnymi darami podpjerowaše.

Wšitke wjesołe a zrudne, česćace a wuznamjenjace podawki w žiwjenju serbskich wótcincow a svojich přećelow přewodžeše Zejler z wutrobnym, njesebitnym džělbraćom a radowaše so, hdyž móžeše je z cunimi a khwalobnymi přispěwami poswjećić a překrasnić. Kaž je z Jenčoweho přehlada w Časopisu M. S. 1874, str. 59 sl. widžeć, je wón na 30 tajkich składnostnych spěwow, mjez nimi tež tři němske, z wjetša w pyšnym wuhotowanju ćišćeć dał a mnohe druhe podawaše wón pisane abo wozjewješe wón w „Tydžeńskich a Serbskich Nowinach“ (př. zw. IV., str. 265—312, hdžež su wšě hromadze woćišćane).

Khudži serbscy studenci a wučerjo namakachu a znajachu we Zejlerju wótcowskeho, skutowneho přećela; wón njeje ženje žaneho próstwu wotpokazał. Jeho lubozneje přećelnosće a zahorjaceje serbskosće dla pućowachu kóžde prózdniny mnozy serbscy studowacy młodžency a wučerjo na Łazowsku hospodliwu faru, na kotrejž so druhy woprawdže ze studentami, wučerjemi, gymnasiastami a seminaristami mjerwješe. Zrudny ze zrudnymi a wjesoły z wjesołymi wědžeše wón sebi přez swoju wutrobnu radosćiwosć bórzy přikhilnosć wšěch tych młodych wutrowow dobyć a wšěch mócnje za serbsku řeč a narodnosć, za serbske wašnje a žiwjenje zahorić. W přnim lětdžesatku jeho přebywanja we Łazu mějachu jeho nježenjeni rojenkojo a młódši serbscy přećeljo stajnu hospodu na jeho farje, w kajkimžkuli času a na kažkuli dolhi čas přińdžechu. Wobkhadźowachu pola njeho tehdy wosebje wot studentow resp. kandidatow Pjeńčk, Domaška, Cyž, Ernst Smoleř, Haas, Krušwica, Wařko a wot wučerjow Kocor, Kulman, Wjela, Bjar, Korla Smoleř, Hicka, Bórš, Libš. Bě to krasne žiwjenje, hdyž běchy wjacori wot nich wokoło Zejlerja k wjesołej, duchapołnej bjesadze zhromadźeni. Tehdy we nich płomjo

wótčinskeje lubosće wysoko a horco sapaše. Zejleř pak běše slónco, kiž jich wšitkich wutroby wohrjewaše, zahorješe, wokřewješe. Někotři, kaž kandidat Pjeńčk, kiž běše dlějši čas bjez zastojnistwa, wužiwachu měsacy dołho jeho hospodliwosć. Žaneho wot nich wón we nuzy njewopušći, samo hdyž druhdy jedyn abo druhi kaž n. př. Bjar jeho pjenježne mocy přez měru napinachu. Jako běše Bjar — khětro lohki ptačk — swoje wučerške město we Łupoj zložiwši přeč do Krakowa začahnył, zapłaći Zejleř wšitke wot njeho napraskane a jemu zawostajene dolhi. A zo by to zmóžnił, dowjeze raz cyły wulki powóz žita do Wojerec na wiki. Ale tež na swoje stare lěta widžeše wón přerady towarstwo młodych zahoritych Serbow wokoło sebje, a wosebje wokoło l. 1870 wopytowachu jeho husto Budyšscy serbscy gymnasiasći a seminarisći, wosebje Holan, Čoch, Hanowski, J. Kral, J. B. Šolta (†), E. Keřk (†), Měrko Smoleř (†) a moja maličkosć. Zejleř zradowaše so na jich młodej a młóduj lubosći k serbskemu narodej a na jich prócowanjach we jich zhromadnym towarstwje „Lubinje“, kotremuž samo jedyn přispěw (hl. zw. I, str. 243) poswjeći. Ja dopominam so hišće džensa z wutrobnej radosću krasnych hodžinkow na Łazowskej hospodliwej farje, hdžež ja druhdy z nim — zdaleny wot wjesoleje zabawy svojich towařow a Zejlerjec Leńki a Mařki a jeju towařskow — w jeho studowanskej jstwičcy sedžo na jeho wótčinske słowa nutrnje posłuchach, hdžež mje wón trubku — swoju swěrnú lubku — kurić wučeše, ale — bjez wuspěcha k swojemu wulkemu wobžarowanju, hdžež wón moje přenje wjetše serbske džěłko — wot mojich Lubinskich towařow za naše piwne zabawy požadany tak mjenowany „serbski komerčnik“, — w nastupanju serbskich techniskich wurazow wustojnje ze mnu wuradžowaše, hdžež mi wón hłubje hač mojim towařam do swojeje hłubokeje, za wšo dobre a Serbowstwu spomožne z młódzenskim płomjenjom so horjaceje wutroby pohladać da, hdžež mje wón napominaše, zo bych so ze swojimi towařemi kruće za to

starať, zo njeby po jeho smjerći Serbstwo spadnyło a serbske pšnistwo sprostło a zo by so wosebje tež serbske dramatiske basnistwo wuwilo a serbske dźiwadło do skutka stajiło, zo by naša Maćica Serbska nowy serbskeho naroda hódny dom dostała To su a wostanu mi swjate njezapomnite hodźinki a stajnje ponučace wotkazanja!

Nic mjenje přiwisowachu Zejlerjej serbscy wučerjo z nje-khablacej lubosću a to předewšěm tehodla, dokelž so jim wón přeco jako jich serbski towarš a přećel, ženje pak jako jich dohladowař a předstejićeř wopokazowaše. Mužnje staraše so wón po móžnosći za pozběhnjenje jich stawa, žadaše pak tež wot nich kruće, zo bychu jako serbscy wučerjo w serbskich šulach w dosahacej měrje serbscy wučili. Za tuto žadanje wustupowaše wón při kóždejškuli při hódnej składnosći, kaž n. př. na jenej wučerškej konferency wokoło l. 1850 wuprajejo při posudženju přednoška wuč. Kulmana Delnjowujezdźanskeho (hl. Łuž. 1890, str. 72) wo němskej wučbje w serbskich šulach mjez druhim tele přeswědčenja: Naša dobra narodna powaha a naše dobre narodne wašnja pohubjeńšeju so w tej měrje, hač so zněmčamy Serbskemu luděj njeje přez němčinu a němcowanje k wyššej zdźělanosći a počestnosći dopomhać, ale jenož přez čišu skutkownosć jeho wučerjow, kiž wukhadza ze serbskeho ducha a ze serbskeje řeče Hdyž pak su Němcy na swoju narodnosć atd. hordzi, što by móhl nam to za zło měć, hdyž bychmy so my w samsnej měrje za lepšich měli hač wšě druge nas wobdawace ludy? Dobře prawo wobstaća našeje narodnosće njemóže a njebudže nam z najmjeńša žana pruska wyšnosć přec a drěc, najmjenje nas wo njo so prosyć dać. — O kajka to sylna dowěra!

Jakož běše Zejler rozsudžity, njebojazny Serb w myslach a skutkach, tak bě wón tež swěrný a lojalny poddan swětneho knježerstwa, wo čimž nimo mnohich jeho jednotliwych pšni wosebje cyklus jeho swjedžeńskich spěwow „So zwoni měř“ (hl. zw. II, str. 281 sl.) zjawnje swědči, a tutu nje-

khabłacu swěru ke kralej a wótcnemu krajej wón tež wot wšitkich svojich Serbow žadaše po znatej Knjezowej při-
kazni we swjatym pismje, kotruž wón sam tak kruće wob-
kedźbowaše, zo n. př., kaž z jeho zawostajenych zapiskow
spóznawamy, wyšše krajne dawki dawaše, hač to po wunoš-
kach svojich dokhodow trjebaše (hl. Łuž. 1891 str. 84).

Zejlerjowa literarna džěławosć njewobmjezowaše
so jenož na pěsnjerstwo: wón běše pódla pěsnjerja, jako kotryž
sebi přenje město w nowonastawacym serbskim pismowstwje
doby, plódnny nowinař a spisowař, znamjenity hudźdař
a hudźbnik, wustojny rěčnicar a rěčespytnik a pilny
zběraćel wupłodow ludoweho basnistwa a bajstwa, z cyla
jedyn z najhorliwišich a najpilnišich džělačerjow při serbskim
nowonarodženju. Wo jeho nowinařskej džěławosći smy hižo
pojedenali. Spisał a wudał je wón nimo „Tydžeńskeje
Nowiny“ a „Missionskich Powěsćow“ w pěšej rěči
a w starym prawopisu za naš lud hišće tele powučace resp.
składnostne spisy, kotrež z dohom wo jeho duchownskej
a politiskej džěławosći swědča:

1. Prědowanje na přnim missionskim swjedženju 24.
jutrown. 1842 we Wojerecach dźeržane. We Wojerecach
1842.

2. Zakońske wustawki za missionske pomocne zjedno-
ćenstwo we Wojerowskej krajomnosći a napominanje na
Serbow, so na missionstwje wobdžělic. 1843.

3. Krótka powěsć wo Bethaniji we Wrótsławju, hdžež
khoru přez smilne knježny wothladanje namakaju. We
Wojerecach 1858.

4. Na serbskich wuzwolerjow k němskemu parlamentej.
Dwě powołani z l. 1867.

5. Tři nowe porjedžene wudawki far. Hānichoweje na-
božneje knižki: Při wužiwanju Božeho wotkazanja k lazo-
wanju. 1843. 1846. 1862.

Tež njesmě so zapomnić, zo je kaž nětko Hórnik a
Imiš tak prjedy Zejler wšelakim serbskim spisowaćelam,

wosebje tež wuč. Kulmanej we Delnim Wujezdze, při spisaniu, porjedžowanju a wudaću serbskich knihow wšomóžnje k pomocy był.

Překhadžejo k Zejlerjowej wustojnosći w hudźbje mamy spomnić, zo wón wubjernje na flejće piskaše a zo hódnosć hudźbných wutworow derje posudžeć wědzeše, tak zo sebi sam Kocor jeho rozsud wažeše. Za swoje młode lěta, jako hišće žaneho komponistu svojich spěwow namakał njebě, wón tež husćišo sam hłosy k svojim pěsnjam wumyslowaše a składowaše, wot kotrychž su někotre kaž „Lubka lilija“ — „Kurić trubku tobaka“ — „Sto lět kaž mi džens je“ — „Ja sym tawzynt dušny khadla“ — „My sydamy so k blidu“ tak spodobne a wabjace, zo je my hišće džensa ze zahorjenjom na našich bjesadach a skhadžowankach spěwamy.* Jeho krasne spěwy pak bórzy druhich mjenje a bóle hudźby wustojnych, kaž Hatasa, Frencela a wosebje Łazowskeho wučerja Korlu Smolerja, k składowanju powabjowachu, doniž so Zejler z Kocorom njezezna a na čas žiwjenja njestowaři wobhladujo jeho za sebi wot Boha póslaneho tołmačerja svojich pěsni a basni. — Zejlerjowa rěčnicarska a rěčespytna džělawosć pokhadža z časa, jako hišće na Budyškim gymnasiu přebywaše, a saha hač do najpozdzišich lět; přetož runjež wón po wudaću swojeje hišće džensa we wšelakim nastupanju njezestarjeneje a wužitneje rěčnicy w l. 1830 sam ničo wjacy w ćišću njewozjewi, so wón tola w rěčespytnym wotrjedze Maćicy Serbskeje stajnje z wulkej wěcywustojnosću a wobhonosću wuhotowany na wšěch rěčespytnych wuradžowanjach, přepytowanjach a postajenjach žiwje wobdželeše, a často so jeho rozsud k płaćiwosći pozběhny. Z wotewrjenym wokom wón wšě porjedženja našeje rěče a našeho prawopisa scěhowaše a je bjez přećiwjenja rad a wjesele přijimaše, štož ma

* Ja sym wšě tak daločo hač móžach je dostać w přistawkomaj k I. a III. zwjazkej sobu podať, jenož jedyn „Džen a próca nimo je“ (zw. III, str. 125) njejsym dotal nihdže wuslědźić a dostać móhl,

so jako wulka wosebitosć jeho zmyslenja zdobnje wuzběhnyć. Wulka bě n. př. jeho radosć, hdyž hnydom při založenju Maćicy Serbskeje w l. 1847—48 swoju mysl, kiž běše hižo jako student w Lipsku pytał do skutka stajeć a za kotruž běše pozdžišo tež dr. J. P. Jordan bjez wuspěcha wojował, skónčnje so předobycé widžeše, zo so naš nowy analogiski prawopis dowuradzi a powšitkownje z najmjeńša za prawopis „Časopisa Maćicy Serbskeje“ a wšeho wyššeho serbskeho pismowstwa přija.

Za „Serbski słownik“ zběraše Zejler z ludoweho erta a ze staršich serbskich spisow a ćišćow hižo wot studentiskich lět nimo dra. Pfula wěsće wot wšitkich Serbow najpilnišo wšěškuli słowa a wurazy a zapisowaše je swědomiće do swoich słowniskich zběrkow, wot kotrychž potom najwažniše drej. Pfuler přepoda k wužiću w jeho wulkim, 1866 dowudatym „Serbskim Słowniku“, na kotrymž wón z Mich. Hórnikom pilnje sobudžělaše. W studentiskich lětach běše sebi Zejler wotmyslił po wudaću rěčnicy tež dospołny serbsko-němski a němsko-serbski słownik wudać, tola wšelakich zadžěwkow dla wón tutón wotpohlad wuwjesć njemóžeše, a pozdžišo jón cyle spušći, jako zhoni, zo dr. Jordan a dr. Pfuler přihoty činitaj k wudaću serbskeho słownika. W knihowni Maćicy Serbskeje pak khowataj so dwaj rukopisnej foliantaj, wot jeho ruki pisanaj: 1. jedyn z l. 1827 z 378 stronami a z napisom wonkach na zwjazku Deutsch-Wendisches-Wörterbuch Tom I A—G a z nutřkach na titulnym łopjenje: Němsko-Serski Słownik wot Handrija Sejlerja 1827 — 2. druhi z l. 1830, Mać. knih. rukop. A 33 z napisom „Słowow zběrka“. Spodźiwne je, zo ani tón ani tamny wot dra. Pfula wučerpany njebu, tak zo so tam wšelake słowa namakaju, kotrež w Pfulowym słowniku njesteja.

Zejlerjowa folkloristiska džělawosć, kotraž ma na jenej stronje za jeho samsne pěsnjejske zdžělanje a na druhej za zdžerženje a hłubše zeznawanje našich rjanych ludowych

pěsni a přisłowow wulku wažnosć, wupřescěraše so na wšitke rjane wupłody serbskeho ludoweho basnistwa: wón zběraše narodne pěsnje, hrónčka, přisłowa, prajima, hudančka, wćipy, bajki a powěsće, rostlinske a zwěrjace, wjesne a ležomnostne mjena a zapisowaše swoje najprěniše zběrki do rukopisnych „Serbskich Nowin“ Lipsčanskeje „Sorabije“, wot pozdžišich pak poskići hromadku ludowych pěsničkow a přisłowow J. E. Smolerjej za jeho wulki wudawk „serbskich ludowych pěsničkow“ (Grimma 1841) a wulku ličbu narodnych přisłowow, prajimow atd. poda redaktorej J. Bukej k wozjewjenju w „Časopisu Maćicy Serbskeje“ (hl. lětn. 1854—62); nimo teho běše wón sam hižo w l. 1839 zběrku wot 50 serbskich přisłowow z němskim přeložkom wozjewił w „Lausitzer Magazin“ (str. 352—358), časopisu „Towařstwa wědomosćow“ w Zhorjelcu, kotrehož sobustaw wón bě. Tež přidawaše wón přihódne přisłowa jako wučbne hrónčka svojim krasnym bajkam (hl. zw. IV, str. 1 sl.). Te pěsnički, bajki a přisłowa pak, kotrež běchu w jeho rukopisnych zapiskach zawostałe, buchu přeze mnje woćišćane w „Časopisu M. S.“ 1876, str. 99 a 1888, str. 19 sl. a we Łužicy lětn. 1889—91.

Skónčnje mam hišće wo Zejlerjowym pěsnjerstwje jednać. Zejlerjowe pěsnje, basnje a bajki běchu dotal pak we wšelakich časopisach, knihach a spěwnych zběrkach rozpróšene pak z cyła hišće njewozjewjene. Najwjacy namaka so jich woćišćanych w lětnikach „Časopisa Maćicy Serbskeje“, w „Tydžeńskich a Serbskich Nowinach“, we „Łužičanu a Łužicy“, w P. Jordanowej a Kućankowej „Jutrničcy“, w „Missionskich Powěsćach a Missionskim Póсле“, w Imišowej „Zerničcy“ a Domaškowych „Zionskich Hłosach“, w Wolfowych „Spěwach za pěkne džěći“ a Pjekarjowych „spěwach za serbske šule“ (z wjetša přeložki z němskeho), w Kulmanowych „Zahrodkach kwětkejtych“, „Čmjelach, wosach a šeršenjach“ a w jeho „Čornym kosu a dróznje“, w M. Smolerjowych třoch „Wěncach

spěwow za serbsku młodosc“, w Hórnikowej „Čitancy z pismowstwa hornjołužiskich Serbow“ a w H. Jordanowej „Čitancy za serbske šule“, a tež do Hórnikoweje „Serbskeje čitanki za katholske wučernje“ a do wudawka „Serbskich spēwow za serbskokatholske šule“ su wšelake přijate. Mnohe buchu husćišo wočišćane, předewšëm wot wubjerkow za serbske spēwanske swjedženje a wot předsydstwow serbskich towarstwow, kaž Luměra a Bjesady jako blidowe spēwy abo za druge jich potrjeby.

Wosebje pak je naš basnik tele zběrki wudał:

1. 1842: Krótke kěrlušy a spēwańčka za serbske šule. W Budyšinje. Ze samsnym nakładom.

2. 1845—49: Pječ „Wěncow serbskich spēwow“ jako tekstowe knižki (z němskim metriskim přełožkom) za serbske spēwanske swjedženje. W Budyšinje.

3. 1855 zběrku bajkow: Serbske basnje (t. j. bajki), swojemu wulcy lubemu ludej podate k wužitkej a k zabawjenju. W Budyšinje. Z nakładom Maćicy Serbskeje.

4. 1860 a 61: Žně a Nalěćo (z Počasow) jako tekstowej knižcy za spēwanskej swjedženjej tehdyšeju lětow.* W Budyšinje.

5. 1871 zběrku swjedžeńskich spēwow: So zwoni měr! K swjećinam měra pěsnił H. Z. W Budyšinje. Z nakładom Maćicy Serbskeje.

Přełožowane buchu mnohe Zejlerjowe pěsnje a basnje do němskeje a do wšelakich słowjanskich rěčow. Němske přełožki nastachu z potřebnosće tekstowych knižkow za němskich připosłucharjow při serbskich spēwanskich swjedženjach a su pak lěpše pak slabše, za tym hač što přełožowaše. Přełožki do słowjanskich rěčow su z wjetša lěpše, dokelž so jenož wustojni ludžo z nimi zaběrachu. Do čěskeho přełožowachu před druhimi P. Franc Doucha,

* Teksty swjateho pisma jako podložk k duchownemu oratorijej: „Israela trošt a zrudoba“ njejsu wot Zejlerja, kaž Jenč (Čas. M. S. 1874, str. 59) wudawa, ale wot Kocora sameho zestajane.

Vymazal, („Slovanská poezije“, Brno 1874) a Adolf Černý (w „Slovanským Sborníku“ a druhich českich časopisach wot l. 1885), do pólskeho Melanija Parczewska a Karol Sękowski (n. př. w „Wjázanka prac literackich“ Warszawa 1884) a do ruskeho Mikławš Vas. Gerbel („Poezija Slavjan“ Pětrohród 1873). Do bratrowskeje delnjoserbskeje narěče je w nowišim času wosebje kantor H. Jordan Popojski wjele jeho spěwow přestajał a Delnim Łužičanam w „Bramborskim Casniku“ a w spěwnych zběrkach a w pratyjach wot delnjoserbskeho wotrjada Maćicy Serbskeje wudatych poskičil. Tola tež hižo před tym buchu w „Bramb. Casniku“ hdys a hdys přeložki Zejlerjowych pěsni wozjewjane, jako n. př. w lětn. 1851 na str. 41, 44 a 101.

Ze swojimi pěsnjemi je H. Zejler, kaž J. E. Smoleř (Łuž. 1872, str. 183) z połnym prawom sudži, serbske šule, skhadźowanki serbskeje mladosće, serbske swójbne a zjawne hudźbne žiwjenje wožiwił, tak zo smě so bjez přećiwjenja prajić, zo je wón k temu dopomhał, hdyž so w šulach, mjez mlodym ludom, w serbskim domje a w zjawnych koncertach serbski spěwa.

Zejler je do cyła lyriski basnik; jeho dramatiske pospyty su slabše, štož wón sam derje wědźicy bjez tajenja přiznawaše. Po swojim samsnym wuprajenju njeměješe wón „žaneho praweho zrozymjenja za dramatiske činki“ a duž tež n. př. žaneho praweho pohona k pěsnjenju operetkow, wot kotrychž je jeničcy „Jakuba a Khatu“ po wjacykrotnym předžělanju dohotowił. Na polu lyriki pak je wón njedosehnjeny mišter. Z jeho bohaće wobdarjeneho ducha čěčachu wjesole a zrudne, žortniwe a cunjočujne pěsnje a basnje, wótčinske a wojeřske, lubosćinske a studentske, duchowne a swětne spěwy, a jeho bajki we wjazanej a nejwjazanej řeči runaju so po swojej jednorosći w twórbje a řeči a po swojej přenjatnosći w myslach a wćipach najlepšim bajkam wšěch ludow. Jeho „Hórske spěwy“ maju powahu odow abo hymnow. W cyklu „Hans Wučba“,

w opereće „Jakub a Khata“ a w zběrcy „Čmjeły a wosy“ wustupuje najsylnišo jeho pokhilenje k žortowanju a k powučacemu wusměšowanju* (satirje). Mnohe druhe pěsnje su pak přezcylnje pak z džěla didaktiske a tehodla mjenje znošne. Jeho njemnohe ballady a romancy maju wjele bóle lyriski hač episki charakter a su z wjetša „Powěsće ze serbskeho kraja a luda“, kaž je basnik sam mjenuje (hl. zw. I, str. 171 sll.). W poslednich lětach swojeho žiwjenja mysleše wón na powjetšenje zběrki tutych „powěsći“ a chceše z balladami našeje minylosće něšto „wosebiće serbske“ podać, štož by tež před druhimi ludami stajnu plaćiwosć měło.

Zejlerjowa řeč je jednora a jasna, wobrazna a žiwa, myslam a začućam přiměrjena, ženje subjektivnje barbjena a dosć husto řeči našich narodnych pěsni podobna. Z jich pokładneho žórła čěra wón nimo znajomosće ludoweho ducha njezaprahnite mocy za swoje pěsnje a basnje a zložuje so z wosebitym wumjełstwom po jich podložkowych přikładach žadajo swojemu serbskemu ludej něšto poskićić, štož by tón cyle a po wšěm za swoje připóznał a sebi bjeze wšeje ćeže hnydom a do cyła priswojił. Runje z tu-teho wotpohladanja pak wukhadža na druhej stronje mjenje a wjetša słabosć někotrych jeho pěsni tež z časa jeho najwyššeje pěsnjejskeje twórnosće, a njedospołnosć wšelakich jeho rymow, runjež wón hewak jara lohko, prawidłownje a wumjełscy derje rymować rozymješe, wo čimž mnohe jeho pěsnje swědča. A z teje sameje přičiny tež so njestrachowaše hdys a hdys při składnosći abo k položenju rymowanja dialektiske, wosebje holanske twórby a słowa přijimować, štož smědžeše sebi hižo tehodla čím skerje dowolić, dokelž za čas jeho najplódnijeje basniskeje džělawosće naša pisomna řeč hišće tak kruće postajena, wobmjezowana a wudokonjana njebě

* W scěhujcym posudženju zložuju so ja z džěla po wusudkach J. Libša, wuprajonych w „Almanachu serb. stud. mlod.“ 1884, str. 20 sl. a w připisu mi wot njeho připóslanym.

kaž džensa. Hewak běše Zejler kruty sudnik wupłodow
swojeho ducha a porjedžeše na wšelakich pěsnjach mnoho
a husto, štož je z jeho zawostatych rukopisow a zakhowa-
nych listow na Kocora a Smolerja (hl. Luž. 1890) jasnje
widjeć. Tež mamy (z najmjeńša wot l. 1860) wěstu měru,
kak wysoko wón sam tu abo wonu pěseń a baseń wažeše,
we tym, hdže ju wón wozjewić da. Najwudokonjeniše mje-
nucy podawaše wón do „Časopisa Maćicy Serbskeje“,
mjenje dokonjane do „Lužičana“ a wšědniše do „Serbskich
Nowin“; pěsnje, kiž pak z cyła jeho spodobanje njenama-
kach, šlapi wón do rukopisneho resp. papjerneho kućika
we swojej studowarňi, hdžež zakryte a zabyte wostachu,
doniž je my tam njewučezechmy.*

Masota (móc) a wažnota Zejlerjoweho basnistwa wot-
počuje bjez dwěla we tym, zo wón maćiznu k svojim
pěsnjam z přirody a ze serbskeho wjesneho žiwjenja bjerje
a zo ju wón we wótčinskim, čistoserbskim a pobožnym
křesćijanskim duchu zapřimuje a wobdžěluje. Ze svojim
wótrym, wotewrjenym wokom widžeše wón, kak hłuboko je
našemu ludej swjata lubosć k Bohu a něžna, přelubozna
lubosć k Božej stwórbje do wutroby zašćěpjena, a wón jako
prawy syn serbskeho naroda wobsedžeše tute jeho samow-
nosće sam w najwyššej měrje: wón wobkedźbowaše žiwjenje
stwórbje jara domyslne a dowćipnje a rozymješe jo nam
basniscy w najrjeńšej podobje předstajeć. Wo tym swědča
nimo mnohich jednotliwych pěsni wosebje jeho „Počasy“,
kotrež su najlěpši dopokaz jeho hłubokeho zapřijeća Božeje
stwórbje a jeho basniscy tworjaceje mocy. Serbske domjace

* My smy tež tute wot basnika njewozjewjene pěsnje do našeho
wudawka přijeli, dokelž mamy za swoju přislušnosć zhromadzić a za-
khować wšě jeho basniske wutwory bjez „subjektivneho“ posudženja,
što je Zejlerja hódne a što nic. Zhromadny wudawk dyrbi za našim
zdaćom po móžnosći dospołny być, a nimo teho maju tež wšelake nje-
dokonjane pěsnje swoju wažnosć za dospołne spóznaće powahi a zmyslenja
našeho basnjerja.

a ratařske žiwjenje z narodnymi wašnjemi a swjedženjemi našeho luda matej za podložk wosebje „Serbski Kwas“ a „Serbska Meja“: tu kaž druhdže Zejler měrnje a wěrnje* bjez wšěch wotpohladow date serbske wobstejnosće wopisuje a w plastiskich, tež jednoremu čitarjej zrozymliwych wobrazach tak žiwje a zajimawje nam před woči staja, zo so nam zda, jako bychu so předmjety a podawki wot njeho wobspěwane před nami wupřescěrale a stawałe a jako bychu jeho serbske wosoby žiwe před nami khodźile a skutkowałe; Zejler je swój serbski lud nanajlěpje znał a z najhorcyšej, čistej lubosću swojeje něžneje, nadobneje wutroby wo nim a za njón basnił; jeho pěsnje dawaju nam woprawdžity wobraz serbskeho luda sameho, kajkiž wón je ze swojej sprawnej, pobožnej, ale nic pobožnostkoweje myslu a ze swojej swěru přećiwo wyšnosći, „pruskej a sakskej“. Duž, štóž chce serbski lud nic jeno w jeho zwonkownym, ale tež w jeho znutřkowym žiwjenju spóznać, tón namaka k temu najkrótši, najnjemylniši a najlubozniši puć w Zejlerjowych pěsnjach a basnjach. — A ze swojej swěrnej lubosću k serbskej zemi zašćěpjuje Zejler serbskemu ludej samemu lubosć k domowinje a k maćernej řeči, kotruž wón znaješe a wumjełscy nałożować wědzeše w přenjetnej cyłosći a cunjosći kaž žadyn jeho rowjeńkow. To připóznawaju tež wulcy wukrajny kriticy, kaž n. př. pólski spisaćel hrabja Stanisław Mieroszowski, kiž mi wo Zejlerjowym pěsnistwje takle pisaše: Ja čitam tute wabjawe idylle z cyle wosebitej radosću — lubozne su wone kaž nalětnje kropački, mejske zwónčki, njezapomnički, fijałki, nalički a druhe małke, něžne pólné kwětki, kotrež nas ze swojej graciju, něžnotu a ponižnej elegancu zwjeseluja. Wulka wustojnosć k temu słuša, něšto woprawdžerjane a nadobne po wašnju ludowych pěsni tak zbasnić, zo pola luda tež spodobanje a lubosć namaka — a Zejler je, myslu, tutu wustojnosć w najwyššej měrje wob-

* Přir. Pjech hist. słow. lit. II, 2 str. 395.

sedzał Haj, tutón posudnik ma cyle prawje: naš Zejleř je ludowy basnik w najlěpšim a najwyššim zmysłu słowa; čistoludowy a dospołnje serbski charakter jeho pěsni je jim puć do srjedze našeho luda přihotował a Zejlerja kóždy serbskej wutrobje tak lubeho a sympathiskeho sčinił kaž dotal žaneho drugeho serbskeho basnika.

Štož pak hakle, kaž Jurij Libš jara rjenje w „studentiskim almanachu“ rozprawja, wšěm Zejlerjowym džělam prawu a kóždeho wótčınca wokřewjacu pychu dodawa, to je jeho njewuhasnita lubosć k našemu serbskemu narodej, kotraž žanych zadžěwkow njeznaješe, hdžežkuli měješe so za Serbowstwo što spomožne stać, kiž so ženje z ničim wotrašić njeda, za tón lubowany lud so starać a prócować, z kotrehož bě wušoł, z kotrymž bě žiwy w dobrych a zrudnych dnjach, za kotryž a wo kotrymž je spěwał hač do poslednjeho zdychnjeńčka. Tehodla pak je tež jeho mjeno ze złotymi pismikami do stawiznow serbskeho naroda a jeho pismowstwa zapisane a jeho wopomnjeće budže wšěm wěrnym wótčincam a džakownym synam našeho luda hač do najpozdzišich časow česćowne, swjate — a hdžežkuli budže wo Serbach a jich najwjětšich a najnadobnišich mužach řeč, tam budže tež z džakownej lubosću so wopominać a mjenować njesmjertne mjeno: Handrij Zejleř.

Rozprawa

wo wudaću

Handrija Zejlerja zhromadženych spisow.

Štyrnaće lět je so minyło, zo přenja nalětnja skhadžowanka serbskeje studowaceje młodosće, kotraž so jutry 1877 w Kulowje wotměwaše, na namjet hłowneho staršeho stud. phil. Ernsta Muki wobzamkny, wšě basniske wutwory našeho njezapomniteho serbskeho basnika Handrija Zejlerja zezběrać a zhromadnje wudać a jemu tak wěčny pomnik postajić. Wobzamknjene drje bě to lohko, ale wuwjedženju stajachu so mnohe a wulke zadžěwki napřećiwo. Tola runje we tym je naša studowaca młodosć sebi najwjetšeje česće dobyła, zo so njezahori jenož nakhwilnje, ale zo trajnje za swój sebi postajeny nadawk skutkowaše. Wopak mějachu wěšćerjo, zo wuwjedženje krasneje myslički wjaznje, a zo tamna horstka młodych, njenazhonitych studentow — běše jich na spomnjenej skhadžowancy jenož 12 — njewě, što by činiła. Ale tuta horstka wědzeše derje, što chce, a bě sebi derje wědoma wšěch čezow a zadžěwkw, kotrež dyrbjachu so přewinyć. Wo tym swědča scěhowace słowa protokola Kulowskeje nalětnjeje skhadžowanki: „Potom přeńdžechmy na namjet wo čišćenju H. Zejlerjowych pěsni. Rěčeše so wo přewulkich čezach tuteho namjeta. Wuprajachu pak so wšitcy, zo maju so najprjedy pjenjezy na to hromadzić. . . . Slubichmy sebi, zo chcemy wšitcy pilnje pjenjezy zběrać. Tute pjenjezy maju so potom na Budyšsku nalutowaŕnju dawać, zo bychu so tak khowale a daniłe“ Kaž je potom dale z wozjewjenja a powołanja tehdyšeho hłowneho staršeho E. Muki w junijskim čisle wot njeho wudawaneje „Lipy Serbskeje“ widžeć,

je bórzy na to khowanje nalutowaŕniskich knižkow, kotrež dostachu napismo „Fonds za wudaće Handrija Zejlerjowych spisow“, k. faraŕ Michał Hórnik w Budyšinje na próstwu serbskeho studentstwa dobroćiwje přijal.

Ze zběranjom pjenjez so hnydom na Kulowskej skhadźowancy započa: nahromadži so 12 hriwnow. Knjez faraŕ Imiš w Hodźiju wo tym zhoniwši, připožiči 6 hr., kand. duch. Běrnik 3 hr., a na zhromadźiznje Maćicy Serbskeje zezběra hłowny starši 34 hr. Duž móžachu so hižo 29. meje 1877, jako běše k. faraŕ Hórnik hriwnu přidał, 56 hriwnow na nalutowaŕnju wotedać.

Zo by so zapoloženy dar čím spěšnišo rozmnožil, dyrbyeše studentstwo nimo zběrkow na skhadźowankach a mjez přećelmi hišće za druhimi srědkami hladać. Jako tajke wunošne a plódné žórła wopokazachu so dźiwadla a koncerty, wot studentow zarjadowane. Hnydom přeni popyt, dźiwadlo w Lejnje, 2. sept. 1877, wot hl. staršeho po přewinjenju wjele wobćežnosćow do skutka stajene, měješe čisteho wunoška 80 hr., a přeni koncert serbskich seminaristow* a studentow na hodownych prózdninach 1877 w Bukecach přispori zběrku wo 71 hr. Přiličo hišće wunošk składowanja na hłownej skhadźowancy tuteho lěta, kotryž 25 hr. 10 np. wučini, a dary někotrych spěchowarjow dobreje myslički, widźimy, zo bě so w přenim lěće nahromadziło 341 hr. 3 np.

W tutych kolijach snowaše so nětko wěc dale, a počali hdy zahorjenosć so zhubjować — kóžda skhadźowanka ju z nowa zaso zbudži a rozplómjeni. Njeje skhadźowanki wot 1877, kotraž wo Zejlerju jednała njeby, a zawěsće bjez skhadźowankow njebychu H. Zejlerjowe basnje w tak rjanym wudawku naše pismowstwo wobohaćile.

* Wosebje khwalobnje skutkowaše tu a při přichodnych koncertach spěwanske zjednoćenje serbskich wučomcow krajnostawskeho wučerskeho seminara w Budyšinje z mjenom „Swoboda“, kotrež z cyła 6 tajkich koncertow wuwjedze.

Přisp. redakt.

Hač do pjateje hłowneje skhadźowanki w Njeswačidle (9. aug. 1879) bě so na 600 hr. nahromadźilo. Duž wuzwoli tuta skhadźowanka wubjerk, kotryž měješe so wot nětka wo wudaće Zejlerjowych spisow starać. Za předsydu bu wuzwoleny k. far. M. Hórnik, za redaktora k. kand. phil. E. Muka a za přisydnikow studentaj J. Bart a Jan Kral. Tola tutón wubjerk jako tajki wjele skutkował njeje, jenož redaktor je njekhablajo na swoim měsće stał a wobhladniwje wo wuwjedženje swojeho krasneho nadawka so prócował.

Hdyž běše zběrka hač do 3. hapryla 1883 na 1289 hr. 35 np. narostła, wuńdže skónčnje nazymu samsneho lěta druhi a bórzy po nim přeni zwjazk basni H. Zejlerja, radostnje witanej wot wšitkich česćowarjow basnika a ludoweho pěsnjerstwa.

Dokelž běchu při čišću 2. zwjazka pjenjezy z nalutowańskich knižkow nimale dowotebrane, dari w lěće 1883 na próstwu hłowneho staršeho J. Wałtarja něhduši hłowny starši k. kapłan Jan Křižan w Hodźiju 100 hr. na wjazanje tuteho zwjazka. Wo wjazanje samo staraše so hižo tehdy, kaž tež pozdžišo woporniwe k. far. M. Hórnik, kotryž wjacy króc ze swojeje móšnje doda, štož k zaplaćenju po-brachowaše, wosebje jónu 40 hr., a jónu 30 hr., a kotryž je tež mnoho pódlanskich wudawkow wulkomyslnje sam zarunał.

Hdyž běše so z předawanjom wudateju přenjeju zwjazkow a z dalšim hromadženjom z nowa přez 1000 hr. nazběrało, postaji nalětnja skhadźowanka lěta 1886, zo ma so třeći zwjazk wudać, ale jenož kaž z posledy wudaty přeni zwjazk w tysac exemplarach, a zo ma so ze štwórtym zwjazkom džělo skónčić. Ale pjenjezy so pomałku přisporjachu. Duž wotpósła třinata hłowna skhadźowanka, 1887 w Budystecach wotměta, hłowneho staršeho J. Nowaka a podstaršeho M. Handrika k serbskemu maece-natej k. řečnikej ryčerjej Mósakěj Kłosopólskemu

do Lubija, zo byštaj jeho wo podpěru poprosyłoj. Tutón naš nadobny wótčinc dari na čišć III. zwjazka wulkomyslnje 500 hr., za čož jemu studowaca młodosc stajnje džakowna wostanje. Duž móžeše so na 14. hl. skhadźowancy we Hornim Wujezdze 1888 wozjewić, zo je III. zwjazk do-čišćany.

K jutram 1889 měješe tež štwórty zwjazk hotowy być, tola wšelakich zadžěwkow dla so to njesta. Přinoški dzeń a bóle zrědnychu, hdyž běše M. Handrik swojeho spomožneho skutkowanja so wzdał. Wot lěta 1885 běše mjenujcy knjez Handrik žiwje za naš nadawk skutkował, na 300 zwjazkow Zejlerjowych basni rozesłał a nimo teho 358 hr. ze zběrkami nahromadził, tak zo je so wjacy wo wudaće H. Zejlerjowych zhromadženych spisow starał, hač žadyn druhi student.

Zo pak by wěc tola zaso postupowała, poprosy studentstwo přez hłowneho staršeho P. Mrózaka sławneho wótčince k. fararja Wjelana w Slepom wo požčeńku; tutón woporniwy knjez pak lubosćiwje 100 hr. na kupjenje papjery dari. Ale papjera bě bórzy wutřebana a skónc lěta 1890 čišć z nowa wjazny. Nastajnje wot hłowneho staršeho prošeny a přesćěhany kupi čišćeř k. M. Smoleř mjez tym sam papjeru a dočišća hač do Michała 1891 wšitke basniske wupłody Zejlerjowe.

Tola spisanje a čišć Zejlerjoweho žiwjenjopisa a tuteje rozprawy, k štwórtemu zwjazkej přidateju, wšelakich přičinow dla dokončenje cyłego džěła wo poł lěta wotstorči.

Hłowna skhadźowanka w Pančicach 1891, kotraž přez 130 hr. — potajkim wo mnoho wjacy, hač žana z předkha-
džacych — za Zejlerjowe spisy nawda, postaji deputaciju, kiž ma po dokončanju 4. zwjazka wšě naležnosće, wudawk H. Zejlerjowych spisow nastupace, přewzać a z teho po času serbskemu studentstwu přibywace zamoženje zarjadować. Do tuteje deputacije wuzwolichu so: k. can. schol. Michał

Hórnik, k. dr. Ernst Muka, k. far. Jakub Skala, k. kapł. Jan Křižan a kóždolětny hlowny starši serbskeje studowaceje młodosće.

Nakład H. Zejlerjowych spisow je lěta dolho dobroćiwej khował k. farań M. Hórnik, woporniwy a wobstajny spěchowar tež tuteje wótcínskeje myslički. Nětko ma skład Zejlerjowych spisow k. farań Skala w Budyšinje, kotryž je teho runja mnoho prócy a časa studentskemu nadawkej woprował, wosebje tež hač do džensnišeho dnja pokładnicu a nalutowańniske knižki khował.

Do tuteje rozprawy słuša wězo tež dospołny přehlad wšěch dokhodow a wudawkow. Wučerpawši a přehladawši akty wšěch skhadžowankow a wšitke serbske časopisy poslednich pjatnaće lět a ertnje a listnje na to a wono so doprašawši podawam jón tu tak dospołny a přewidny, hač běše mi móžno jón zestajeć.

Dokhody.

a) Zběrki a dary.

A. I. Na studentskich skhadžowankach je so nahromadžiło:

a) z dźiwadłami (7 króć)	459,71 hr.
b) z koncertami (9 króć)	611,10 „
c) ze zběrkami (6 króć)	124,38 „
	<hr/>
	1195,19 hr.

II. Serbske studentske towařstwa nawdachu:

a) Serbowka	84,58 hr.
b) Hodźijski seminar	60,— „
c) Sorabicum	50,50 „
d) Societas slav. Budissinensis	20,— „
	<hr/>
	215,08 hr.

III. Jednotliwi serbscy studenća 34,80 „

Serbska studowaca młodosć hromadže: 1445,07 hr.

B. I. Maćica Serbska	158,— hr.
II. Knjezajfarań Wjelana kaplan Křižan	200,— "
III. Druzy serbsey duchowni	257,— "
IV. Kn. řečnik ryć. Mósak-Kłosopólski	500,— "
V. Druzy zdžělani Serbja	51,87 "
VI. Naš serbski lud	54,55 "
VII. Budyšska Serbska Bjesada	12,65 "
VIII. Čisty wunošk spěw. swjedź. 1. okt. 1891	145,97 "
Druzy Serbja darichu: <u>1379,86 hr.</u>	
Serbja nawdachu z cyła: 2824,93 hr.	
C. Druzy Słowjenjo (Rusojo, Polacy, Češa)	
darichu:	800,30 hr.
D. Němcy darichu:	70,— "
<u>Wšo do hromady je so nazběrało: 3695,23 hr.</u>	

b) Rozpředate zwjazki.

Předało a zapłaćilo je so:

162 zwjazkow po 4 hr. =	648 hr.
244 " " 3 " =	732 "
45 " " 2 " =	90 "
15 " " 1 " =	15 "

466 zwjazkow za 1485 hr. 1485,— hr.

Nazběrało a nawdało bě so: 3695,23 "

Wšitke dokhody hač do 1. jan. 1892: 5180,23 hr.

Wudawki.

Předspomnjenja. Druhi zwjazk (najprjedy wudaty) je čišćany w 2000 exemplarach, zbytnje tři zwjazki po 1000 ex. Papjera plaćeše pola I. a II. zwjazka nowy ris (t. j. 1000 łopjenow) 20 hr. (z Budyšskeho papjernika), pola III. a IV. pak (něšto snadniša wot wonkach kupjena) nowy ris 10 hr. 51 p. Štož čišć nastupa, je so pola I.—III. zwjazka knihičišćerjej za listno čišća 29 hr. plaćilo. Pola IV. zwjazka dyrbyeše so, dokelž měješe so po wobzamknjenju hłowneje skhadžo-

wanki z nim cyły wudawk skónčić, dla wobšěrnej hišće njewočišćaneje maćizny wot 18. listna wšo w „petit-“ pismje stajec; za listno w „petit“ pak žadaše ćišćeř 40 hr. Na to wašnje wujasni so płacizna ćišća za IV. zwjazk (17×29 hr. a 14×40 hr. = 1053 hr.), kiž je nimale wo třecínu wjetši hač přenje tři zwjazki. Přeni zwjazk je wot druhého (dróžšeho) knihiwjazarja brošurowany a w Prazy wjazany, zbytnje tři zwjazki pak buchu w Lipsku wo wjele pyšnišo a přez to trochu dróžšo wjazane. Přenje tři zwjazki su dospołnje zapłaćene, šwórty pak ma so hišće dozapłaćić.

a) Přehlad.

Zwjazk	expl.	listn.	pap. płáci hr.	ćišć pł. hr.	broš.	płáci hr.	wjaz.	płáci hr.	hromadže hr.
I	1000	21	420	609	300	51	200	150	1230
II	2000	22	920	638	300	42	200	160	1760
III	1000	24	252,24	696	200	34	200	160	1142,24
IV	1000	31	325,81	1053	200	34	200	160	1572,81
	5000	98	1918,05	2996	1000	161	800	630	5705,05

b) Pódlanske wudawki.

Za H. Zejlerjowy wobraz I. zw. přidaty 104,02 hr.
 Wobćišćane wobwalki za II. zwjazk . 10,— „
 Porti pola k. M. Smolerja 37,50 „
 Za 500 wokolnikow 7,50 „
 Wudawki M. Handrika při rozpóslanju 118,39 „

277,41 hr.

Tu ma so tež zdobnje na to spomnić, zo je knihićišćeř k. Marko Smoleř wšě programy, spěwy, nawěstki atd., kotrež běchu při koncertach a dźiwadłowych předstajenjach trěbne, darmo ćišćał. Hdy budžechu so wone zapłaćić měle, by so za to něhdže 300 hriwnow wudać dyrbało.

c) Knjez Marko Smoleř je dostał:

Na papjeru IV. zwjazka	315,30 hr.
„ čišć IV. „	179,75 „ *
ma za čišć a papjeru potajkim hišće dostać	883,76 „
Brošurowanje a wjazanje 200 ex. IV. zw. budže plaćić	<u>194,— „</u>

Potajkim maju so wot wudawkow wotličić: 1077,76 hr.

d) Za papjeru, čišć, brošurowanje a wjazanje Zejlerja je so

dotal woprawdže wudało:	4627,29 hr.
K temu pódlanske wudawki	<u>277,41 „</u>

Wšo do hromady je so dotal wudało: 4904,70 hr.

Wšě dokhody: 5180,23 hr.

Wšě wudawki: 4904,70 „

W kasy: 275,53 hr.

Wonkach steji: 244,02 „

Tukhwilne zamoženje: 519,55 hr.

Duž ma so na dopłaćenje IV.

zw. hišće nazběrać 558,21 hr.

Z tuteho přehlada móže so mnoho wuknyć. Ličby rěča jasnje dosć. Serbske studentstwo smě spokojom na swój krasnje wuwjedzeny nadawk hladać. Z nim njeje jenož sławnemu H. Zejlerjej, ale tež sebi samemu njezahinity pomnik stajilo. Stojó pak nětko při dokonjanym přenim wjetšim narodnym skutku njemysli wono rucy do klina zložić, ale chce a budže z Božej pomocu dale džělać k spo- moženju swojeho lubowaneho naroda.

Kónčo swoju rozprawu wuprajam w mjenje serbskeho studentstwa wšěm, kotřiž su z kajkejžkuli podpjeru wudaće tuteho džěla spěchowali, na najwutrobniši džak. Předewšěm pak je sebi wosebitu džakownosć w poľnej měrje zaslužil lubušć serbskeho studentstwa k. dr. E. M u k a, kotryž je swoje dosć wobužne a njelohke městno jako redaktor

* To su z wjetša pjenjezy za wot njeho předate zwjazki I.—III.

H. Zejlerjowych zhromadženych spisow njesebičnje, wustojnje a z njewšědnej lubosću zastał. Nutrny džak serbskeho studentstwa je jemu na wšě časy zawěšćeny.

Tak přeodawa nětko serbska studowaca młodosć dowudate spisy Handrija Zejlerja zjawnosći z jeničkim přećom, zo by tak postajiła serbskemu narodnemu žiwjenju mócný, njekhablacy stołp.

Wšě naležnosće dokónčeny nadawk nastupace pak přeńdu z tym na deputaciju, kaž je ju sebi serbska studowaca młodosć na hłownej skhadźowancy w Pančicach wuzwolila.

W mjenje serbskeje studowaceje młodosće

Jakub Šewčik,

bywši hłowny starši.

P o k a z o w a í

jednotliwych basnjow štwórteho zwjazka.

	Strona
A, a, a, k nam zyma přikhadža	359
A był ja Marja Madlena	255
Ach Božo, wulki, trašny, mócný	228
Ach, zo by ty při nas wostał	332
„Aj wopomń“, rjekny hojo k nanej	99
Bě něhdy dołho mokrota	28
Bliže stupa mutny čas	345
Boha póznawać	166
Bohu budź džak	328
Bolosćow kónc woćichnjenje	206
Bože slónčko złote, rjane	158
Božo, daj, zo podarmo	165
Božo, přećelniwje	217
Bóh jako zemju stworił bě	20
Bóh postrow a žohnuj će	310
Bóh słyši, widzi wšo	170
Bóh wotpočink nam wobradzi	160
Brjuch hlódny wjelka ćerješe	32

Budź, Božo Wótče njebieski	161
Budź stare lěto božemje	225
Bur koło stare donjesł je	110
Bur w Kukecach něhdy je wotročka měł	315
Bur wora, symjo syje	329
By hižo nalěće tu było	287
Był ja kaž jandželki	171
Cyła wosada će wobžaruje	277
Česć Bohu Knjezej damy	215
Česć dajće duchej swjatemu	216
Česć, khwalba, džak! je naše zaspěwanje	231
Česć, khwalba Wótcej! džak za jeho lubosć	358
Čmjeła hlód bě žiwila	13
Čołm k brjohej pokiwajo steji tam	366
Čorne mroki narod serbski přikrywachu	296
Čekń, wjelko! poběž lećicy	149
Ćieha nóc, swjata nóc	323
Do črjódki wóstow na brjóžku	73
Do hnězda skradžu šeračkej	118
Dokelž jeno smy tu ducy	260
Doma, doma rjenje je	324
Dom so njesu z křižom swojim	259
Dopomnjenja nastupjenja	307
Do winicy swojej	232
Duž bož'mje, domo ćichowny	370
Dwaj w lěsu něhdy mjedwjedzaj	113
Dwě jehnjeći wjelk zežra něhdy	122
Džak a česć měj Bóh tón miły	219
Džak přinjesće	209
Džak tebi, Božo, zaspěwamy	192
Džak woprujemy z nowotka	183
Džeń twój narodny nam skhadža	203
Džens jasnosć nalětnja	362
Džens k twojom žłobej přistupju	200
Džens, wulki Božo khwaleny	256

Džens z horcej sylzu wusywamy	278
Haj, Bože słowo mócne je	321
Halleluja! tak zaspěwaju	190
Hanka ta serbska so lubješe mi	377
Hdyž hodžinka ta hórka bije	281
Hdyž nalěće přez hona dže	365
Hdyž něhdy mój dzeń posledni	167
Hdyž přez božu šćedriwosć	168
Hdže slónčko jasne, ach, hdže sy	29
Hdžež wěra je, tam	283
Hej! bratřa hólcy, juskajće	8
Hišće młodženc po starosći	355
Hlós hrima, howri po kraju	381
Hlajće, njebjo kak jasne	354
Hlej, młodosć je čas wusywa	162
Hoľb' leći ročku troštować	50
Hród w zastarsku tak wulki	374
Chceš, město ćesne, radosć	364
Chceš rjenje žiwjenje tu wužić	219
Ja dorych wulke pjenjezy	84
Ja drje sym štomik młody	158
Ja du přez zeleny, trawny lěs	363
Jako bubon mi w horach, po doli	382
Jako law kral nastupi	48
Jako zymske sněhi tachu	291
Ja pozběham tu woči	301
Ja wěm, zo Jezus žiwy je	327
Ja z Boha zaso witam zwjeseleny	155
Ja z wutrobu, z ruku	340
Ja žiwjenje sym dostał	155
Jazyk, wutroba ćesć Bohu dawaj	187
Je pobyl něchtó we cuzbi	356
Kačka bachta kačorej	27
Kak džělenje nas móhło stužić	292
Kak jasnje a krasnje so mandželstwo	243

Kak je twój dom tak lubozny	182
Kak krasny dzeń džens zaswita	306
Kak lubozne, žiwe to nalěčo je	325
Kak móhl ja tebje zabyć	377
Kak móhl ja z měrom drěmać	346
Kak rjenje so tu směje	333
Kak w ćichim měrje wšitcy	349
Kak wjeselo přez holu, kraj	350
Kak zahorjena wot lubosće	274
Kaž do wody so žołma podnuri	218
Kaž khěža žana jenička	172
Kaž rěka běžo pyta morjo	212
Kaž Salomo bě bohaty	87
Kij w rucy a wěnašk na kłobucy	367
Kiž ty w mojej młodosći	157
K lawej něhdy zwjeseleny	128
Knjez mjedwjedź něhdy wobzamkny	129
Knjez Nabob z měščanskeje hary	89
Knjez paw so w dworje hordžeše	39
Knjez toler džeše k šěsnakej	63
Knjez Wjesela ma hajnika	132
Knježe kralo, što ty prajiš	16
Kokoš khodžeše po hasy	15
Krasny dzeń je zaswitał	300
Krystal a dejmant točenaj	79
K sołobikej sroka pisana	11
K žłobej w duchu pokhwatajće	194
Khodžach z nalěćom po zemi	141
Khód lěta, o přeceljo, hlajće	348
Khwalene budź twoje mjeno	137
Lěs, polo wita z wjeselom	361
Liška knjeza slona wuhlada	111
Liška něhdy khora wali	58
Lubosć jasna naš Bóh je	361
Luby Bóh je z njebjes prajił	141

Luby Jezu, hnadu daj	211
Mać liška synka wjedžeše	117
Mały kralik něhdy swarješe	34
Micmica pola hawaka	54
Modlo khwalée lubosé Božu wulku	384
Mój abba, wótče njebieski	246
Mój zbóžnik tón je stanył	359
Mrowja wleče husańcu	147
Mróz přeni zemju přikrył je	81
Muž khudy khodži po lěsu	91
My so ći z wutrobu	164
My zaso kročel k wěčnosći	164
Myš pólna, Hapla Hrymzakowa	100
Myš pólna zmjerzła zmoknjena	7
Na drózy něhdy zetkało	51
Na dworje něhdy dźeržachu	33
Na džewjatnaće stotetkow	303
Na haćenja we susodstwi	46
Na horach wysokich	286
Na kajkich dźeržiš prawiznach	56
Na Khrysta k njeju stpiće	247
Na lawa něhdy na štomje	131
Na lisíčku w lohkim čolmje	52
Nam Bože pismo pokaže	269
Na placawu so sydže mucha wobžerna	5
Na puću něhdy z hole ćmowej	126
Na řecy muška zejhravje	3
Na rjanu mlódnju slowčinku	74
Na row, kiž nětk će kryje	280
Naš Pětyr njecha domach wostać	318
Naš Wótče, tebje khwalimy	220
Na štałt a wodžew njepyšny	114
Na tebje, Jezu, hlada	249
Na třěše wroble zhromadźene	53
Na ženťwu chcył je wosoł hić	151

Něhdy nócnik jeja-pijerski	105
Nětk nowe lěto witamy	230
Nětk šulu wobzamknjemy	163
Nětk w Božim mjenje chcemy	175
Nětk w Božim mjenje wustupju	235
Nětk wołtař Boži swjećił je	295
Nic złoto a nic slěboro	292
Njedzělu tu dżesatu	274
Njeh lubosć sylzu syje	344
Njeje zyma kruta mužica	341
Njesł štomik je žno młoduški	351
Nowe lěto nastupjene	209
Nowe wšo hiba so	372
O džak íi, miły Wótče, džak	202
O jědleńka, o jědleńka	370
O luby Jezu, ty sy měł	157
O mólčke stadło, njeboj so	322
O najswjećiša, o najzbóžniša jutrownička	173
O najswjećiši, o najzbóžniši swjatkow čas	174
O najswjećiši, o najzbóžniši Boži dnjo	175
O, naju w swěće runja njej'	42
O pójće sem, wěrjacy	229
O prócny bohačko, přemócnny	148
O rjana wěstosć njesmjertnosće	197
O swjaty Božo wšudžomny	164
O wěrnosće ty Ducho	234
O wječornička	226
O Wótče wjeršny na njebju	205
O wučerńja ty rjana	177
Paw bě so rjany wupyšał	135
Pčołam něhdy wušla běše	83
Pěši sym a dobry na nohi	367
Phi dubje, wulki stary bėsmanje	22
Po ćerpjenjach a wojowanju	288
Pod burskej rjadu prochnawej	151

Po drjewo z wóslom do lěsa	145
Po holi něhdy dróhař dže	104
Po swěće džěše Bože žohnowanje	97
Posłchaj, žona, sapyrliška	270
Pój, luba meja, džělać	371
Pój, swjaty Ducho, z njebiesow	216
Pój, wosada, pój nutř	221
Pój, žiw so wšak wot kwětkow tuka	66
Praj wšak, luba złota maćerka	14
Před bróznju něhdy wo klósku	78
Před strachom a njebožom	167
Přez knjeza Mlónka zajěło	272
Přez wšitke kraje číše	325
Při kurjencu psyk lišku zesłapa	150
Prijěl přez sakske pomjezy	298
Přindžeš k mojej holičcy	316
Přizwolće čahnyć mi	380
Psy něhdy z wulkej zrudoby	21
Psyk a kóčka něhdy džěštaj	127
Pujwuj, tón lěsař wulkotny	134
Pycha rjana, njewinnosć	214
Rad Boha khwal	347
Ročk stary džěše k mlódemu	144
Sej wjedro wěšćić dawaš	252
Sněhběla liba šćebotajo	86
Sněhběle mlode jehnjatko	103
So hórka dólčkej wusměwa	26
Sknadžej z hnězda něhdy džěćata	14
So lećo časy minu	354
So mjeřwi zemja wubudžena	180
So něhdy wonka w šulskej jstwi	119
So něhdy wosoł wuchaty	136
So pliška šěri na hnězdzi	107
So sowa zahe wusunje	31
So trawnik pyšny krasni	343

So wěncuj wjesela	301
So zyma k nam je dała	339
Spěwał w módrej wysokosći	6
Spi, złote džěčko, mój jandželk	317
Spokojnosć ja dycham	336
Stań ze spanja, moja duša	361
Stari, młodzi, pěkni być	337
Strowy rozym, čile stawy	161
Stup sem ke mni, bydli we mni	224
Stwina mucha naleći	12
Suchi pjeńk a šmutajca	43
Sultan, Neta, Filaks běchu	76
Swěrnju lubosć hač do rowa	344
Swět svojich ludźi wočehń sebi	311
Swjate hody, swjedzeń džěći	379
Swjaty spěwajće knjezej hlós	177
Swój dom a zachod slónco ma	181
Sy, slónčko kralo, słyšało	55
Sylzow sym dosć ronił, wjele so rudził	368
Što duja te trompety	372
Što džělaš a kak so čí dže	141
Što na horach Budyskich zelenych	284
Što Njeswačilske zwony zrudnje zwonja	305
Što swjatosć ma najwjetšu	348
Što swjedzeńscy sy džensa wuhot'wana	280
Što tamle w keřkach čerwi so	388
Što wjacy přinjese swět do přědka	148
Što w strachosćach dawa móc	352
Štož bože lube džěći su	166
Štož smy džensa wuknyli	163
Štož tu swět zbože mjenuje	236
Što, Božo, twoju krasnosć měri	179
Štož wusměša wšo hinaše	111
Šwjerč pólny něhdy wza sej khwile	72
Tam delkach pola młyna	348

Tam na zelenej holi	323
Tak je Bóh lubował hrěšnu	227
Torničaŕka barbješe	120
Tra ri ra! Hlaj lěčo	334
Tři sotry knježa po šěrokim swěći	198
Tři stworićelske mocy mjenuju	266
Tři žaby wocućichu k žiwjenju	23
Tu Bože domy starja	251
Tu čłowjek so njehordź	374
Tu spi, sprawna mandźelska	299
Tu zeńsku drastu sy ty wotpołožił	265
Twařmy, twařmy na Boha	188
Twojich džěći rańši wopor	169
Twój čestny swjedzeń witamy	294
Ty, Božo, džělaš sam	256
Ty, Božo, swět wšón wokřewiš	170
Ty džě, našich sylzow swědko	309
Ty, luby Jezu, znamjo sy	159
Ty sprawny swěrnny wotročko	338
Typy, tapy liška běžeše	9
Wam čas a skutk chcu wopisać	62
Wam wulki džiw chcu powjedać	4
W Božim mjenje wotsal čahnu	267
We Africy, hdžež lawy su	61
We Božim mjenje započńmy	196
We gala drasće tresatej	142
We Khrysta mjenje dokonjamy	167
We lěće něhdze połdra sta	45
We purpurje, na złotym trónje	124
We sonach slódkich na poli	64
We škleńčěrni so něhdy duchu	2
We zahrodže Knjez khodži	346
Wěrnosć něhdy khodžo po swěći	1
Wěš, kak wjele hwězdow steja	332
Widził hólčik róžičku	335

Wjelk hišće syty wot wčera	115
Wjelk něhdy winčaŕ w lěsu je	139
Wjelk stary krótko před smjerću	143
Wjelk w lěsu w jamje sedžeše	18
Wjelk wowcu něhdy z wowčerņje	67
Wjelk z lišku ćehnje po lěsu	109
W lěsu zeleneho dorna	136
W najrjeńšim kćewje, w młodych lětach	279
Woheń z wodu wojowaše	69
Won, sotry a bratřa, won na zahrody	335
Won trirara klinča	351
Wot hamtskich lět so džensa minyl	289
Wot srokopjela šeršeń honjeny	85
Wot stotkowych lět wotběžala	302
Wottrihņjenej, wotćisņjenej	77
Wot wowcow něhdy zebra so	75
Wól něhdy lišku nadeńdže	37
Wól přińdže k piću do hatka	68
Wóslica mać před poŕ lětom	138
Wótcny domo, žórŕo jasne	346
Wróna něhdy wćipna do swěta	25
Wšitko zańdže a so minje	272
Wukń, dzowćička, mój hnězduško	24
Wužiwaj radosć, tu radosć žiwjenja	330
W zŕotym bŕjšću rjane	334
Za myšinu jěž nuchota	71
Zbožowna duša, tak luba	282
Z duba žoŕdže wotnošować	95
Ze křidleškomaj machotajo	80
Zerja, wy swěćíce mi	340
Ze słódkich drěmkow stanu	250
Ze sylzu želnej poplakamy	275
Ze šipom a z prokom	337
Ze zŕotych wrotow stupaše	96
Z kokošu we khlamje runje	123

Zle, falšne psysko njezwjazane	102
Z njebjes daty Ducho swjaty	254
Z njebjes klinča hłosy krasne	208
Z rowa stanył — z rowa	358
Zrudne zynki zwony zwonja	275
Zyma adej! Woteńc	353
Zynčo, hrajo zlětowaše	41
Žno třiceći lět stary	323



Faint, illegible text, possibly bleed-through from the reverse side of the page. The text is arranged in several columns and is too light to transcribe accurately.

